

In bibliotheca Domus fl. caroli parisiensis

VIRI ILLVSTRIS

NICOLAI CLAVDII

FABRICII DE PEIRESC.

SENATORIS AQUISEXTIENSIS

VITA. *LD*

Per PETRVM GASSENDVM Præpositum
Ecclesiæ Dinienfis.



PARISIIS,

Sumptibus SEBASTIANI CRAMOISY,
Architypographi Regij, viâ Iacobæâ.

M. DC. XLI.

CVM PRIVILEGIO REGIS.

THE
NATIONAL ANTHROPOLOGICAL ARCHIVES

WASHINGTON, D. C.

1907-1908

RECEIVED

1907-1908

1907-1908

1907-1908

1907-1908

1907-1908

1907-1908



PRINCIPI MAGNO,
SAPIENTI, BONO,
LUDOVICO
VALESIO
ALENSI COMITI;
LEVIORIS EQVITATVS PER
Gallias Magistro, & Gallo-Pro-
uinciæ Proregi.

PETRVS GASSENDVS *lib. theol.*



AGNE PRINCEPS,

*Scribere aggredior quam abs me deposcis lau-
datissimi Peireskij vitam. Quippe non prius in
hanc Prouinciæm faustis auibz accessisti, quàm*

A ij

ingenuisti praeceptam tibi, magnâ fatorum inui-
 diâ, illius consuetudinem; ac me, quem nôras
 fuisse cum ipso familiarissimè versatum, perquàm
 studiosè de eius studiis, moribûsque es perconta-
 tus. Voluisti etiam habitum oris ex effigie co-
 gnoscere, & loca adire, in quibus superessent illius
 vestigia, lustrando ubi habitare, ubi sedere, ubi
 praestanteis quosque viros, quibusdam quasi Sire-
 nibus, detinere solitus fuisset. Denique in eam
 raptus es virtutum eius admirationem, ut con-
 scribende illius vitæ non postremus auctor mihi
 fueris, ac me idcirco non inuitus à te abesse permi-
 seris, ut in secessu hocce meo coronis citius impo-
 neretur. Et poteram quidem germanam excusa-
 tionem prætendere ex tenuitate virium: at cunctan-
 dum non censui, cum ad multiplex officium at-
 tendi. Nam primum quidem, quod ad Te spectat,
 morosus sum planè, nisi obsequar, qui nihil tale co-
 gitans, ac nihil tale meritus, sic fui euocatus ad
 te salutandum, ut ex eo usque tempore beneuolen-
 tia erga me tua esse non potuerit & liberior, &
 dulcior, & ad omnem comitatem, facilitatè que
 procliuior. Didici certè experiundo, quàm merito
 iure te suspiciat, amètque, & suas delicias tota du-
 cat prouincia; fœlix videlicet Prorege, in quo phi-
 losophia, & imperium aquis momentis temperen-
 tur. Quinetiam ita pacis studia cum artibus belli

componis, ita cum Marte Musas concilias, ut
 ambiguum fiat, generosiorne, an eruditior emi-
 neas; & cum immortale id decus sit tibi genti-
 litium, nemo tamen ex inclyta, Regiâque Valesio-
 rum stirpe occurrat tecum comparandus. Sed me-
 moranda hac aliàs: nunc commendari satis non
 potest, quòd fasceis ubique submittis virtuti, ne-
 que in solis Principibus regiarum laudum mate-
 riam queris. Nihil interesse existimas sub qua
 veste lateat heroïca mens; & modo pectus diui-
 num sit, propensum te ad cultum præstas. Exem-
 plo certè erit perpetuo, & magnorum Ducum, Im-
 peratorumque factis accensendo, quòd iam tua
 commendatione Senatorij ordinis virum ob exi-
 mias animi doteis, inter Principes euehis; & ne
 unquam illius fama intermoriatur, curam assis-
 mis. Oportet nempe in te possideas quas in illo
 amas laudatas virtutes; neque potest affectus
 tui non perennare memoria, cui virtus ipsa est
 elogium pronuntiatura sempiternum. Deinde
 quod spectat ad Virum, ingratus sim, nisi id præ-
 stem, quod singularis erga me amor, & munifica
 indoles erga omneis efflagitat. Nam me quidem
 quantum amârit, promptius est animo sentire,
 quàm verbis exprimere; satisque est dicere me fæ-
 licitati vertere magna, quòd me tam carum ha-
 buerit, quòd tam frequentem sibi adesse, consilio-

rumque animi omnium esse consciunt voluerit;
 quod in meum sinum ut cetera, sic, extrema ver-
 ba, animamque ipsam tandem exhalarit. Eam
 ob causam, cum nulli magis, quam mihi esse cordi
 debeat capitis tam cari memoria; currenti sanè
 adhibes calcar, cum tuo imperio id exigis, ad quod
 gratitudo, & ius amicitia me procliuem facit.
 Qui enim quoties quidpiam de illo cogito, loquor,
 audio, intima quadam suauissimamque animi lati-
 tia perfundor: quomodo possim non iucunde vita
 eiusdem seriem sic scribendo retexere, ut cum ple-
 risque comunicetur? An non videbor adhuc cum illo
 humanissimè conuersari, suaueisque horas consu-
 mere, ac tum mihi demum satisfacere, ubi per me
 non steterit, quin tanti amici gloria efflorescat?
 Quantum verò ad propensionem, qua animatus in
 omneis fuit, exstitisse nemo videtur, qui in com-
 mune bonum natus, id impensius curauerit, ut
 constantissimè prodesset uniuersitati generis hu-
 mani. Nam multis quidem cessasse potest, si fa-
 cultates spectaueris; nemini tamen, si virium mo-
 dum, voluntatemque benefaciendi. Dignus proin-
 de, qui regnaret in animis hominum, ac studioso-
 rum praesertim, quos excitare, fouereque eruditio-
 ne, consilio, auctoritate, gratia, opibus suis destitit
 nunquam. Testes sunt boni, doctique omnes, qui
 consensu unanimi fatentur nullum unquam fuis-

*se Meccenatem generosorem. Heinc tametsi fama illius non videatur posse exstingui, cuius illustri nomine litteratorum orbis completur, haud tamen committendum est, ut idem nobis exprobrari, quod Meccenatis saculo possit. Nam quod huius historiam nemo coatanens in posteros trans-
 miserit, effectum est, ut praefer nomen eruditis carissimum, vix quicquam de illo ad nos perman-
 rit; & cum idem Nostro timendum videatur, aequum profecto, ut qui illi familiariter conuixe-
 runt, id curent, ut quis fuerit, nepotibus etiam seris innotescat. Similis enim crepusculo vesper-
 tino est rerum fama, quae initio clarissima, ita paulatim euanescit, ut abeat tandem in tenebras;
 opusque adeo historia est, quae facilius instar illam producat. Agnosco porro neminem esse, cui, potius, quam mihi id munus incumbat; quando nemo est, cui propter diuturnum, familiarémque conuictum, ille potuerit esse perspectior. Accedit, quod licuit à morte ipsius ea interrogare, & cum ex variis epistolis, tum ex aliis monumentis in-
 telligere, quae non fuissent cuius perinde in prom-
 ptu. Factum certè est ob hanc causam, ut cum tot viri eximij huiusmodi Spartam ornare potuis-
 sent, nihilominus tecum conspirarint, meque solli-
 citauerint, ut illi admouerem manum. Postremo quod spectat ad Patriam, ad hanc aetatem, ad*

posteror, iniurius sim prorsus, si opus detrectem. Et patria quidem; nam species quadam impietatis videretur, si obduci paterer lumen, quo, ut hactenus coruscavit, sic merito in posterum gloriari mirifice potest; si negligi id ornamentum, quo pronunciare penè licet nullum unquam aut existisse, aut existitum magnificentiùs. Quippe non tota modò Europa, sed Asia quoque, & Africa, ac ipse etiam novus orbis conuersos eius occasione in hanc prouinciam oculos habuit; nemòque usquam fuit eruditus, bonarumve appetens rerum, qui non aut illum conuenire, aut cum eo certè agere per literas non affectàrit. Tum presenti quoque atati; siquidem eius interest, ut qui sequentur, intelligant non fuisse effatam in ipsa naturam; potuisseque eam virum magnum, insignemque producere, qui futuris post saculis proponi in exemplum posset. Magna certè eius laus est, quòd videatur in illo vno collegisse omneis omnium seculorum virtutes; possitque adeò sese efferre, quòd in ipso expresserit quicquid praeclarum de Pandora fabulosa atas confinxit. Denique ipsis posteris; quoniam incundissimum ducent virum illum cognoscere, cuius singulari affectui sese plurimum debere agnoscent; cuius fortassis imitatione sic tenebuntur aliqui, ut quasi Phœnices enasci ex illius cineribus non sine fructu aliquo generis humani

contendunt. Quod superest, vitam describam,
 qua narrationis simplicitate, non coloribus quasi-
 tis spectetur. Alij, si videbitur, comptiore cala-
 mo expolient, ac historia forma donabunt quos ipse
 commentarios, ceu rudera quadam, digessero so-
 lum, veluti annaleis, in temporum seriem. Siqui-
 dem mihi animus est agere Damidem duntaxat,
 & si qui fortè caussabuntur delectum mihi non ha-
 bitum, minima quaque obseruitanti; dicam quod il-
 le, etiam micæ, quæ ex mensis Deorum sunt, di-
 gnas videri, quæ colligantur. Fortè neque res iis
 erit ingrata, qui, similes tui, pernosse magnos viros
 student, non ob actiones solum illustreis, publicè quæ
 exhibitas; sed ob obscuras etiam, & quas euulgari
 ipsimet noluisent. Quippe quæ in oculis omnium,
 & cum claritate geruntur, nescio quid persona-
 tum habent; unde quidnam intus, & sub cute la-
 teat, internosse perarduum sit; quæ verò procùl ab
 arbitris, & sine fama captatione, atque idcirco si-
 ne fuco, ereptæque personæ fiunt, ea demùm homi-
 nem ostendunt; quod discernere est operæ pretium.
 Id scilicet animos addit ad imitandum præclare ge-
 sta, cum etiam in heroibus nonnulla deprehen-
 dimus infirmitatis nostræ indicia; neque perin-
 de desperamus eorum virtutes assequi, ac dum
 grandia quaque duntaxat narrantur. Sin verò
 nonnulli requirent illustriora quadam, & am-

pliora facta, quàm commemoraturi simus; nò-
 rint oportet non omneis posse Scipiones esse, aut
 Maximos, ut bella, triumphosque recordari va-
 leant. Abundè illi merentur laudem, quos cùm
 fortuna ad summam opes, atque dignitates non eue-
 xerit; maiores tamen animos gerunt, generosiore
 virtute sunt, ac molliuntur grandiora longè, quàm
 pro conditione sperare quis possit. Talis porro Pei-
 reskius fuit, quem exhibituri non sumus, nisi ut vi-
 rum, qui fuerit gradus, censùsque Senatorij; &
 qui se tamen ita gesserit, ut se fecerit quolibet en-
 comio, ac panegyri superiorem. Videlicet sumus
 duo quedam toto decursu prosequunturi, ob qua com-
 mendatus summopere est; alterū eruditio magna,
 ac omnigena, cum ardore sciendi inexplabili: alte-
 rum cura indefessa promouendi arteis ingenuas,
 cum regia planè erga omneis literatos munificen-
 tia. Ex hisce verò capitibus periculum sanè non
 subest, ne efferre quidpiam hyperbolicè videar; le-
 quar enim in ipso ore eruditorum virorum, apud
 quos ille inclaruit, quique tantum abest, ut me
 causentur fuisse nimium, quin vereor potius, ne par-
 cum nimis exstitisse sint conquesturi. Sed ne harere
 heic videar, patere, per optime Princeps, ut qua nos-
 se desideras, deinceps enarraturus, exordiar à ma-
 ioribus: ut vel ex eo capite constet, cur illum aucto-
 res constantissimè Nobilissimum vocitarint.



DE VITA
PEIRESKII
LIBER PRIMVS.

PRINCIPIO genus Peireskio fuit ex
perantiquo illo Fabriorum, seu Fabri-
ciorum stemmate, quod Pisis in Italia
oriundum, translatum est in hanc Pro-
uinciam, à tempore vsque Diui Ludo-
uici, ac partus salutiferi anno supra millesimum du-
centesimo quinquagesimo quarto. Memorant enim
Hugonem Fabrium inter Pisanos nobiles militiæ illi
sacræ adscriptos, fuisse à Sancto Principe in Prouin-
ciæ oras deductum, cum ex Oriente rediens appulit
Arcas, seu Hieras, Olbiam scilicet antiquorum. Il-
le cum morbo detentus fuisset, & à discedente Re-
ge cominendatus, ea fuit apud viros primores aucto-
ritate, & gratia, vt contententium de arcis, & ciui-
tatis dominio dissidia composuerit, ductaque deinceps
ex stirpe Sollerienti coniuge, fixam Areis statue-
rit sedē. Loco deinde cooptato in patrimonium Prin-
cipis, præfectus ipsi legitur anno sæculi illius septua-

DE VITA PEIRESKII

gesimo à Carolo primo Comite Prouinciæ, ac Rege Siciliæ, cui non minus fuit, quàm Ludouico germano carus. Cœpit subinde ciuitatem, castrumque variè communire; sed absoluit opus Aycardus eius filius, relicta ex nomine suo vni portarum nuncupatione, quæ etiam - num vocabulo corrupto dicitur Cafabria. Natus Hugoni præter Aycardum filius alius nomine Paulus, qui fuit à Carolo secundo maior Massiliæ Iudex creatus: itémque alius nomine Guillelmus, qui ex variis peregrinationibus redux, auctor fuit Xenodochij, in quo peregrini cuntes, redeuntésque ex Palæstina curarentur. Sed, vt compendium faciam, successit deinceps nobilis progenies, armis, literis, pietate conspicua; cum subiecto ipsi per propagines, ætatésque varias dominio Regij, Spinosæ, Gramusæ, San-Juliani, San-Ianeti, San-Laurentij, Lauernæ, Calasij, Petriscei, Valauesi, Riantij. Enimuerò taceri non debet abnepos Aycardi Antonius, ad quem, & ad Raymondum filium exstant, legunturque apud Nostradamum humanissimæ Renati Regis literæ, cum sese ante ducentos annos ad Neapolitanam expeditionem compararet. Fuerat Raymondus à puero vnà cum Renato in Ludouici secundi aula educatus; natusque est illi, præter Antonium, Amedeus, qui, quòd esset natu posterior, ideo familiæ insignibus, seu Leonis furui in scuto aureo lemniscum coccineum adiecit. Legitur is quoque Arearum præfectus, & Carolo tertio, cui Rex Franciæ breui successit, intimè notus. Ab hocce autem familia rursus in duos ramos diuisa est: siquidem ipsi fuere duo filij, alter Fulco, alter

Guillelmus; ambo & petitiâ armorum, & prudentiâ iuris instructi. Quippe, cùm primùm in expeditione Pedemontana militassent, sese ab ipso reditu excolendo iuri totos addixerunt. Nam Guillelmus quidem natu minor, à magno auunculo Elziario Portanerio Brinoniensi, viro literato adoptatus, concessit iuris discendi causâ Aureliam, & Auaricum; ductâque vxore Aruernate, in ea regione pedem fixit, & gratitudinis ergò insignia Portaneriæ domus assumpsit; in scuto nempe cæruleo fasciâque, & rosas argenteas. Reliquit porrò præter Hugonem iurisconsultum celebrem, filium alium nomine Ioannem, patrem Ioannis alterius, à quo procreatus Ioannes alius parens fuit Ioannis illius, qui iam Libellorum supplicum Magister, heroinas habet germanas, tum Magdalenam Petro Seguierio, per-illustri Franciæ Cancellario; tum Mariam, viro generoso Philiberto Pompadorio Lemouicum Proregi nuptam. At Fulco, ex quo supremus Senatus vnâ cum nascente superiore sæculo Aquis-Sextiis creatus fuit, maxima cum laude causas perorauit, factûsque sæpius Prouinciæ procuratoribus Assessor, destinatus non semel fuit ad Ludouicum duodecimum, itémque ad Franciscum primum. Is, Fulconis eruditione, & probitate perspecta, Senatorem esse mero nutu iussit, anno eiusdem sæculi supra trigésimum secundo; & cùm Carolus Imperator immineret Prouinciæ, Annæo Mon-morantio Regiæ militiæ Præfecto consiliarium dedit. Memorabile porrò est, fuisse eum auctorem salutaris consilij, quo Mon-morantius regium Archium in

Baulciensem transtulit arcem: sic enim pretiosa illa tabularia euasere id, quod fuit à Sabaudò deinceps A quenſi Palatio illatum incendium. Quin-etiam cùm non poſſet vrbs Imperatoris copiis obſtare, ſeceſſus auctòr ciuibz fuit, & ne quid ex ea ſubſidij reſiduum fieret hoſtibus, ita ad peſſundandum cibaria, cætera-que hortari cœpit, vt primus & horrea in puteum, & vaſa vinaria, ac olearia in angiportum effuderit. Fulcone defuncto, admiſſus eſt Nicolaus filius in dignitate Senatoriam anno ſæculi quadrageſimo quinto. Innotuit huius quoque virtus non modò Proregi Claudio Sabaudò Teudæ Comiti; ſed ipſi etiã Carolo IX. qui Senatu interdicto, miſſâque in locum illius ſummorum Iudicum decuriâ, conſcriptum decuriæ Nicolaum voluit, & Carolo ipſius fratri, poſtquàm per expeditionem Corſicanâ copias deduxit, ſeſeque ſtrenuiſſimè geſſit, conceſſit vltro dominium, & proprietatem Brigantij. Iam, vt accedamus ad Peireskij patrem, reliquit Nicolaus duos filios, Claudium nempe, & Reginaldum. Fuit autem Claudius corpore puſillo, ac infirmo quidem; ſed animo tamen planè generoſo, atque vegeto; adeò vt ab anno uſque eius ſæculi ſeptuageſimo ſecundo, quo paterna, atque auita dignitate donatus eſt, magni in Senatu & tota Prouincia fuerit nominis, ac Henrico Engoliſmenſi magno Melitenſium Francorum Priori, Proregique eximiè carus. Reginaldus verò innutritus à puero apud Duciffam Ferrariæ Renatam Ludouici duodecimi filiam, cùm illa exigeret ſenium Montargirij dedit ſe deinceps iuri excolendo, allectusque eſt ſub-

fidiorum, sacrique patrimonij comitibus, & rationalibus Magistris. Cùm incidissent autem illa heno-
tica factionis difficillima tempora, perstitit constans
vnà cum fratre, in fide Regi debita, & (quod Bernar-
dus Nogaretius Valletanus tum Prorex magni æsti-
mauit) Arearum arcem, atque adco totam illam
oram à Sabaudo desciscere, auctoritate sua curauit.
Porro cùm frater viueret cœlebs, duxit ipse in coniu-
gem Margaretam Bompariam, quæ ex paterna stirpe
equites, & præfides habuit; ex materna verò ad fa-
milias Valleuoriam, Forbinámque attinuit. Fando
verò accepimus fuisse illam forma adeò eleganti, &
composita, vt Catharina Medicea Regum mater,
cùm Aquis-Sextiis inuisceretur à nobilibus scœminis,
ipsam vnã delegerit, quam suo osculo dignaretur.
Is itaque fuit Reginaldus Fabrius, hæc Margareta
Bomparia, quos Peireskii noster parentes agnouit.
Quoniam verò editus est in lucem Belgenferij; ideo
sciendum hoc oppidum situm esse in perangusta, sed
peramcena tamen valle, quam Gapellus fluuiolus in-
terfluens etiam diuitem facit. Distat heinc Tolone,
heinc Areis eodem, quo illæ quoque vrbes inter se di-
stant interuallo; milliarium vt putà prouincialium
trium: & cùm vtrique ad Boream sit, vtrique etiam
aëris bonitate longè præcellit. Fecerat vicinia, vt ma-
iores illi Areis commorantes, tum aliquot prædia in
eo oppido quærerent, tum eò secedentes exciperen-
tur vetere castro, quod nunc temporis iacet dirutum:
scilicet nondum extructa domo præclaris hortis co-
hærente, in quam, vt canalis ex fluuio deriuari tutius,

& vberius posset, Claudius pontem, seu aquæ-ductum satis insignem interexstruxit. Natus est ergo in memorato Belgenferij castro Peireskii, cum parentes eò diuertissent ob pestem memorabilem, quæ
1580. anno salutis millesimo quingentesimo octogesimo grassari tota quidem Prouincia, sed Aquis-Sextiis præsertim cœpit. Incidit autem natiuitas in diem Decembris anni eius primum, ac horam à meridie propemodum septimam. Quod attingo solum, ne videar circa temporis circumstantiam non fuisse satis diligens; non verò vt faciam hariolandi ansam coniectoris, quò iam post viri obitum, certius quàm antè, fata retexant. Etenim mirum dictu est, quàm multa mentiti Astrologi fuerint, seu annos spectes, quibus non vixit; seu vxorem, & liberos, aliâque, quibus caruit; seu cætera multa, quæ est consequutus. Cum parentes porrò aliquot iam annos absque liberis exegissent, eam ob causam quamprimum mater, grauidam se esse pensens, destinavit proli lustralem sponsorem, non magnatem aliquem; sed, quæ fuit eius pietas, pauperem obuium primò futurum. Heinc qui pauper primus occurrit, accersitus est, fidemque, dum initiaretur, abluereturque pro eo spondens à nomine patrui Claudium appellauit. Verùm cum patruus superuenisset, etiam aui nomen gerere illum voluit; vnde, quasi prænomine Nicolai imposito, dictus est Nicolaus Claudius. Quanquam non modò, cum puer esset, Nicolaus ferè audiuit, sine adiuncto Claudij: sed etiam deinceps ætate prouectus, vt cum est ab auctoribus Nicolaus Faber, seu Fabrius,

Fabius, seu Fabricius appellitatus. Quo loco adnotari potest insignis eruditi viri Ioannis Seldeni æquiuocatio, dum citatum à Baronio Nicolaum Fabrum, qui Præceptor fuit Ludouici XIII. Regis Christianissimi, pro nostro accepit. Præfatus enim in Eadmeri Cantuariensis historiam, & quas Lant-Franci Epistolas Barónius tomo vndécimo Annalium habet, memorans, *Earum, ni fallor, inquit, se agnoscit ipse exemplar accepisse à clarissimo, & doctissimo viro Nicolao Fabro Petrisco Curia Aquensis Assessore dignissimo, atque amico mihi plurimum obseruando.* Et citat quidem Baronius Nicolaum Fabrum; sed *Parisiensem* addit, non *Petriscium*, quod epitheton noster tulit ex montano oppido maternæ ditionis, latine Petrisco, & vulgò *Peiresc*, vnde celebrè ipsi nomen; quod vt debite pronuncietur, nos *Peireskium* inflectimus: non, vt multi, *Petrescium*, *Perezium*, aut simili alia ratione. Cæterum vix erat bimestris, cum ferunt animum maleficam ingressam in cubiculum, proiecisse coram matre securim, quam manu tenebat, aiebatque se reddere; atque ex eo tempore tum ademptam matri vocem, & ploratum infantulo; tum depressum vtrique caput in alterum humerum, ea rigiditate, vt flecti non posset. Addunt patrum, re cognita, vapulare anum iussisse, quæ & ipsa detorto collo sub camino inuenta est; ac illam, cum primum caput extulit, vt satis plagarum esse diceret, renunciasse id, quod fuit, matrem, infantemque valere. Id factum non modò ex aliis, sed ab ipso etiam Peirescio accepi, memorante vt patruus enarrare solitus fuisset. Res planè mira, si veru-

1580. la, cùm deflexerit ipsa caput, ea neruorum contentione euibrare spiritus possit, vt distantis caput perinde defleat, & pari vehementia, qua suam, alterius linguam cohibeat; neque seu caput relaxetur, seu lingua soluatur, donec rigorem ipsa remittens, distentas, sed insensileis veluti chordulas laxarit. Et solent quidem similia multa ad *Cacodæmonas* referri: verum, vtcumque optimus Deus innocenteis infantulos illorum malitiæ permittere possit; vtcumque ipsi ad ea officia, & ad obsequendum miscellis quibusdam animalis se comparent: compertum est tamen magnam eorum partem, quæ commemorantur, fabulosam esse, aut non alio certè niti fundamento, quàm minus solitis quorundam morborum symptomatibus, quibus sunt infantes obnoxij; cùm etiam constet ista præsertim in infima plebe, ac in ipsis agris esse familiaria, vbi minima quæque ansa credulitatem parit, ac fouet. Sesi-qui-anno post, hoc est mense Iunio anni
1582. supra millesimum quingentesimi octogesimi secundi, Kalendarij reformatione memorabilis, natus est illi frater, cui nomen *Palamedes*. Is est, qui deinceps à clientelari fundo dictus est *Valauesius*, ex quo tempore *Nicolaus* quoque cœpit *Peireskii* nominari. Scilicet ad exactam vsque adolescentiam nuncupatisunt nunc *Fabricij*, nunc *Calasij*, quæ fuit etiam patris, patruusque vulgaris nuncupatio ex oppidi *Calati* ditione. Natus *Palamedes* cùm est, aberat pater negotiorum causâ *Gratianopoli*: mater verò altero à partu mense interiit, annos nata viginti duos. Ac superinduxit quidem *Reginaldus* pater aliam coni-

gem, sed quarto-decimo tandem anno. Ea fuit Catharina Vassalla Caradetea, illustri vtrimque progenie, vt cuius maiores ex paterna stirpe inter Achaiae Principes fuissent, ex materna vero attinuissent ad Fliscanos Genuenseis. Vidua tum erat (nupra prius Oliuario de Thulia, ex senatorio ordine) cū superstite filia nomine Marchisa, quae Palamedi postmodum nupsit. Ex altero autem illo matrimonio suscepit Reginaldus cū liberos alios, qui vel in pueritia, vel in adolescentia obierunt; tum superstitem etiamnum Susannam, quam Hentius Seguiranus rationalium magistrorum, & senatorum patrimonialium Praeses primus vxorem duxit. Ad Nicolaum vt redeam, is haud iniuriā Patrum semper, tanquam alterum parentem agnouit. Ille enim suae dignitatis successorem cum destinans, speciale quoddam ingenuae educationis studium assumpsit, ratus scilicet frustra esse, si quis nascatur foeliciter, nec liberaliter instituitur. Tantò autē magis animatus fuit, vt eius curam gereret, quantò ab ipsis cunabulis gratiorem in corpore pulchro venientem virtutem conspexit. Quippe ablatatus vix fuit, cū genium suum prodidit, nimirum se ad omnia visa, auditāque attentum praebens, ac solitus semper oris gratiā suauitatēque vocis summa à nutrice, à parente, à patruo, à magistro, à quibuscumque poterat inquirere quid, quomodo, quorsum vnaquaeque res foret. Sic cū litterae primum monstrarentur, & libros, chartasque praemanibus habere gestiret; percontabatur frequenter ecquid argumenti contineretur in iis; & quoniam indignè ferebat, si

1582. aliquando responderetur, id superare ipsius captum, confingendum erat, quod illi cum voluptate recitaretur. Leuia hæc profectò, si ipsa spectentur; at non contemnenda tamen, si ad ætatem respexeris, & arbores etiam florentes, gemmantesque considerâris. Admirationi certè fuit viris ætate maioribus, qui & mihi illa narrârunt, & asseruerûnt, ipsum nihil vnquam,
1587. quod puerile foret, sapuisse. Septennis cùm esset, & vnâ cum fratre institueretur Brinoniæ, vbi tum curia subsidiorum, rationûmque, ob pestem Aquis-Sextiis perseuerantem commorabatur, erudiri expetiit in San-Maximitano collegio, quod litterarum studiis efflorescere fama erat. Non tacendum verò quòd patri persuasit, vt fratrem sibi permitteret, tanquam inferiorem ætatem, & iuniora eius studia curaturo. Neque prætereundum, fuisse illum fratri ex hoc tempore præceptoris simul, & parentis loco; fratremque illum tanquam parentem, atque præceptorem reueritum fuisse. Anno elapso, ac iam peste San-Maximini suborta, euocati sunt Belgenserium, & rursus post annum Aquas-Sextias, vbi patruus tum versabatur. Inardescens postea à morte Henrici III. ciuilibus bellis, Auenionem missi sunt, vbi quinquennio integro in Collegio Patrum Societatis Iesv studuerunt. Memorare autem Peireskii solebat debere semultum Antonio Colombatio, & Andrea Vallerio, quos supremos habuerat litterarum humaniorum professores. Dicebat enim eos faciliè solitos quidpiam ex aliis exercitationibus relaxare, vt dederet se maximè peruolutandis historicis, studio interea

poëſeos & linguæ Græcæ non neglecto. Ij nempè 1590.
gaudebant non tam opus eſſe greſſum illius regere,
quàm eminùs viam demonſtrare; laudandi, quòd
nobile pectus ea ſeruitute non opprimerent, qua ple-
rique aut odium rerum bonarum contrahunt; aut hu-
milibus nimis aſſueſcunt. Referebat etiam quàm ſu-
blimes adderentur animi, cùm illi præterea palàm
commendarent, quòd totam Iuſtini hiftoriam, to-
tàmque Ouidij Metamorphoſin teneret ad vnguem;
nec faceret finem conſulendis libris, ex quibus inno-
teſcere ſingulares rerum circumſtantia poffent. Eam-
obrem certè auerſabatur & ludos, & ſpectacula; vt
legendo, excerptendòque ſingularia quæque incum-
beret totus. Immoderatiùs tamen, vt puto; relaxan-
dus enim animus per vices, nec ſtatim à paſtu con-
tendenda mens; quod cùm ſtudioſorum iplius mode-
ratores non ſatis cauerent, effectum eſt, vt ſtoma-
cho, capiteque doluerit non ſemel. Exegerat iam
penè annum ætatis quintum-decimum, cùm Aquas-
Sextias rediit, illicque anno integro Philoſophiæ 1595.
operam dedit. Voluit patruus, vt interea edoceret
arma tractare, equos regere, tripudiis membra exer-
cere. Verùm quia ſuccidere gratiores quaſdam ho-
ras oportuit; ideò obſequutus eſt quidem; ſed niſi
præſentibus illis, à quibus erudiebatur, retractare ni-
hil voluit; adeò quidpiam vel legere, vel ſcribere,
vel audire ſatius ducebat. Per ea tempora oblatum
fuit patri numiſma aureum Arcadij, quod Belgen-
ſerij fuerat rēpertum. Id ipſe illicò popoſcit, & cùm
circumſcriptas literas legiſſet, Imperatoriſque no-

1595. men adnotasset, ad patrum statim retulit, qui illi gratificaturus, & duo alia numismata, & libros etiam, quibus vberius erudiri posset, concessit. Atque ex hoc quidem tempore exarsit, seu ignis in siluis, curiosissima eius mens; avidè enim conquirere, atque congerere occcepit quotquot antiquos potuit nummos, singulis legendis, ac interpretandis acerrimò incumbens studio: qua occasione cœpit etiam inscriptiones omneis siue sepulchrales, siue alias perquirere, & studiosè obseruire. Destinatus est deinde cum fratre Turnonem, ut sub patribus Societatis IESV Philosophiæ curriculum, quod appellant, ab- solueret; fratre adhuc in studiis humanioribus consistente. Cùm verò studio Matheseos præsertim inardesceret, ardentè arripuit quam illic docebant Cosmographiam, certus historiam sine illa, ac sine Chronologia penitus obscuram, imperuiamque esse. Sic post usum Sphæræ, addidit etiam usum Astrolabij, literis repetitis scribens, & expostulans aduersus quendam artificem, qui in se pridem receperat Astrolabij fabricam, nec ipsi tamen operam satis diligentem nauarât. Nihil interea remittebat neque ex studio rei antiquariæ, cuius causâ Petro Royero professorum vni fuit eximie carus; neque vniuersè ex ipsis humanioribus studiis, quæ, ut à fratre excole- rentur, tanquam magister attendebat. Sed ad ista nēpe ut sufficeret, studere solebat in plurimam noctem. Euenit proinde, ut partim ex natua constitutione, partim ex assiduo labore, prolixisque vigiliis debilitatè stomachi antè contractam adauxerit, pulueremque
- 1596.

ideò vsurpauerit, quem literis ad patrem datis appellauit digestiuum. Quia literarum incidit mentio, idcirco adnotari potest illum ex eo iam tempore scripsisse omnia accuratè, stylo videlicet tentato per repetitas schedulas, quæ & mihi incidere in manus, & fidem fecere non fuisse illi vnquam phrasim luxuriantem, aut immaturam. Dixit nimirum semper quod voluit communibus verbis; tametsi non sine delectu, nec sine ea gratia, & vrbanitate, qua testando benevolentiam, obseruantiam, gratitudinem; qua excusando, commendando, gratulando, ceteraque huiusmodi præstando mirificus fuit. Nam ad nouercam, exempli gratiâ, ob quædam donariola, Fœlices videmur, ô mater, quod beneficiis tuis cumulamur: sed infœlices tamen, quandò sic illis obruimur, vt agnoscendo impares simus. Talia porrò dum scriberet, reponebat interea quæ munuscula poterat; nempe ab ea vsque ætate vinci benefaciendo. nescius, nisi quâ prorsus impotens erat. Ita ad amicum coætaneum scribens, ingratitudeque iam tum detestatus, Mihi ipsi, inquit, intulero manus, si vel minimæ in officio negligentia coargui possim. Eodem spectat, quòd præceptorum sollicitudinem commendabat, vt à patre, ac patruo honoraria promissis longè vberiora consequerentur. De studiis vt iterum dicam, non tulit patruus, vt triennium Philosophiæ impenderet: sed, exacto Turnone anno, reuocatum voluit Aquas-Sextias, vt destinatus Senatui Iurisprudentiæ initiaretur. Id etiam expetierat, cum ille adhuc Turnone foret; scribens scilicet, vt

1597. maturè Rubricarum Enchiridium haberet præ manibus: verùm ipse, vt Iuris studium tantisper adhuc declinaret, hunc prætextum quæsierat, Volueras, patruè, vt operam arti oratoriæ sedulam nauarem: si per teliceatigetur, faciam, quoniam heic possum percommode, ac initiabor prudentiæ Iuris, cùm ex hac vrbe discessero: tu præscribe tamen quod factò sit opus; si perstes enim, nihil mihi fas, nisi vt iussa capeßam tua. Itaque domum euocatus, Iurisprudentiæ nomen dedit sub Francisco Fortio Andino, qui in Aquensi Curia aduocatus, & docendi iuris oppidò peritus, callebat prætereà, si quis alius, elegantiores literas. Is Peireskij parentibus carus cœpit magnâ curâ Institutiones prælegere; ille verò tam occasione huiusmodi studij, quàm, ne cœptam eruditionem omninò intermitteret, texere suo Marte cœpit Imperatorum seriem, à quibus leges fuerant latæ. Texuit & seriem Consulum, magistratuumque cæterorum, conquisitis vndique numismatibus, vt & facie, & rebus gestis Latores legum agnosceret. Sic habere etiam curauit icones celebriorum Iurisconsultorum, vt cùm in illorum responsa, interpretationesque incideret, fieret memoria tenacior ex concepto cuiusque vultu. Erat tum porrò Aquis-Sextiis Petrus Antonius Rascasius Bagarius rei antiquariæ peritissimus: postea quippe Henricus Magnus, propter famæ celebritatem, illum accersiu, & cimeliarchio suo præfecit. Ipsiigitur succisuiis horis Peireskij frequens aderat; vt sciscitaretur, edocereturque; ille verò sagacitatem, crudi-

eruditionemq; miratus, & coniunctam modestiã cum
 discēdi ardore amicè complexus, celare nihil poterat;
 actum varia cimelia diebus variis demonstrabat, tum
 prolatis libris coniecturas suas, explicationesque ful-
 ciebat, tum singulareis Peireskij interpretationes &
 admittere, & commendare non grauabatur. Anno
 superato, Auenionem rursus concessit, vbi priuatus
 illi doctor Petrus Dauid natione Burgundus, qui
 fuit deinceps Semurij capitalis Profenscallus. Huic
 quoque præter peritiã juris suauiores Musæ propi-
 tiæ erant; vnde faciliè ferebat Peireskium interpone-
 re iuris studio rerum antiquarum peruestigationem.
 Ea de caussa non infrequenter cum Bagarrio de re
 nummaria, & de rebus aliis selectis per literas egit.
 Perscripsit aliquando ad illum singularia quæque in
 Romei cuiusdam Arelatensis cimeliarchio obserua-
 ta, misitque inter cætera obtentum pro eo cætypum
 ex eleganti iaspide Deianiræ per Nessum raptæ. In-
 terdum etiam recuperata egregia Neronis, Vitelli-
 que numismata misit ad patrum, exorauitque, vt
 ea exornari perinde curaret, ac exornatum Hercu-
 lem, Agrippinamque iam habebat. Rogauit quo-
 que, vt ad se anulum quemdam mitteret, com-
 mutandum, vti sperabat, cum Corneola, seu Ony-
 che quadam, quæ & præstantissimi, inquit, artificis
 est, & incomparabilis, sed apud possessorem incom-
 perti pretij. Memoro ista ex pluribus, vt quis ex illo
 iam tempore circa hæc fuerit, melius noscatur. Cæ-
 terum qui curiosam eius indolem quammaximè fo-
 uuit, Petrus Antonius Ghibertus Neapolitanus fuit,

1598. quo Auditore Cardinalis Aquauia tum utebatur. Is enim ipsi rara quædam, ac non prius visa monstrauit; & inter libros alios, etiam quosdam Huberti Goltzj, quos nondum habuerat, in plurimos dies commodatò dedit. Quin-etiam mentem viuidam, sagacemque perspicuens, hortatus est, vt in Italiam iter institueret, habiturus, Romæ præsertim, vnde explere animum posset. Agebat tum annum ætatis decimum octauum; cùm de profectiōe in Italiam cogitans, natandi artem addidicit. Ante id tempus solitus erat se per æstatem abluere in minore Rhodani alueo, qui est Barthalasix insulæ ad ortum, & in quem se Sorga fluuiolus exonerat. Deprehendit autem aliquando fundum, quod aliàs æquabile, & molliusculum obseruârat, induruisse in globulos, moleculasve, qualia oua sunt, cortice detractò, vbi coctiora fuerint. Id demiratus & collegit, & detulit aliquot domum, vt præceptor ostenderet, & facti causam sciscitaretur. Miraculum verò adauctum, vbi post dies non ita multos, cùm rediisset ad fluuium, deprehendit moleculas induruisse planè in flumatileis lapides, idemque etiam obseruauit contigisse iis, quas asseruabat repositas domi. Atque exinde quidem cœpit circa lapidum generationem philosophari; sed res dicenda posterius est. Tandem verò cùm desiderio inuisendi Romam flagraret, veritus tamen ne parentes id abnuerent, petiit duntaxat Patauium mitti, vbi celeberrima iuris studia essent. Tacitè autem cogitabat proximè esse annum secularem, veniarumve solemniū; ac se ipsius oc-

casione posse Patauio Romam adire. Incipiebat tum 1599,
fluere annus superioris sæculi nonagesimus nonus,
cùm Cardinalis Ioyosæus discedens in Italiam, erat
Ferrariam concessurus. Videlicet Clemens octauus
ditionem caducam ex morte Alphonsi secundi Atte-
stini recepturus, eò discesserat; eaque de causa Car-
dinalis non Romam, sed illuc tendebat. Itaque Pei-
reskius valdè exoptârat se in ipsius comitatum vnâ
cum fratre dedere; at parentibus secus visum. Nam
constituerunt quidem fauere laudato desiderio; sed
censuere tamen expectandum autumnium, tum vt
tempestas foret moderatior, adolescentésque potius
hieme, quàm æstate succedente, alieno cælo assuesce-
rent; tum vt commodius de necessario apparatu pro-
uideretur. Quarendus porrò primùm fuit, qui studia
& mores eorum regeret; tametsi ea erat vtriusque, &
ipsius Peireskij præsertim moderatio, atq; prudentia,
vt videretur honori potius, quàm necessitati ductor
designandus. Itaque delectus est ipsis Paulus Gudanes
Fonuiuius, nobilis è Bearnia vir, qui ex Italia, Polonia,
Germania, aliisque regionibus redux, multorum iam
hominum mores, ciuitatésque nouerat, quémque
Belleuræus Cancellarius in proximos annos filio de-
stinârat. Discessère ergo cum illo sub Septembris ini-
tium, prætulitque Peireskius soluere ex Cannensi por-
tu, tum vt antiquum Monasterium in Lerone insu-
la proximè situm inuiseret; tum vt prius occurren-
tia ad forum Iulij monumenta antiquitatis coràm lu-
straret. Cùm appulissent Genuam, ac spectassent
abundè satis palatia illa magnifica, fuit quidem præ-

1599.

tercà superandus mari Veneris, ac Ericis portus; sed voluit tamen Peireskiius terrâ deinceps contendere, tum quòd ex mari malè haberet, tum quòd lustrare curiosè vellet, quæ animo conceperat. Videlicet itinerarium suo sibi marte apparârat, statuerâtque non sic ex vrbe in urbem rectâ pergere, quin, si heinc inde aliqua notatu digna memorarentur, diuertere illuc pro libitu posset. Heinc sese nunquàm in extraneorum comitatum sponte adhibuit, & ubi se alij ipsi adiunxerunt, urbana quadam excusatione seunctionem breui faciendam præuenit. Parùm portò abfuit, quin eæ digressiones, ipso statim initio, illi pessimè cesserint. Cùm enim ad fodinas Massæ inspiciundas desllecteret, ductorem se vnus extorrium, quos Banditos vocant, sic præbuit, vt nisi maturè fuisset agnitus, deduxisset planè in carnificinam. Commoratus nonnihil Lucæ, spectare Pisis voluit insigne cimeliarchium: non potuit tamen, nisi postquam Liburnum inuisit, ac in eam urbem rediit. Memini verò, inter cætera, quæ ibi visâ commemorabat, admiratum illum Corallij plantam, quæ humano cranio supercreuerat: quod adnoto, quia hæc deinceps fuit illi non postrema causa, vt adesset coram in expiscatione Corallij, de qua suo postcà loco dicendum. Vt paucis loca alia perstringam, iter exinde fecit Florentiâ, Bononiâ, Ferrariâ, ac ubi fuit paucis diebus immoratus Venetiis, sedem Patauij denique fixit. Illeic paucos menseis vix fuit, cùm ipsius virtus apud vniuersam Academiam inclaruit. Quippe tametsi vnâ cum fratre professores iuris cir-

cumstaret frequens, ac nominatim Iacobum Gal-
 lum, Bartholomæum Siluaticum, Ioachimum Scatis-
 num, Ottonellum Discalcium: nihilominus alios
 etiam, quotquot aderant, eruditos viros & conuenit,
 & facile in admirationem traxit. Cæteros inter, Tho-
 mas Segetus, illenempe, quem Lipsius centuriâ ter-
 tiâ Epistolarum commendatum iam fecerat, sic suam
 ipsi beneuolentiam, obseruantiamque significauit,
 vt inscriptum prius hoc voluerit, GENIO GALLIÆ
 NARBONENSIS, IN GENIO, ET MATVRÆ, IM-
 MATVRO ÆVO, NICOLAI FABRICII VIRTU-
 TI SACRVM. PATAVII PRID. NATAL. CHRIS-
 TI, CIO. IO. IC. Vir autem eximius Erycius Putea-
 nus, non Lipsio modò collaudatus, ac postmodum
 datus successor; sed iam tum etiam destinatus, qui
 Mediolani ageret & Chronographum regium, &
 artis Oratoriæ interpretem primum, inscriptione ista
 præiuit, LARE SECRETO. CUI GRATIÆ ADO-
 LESCENTIAM ORNANT, ERVDITIO IUVEN-
 TAM, PRVDENTIA SENECTAM; IS ADVLE-
 SCENS VOLVPTATEM AMICIS CREAT, IUVEN-
 NIS HONOREM PATRIÆ, SENEX VTRVM-
 QUE SIBI. TV VERO, NICOLAE FABRICI,
 CVNCTA SIMVL AMICIS, PATRIÆ, TIBI, IN
 SPE ÆTATIS, ET FLOREM IUVENTÆ, ET
 FRVCTVM SENECTÆ PROFESSVS. PATAVII
 ∞. IOC. KAL. FEBR. Atque hosce quidem re- 1600.
 fero è multis. Cùm verò in se omnium ora, oculós-
 que conuerteret; notissimus sanè, & carissimus po-
 tissimum fuit laudatissimo illi Ioanni Vincentio Pi-

1600. nello, qui origine Genuensis, & patria Neapolitanus, eam ciuitatem delegerat, in qua tranquillè æuum degens, totum se bonis artibus, literisque ingenuis promouendis consecraret. Is videlicet Bibliothecam instructissimam apparârat, rerumque omnium exquisitarum promptuarium instruxerat; ac æui illius literatos omnes, quâ propè quâ procul, si quid libris, aliisve rebus opus haberent, adiutabat. Callentissimus ipse rerum, & excitabat omnium studia, & fores suas colloquiis, consuetudinique eruditorum virorum tam aduenarum, quàm indigenarum apertas habebat. Testimonium illi dixerunt & Lipsius, & Scaliger, & Thuanus, & Casaubonus, & Pithæus, & quis non ex laudatis viris? Itaque, talis vir cum esset, deperit statim Peireskij genium, tanquam sui simillimum, admiratûsque, & reueritus in adolescente est adultam iam, ac penè maturam virtutem, & eruditionem. Superfunt certè schedulæ variæ, quibus ad illum missitatis, testatus est summam familiaritatem; nunc variè consultans circa numismata, circa rerum gestarum loca, circa responsa danda Ursino, Velfero, & aliis: nunc gratias agens ob varias interpretationes rerum, locorumque apud auctores difficilium, ob communicatos libros, ectypos, apographa, alia: nunc vicissim mittens, si quando aut Romæ, aut aliundè accepisset libros, cimelia, inscriptiones, literas; nunc inuitans ad cognoscendum, colloquendum, spectandum, ferendum iudicium, & id genus cætera, quæ recensere molestum foret; ne quidpiam dicam.

de literis, quas ad quadraginta vsque, dum ille Venetiis, Florentiæ, aut Romæ abesset, perscripsit, omnibus familiarissimas, & singularis beneuolentiæ testificatione plenas. Commencabat autem Peireskius tertio quoque mense Venetias: tum vt necessariam pecuniam, iuxta nummarias tesseras, à nummulariis exigeret; tum vt viros doctos, litterarumque amantes, veluti Paulum Sarpium, Dominicum Molinum, & complures alios conueniret; tum vt nihil, quod foret pretio, raritateve in ea ciuitate commendabile, sineret inuisum. Quam quidem ad rem eximie fauebat egregius Christianissimi Regis nomine Orator Philippus Canaius Fraxineus; cum ipse quoque sibi interea pararet amicos, quorum auctoritate nihil fieret imperuim. Præcipuus in illis fuit Fridericus Contarenius Diui Marci procurator, qui, cum Musæum haberet instructissimum, illius tamen pretium non nouit, donec Peireskius demonstrauit quidnam, & quanti æstimandum vnumquodque cimeliorum foret, quid inscriptiones Græcæ tam numismatum, quàm marmorum significarent, & id genus similia, ex quibus singularem viri beneuolentiam est consequutus. Neque verò ipsius modò, sed & totius etiam familiæ: ex quo intercessit illa cum Angelo Contareno viginti post annis agente in Gallia Reipublicæ Oratorem necessitudo; & cum Vincentio Contareno, qui sex annis post librum variarum lectionum edens, *E Gallia vsque*, inquit, *nobilissimus, & cum iuris, tum antiquitatis totius egregie peritus Nicolaus Fabricius me sibi peramicè monendam*

1600. *putauit.* Prætereo Ioannem Mocenicum, cui fuere oppidò quàm-rara; prætereo Bembum Equitem, cuius vniuersam penè rerum antiquarum suppellectilem à Cardinali vsque Bembo deductam coëmit: prætereo Patriarcham Aquileiensem, in cuius cimeliarchio memorabat se obseruasse ad trecentos vsque Cameos perraros: prætereo & alios complureis. Refero solùm quod Puteanus, cùm Venetiis foret, ad Pinellum scripsit xi. Kal. Iunij eâ Epistolâ, quæ edita est in Promulsæ octogesima secunda. *In ædibus*, inquit, *Scaramelli fui: Septumia monumentum vidi, etsi penè frustrâ: ita similiter omnia expressa, ut nesciam, me hercules, industriam, an memoriam Fabricij nostri, an utramque debeam admirari, qui tam feliciter in summa festinatione ipse pinxit, aut feliciter pingentis postea, ac reformantis manum direxit.* Exinde nempe colligitur, quàm solers foret, ac diligens in singulis obseruitandis. Cæterùm Venetias profectus sub finem Augusti, ardorem tandem explicuit, consiliùmque cepit concedendi exinde Romam, quod tametsi Porta-Sancta aperienda, & Iobelæi celebritas inchoanda non esset, nisi sæculi, atque adeò anni sequentis initio: existimaret tamen, si quos illeic mensis præoccupando transigeret, haud malè collocatum iri. Nôrat aliunde fore, vt breui celebrarentur Florentiæ memoranda sponsalia inter Henricum Regem Christianissimum, & Mariam Mediceam nunc Reginam matrem: neque volebat committere, vt à se coràm non spectarentur. Itaque postquàm Patauium scripsit, ac specialiter ad Pinel-

Pinellum, inscriptiones, aliâque mittens, & simul rogans, vt literas ad familiareis Romam daret; discessit initio Septembris, lembo conducto Ferrariam, aut certè Francolinum vsque. Non peruenit autem Florentiam ante diem mensis vigesimum, quòd vbiunque aliquid spectatu dignum occurreret, quantum ad illud peruidendum opus foret, commoraretur. Constitit verò, retardatusque Bononiæ potissimum est, quòd Iulius Cæsar Velius, qui credebatur hausisse totam antiquitatis notitiam, suauis illius congressu captus, detinere ipsum plusculum voluerit. Neque verò se continere optimus senex potuit, quin de sua felicitate in cognoscendo Fabricio, literas calidissimas, mirisque elogiis plenissimas daret. Calidissimas certè eas dixit Pinellus, commendans aliunde, quòd Fabricius ex iis non esset, qui peregrinando nihil aliud, quàm cursitant, quibûsque, iuxta Senecam, illud evenit, vt multa hospitia habeant, nullas amicitias. Accedens Florentiam, habuit aliquas à parentibus literas, ac, inter quasdam commendatitias, reperit speciales Caroli Lotharingij Ducis Guisij, & in Galloprovincia Proregis, ad Nicolaum Brûlartum Sillerium, qui fuit deinceps Regni Cancellarius, quique tum Regius Romæ Orator, eò venerat, ad sponsalium celebrationem. Quamobrem ille Peireskium, fratremque accitos in familiam voluit, vt suis sub auspiciis omnia liberius contuerentur. Præter verò celebritatem, auidè imprimis spectauit Bibliothecas illas insignis, in quibus agnouit, & penè dicam, adorauit tum magnorum Principum, tum virorum eruditorum, à

quibus bonæ literæ restitui cœpère, vestigia. Nihil speciatim dico de Pandectis, quos, in Palatio magni Ducis religiosissimè licèt asseruatos, curauit tamen inspicere; securus nullum antiquitatis monumentum illustrius in litterario orbe exstare. Amicos quoque illeic parauit; sed, quantum recordor, nullum constantiorem, quàm Richardum Richardi, studiosum plantarum, atque marmorum; qui ipsum quoque uersum ad opera publica, hortosque deduxit. Mense transacto, Senas petiit, vbi salutare potissimum voluit Celsum Cittadinum, qui tunc habebat præ manibus tractatum de Origine, progressuque Latinæ, & Italicæ, seu vulgaris Linguae. Inde discedens, Romam tandem sub finem Octobris peruenit. Romæ porro dici non potest quàm citò fuerit notissimus; non modo, quia iam Pinelli, aliorumque literæ celebre nomen fecerant; sed maximè etiam, quia cum primùm viris in ea vrbe eruditis cœpit congregi, ingentem sui admirationem, atque amorem conciliauit. Prolixum foret recensere quos eximios viros coluerit, à quibus, ob lumen ingenij, & temperatissimos mores, magni habitus fuerit: sed, cum sileri omnes non possint, commemorandi imprimis sunt magni illi duo Cardinales, Baronius, atque Bellarminus. Ille nempe obstupescerebat, cum de insertis in Annaleis inscriptionibus, aliisque rebus ad historiam abstrusorem spectantibus, edifferentem coràm audiret. Ecquid putas verò, cum ostendit gemmas, numismataque varia, quibus Basilidiani, Valentiniani, alique hæretici inscribere soliti erant vocabula barbara opinionibus

fuis obtegendis? Collegerat nempe complura, ad illu-
strandum, quod ille in secundum tomum coniecisset
ex Amethysto Fuluij Vrsini, circa vocem ABPAΞAC,
qua Basilidiani intellexêre summum Deum, conti-
nentem Angelos septem, cœlorum septem præfides;
ac præterea eorum trecentas sexaginta quinque virtu-
tes, iuxta anni dies; idque ob septem literas, numera-
lêmque earum valorem (iunctis scilicet numeris, pro
ordine vnus cuiusque in alphabeto literæ) & id genus
similia, quæ deinceps quoque ad Natalitium Benedi-
ctum literis exposuit. Bellarminus verò tum eadem,
tum alia accipiens circa hæreses, veterêmque histo-
riam totam, hærebat quid magis probaret, an sagaci-
tatem in peruestigando, an solertiam in coniiciendo,
an iudicium in eligendo, an memoriam in referendo,
an lepôrem in explicando. Meritò autem lenissimis
eius moribus capiebatur: nam, vt omittam cætera,
confidentem in media plebe auditorem ferè habebat,
quoties suos paræcos pro concione erudiret, familia-
ritérque institueret. Dicendus deinde Iacobus Sir-
mondus, inter homines Societatis IESV iam tum
etiam clarissimus: arctissimam enim cum illo amici-
tiam iniit, nihilque studiorum non commune habuit.
Dicendus Lælius Paschalinus, cuius cimeliarchio spe-
ctabilius quicquam non fuit, quisque illius eruditio-
nem ita suspexit, ita amauit indolem, vt aliquando co-
gitârît, ac volücrit pretiosa quæque tradere, quæ ipse
secum absportaret. Dicendus Fuluius ille Vrsinus,
cuius nomine inter viros antiquariæ rei studiosos
maius, celebriúsque nullum est, quisque ex perscriptis

1600. à Pinello interpretationibus, expetierat illum nosse perardenter. Dicendus Philippus Pigafetta, ad quem cum Pinellus initio non dedisset litteras, mirum quantâ commendatione obliuionem compensârit. Dicendus ille ipse Ghibertus, quem Auenione iam no-uerat, quique ad spectandum res varias ipsi deducendo se comitem præbuit. Dicendus, qui etiam cum variè deduxit, Paulus Gualdus, cruditus Vicetinus, qui in Pinelli contubernio ipsum miratus Patauij, Romæ etiam obstupescibat. Dicendi Petrus Stephanonus, Dionysius Octavius Sada, & vniuersè quotquot fuere in vrbe eruditi viri, & bonarum artium, literarumque amantes. Sed & reticendus non est Arnaldus Cardinalis Ossatus, Regia negotia tum Romæ curans, vir eruditione, prudentia, integritate, suauitate morum eximiè conspicuus: qui consuetudine Peireskij exfatiari vix vnquam potuit, neque illum vnquam abs se, dum inuiseretur, non ægrè dimisit. Non reticendus Abbas Montanus, Archiepiscopi Arelatenfis patruus, qui virtutis illius potius, quàm Nepotis commendatione, in perpetuum propemodum contubernium adscitum voluit. Iam neque dici faciliè potest, quàm vehementi studio vniuersa antiquitatis monumenta peruestigârit. Imprimis enim desiderauit situm Urbis cognoscere, & regiones, quas fuit complexa. Visit montium vestigiis, adeò depressos miratus est, quos putârat adeò sublimes. Obstupuit inter cæteros Palatinum summè desertum, quo nullus olim frequentior. Disquisiuit, si fortè posset intelligere, aut subodorari, quâ fuissent Pomerij fines tam à Regi-

bus, quàm ab Imperatoribus prolati; & cùm ad portas, viàsque omneis diligenter attenderet, explorauit tamen præsertim Aureliam, propter eius viæ reliquias, quæ in Prouincia adhuc supersunt. Deinde regiones, vicosque percurrens, agnoscere voluit, quantum licuit, quæ extitissent Præscorum templa, ædes, aræ, luci, sepulcra, asyla, scholæ, bibliothecæ, amphitheatra, theatra, circi, hippodromi, naumachiæ, campi, odææ, fora, emporia, horrea, armamentaria, balnea, thermæ, aquæ, pontes, colossi, obelisci, columnæ, statuæ, & innumera alia, quæ inter legendum auctores adnotauerat, & in commentarios relata circumgestabat. Vix autem vnquam exsatiari contemplando poterat, cùm obseruaret quidpiam adhuc siue integrum, siue mutilatum superstes. Sic dies benè multos posuit circa Pantheon, rarum architecturæ exemplar, considerando, conferendoque quicquid Ludouicus Demontiosius fuerat de illo ratiocinatus. Sic, quia nôrat asseruari in Vaticano Palatio tum Herculem truncum, tum Laocoontem cum duobus filiis, opera exquisitissima, & Michaëli Angelo miracula habitatis; idcirco illis inspiciendis non vna vice adstitit, vt nec semel etiam inuisit geminas illas Alexandri, & Bucephali statuas, quæ exstant adhuc Phidiæ, & Praxitelis monumenta. Sic aliquoties ad inuiscendum C. Sestij Epulonis in via Ostiensi sepulcrum itauit, ob vetustissimas illius, nobilissimæque reliquias. Sic variè spectauit obeliscos varios, sed nullum frequentius, quàm Constantinianum, ob cuius effossionem, translationem, erectionemque laudare satis non poterat

1600. generosum Sixti V. Pontificis institutum? Sic & columnas; sed maximè Traianam, atque Antoninianam. Illam quidem, ut Pinello satisfaceret, cui factum satis non fuerat volumine toto de ea (seu de historia utriusque belli Dacici, à Traiano gesti, prout Alphonsus Ciaconus illam ex columna eruerat) conscripto: unde & exoptauerat tum exemplum libri à Peireskio quàm perfectissimum conquiri; tum depictas in eo figuras personarum, armorum, gestuum, cum insculptis, secundùm totam cochlidem, per ipsum conferri. Hanc verò, hoc est Antoninianam, ut perdiligenter exprimi curaret effusionem illam Iouis Pluvij Romanorum exercitum irrorantis, & hostium copias fulmine ferientis. Eiusmodi certè Iconismum cùm Scaligero postmodùm offerret, ad illustrandum quod Eusebius de prælio commisso inter Antoninum, & Germanos, ac Sarmatas, contulit in annum Olympiadis c. xxx. viii. primum, Hæc, inquit, vna est ex rebus maximè notatu, & spectatu dignis, quas mihi quidem inter omnia antiquitatis monumenta contigit Romæ observare. Nec verò harum modò rerum delineationes habere voluit; sed rariorem etiam quarumvis statuarum, quas disquisivit in Capitolio, in Vaticano, in Farnesianis, in Cæsianis, in cæteris ædibus; itémque in hortis, ac vineis, & ut breue faciam, in quibuscumque privatis, publicisque locis; pictores deducens, qui non modò statuas, intemerataque alia opera; sed truncos etiam, & ruinas ædificiorum veterum, quæ occurrerent, adumbrarent. Deferre quoque solitus erat selecta

quædam numismata, quæ conferret cum statuis, ex- 1600.
plorans cuiusque ætatem, & agnoscens plerumque
manum: cum eâ foret solertiâ, vt momento discer-
neret quid re verâ, quidque ex sola imitatione foret
antiquum. Sic inscriptionum etiam omnium, quæ
saperent antiquitatem, habere voluit apographa,
tentans pro sua sagacitate ex eas supplere, ac penè
desperatas restituere. Rursus Codices MSS. seu Va-
ticanos, seu Farnesianos, seu alios, non quantum qui-
dem libuit, sed quantum tamen licuit, euoluit; &
quotquot inter cæteros maximè rari visi sunt, adno-
tauit in tabulis. Sic adnotauit etiam vasa, pondera,
mensuras, calaturas, numismata, simulacra, imagi-
nes, & quicquid demùm notatu dignum occurrit in
Metallothecis, iconothecis, in Promptuariis, Mu-
sæis, Xystis, Pergulisque variis; vt præteream innu-
mera, quæ vel pretio quæsiuit, vel commutauit, vel
dono habuit, quorùmque saltem ectypos, ecmag-
mata, aposphragismata, aut iconismos obtinuit.
Vnum doluit, se nec habere, nec videre vsquàm po-
tuisse memorata Goltzio Tulli Hostilij, ac Seruij
Tullij numismata; vt neque alia memorata cum his-
ce inscriptionibus, Col. Aquæ-Sextiæ. Col. Arelate.
Col. Auenio. Col. Arausio Secundanorum, & simi-
lia, quæ amore patriæ ardentissimè, sed frustrâ tamen
requisiuit. Ex hisce porrò ingentem sui admiratio-
nem excitauit, non modò Romæ, vbi illius amicit-
iam eruditi omnes ambierunt, sed in distitis etiam
locis; quòcumque eius fama peruénit. Ex hoc nimi-
rùm tempore cœpit, quæ fuit illi necessitudo cum

1600. Natalitio Benedicto, rebus exquisitis instructissimo, ac Fullinij tum commorante; quæque cum Adolpho Occone Augustano medico, tunc iteratò edente volumen de numismatis Imperatorum Romanorum: ut illos taceam, quos iam nôrat, Hieronymum Rubicum Rauennæ, Cæsarem Nichezolam Veronæ, Antonium Tolentinum Cremonæ, Cæsarem Campanum Vicentiæ, aliisque locis non paucos. Mirum autem quantum Patauij præsertim inclaruerit, adstantibus literis ad ipsum per id tempus datis à Laurentio Pignorio; qui ipse rerum præscarum adeò peritus, professus est tamen se amplius ex vnis eius literis, quam ex decem Antiquariorum voluminibus erudiri: quisque suspexit non modò copiam conquisitarum ab ipso rerum, sed delectum etiam insignem, cùm ex missis duobus quibusdam Constantini numismatibus, agnoscere se, ut ex vngue leonem, dixit. Consimilia scripta ab Edmundo Brutio, Georgio Ragusæo, Iacobo Papifauio, Martino Sandello, & quem nominare primum debui, Hieronymo Aleandro iuniore, vero Musarum delicio; itémque M. Cornaro optimo vrbis Præsule, quicum deinceps per litteras, donec fuit in viuís, amicitiam coluit. Sed quantum quidem fieret Patauij vel id indicat, quòd misso Augustâ Vindellicorum ætÿpo-Sapphiri cuiusdam, inscriptionem præferentis, in qua *Xiphia* vox omnibus curiosis faciebat negotium; Pinellus ad eum scripserit, examénque, & iudicium ea de re ipsi detulerit. Prætermitto autem, ut fecerit satis, vocique lucem attulerit ex Strabone potissimum, cùm

ex Polybio loquutus est de venatione *Xiphie*, mon- 1600.
 stri videlicet marini. Quod ad statum Romæ recen-
 tioris spectat, nullum fuit Templum, Sacellum, Col-
 legium, Xenodochium, quod ingressus non fuerit:
 nullum Palatium magnificum, nullum celebre Pon-
 tificum opus, ad quod non diuerterit: nulla Raphaë-
 lis Urbini, Michaëlis Angeli, Polydori Carauagij, Ti-
 tiani, aut alterius artificis insignis pictura, quam
 non inspectarit. Sic cæmiteria, cryptasque illas sub-
 terraneas, plena venerationis loca, & Christianæ
 pietatis, constantiæque monumenta. Sic Religiosis
 cæremoniis, quantum sine discrimine posse putauit,
 interfuit. Quippe quod complexione foret non
 robusta magnoperè, coniicere sese in turbam tumult-
 us plenam detrectabat. Hinc quod ad statas, so-
 lemneisque Iobelai attinuit, spectauit quidem, ob-
 seruauitque ex ipsis quantum potuit; cæterum au-
 tem Valauesio fratri, tanquam valentiori demanda-
 uit curam spectandi omnia cominùs, & ad sese re-
 ferendi. Idem præstitum circa cæremonias, quas vo- 1601.
 cant cænæ Domini: quod circiter tempus tam ipse,
 quàm frater, vt Pontificem iis pauperibus, quos die-
 tim pascit, ministrantem, simulque in eadem aula
 discumbentem contuerentur, vices redemere duo-
 rum pauperum, vestibùsque eorum assumptis, adfuê-
 re inter cæteros, & agniti licèt à Pontifice, ipso ta-
 men rem placidè dissimulante, omnia spectârunt.
 Paschalibus Romæ exactis, & postquàm varia mu-
 nera domo accepta distribuit, nonnullaque etiam ad
 Pinellum misit, profectus est Neapolim. Superfluum

1601. foret recensere quantum, quotiesque diuerterit, ut requireret varia, quæ apud auctores celebrata sunt tam Latij, quam Campaniæ loca. Affectum se verò præsertim dicebat, cum memorata Virgilio coram haberet, lustraretque, ut Caietam, ut Cumas, earumque reliquias: ut Misenum montem, & Avernum Lacum, & similia. Cum item loca, in quibus exstitisse dicerentur villæ Ciceronis, & Luculli; aut sepulti fuisse Scipio Africanus, & Virgilius: atque id genus cætera, ad magnos viros attinentia. Addebat se, cum crypten illam, seu, ut appellat Seneca, carcerem longum, & obscurum, Pausilippum scilicet montem per passus mille perforatum, cundo, redeundoque spectaret, doluisse, quod ignoraretur, certusve non esset, qui tam præclarum facinus, tanto viatorum compendio, commodoque attentauisset. Digniore enim commendatione arbitrabatur esse, quam Xerxen, cum Græciæ bellum inferens, Athon montem non à continente modò præcidit, sed medium etiam perforavit. Neapolim quam-primùm accessit, tenere se non potuit, quin Portæos illos fratres conueniret. Cum inductus autem fuisset ad natu maiorem, cui nomen Ioannes Vincentius, is breui colloquio sic affectus fuit, ut ipsum exclamabundus ad Ioannem Baptistam natu minorem deduxerit, quod & ipse in similem admirationem raperetur. Enarrare autem solebat Peireskii, licet ipse quoque Ioannes Baptista foret iam grandæuus, adpersisque canis venerabilis; ipsum nihilominus eâ reuerentiâ observare solitum iussa, nutusque Ioannis Vincen-

tij, vt maiore non potuiffet ora, atque imperium patris. Cæterum, vt cum ipsis vltro communicauit plurima, ita viciffim ab iis accepit; neque fpectauit modò quæcunque afferuabant in Mufæis, pretiofisque armariis; fed etiam omnigenis penè illorum experimentis, prout fibi in votis effe infinuauit, interfuit. Heinc nata ipfi cum vtroque eximia familiaritas, & quæ eft deinceps mutuis literis, officiisque variis culta amicitia. Inuifit præterea Mufæum Ferrantis Imperati, ipfum quoque raris naturæ operibus inftitutiffimum; itémque Adriani Guillelmi, Martis Gurguftiolæ, & Matthæi Cappuani Conchanorum Principis; tametsi ad hunc extra ciuitatem diuertendum fuit. Monumenta infuper omnia antiquitatis perueftigauit, ac præ cæteris delineatas voluit nescio quas columnas operis Corinthiaci, Apollinémque ad Tripodem, & fimiles quasdam figuras. Ad hæc rogauit, didicitque quicquid licuit cognoscere de familiis Neapolitanis translatis in Prouinciam, & de Prouincialibus translatis in eam regionem. Cùm verò noffet effe in templo Diuæ Claræ nuncupato fepulcra complura Regum, Principumque ex Regia ftirpe ad Carolum primum (quem diximus fuisse S. Ludouici fratrem) attinentium: idcirco ad illa maximè attendit, præcipua adumbravit, Epitaphia exfcripsit. Quinetiam follicitus fuit in exquirendo fepulcro Simonis Portij Philofophi celeberrimi, non ita pridem vita defuncti: fed enim curam explorandi, fi quæ fortè inueniretur, & maximè quidem cum Epigraphe, Pinellus ipfi commendarat.

Viuebat tum Neapoli fœmina quædam sanctitate, institutóque vitę illustris. Ea Romam accita à tempore vsque Gregorij tertij-decimi, & ab optimo Bellarmino examinata, probatáque, dicebatur rapi in eam extasim, statim ab assumpto Eucharistico Sacramento, vt, quemadmodum genuflexo erat, ita immota, rigidáque, stipitis instar, consisteret, oculis apertis nihil conspiceret, toto corpore nihil planè sentiret. Itaque noluit Peireskius ex ea vrbe discedere, quin rem factu mirabilem vidisset, atque exploráset. Ac obtinere illud quidem absque contentione non potuit; sed, vt imperuium ipsi nihil erat, peruicit tandem, ac præter fratrem, deduxit quoque Ioannem Porcelletum Mallianum, qui fuit deinceps Præsul Tullensis. Vidit ergo, explorauitque, & commemorando mirari solebat, si posset quidpiam simile humanitùs contingere; neque facile credebat Cardano referenti sibi quid tale euenire solitum, quoties animo collibuisse. Postquàm urbem satis lustrauit, illiúsque elegantiam, amœnitatémque admiratus est, nihil habuit potius in votis, quàm adire Vesuuium, contemplarique locum, in quo magnus Plinius dicam obiisset. Ea re peracta, insigni quodam flagrauit desiderio inuifendi Siciliam, & pergendi Meliten vsque. Tria autem erant, præ ceteris, quæ auebat coram spectare, Fretum Scyllæum, Æthnę incendium, Antiquitates Syracusanæ: restitit tamen Fonuiuius, neque ipse, illo inuito, progredi vsquam voluit. Quare satis fuit totam eam regionem circum peragraré, & ad loca

etiam aliqua redire, vt Puteolos, & Baias versus, quò posset oculatiùs duo quædam ædificia subterranea inspicere, quæ Piscina mirabilis, & Labyrinthus appellantur. An adiciam verò, cum littus prope Puteolos consideraret, pulueremque requireret aqua marina lapidescentem, detectum ipsi præterea fuisse inter arenas quendam plumbeum, quo cælaturæ, ac præsertim Onychinæ conseruarentur. Quòd autem in eo littore numismata ferè exesa deprehenderentur, opinatus est causam esse sulphur, quod tametsi insensile, in iis tamen oris vbique interuenit, accedente aliundè ex mari salugineo halitu, cum arrodendi facultate. Altero post mense repetiit Romam, idque vt amicis vale diceret, collatis variis munusculis, ac aliquibus etiam aliò missis. Constituerat nempe redire Patauium ante Solstitium, magnòsque æstus; vnde & paucos intra dies non sine relicto sui desiderio ex vrbediscessit. Instituit autem iter Perusiâ, tum Academiæ gratiâ, tum spectandi lacus Thrasumeni causâ. De flexit inde Eugubium, occasione inuentæ illeic non ita pridem Tabulæ æneæ lingua veteri Hetrusca perscriptæ. Salutato postea ad Assisium D. Francisci monumento, inuisit Fullinij Natalitium Benedictum, abs quo expectatus ardentissimè fuerat. Spectauit exinde ad Montem Falconem, inter D. Claræ reliquias, treis insigneis globulos in cistula fellea inuentos, quorum duo, vel tres, non ampliùs, quàm vnus, ponderosi deprehenduntur. Tum votis ad celebre Fanum D. Mariæ Lauretanæ ritè per-

solutis, adiit Anconam, indeque Vrbium, ad
obtinendum licentiam peruolutandi Bibliothecam
Ducis. Digressus Pisaurum, atque Ariminum, ac-
cessit Rauennam, vbi Hieronymus Rubeus clarus
ille Medicus, patriæque scrutator, completi illum
expetebat, demonstrareque in ipsa sede Exarchatus
nescio quas reliquias Barbariei Gothicae, & orna-
menta Imperatorum, contemporaneorumque Re-
gum, cum his nominibus; ATHALARICVS
RIX, WITIGES RIX, THEODVISATVS,
& id genus alia; simulque ostendere ornamenta
quædam Gallæ Placidia, in nescio quo templo,
quæ Velius non esse antiqua censuerat: denique ipsi
sua manu exemplum Historiæ Rauennatis dare. Per-
uenit exinde Venetias, vbi amicis, magna illorum
cum voluptate salutatis, cognoscere non obiter
voluit Antonium Posseuinum, ex Societate IESV,
virum optimum, ad quem cum expetiisset com-
mendatitias literas, *E. quid queris proxenetam, re-*
scripserat ad illum Sirmondus, cum ad quoscunque
veneris, adeo ex teipso innotescere, amabilisque euadere
possis? Postremò non multos post dies, hoc est,
medio circiter Iunio, accessit Patauium, vbi tantâ
est exceptus lætitiâ, vt videretur quasi quispiam
Deus studiosorum eò aduentasse. Maximè verò re-
ditu suo recreauit optimum Pinellum, qui diutur-
nis, sed lentis morbis iam ingrauescentibus, pro-
pendere se in mortem sentiebat. Dies non sufficie-
bant audiendò, quæ compererat; neque inspiciendò,
quæ attulerat, neque cognoscendò, quæ visa

obscura interpretabatur. Dicam-ne , cum inter 1601.
eos viros , quos cognouerat , fœlicitati verteret;
quod amicos sibi Baronium , ac Bellarminum pa-
rauisset , prouocatum fuisse optimum Pinellum , vt
quidnam sibi circa illos contigisset , exponeret ?
Cum , inquit , summus Pontifex ante annos treis
venisset Ferrariam , dignati sunt illi me inuisere ; sed
tacitis nominibus , habitûque dissimulato ; adeo vt
se Presbyteros simpliciter asseuerarent. Ipse ex eo-
rum iconibus , qui viri essent , statim agnoui : sed
fingens tamen me ignorare , in eam Musæi partem
deduxi , in qua virorum illustrium , ac ipsorum spe-
cialiter , imagines erant conspicuæ. Ostensa autem
Baronio Bellarmini effigie , Num hæc imago , in-
quam , ô bone , socium istum tuum repræsentat
eximiè ? & ostensa Bellarmino quæ Baronij aderat ;
Num hæc quoque , inquam , socium istum tuum
exquisitè refert ? Ac tum illi delusos se , cum delu-
derent , agnoscentes in amplexus prolapsi sunt. Por-
rò quia Peireskîus præsentiebat se post annum re-
uocatum iri in patriam ; idcirco se ad intermissa lu-
ris studia composuit : tempore sic dispensato , vt ad
alia præterea innumera sufficeret. Siquidem præter
varia , de quibus paullò pòst dicetur , in literatos
officia , profecit continuo in notitia abstrusioris hi-
storiæ , altiorisque antiquitatis. Specimen autem in-
signe dedit , cum subortâ inter curiosos de monte
Argæo controuersiâ , edisseruît ex Iaspide , variis-
que numismatibus Cæsareæ , alibique cuspis , origi-
nem , ritûsque varios , quibus ille mons fuit olim.

1601.

in Cappadocia adoratus. Linguas præterea semper excoluit, quas credidit vsui futuras. Nam ex Hebraïca quidem, & ex utroque charactere, tam vulgari nempe, quàm Samaritano; ex Syriaca item dialecto, idiomateque Arabico, tantum ferè delibauit, quantum ad fidorum, similiùmque numismatum interpretationem necessarium duxit; vsus magisterio Iudæi cuiusdam commorantis Patauij, cui nomen Rabbi Salomon fuit. Ad Græcam linguam quod adinet, studiosiorem illi operam impendit, tum propter varias constitutiones Imperatorum Græcorum, ipsamque Iuris originem, quæ ad Græcos fontis refertur; tum propter Philosophiam, seu studium Sapientiæ, propterque Poëseos, ac Historiæ, quæ in ea lingua supersunt, antiquissima monumenta; tum propter explicationem gemmarum, numismatum, marmorum, quorum sunt Græcæ inscriptiones, quibûsque illustrandis pulchrum semper duxit, suauissimùmque habuit seriam operam collocare. Hinc cum ad aliquem scriberet Græcarum literarum amantem, exempli causa ad Occonem, qui suas semper Epistolas sententiis Græcis interferebat, solitus erat ipse quoque eruditionem suam testari, nunc versum Græcum præmittendo, nunc quidpiam carmine, aut prosa appositè interpolando: vt ad memoratum Adolphum Occonem, *Fortunate Senex, Te Diuæ illius antiquæ, & venerandæ Μνημοσύνης filia, non iam Αδελφον, sed Αδελφον duplici nomine Germanum dicent.* Nec verò humaniorum modò literarum studiosus fuit, sed multum etiam

etiam inuigilauit Mathematicis artibus, carus ex eo tempore Galileo Galilei, quem & apud Pinellum primum nouit, & ex inuenta hauriendis aquis tum urbem infestantibus machina, admodum suspexit. Incubuit quoque plurimum in peruestigandis causis rerum naturæ admirabilium. Quippe, & varios variè rogauit de illis Parheliis, siue tribus solibus, ac triplici Iride visis, die Februarij septima, hora circiter vigesima prima. Et de piscibus, aliisque rebus saxificatis philosophaturus, tum variam copiam impetrauit, inque angulo Musæi disposuit; tum ichnographiam eius montis, qui apud Vicetinos iis abundat rebus, obtinuit. Et quicquid fuit cuiquam perspectum circa fossilia, mineralia, rem metallicam, sua seu remuneratione, seu comitate concessum tulit; maximè autem Venetiis; vbi aliunde, cum multa præclara in armamentario se obseruasse diceret, referebat tamen nihil sibi fuisse adspectu iucundius formatione aluminis in octahedricam figuram. Et frequens adiit rariores hortos, perferaturus varietatem, vireisque tam indigenarum, quàm exoticarum plantarum; ac destinans quasdam in Prouinciam, quasdamque vicissim ex Prouincia, nunc in Pinelli, nunc in aliorum viridaria transferri curans. Et interesse solitus fuit non publicis modò Anatomicorum dissectionibus, sed priuatis etiam Hieronymi Fabricij ab Aquapendente, qui illum propter singularem beneuolentiam admisit, cum specialiter ex ouis gallinæ incubanti suppositis, singula in dies singulos subduceret, vt

1601. ab ipso usque incubationis initio obseruaret seriem formationis pulli. Atque hæc quidem de studiis. Sequitur, ut iam infinuemus, quemadmodum illum ex hoc tempore viri studiosi, eruditique arripere agnouerint gubernaculum literarum. Dictum est iam, cum Roma rediit, cœpisse optimum Pinellum solito grauius laborare, inque obitum vergere. Is itaque non multò post, quippe sub Augusti initium, è mortalium vita excessit, propè septuagenarius: magno profectò dolore omnium bonorum, eruditorumque; sed Peireskij potissimum, qui illum, tanquam alterum parentem habebat, ac venerabatur. Cæterum cum ille sui desiderium, quæ patebat orbis literarum reliquisset, consolationi tamen fuit, quòd videretur Peireskio quasi lampada tradidisse. Ipse nimirum ad eius mores ita se composuerat: ita studio rerum nobilium, exemploque benefaciendi, ac promouendi bonas arteis animatus euaserat, ut virtutis heroicæ destinatus hæres iure censeretur. Huiusce rei congerenda aliquot testimonia sunt, quæ pleniorẽ concilient fidem. Imprimis verò citandus occurrit Paulus ille Gualdus, qui Pinelli vitam conscripsit, cuiusque mentio facta iam est. Is postquam viri mortem defleuit, dixitque naturam parcè proferre eiusmodi viros, ac Methonis fortasse annum transigendum iis, qui alterum Pinellum expectent; talem scilicet, cuius studium humaniora studia restituat in pristinum splendorem, cuius opes in nobileis libros colligendos impendantur, cuius dignitas doctis viris patrocinio sit; tum

demum subdit, *Ætas sanè nostra, si quem feret eius-* 1621.
modi, is, ita me Deus amet, non alius erit à NICO-
 LAO FABRICIO Gallo, domo Aquis-Sextiis, cla-
 rissimo adolescente, qui Roma, & Patauij, vix-dum
 plenam pubertatem egressus, eo ardore Pinellum, & Pi-
 nelli studia est complexus, ut omnibus nobis, & doctis vi-
 ris, quotquot his capiuntur literis, miraculo sit. Egre-
 gium sanè vaticinium: sed en etiam votum Erycij
 Puteani, iam tum Mediolani, ut suprà est dictum,
 Eloquentiæ, & Chronologiæ professoris. Is scribens
 ad Peireskium, O vulnus, inquit, quod Pinelli mor-
 te acceptum est! Abiit æternus ille vir, ipse nominis, &
 fama securus: sed nos in desiderio, & dolore reliquit,
 Musas in squalore. Quis succrescet, & dolorem nobis de-
 met, Musis squalorem? Non doctrina, sed opibus quo-
 que opus. Quis? fallor? an tu ipse hûc vocare, ut sis
 quod Pinellus fuit? Vouco, vouco, & saluere te iubeo,
 Iuuentutis spes. Quo loco fortassis non ingratum
 erit, si Peireskij responfionem adtexuero. Sic igitur
 ille rescripsit. Peruellis animum meum dolore, dum mihi
 incomparabilis viri morte vulnus inflictum refricas. Me-
 ritiò tu quidem funebreis, ac luctuosas voces ingeminas;
 meritiò vicem nostram deploras, meritiò omneis ad lugen-
 dum inuitans exclamas, Quis nobis dolorem demet, Mu-
 sis squalorem? Sed in fine risum excitas, dum, quasi va-
 ticipinari velles, subiungis me, quod Pinellus fuit, futu-
 rum; idque, tanquam fieri posset, seriò voues. Quod per-
 inde est, ac si ingenti succisa pinu voueres, ut humilis ali-
 qua myrica robur illius, ac proceritatem æquaret. Verùm
 amor erga me tuus hoc tibi, quiduis aliud meditantii, vo-

DE VITA PEIRESKII

52

1601. tum extorsit, cuius, ut reor, nunquam te damnatum iri, aut reum fore sperasti. Quod si ego tibi idipsum vouens, vatis illud accinam, Tu nunc eris alter ab illo, qui te penitus nôrunt, sat scio, me vatem affirmabunt haud vanum; tuæ namque hoc opus opis non meæ. Argutè sanè, & eleganter; tametsi id dissimulauit, quod verissimè à Puteano dictum, ad subeundum id muneri, opibus quoque opus esse. Fuère & aliæ perelegantes vtrimque literæ conscriptæ, exstâtque speciatim vna edita in secundis Ferculis, seu centuria Epistolarum Puteani secunda, qua sub initium sequentis anni, qui fuit supra millesimum, sexcentessimumque secundus, ille gratiosè conquestus est se Deorum genus nominatum. Fuère, inquam, aliæ literæ conscriptæ: sed ad rem facienteis excerpfi, ex quibus abundè intelligitur quàm appositè Ianus Gruterus in præfatione magni illius Inscriptionum voluminis ita coniunctim nominârit, commendaueritque Erycium Puteanum, & Nicolaum Fabricium, ut iuuenes esse præ cæteris dixerit,

— Sacros qui sollicitare flores

Aonidum, totâmq; solent haurire Aganippen.

Versabatur porrò sub prælo ingens illud opus, cum Pinellus concessit fatis: Peireskii autem suppeditauit, quæ in illud infererentur, non modò ex iis, quæ inter Pinelliana cimelia, sed etiam ex iis, quæ Romæ, quæ Venetiis, quæ aliis in locis obseruârat, descripserâtque, ut docet illud toties subiectum inscriptionibus, *Ex Nicolai Fabricij schedis.* Venio iam ad Marcum Velferum, cuius interuentu Gruterus.

chedas illas obtinuit. Ille Pinello propè par, & 1602.
singularis amicus, florebat Augustæ Vindelicorum
Duumvir. Me tacente, scripta illius, omnesque viri
cruditi, opem ipsius munificam, paratissimamque
experti, quantus vir fuerit, satis loquuntur. Velle-
rus ergo, literis ad Peireskium datis, testatus est
tanti se facere ipsum, eiusque amicitiam, ut nihil
sibi fuerit ex tota Pinelli hæreditate expetibilius.
Quin etiam ipse quoque illum non-modò virtutum
Pinelli hæredem agnoscens, sed futurum quoque
suarum successorem coniiciens, diligere cœpit, tan-
quam filium, & literarum frequentiam, quoad vixit,
non destitit testatum facere affectum. Hoc vno ipsi
durus fuit, quòd sui effigiem constantissimè dene-
gavit, pro eo, quo omnibus aliis ardentissimè fla-
gitantibus denegauerat instituto. Et Peireskius ta-
men, ut alios nonnullos, sic illum nescientem pin-
gi procuravit, conducto artifice, qui ipsius vultum
è clandestino loco spectaret. Sic obtinuit quod illi
Occo sperare nefas prædixerat, cum id abs Velfero
tulisset responsum, *Cato maior posteros volebat quære-
re, cur sibi statua nulla posita: mihi contrà, quantum
video, cauendum, ne quis aliquando miretur, si non ex-
indignetur, qua ambitione consortio magnorum virorum,
quorum imagines se colligere Fabricius ostendit, irreps-
erim. Prætereo autem quàm præclarè Noster illud ex-
ceperit: quippe ad Occonem rescribens, Dixit qui-
dem, inquit, Cato non minùs argutè, quàm sapienter,
se malle, ut posteri quærerent quare sibi non esset, quàm
quare esset posita statua: nunquam tamen, quod légerim;*

se pingi, aut fingi renuit; cuius rei testes esse possunt icones eius non pauca, quæ in hodiernum diem circumferuntur. Igitur nec Velserus, vera Catonis imago, id abnuere deberet, & ne abnuat, precor preceris, ores ipsum, atque exores iterum oro. Subnectendus Velsero est Iosephus Iustus Scaliger, vir ille maior, ac celebrior, quàm ut encomio nostro indigeat. Subnectendus, inquam, ut constet quàm sponte, quàmque alacri mente Peireskii se ipsi, aliisque eruditis deuouerit. Nam ille quidem summopere sibi ipsi est gratulatus, quòd in Pinelli defuncti locum talis amicus successisset; ac occasionem ut accipias, ea fuit huiusmodi. Scripserat Scaliger ad Pinellum, rogans, ut sibi procuraret Hebræicos aliquot libros, itemque nummos aliquos Scaligerorum Principum; ac simul miserat tam Patris, quam sui ipsius autographa quædam, & vtriusque etiam icones, prout ille petierat. Scripserat vnà Carolus Clusius, miseratque exemplum suæ rariorum plantarum Historiæ, & iconem desideratam Matthiæ Lobellij: ne quidpiam dicam de destinatis à Scaligero literis ad Carolum Leberoneum Valentinum Episcopum Patauium commorantem. Peruenire ista Patauium, cum non modò iam Pinellus obiisset, sed discessisset etiam ex vrbe Cæsar Dux Acheruntij, qui fuit Pinello ex fratre nepos. Quia verò is Gualdo mandauerat, ut siquid datum foret ad Paruum, id exciperet, & Neapolin ad se mitteret: idcirco Gualdus omnia excepit, ac priusquàm transmitteret, cum Peireskio communicauit. Itaque Peireskii, cala-

mo arrepto, rescripsit ad Scaligerum: nuntiauit non modò Pinelli, sed etiam Episcopi mortem: securum fecit de donariis à memorato Cæsare grato animo accipiendis: recepit in se quam Pinello commiserat curam librorum Hebraïcorum, ac numismatum: pollicitus est se aliqua saltem, quæ haberet iam, occasione prima missurum: obtulit & nonnulla alia ad illustrationem Scaligeræ gentis, quam cum veneraretur, adiecit se non commisisse, ut icones illæ abirent, quin exempla sibi earum obtineret. Scripsit pari modo ad Clusium, ac dici non potest, quantum illi se tam generosæ indoli, ac singulari humanitati deuinctos prædicauerint. Hûc spectat illa Scaligeri ad Velsærum Epistola, quæ est in tertium librum inserta, & in qua, *Numismata*, inquit, *gentis Scaligeræ cum literis Fabricij nostri, & tuis accepi; quo nomine gratias tibi ago. Nondum Hebraïcos accepi libros, quos ille ad me ex Italia misit; quia inter mercimonia Raphaelengiana sunt, quæ nondum hûc perlata sunt. Prope diem, quum accepero, & illi, ut gratias agam, scribam, & à me quoque alias expectata.* Scripta est autem Epistola 1 v. Idus Maij. An subinde commemorabo aliquos ex iis, quibus alacrem operam nauauit? Impremis certè, si quid fuerat à Pinello priùs tentatum in studiosorum gratiam, id contempione maxima perficere adnixus fuit. Sic nullum lapidem non mouit, ut quam ille spem fecerat Prospero Alpino per celebri Medico recuperandi de tertia Methodicorum secta tractatus, opere ipso posset explere. Deinde, cum dicendi sint, quos Pinelli exemplo iuuat, vnus instar

1602.

omnium esse posset memoratus Pignorius, dum Iliacam mensam exponens (Tabulam nempe illam aeneam Hieroglyphicis Ægyptiis insignem, quæ ex Petri Bembi Cardinalis reliquiis eo tempore in Ducis Mantuæ Bibliotheca asseruabatur) gratias quidem egit imprimis Velfero, sed subiecit tamen, Nicolao dein Fabricio Chalasi Domino, natalium splendore, & recondita eruditione illustri adolescenti, qui non modò insignes antiquitatis reliquias, quibus instructissimus est, in meum, & studiosorum usum munificè contulit; sed etiam aliorum Musæa, ut paterent, sedulò curauit. Eius diligentia factum est, ut non modò Venetiis Friderici Contareni Diui Marci Procuratoris, & Ioannis Mocenici illustrissimorum virorum præclarissima nummorum, & gemmarum κειμήλια mihi in promptu essent; sed & Roma ornatissimi viri Lælij Paschalini κέρας ἀμαλθίας (cur enim hoc nomine non appellem bonæ copiae diuitem thesaurum ?) de quo nobis numismata, gemma, sigilla, rara omnia insigni humanitate suppeditata sunt. Eidem Fabricio acceptum ferri debet omne id, quod è Natalitij Benedicti pretiosis oculis euulgamus, è quibus auctario nostro cum robore, & incremento spiritus accessit. Ea enim omnia, quæ ad illustrandam Epiphaniij, Irenæi, & aliorum Patrum historiam Sæctarios antiquos exagitantem attulimus, inde profecta sunt. Hæc fusiufculè refero; quoniam ex iis, quæ iam antè attigi, pluscula confirmant. Adde verò circa Pignorium, cum is librum de Patauinis originibus scriberet, obtinuisse illi Peireskium à Ioanne Vincentio à Porta, quod ipse postea memorauit, & Philippus etiam Tomafinus in Tito Liuiio retulit, circa

circa Parentis historiæ bracchium. Nimirum ci-
 ues Patauini ex asseruatis apud se Titi Liuij ossibus
 alterum bracchium exemerant, concesserantque in-
 clyto illi studiorum fautori Alphonso Arragonum
 Regi, cum illud instantissimè per Antonium Panor-
 mitam Legatum suum exorâisset, ab anno usque sa-
 lutis millesimo quadringentesimo quinquagesimo
 primo. Cum ignoraretur verò ecquid de bracchio
 actum foret, occasionem cepit Peireskius mittendi
 complura ad Portæum munuscula, quasi compen-
 sans ectypum marmoris cuiuspiam, in quo erat ex-
 pressus ritus mittendi milites sub iugum; ac simul
 efflagitauit vt rescriberet, quid pro sua sagacitate de
 bracchio compertum haberet. Rescripsit autem ille
 consequenter, neque Alphonsum morte præuen-
 tum, neque etiam Panormitam condere potuisse pro
 votis id bracchium: successorem verò istius à secre-
 tis regni, conclusisse sub marmore, collocassè-
 que extra Oratorium, cum inscriptione huiusmodi,
 T. LIVII HISTORICI BRACCHIVM, QVOD
 OLIM ANTONIVS PANORMITA A PATAVI-
 NIS IMPETRAVERAT, IO. IOVIANVS PON-
 TANVS MVLTOS POST ANNOS CONDIDIT:
 cæterum à multis iam annis id marmor non fuisse
 conspectum, ob facellum à nescio quibus confra-
 tribus superextructum. Vt fuit porrò Peireskius er-
 ga Pignorium munificus: sic fuit etiam erga Vlyf-
 sem Aldrouandum percelebrem illum de Animalibus
 scriptorem, qui multa ab eo numismata habuit,
 maximèque Asiatica, illustrandis iis, quæ circa ani-

malium symbola iam ediderat, ac tum de nouo apparabat. Atque is quidem Bononiâ scribens animo reuerâ grato pollicitus est se commendaturum per quem profecisset : sed in cæcitatem breui incidens id, quod destinârat, perficere potis non fuit. Idem fuerat pollicitus Ioannes Baptista Villalpandus, de illius nomine, patria, conditione sollicitus, ut testari posset à quo accepisset & ficos, & pleraque alia, amplificando tractatui de nummis Hebræicis, post editos iam magnos illos in Ezechielem commentarios. De Sirmondo heic memorandum, quòd cum accipere à Peireskio Roma discedente noluiisset, nisi ex iis numismatis, quæ geminata illi adessent, postulauisset ipsum tamen, obtinuisseque ab eo, postquam Patauium rediit, plusquam ducentos ecypsos, vel ex Græcanicis duntaxat. Eius scilicet generis cœgerat iam supra mille, quæ forent penitus intacta rei nummarie auctoribus : & cum haberet cusa tam ante, quam post Romanum imperium in ciuitatibus quibusque Græciæ, Asiæque præcipuis, ex quibus contexuerat seriem Seleucidarum Principum, ab Alexandro ad Romanos usque : eamobrem Sirmondus hanc seriem desiderauit cognoscere, ut illius instar seriem Principum Ægyptiorum texere posset. Sed faciendus his modus est. Porro iam penè triennium in Italia exegerat, cum apparare reditum cœpit. Ac habuerat quidem in votis Venetiis tendere Augustam, tum ut Velferum, Occonémque ea in vrbe inuiseret : tum ut exinde commissus Danubio circumstantia Germaniæ, Hungariæque loca lustraret.

& Constantinopolim tandem per Euxinum Pontum, Bosphorūque Thracium perueniret, peragraturus deinceps quicquid liceret ex Græcia : verū Fonuius planè abnuit , vel quia censeret Patrem, Patruūque id consilium auersaturos, ob digressionem prolixam nimis , periculūque plenissimam ; vel etiam quia ipse Parisios repetitò accerferetur. Peirefkius ergo nihil planè ausus ipso repugnante moliri, res suas ita composuit , vt imprimis omncis Italiæ amicos, quibus vale coram dicere non potuit, literis salutauerit, oblatōque obsequio, & plerumque etiam adiunctis munusculis deuinxerit. Sic exteros quoque, ac præ aliis Scaligerum , cui ad superius memorata adiecit nummos ab amicis Veronensibus recens habitos , nonnullaque alia spectantia ad Scaligeranam familiam. Coëgit deinde quicquid potuit seu librorum , seu cimeliorum , seu aliarum rerum exquisitarum nancisci : ratus sibi in patria parem copiam non occurruram. Discessurus coniecit omnia cum sarcinulis in aliquot capsas , quas direxit Genūam , conuehendas inde Massiliam : ac reseruauit solūm rariora, & pretiosiora aliqua, quæ vnà translata eandem secum experirentur fortunam. Videlicet , cū sibi satis lustratum putaret ex Liguria, peragrarè Galliam Cisalpinam voluit, emergerēque Lugdunum , vt prouidere illeic posset quemadmodum litteras ab amicis acciperet , & vicissim ad illos daret. Postremū relicto ingenti sui desiderio Patauij præsertim, ac Venetiis (ne quid piam dicam de Augusta, vbi Velserus concepta ipse complectendi illum frustratus,

1602.

quasi dimidium animæ subduceretur, ingemuit) itineri sese commisit. Diuertit autem primum Vicentiam, salutaturus illic amicos, ac inuisurus eum montem, cuius, ut dictum est iam antè, ichnographiam quasierat. Considerauit etiam Gustosâ illam venti dispensationem per canaleis, ac tubulos; accepitque, & in commentarios retulit historiam illius, qui nascentem è crypta ventum in loco satis dislito, domum usque per meatum subterraneum ita deduxit, ut tandem velut secuerit, distribueritque pro arbitrio. Accessit deinde Veronam, attenditque illic præsertim ad Scaligerorum sepulcra, quorum, quia tum non licuit adumbrationem obtinere, impetrauit postea interuentu Cæsaris Nichezola, & Marci Antonij Montani. Mantuæ cum foret, tam multa vidit, atque adnotauit in Ducis Cimeliarchio, ut cum superioribus annis accepisset direptum fuisse, Germanis urbem vastantibus, vix satis sese consolari per multos dies potuerit, tantam ducebat factam iacturam. Inter cætera spectauit curiosè Ægyptiam illam Tabulam, ut varios de ea scrupulos eximere Pignorio posset. Visâ Cremonâ, voluit Brixiam, Bergamumque diuertere, ac tum venire Mediolanum, ubi non modò Erycius Puteanus, & Septalij fratres, aliique amici; sed maximè etiam ille nunquam satis laudatus Archipræsul, Cardinalisque Fridericus Borromæus, Ambrosianæ Bibliothecæ iam tum crebrescentis fundator, sunt illum humanissimè, ac per dies multos complexi. Digressus Ticino, Nouaria, Vercellis, peruenit Taurinum, ac superatis Alpibus,

Geneuam ; vbi peruolutis libris variis , spectatôque 1601.
Lemmano lacu , Tononum vicum adiit , vt fieret
oculatus testis admirandorum facinorum , quæ pa-
trare per illud tempus Dæmoniâci perhibebantur.
Traiecto lacu , perlustratâque circumuicina Heluetia ,
soluere vota placuit ad celebre fanum Sancti Clau-
dij , ac præsertim pro Patruî cognominis incolumi-
tate. Desistere inde volebat Semurium , Dau-
idem illum quondam suum præceptorem salutatu-
rus , ædeisque illas inuisurus , in quibus ante quin-
que annos Genebrardus obierat : sed rerum in Bur-
gundia ob factionem Bironij Marefcalli innouata-
rum , suspectarumque status deterruit. Dflexit ergo
potius Lugdunum , vbi acceptâ pecuniâ , persoluit
largè honorarium Ductori suo Parisios , vt iam di-
ctum est , discessuro. Deinceps , quamuis amore
patriæ , parentumque teneretur , callidè tamen con-
siliû cepit non pergendi recto itinere domum , sed
discedendi Monspelim , vbi Iulius Pacius à Beriga
Iurisconsultus Vicetinus profiteri magna cum laude
Iurisprudentiam ferebatur. Quia enim satis sibi ipsi
circa Iuris studium nondum fecerat , & apud se ta-
men constituerat neque postulare , neque adipisci
quam lauream vocant Doctoream , absque insigni
quadam gloria , testationeque eruditionis ; idcirco
domum tendere noluit , ne inuitus adigeretur ad
consequendum lauream , possêtque prius sub illustri
Antecessore fieri instructior. Itaque concessit Monf-
pelium sub Iulij mensis initium , seque statim ipsi
Pacio in contubernium cum fratre dedit. Subinde

1602. verò consilium indicauit Patri, ac Patruo, qui nihil tale suspicantes subueriti sunt, ne fortè in Italia non satis studiosè Iuri incubuisset. Præter eum secessum, argumento fuit, quòd tam ex capsis Genuâ acceptis, quam ex transmissis residuis illis, selectioribûsque cimeliis, quibus Monspelium cùm peruenisset, sese exonerauerat, peruiderunt illum debuisse tantum temporis in iis colligendis, cognoscendisque impendere, vt nihil, aut parum omninò, quod impenderetur Iuri, superfuisset. Id autem vbi ille resciauit, quadam veluti apologia suspicionem est amolitus. Nimirum, se nihil detraxisse horis Iuris studio debitis; sed tantum quas alij aut ludicris rebus, aut computationibus, aut Venereis illecebris vulgò dederent, succidisse, contriuisseque in comparanda antiquitatis notitia. Quam viderent de ea congeriem, argumento saltem esse pecuniam sibi creditam non fuisse in nequitiam, perditosve vsus absumptam. Cæterum & se agnouisse non esse studium antiquitatis Iurisprudentiæ inutile, cùm alia ratione non possent pleraque loca seu Digestorum, seu Codicis intelligi; & posse ipsos id experiri, cùm quod, exempli gratiâ, lateret iam Interpretes circa Viriolas ex smaragdis Vlpiano, ac Paulo sapius memoratas, intelligere ex iis possent, quas eruisset Romæ ex quibusdam ruderibus, quasque ad illos mitteret, rem iam à plerisque sæculis inuisam. Existare etiam in sarcinis plureis reliquias ex eo Ære, quod antiqui graue dixerunt (cùm id nimirum penderent) interque parteis Assis varias reperiri Qua-

drantem , qui altera facie Suam præferat, ex quo, 1602.
& ex Oue , ac Tauro pariter signatis , dicta primùm
fuit Pecunia, tanquam à pecudibus. Sic & repertum
iri alia propemodùm innumera , de quibus coràm
differere, sine voluptate vtriusque non posset. Deni-
que tam sese , quàm fratrem non diuertisse ad Pa-
cium , quòd se Iuris ignorantiores suis coætaneis
crederent; sed quòd eximium aliquid supra ipsos sa-
pere vellent. Placuit mirè parentibus instituta de-
fensio , ac Patruo præsertim , qui tanto ardore vi-
dendi ipsius inarsit, vt, vix tertio mense exacto, ac-
cessitum voluerit. Accessit ergo ; sicque Larcis reui-
sit primùm mense Nouembri , sed adducto tamen
secum Pacio , vt vel reducendi ipsius prætextu deti-
neri domi non posset. Relictus verò germanus fuit,
quòd è morbo tum conualescens sese dare itineri
absque periculo non posset. Heic non memorabo
qua exultatione exceptus Peireskius domi fuerit,
neque quo cultu habitus Pacius. Referam duntaxat
magnum illum virum Guillelmum Varium, qui tum
erat princeps Aquensis Senatus , quisque fuit post-
modùm suffectus, vt suo infra loco dicetur , in vi-
cem Cancellarij , mirari satis non potuisse indolem
adeò egregiam , raràmque adeò eruditionem tanta
cum modestia coniunctam ; neque vnquam satis sa-
tiari interrogando , excipiendòque quæ ille scitè,
perspicuè, suauitèrque commemorabat. Paucis post
diebus Monspelium ynà cum Pacio rediturus, desle-
ctendum è via censuit, vt demonstrare illi posset
scaturiginem Vallis clausæ, non aquarum exundan-

1602. tium copia magis, quàm Petrarchæ, & Lauræ amoribus concelebratam: itémque Arcum illum triumphalem, qui Araufione conspicuus, C. Marij credebatur, cum ipse Fabij Maximi potius esse opinaretur; tum ciuitatem Auenionensem; & fornicatum triplici serie Wardonis, seu Guardonis pontem; ac Nemausentia quoque nonnulla, quæ ille non aduerterat, tametsi illeic biennio moratus. Quam-primum autem rediit, tanta se cum alacritate ad studium Iuris composuit, vt horas decem solidas diebus singulis in eo collocaret. Neque verò id solum tempus consecratum est studiis; sed dictim etiam quasdam horas, ac potissimum ante somnum impendere solitus fuit litteris humanioribus, studioque rerum antiquarum. Non id abnuebat penitus Pacius, qui mirè etiam afficiebatur, quoties illum de rebus variis, ad antiquas præsertim leges pertinentibus, dicentem audiret. Quin non modò etiam est passus, sed penè, dicam, auctor fuit, vt Narbone inuiseret, quæ exstant illeic vetustatis non ignobilia monumenta; ac speciatim votum, factamque Augusto Aræ dedicationem, cuius ante annos triginta effossæ, & Burdigalæ, cum illustratione Eliæ Vineti, excusæ exemplum obtinuerat. Scilicet nondum allatum erat Inscriptio-num Gruteri opus, in quo postea obseruauit Tributiam Augusti potestatem, quæ apud Tacitum legitur trigelima septima, fuisse ex hac ipsissima inscriptione trigesimalam octauam. Ad hæc, quia Pacius perlubenter edissererebat de rebus ad Physicam spectantibus, nullam non occasionem captabat rogitandi

tandi illum de causis naturæ abstrusioribus, & maxi- 1603.
mè quidem per horas relaxando animo datas. Sis-
cùm aliquando noctu incidisset in crustas, squam-
mâsque piscium lucidas, collegit, intulitque clàm
in Pacij Musæum; ac postea cum illo ingressus, quam
præfererat candelam consultò exstinxit, vt illo pri-
mum attonito, ac deinde lucem mirante, sciscitare-
tur ipsius causam. Ac recurrit quidem Pacius ad ca-
lorem ex putredine excitatum; sed rogauit Peires-
kius, cur non sentiretur ergo calor neque in iis
squammis, neque in quibusdam lignis putrescenti-
bus? cur horrea præ putredine incalescentia, calx
item madefacta, & alia tantoperè calida non emit-
terent lucem? cur si ob calorem cicindelæ lucent,
non lucerent etiam animalia cætera tantoperè iis ca-
lidiora? Ad quæ Pacius, posse calorem, quem in scho-
lis dicunt virtualem, sufficere; & aliunde exigì cer-
tam dispositionem materiæ, quæ reperitur in rebus
minùs ad sensum calidis, non reperta in aliis calidio-
ribus sensu deprehensis. Prætereo porrò, cùm hæc,
& alia non fecissent satis Peireskio, nihil deinceps
visum fuisse probabilius, quàm lucem omnem flam-
mulam esse, sed rarissimam, tenuissimamve: argu-
mentoque esse lucem Solis, quæ dum cogitur, den-
satúrque, ardet; ad eum modum, quo vapor nihil
aliud, quàm aqua rarefacta, tenuatáque est, quæ rur-
sus coacta, densatáque, humor apparet. Cùm lux
autem Solis directa, seu primaria sit adhuc satis den-
sa, vt calorem sui sensibilem faciat; reperiussam ta-
men, secundariamve adeò tenuem euadere, vt eius

1603. calorem sensus non percipiat. Quare & nihil mirum videri, si lucula illa squammarum, similiumque rerum non sentiat calida; cum sit longè tenuior illa solari secundaria, intra quam planè evanescit. Quòd res autem calidiores non perinde luceant, causam dici posse, quòd calor vehementior terriores excitet vapores, seu fuligines, quàm ut connatam luculam patiantur puram emergere, atque idcirco apparere. Rursus, cum foret valdè curiosus rei anatomicae, ac herbariae; ea propter quoties licitum erat, diuertebat in Regios hortos, à quatuor iam annis instructos, ad Richerium Belleuallium vtriusque demonstratorem, cui nunquam non fuit Peireskij & desideratissima, & iucundissima consuetudo. Diuertebat etià frequens ad Franciscum Ranchinum, qui ad peritiam Physices, Medicæque eximiam, pulchrè adiungebat notitiam, cultumque rerum antiquarum. De Ioanne Dortomanno quid dicam, cuius semper solitus fuit & exquisitam doctrinam, & insignem erga se benevolentiam commendare? Hoc certè Medico est usus, cum febriculâ laboravit, cùmque vexatus est grauiore, quàm eò usque fuisset expertus, dolore hæmorrhoidum, & nonnulla etià urinae emittendæ difficultate. An adtexam verò quod retulit sæpius, cum Dortomannus aliquando ægotantem inuideret, rogareturque, cur ea vice seriùs solito aduenteret, respondisse ipsum se accedere ex consultatione memorabili pro muliere Belliquadrensi, quæ tum gestaret vtero mensē iam vigesimum tertium. Ea nempe iteratò nupta, cum ex priore coniugio par-

rus aliquot nonimestreis edidisset, ex posteriore tamen ediderat treis, vnum mensium vndecim, aliorum quatuordecim, tertium verò octodecim: & quoniam ex periculis antecedentium puerperiorum, coniciebat sibi ex quarto impendere grauissimum; medicos idè consuleret, si qua ratione incolumis evadere ex illo posset. Et memini quidem obieciſſe me, videret, ne eſſet eadem fœmina, quam non ita pridem Antonius Saporta, aliſque Medici propter ſimile neſcio. quid non omnino ſanam mente pronuntiäſſent. Verum perſtitit fuiſſe aliam, adiiciens ipſam non longè poſt peperiſſe infantem cum capillitio, ac dentibus, obtinuiſſeque à coniuge, ne ulterius contingeretur. Vt cumque pòrò hac de re ſit, (quam venditare pro verà nolim) occaſione partim morborum, partim vehementioris ſtudij, effectum eſt, vt literas ad amicos ſcriberet raras. Inde euenit, vt cum ſemel totos quatuor menſeis à ſcribendo abſtinuiſſet, & periſſent etiam deſtinatæ quædam in Italiam epiſtolæ, idè rumor de eius morte Romæ, ac Patauij præcrebuerit; & Pignorius etiam ad Patrem conſolatoriam ſcripſerit; Gualdus verò, falſitate rumoris comperta, illum quaſi rediuium ſalutauerit, crudelem blandè appellans, quod ſuâ in ſcribendo negligentia, amicos tam bonos, tamque conſtanteis enecaret. Videlicet non admittebant quod expectandas à ſe raras literas præmonſtraret, donec ſtadium Iuris foret abſolutum. Quare compulſus denique fuit, vt ſapiuſculè ſcriberet; neque ad ipſos Italos modo, ſed ad ipſos quoque Veſerum,

1603.

Scaligerum, Clusium. Quia porrò ambages nimis erant magnæ; cùm oporteret literas Augustâ, atque Francofurto transdere in Hollandiam; ideò Scaliger auctor fuit, vt literæ mutuo destinarentur Parisios, ad Præsidentem illum eximium Iacobum Augustum Thuanum, cuius nomen diffusius est, quàm vt elogio vllò possit comprehendi. Etenim, quòd Scaliger illum & sui amantissimum, & pro singulari in bonos, eruditòsque omneis affectu ad omne genus officij paratissimum comperisset; idcirco eam ipsi curam non dubitauit committere, vt commendatas ab utroque literas ex æquo curaret. Quare hac primùm occasione, & ex hoc vsque tempore cœpit quæ magna, exultatque deinceps fuit, inter Peireskium, & Thuanum necessitudo. Ad Patrem verò, ac Patrum, æti par fuit, scripsit frequentius: sed maximè vt obtineret, ne ante finem eius anni, qui fuit huius sæculi tertius, Aquas-Sextias euocaretur. Et quia nôrat ciueis Aquenseis ea tempestate procurare, vt non modò Regium Collegium pro humanioribus literis, ac Philosophiæ studio haberent; sed vt priscam etiam Vniuersitatem, Regiis Professoribus illustratam facerent; capropter scribens ad Parentes miro contendit studio, vt Professori primario Iuris ampla forent stipendia, quo Pacius illud accerferetur. Siquidem perspectum habebat tam Palatinum Comitem, quàm Academiæ Curatores euocare illum ingenti pollicitatione Heidelbergam, vbi iam per complurèis annos sui specimen dederat; ipse verò & exspectabat posse Aquensem Academiam tan-

ro ornamento gloriari, & ægrè ferebat excidere spe, 1603.
 quam satis firmam conceperat efficiendi demùm ex
 illo virum Catholico-Romanum. Cæterùm, cùm
 non posset ampliùs Patruì votis oblistere, quippe qui
 resignata illi dignitate Senatoria, etiam ab anni ini-
 tio regium diploma quæsierat; accessit tandem
 Aquas Sextias, vt necessarium illi habendæ docto-
 reum gradum consequeretur. Non accessit autem
 nisi priùs optimè exercitatus, ac nisi obtenta in fi-
 nem anni dilatione, tum vt Pacium per ferias Na-
 talitias deduceret, tum vt intereà se ad varias actio-
 nes obeundas meliùs compararet. Etenim quia mo-
 ris tum erat in Aquensi Academia, vt nemo priùs
 ad lauream Doctoratus admitteretur, quàm, præ-
 ter alia tentamenta, triduanas theseis defendisset; id-
 circò theseis miscellaneas exvtroque Iure desumptas,
 maturè & seligere, & mandare typis oportuit. Et
 aliunde, quoniam à Patruo accepturus vno die Do-
 ctoratus insignia, constituerat ipse in fratrem inse-
 quenti die conferre; eapropter habere sibi tempus
 voluit, ad congerendum vnde posset insigniorum
 originem, vetustatèmq; explicare. Accessit ergo
 tandem cum Pacio sub brumam Aquas-Sextias: ta-
 met si gradum adeptus non est, nisi die Ianuarij in-
 sequentis anni decima octaua. Tædium fortassis pa- 1604.
 rerem, si vel per capita attingerem ea, quæ magna
 cum eruditionis testatione edisseruìt singulis illis
 actionibus, quibus est Lauream consequutus. Satis
 esto subiicere, gessisse se illum eo cum vigore animi,
 vt non totam modò coronam in admirationem ra-

1604. puerit; sed ipsi etiam Pacio visus fuerit seipsum longè superare. Biduo post, cum ornamenta Doctorica in Fratrem conferret, dici non potest qua suauitate auditores perfuderit. Scilicet ex statua quadam Metrodori cum galero suo, seu Arcadico pileo, & infulis, cumque pallio philosophico, & annulo in sinistra manu: itemque ex statuis quibusdam Hippocratis cum simili pallio, epomidèque adiuncta: ex inscriptione quadam Eubuli Marathonij, ac infulata statua non ad ceruices, sed circum caput: ex consimilibus Platonis, Theophrasti, Phaulorini, aliorum: ex cimeliis Gotthicis, in quibus mitræ pileis non admodum absimiles; ex innumeris aliis (vt breue faciam) monumentis, ostendit quemadmodum vsus eiusmodi ornamentorum ab vsque Græcis ad Latinos, & ad nos vsque transierit; quemadmodumque ex Philosophia atque vetere Sacerdotio, gradum fecerit in doctrinam, Professionemque multiplicem recentiorum Academicarum; idque citatis passim Conciliis, Patribus, Poëtis, Historicis, Philosophis, Oratoribus, quibus plenam faceret fidem.



DE VITA
PEIRESKII
LIBER SECVNDVS.

Vix iam defierat celebritas, cùm memoratum antè diploma, ne, anno maius, antiquaretur, Senatui exhibendum fuit. Id ergo exhibitum quidem, & in acta referri iussum: verùm obtinuit Peireskius, ne propterea statim admitteretur, conscribereturque reipsa in Senatorum numerum; tum quia videri noluit ex eo numero Patrum amantissimum exegisse; tum quia timuit, ne si semel astringeretur officio, sibi & libertas studiorum, & occasio peregrinandi maturè nimis præriperetur. Heinc quoniam ad amicos scribens, & occupationes doctoreas in excusationem diuturni silentij prætexens, insinuavit simul se ad Senatoriam dignitatem adigi non sponte: responsa tulit varia, congratulantibus plerisque, quòd iam inter Senatores cooptatum arbitrarentur. Ex istis fuit Scaliger, qui & dignitatem nouam commendauit, & con-

gratulatus ob lauream, subiunxit et aliàs adfuisse
 Aquis-Sextiis, testem seueri examinis, quo Academia
 vteretur. Fuit etiam, Velferus, qui non modò est ob
 dignitatem congratulatus, sed admonitionem etiam,
 adhortationemque paternam adhibuit, ac inter cæ-
 tera, *Non esse animo ipsi despondendum: munus Senato-*
rium tametsi spinosum, id tamen prima fronte duntaxat;
principium solùm molestum esse, lenire tempus cætera: ni-
hil supra vireis exactum iri; fore Numen propitium; de-
beri patriæ operam, & quædam alia in eundem sen-
sum. Sic adhortatus etiam est Pacius, statim ac re-
 diit Monspelium, epistolâ nuncupatoriâ, qua Im-
 perialium Institutionum Analysin ipsi dicauit; quan-
 quam, quòd nosset illum nondum inter Senatores
 relatum, dicauit, ac inscripsit solùm, tanquam in
supremo Prouinciæ Senatu Consiliario Regio designato.
 Non pigebit porrò hûc transcribere ipsissima, nun-
 cupationis, & adhortationis verba. Sic ergo illum
 affatus est. *Ad te verò, mi Fabrice, meas lucubrationes*
mitto. Cùm enim tu antiquis moribus præditus, à nostro
conuictu, vnà cum suauissimo fratre tuo in patriam re-
diens, vetusto more, præclara xenia, vel potius munera
obtuleris, quibus vestram, vestrorumque Patrum, & Pa-
tris virorum amplissimorum, & regionum in supremis Se-
natibus Consiliariorum erga me, meosque beneuolentiam
testatam reliquistis: me quoque oportuit, ne ab antiqua,
& laudatissima consuetudine discederem, aliquid inuicem
rependere, quod grati animi testimonium esset. Quid au-
tem à me proficisci potuit, quod tibi gratius esset, quàm
aliquid ex his studiis depromptum, quibus nobilissima tua
 familia

familia maxime floret? Nam pecuniâ neque tu egēs, neque ego abundo: hæc verò studia amas, & colis; ac te ex nostris prælectionibus, atque exercitiis profecisse lubens fateri soles. Eximia verò laudis, quam tuo merito in doctoreo gradu assumendo es consequutus, participem me quoque esse vis, quasi nostris monitis, & præceptis adiutus, ad illud eruditionis culmen, quod multi frustra aspirant, ascenderis. De quo tuo, optimique fratris tui nouo honore vobis ex animo gratulor; & ut iam Senatorios animos accipiat, iam in Rempubicam, qua vestram operam requirit, omneis vestras cogitationes conuertatis, publicumque bonum perpetuum vestrorum consiliorum obiectum statuatis, etiam atque etiam hortor. Hac enim re nulla vobis dignior, nulla parentibus vestris (Patrum alterum vestrum parentem agnoscitis) gratior, aut iucundior esse; nulla vos illustriores reddere potest. Hactenus Pacius; Peireskii verò animum quidem allegendi se aliquando Senatoribus non abiicit: non intermisit etiam ptorsus susceptum Iuris studium: verum dilatione obtenta, & liberioribus iam studiis, ad colendum suauiores Musas, ad promouendum bonas artis, ad adiutandum, quantum potuit, viros bene de literis merentis animum applicuit. Ac primum quidem variè sollicitatus de coniugio, cœlibem vitam prætulit; ratus non posse se vxoris, succrescentisque familiæ sollicitudinem gerere, & expeditum se erga studia, virósque studiosos tueri. Heinc cum Pater, ipso inconsulto, conuenisset propè de nuptiis cum viri illustris Ioannis Ceppedæi primi Rationum Præsidis vnica filia contrahendis, veniam

1604. ardentè petiit non discedendi ab instituto. Quippe se Palladi, ac Musis nomen, fidemque ita dedisse, ut sacrilegium duceret de aliis nuptiis cogitare. Et Pinelli quidem exemplum, alta licet mente repositum, noluit Patri proponere; sed proposuit tamen exemplum Varij, quod præsens ac illustre erat; adiecitque sibi præ aliis domesticum esse coram oculis, quod se non posse, nisi cum laude imitari arbitraretur. Itaque imitatus Patruum ducere uxorem germano concessit; illéque propterea sequente ætate memoratam suprà Marchisam à Tullia duxit coniugem, ex eaque tertio anno post Filium suscepit, quem Claudius Patruus, superstes adhuc, cognominem fecit. Deinde, non admodum longè à doctoreo gradu suscepto, perlustrare placuit maritimam oram, tum ut omnia antiquitatis monumenta peruestigaret, tum ut rariores quasdam plantas per eam regionem deligeret in Belgenferianum hortum transferendas. Quòd duxerit autem initium à Foroiulienfibus antiquitatis reliquiis, circa quas sibi prima vice (discedendo nempe in Italiam) abundè factum non putabat, fuit occasio deducendi Draguinianum usque nobileis consanguineos, qui ad Doctoratus accesserant pompam. Visere autem imprimis voluit opus Romano nomine dignum, intercisam scilicet Rupem, seu excavatum amplum canalem in declivi quadam montis facie, quà Cyanci fluij scaturigo altera forum Iulium, à quinto usque Prouinciali lapide, per anfractus vallium, siluarumque fuit perducenda. Quàm multa verò toto progressu obseruârè,

collegeritque, enumerare prolixum foret: adnoto 1604.
 solum ipsum exinde cepisse ansam conscribendi,
 mittendique varia ad amicos varios. Cætera inter
 plurimi fecit Consulare quoddam numisma, quod
 dicebat insolitum, & neque Goltzio, neque Vrlino,
 neque aliis memoratum, quodque destinavit ad Pi-
 gnorium, vt cum Friderico Contareno communi-
 caret. Plurimi etiam inscriptiones quasdam Flami-
 nij, & Dudistij, de quibus supplendis (nam exesæ
 erant) cum Velfero præsertim egit. Plurimi quædam
 alia selecta, quæ misit ad Scaligerum, & ex rebus aliis
 conchas nescio quas, quarum occasione scripsit ad
 Penam Medicum de Concha anatifera mituli instar
 conformata. Sed vt de Plantis speciatim dicam, co-
 mitem adhibuit Botanicum quendam plantarum
 quouis tempore internoscendarum peritum, capro-
 pterque non solum plantas in suum hortum destina-
 uit, sed plerarumque etiam radices transmisit ad
 Clusium, ac inter cæteras Tragacanthæ, Aristolo-
 chiæ, Asphodeli, Arbuti vtriusque. Significauit au-
 tem simul desiderium, quo vellet Clusium aliquan-
 tisper Belgenferij detinere, ostensurus illi Styracem,
 seu arbutum foliis cotoneæ malo, floribus arantiæ
 non absimilem, & liquoris fragrantia nequaquam
 Syrio posthabendum. Is enim ad vnum milliare iux-
 ta oppidum itanascitur, vt aliàs frustra requiratur.
 Ostensurus etiam Lentiscum, quæ non minus Ma-
 stichen fudet, quàm quæ in Chio insula nasci specia-
 lis dicitur. Ostensurus & alia quædam vix aliàs vs-
 quam obseruabilia. Cùm rediisset, agere cœpit de

1604. instituendo Eremitarum Camaldulensium cœnobio in egregia illa solitudine, subrupeâque Ecclesia, quæ Diuæ Mariæ de Angelis sacra, æquâ propè distantia est Massiliam inter, & Aquas-Sextias. Occasioni fuit, quòd Patauij degens eorum institutum valdè probauisset, eruditusque inter ipsos Religiosus nomine Elias, Nouitij cuiusdam causâ, Aquis-Sextiis tum versaretur. Peireskii itaque illius conuersatione delectatus, ipsum per multos menses detinuit, in solitudine sustentauit, ac sæpiùs per complureis dies commoraturus inuisit. Procurauit intereà vt ciuium tam Aquensium, quàm Massiliensium decreto id cœnobium postularetur. Licentiam quoque instituendi à Mintensi domino, in cuius ditione est locus, obtinuit, ac circumuicinum dominium, seu fundum pretio acquisiuit. Satagit quàm enixè potuit per Patauinum Episcopum, & Cardinalem Palauicinum, vt Congregationis eius Superiores non Eliam modò illeic loci relinquerent, sed religiosos etiam alios in amplissimam messem destinarent. Rogauit, vt aliquos saltem loco visendo committerent, pecuniâque intereà sumptibus faciendis necessariam misit. Et facta quidem plurima spes: sed postremò tamen irriti conatus. Sic votis etiam non respondit redintegratus pro Pacio labor. Siquidem cum incunte vere euicisset, vt Aquenses destinarent Pacio primariam Iuris cathedram, præstituto stipendio librarum Turonicarum bis mille, & quadringentarum, proficisci ipse Monspelium cum Assessore urbis voluit, vt si quidpiam difficultatis obstete-

ret, amoliretur. Et rediit tamen re infecta; præ- 1604.
xente quidem Pacio, quòd tria librarum millia, præ-
ter occurrentia emolumenta, expeteret; sed causâ
reuerâ ab vxore datâ, quæ Catholicam urbem exo-
sa, Heidelbergensem præoptaret. Incidit verò sta-
tim in morbum, è quo vix initio æstatis conualuit.
Importuna præsertim fuit mira cutis teneritudo;
nam quacumque corporis parte tantilla fieret ve-
stium compressio, rubescens tumor cum vehementi
prurigine cooriebatur. Casus hic ansam illi præbuit
philosophandi de Maculis, quas ab vtero plerique
fortiuntur. Quippe cogitatio illum subiit fieri simi-
liter posse, vt qua parte corporis grauidæ mulieres
sefe attræctauerint, dum expetitæ cuiuspiam rei ima-
ginatione tentantur, in eadem Embryonis parte
eiusmodi rei character suboritur, exprimatûrque.
Ita non semel tetulit, ac non multis speciatim an-
nis ante obitum, cum vnâ philosopharemur de qua-
dam canis imagine intra vrinam hominis à rabido
cane demorsû conspecta. Ac difficultas quidem erat,
cur ille character non corpori matris, sed Embryo-
nis inureretur: sed assensit tamen Embryonem vte-
ro gestatum vnum corpus cum matre esse; eadẽ-
que specie alimenti, iisdẽque spiritibus secundum
omneis sui partẽs sic enutrirî, vegetarîque, vt se-
mine ex omnibus partibus deciduo fuit primùm for-
matus. Quare & tenue corpusculum iisdẽ affici
casibus, quibus ipsum corpus maternum; ac posse
ipsi tantò facilius notam aliquam imprimi; dum,
spiritibus speciem conceptam deuchentibus, eo ma-

tris contactu veluti defigitur, quantò ipsum est mollius, ac tenerius. Memini verò id confirmatum memorabili quodam facto, quod ipsi fando accepimus; Muliere nempe grauida in oppido huius Prouinciæ Cipperiis dicto, ante annos circiter sexaginta, pugione confossa, eductum fuisse ex ea Embryonem cum totidem notis liuescentibus, & ad easdem partibus conspicuis, in quibus mater fuerat percussa. Quòd autem, dum illæ fructuum species, cerasa, fraga, aliæque rubescunt, impressi quoque characteres viuidiore rubore sint, causam dici posse affectionem aëris secundum eandem tempestatem similibus spiritibus concitandis idoneam, vt dum vitibus florescentibus vinum in doliis commouetur; sed non est quorsum ea de re vberius quidpiam heic proferatur. Repeto potiùs Peireskium balneorum vsu conualuisse (sanguine putà temperato, perspirabileque facto corpore) ac magno fuisse leuamento, quòd iucundissimam intereà familiaritatem duplicem parauit. Altera fuit cum nobili Francisco Villanouano Flayosci Barone, & Marchionis Transij germano, qui linguæ Græcæ, omnigenæque historię callentissimus, quicquid penèrat in tota Prouincia monumentorum vetustatis perspectum ad vnguem habebat. Altera cum celebri viro Francisco Malherbio, qui deinceps habitus fuit Gallicæ linguæ arbiter, & Poëseos facilè princeps. Inuisebat enim vterque; & cum priorem quidem ipsi patria communis, ac studium earundem rerum conciliasset, posteriorem illi quæsiuit commendatio Va-

rij, clarumque in Prouincia nomen, ex quo tempore fuerat memorato magno Franciæ Priori à Secretis. Heinc proinde cœpit Peireskius Malherbij poemata cognoscere, suspicere, apud exteros commendare. Siquidem cum mense Septembri illa memorabilis Ostendæ obsidio exitum habuisset, pulchraque illa carmina, *Area Parua ducum*, &c. fuissent Gallieis versibus non modò à Vario, sed à Malherbio etiam expressa, misit illicò cum ad alios, tum ad ipsum Scaligerum, quem Latinorum carminum arbitrabatur esse auctorem. Taceo autem vt Scaliger ad ipsum rescripserit auctorem esse Hugonem Grotium, adolescentem lectissimum; puellas verò ex Helicone se, vt senescentem, pridem auersatas; ex quo etiam se excusauit, quòd versus ab eo pro Pinello expetitos non mitteret. Diuersatus per Autumnum Belgenferij, spectauit Rarum illum concursum trium superiorum Planetarum, qui nonnisi anno quoque octingentesimo contingit, & Magna, seu Maxima potius, Coniunctio meritò vocatur. Et mirabile quidem fuit nasci in eo conuentu Stellam magnitudine Iouem æmulatam, quæ supra annum in eodem Serpentarij pede sic perseuerauerit, vt perseuerauerat alia in sidere Cassiopeiæ ante annos triginta duos, & alia rursus ante triennium in constellatione Cyeni. Verum quia tum Peireskio cœlestis globus non aderat, quò fieret certior de siderum non errantium nomenclatura; ideo facilè credidit Nouam illam stellam ex antiquis esse, ac potissimum videns ipsam non, vt Planetas circumstan-

1604. teis, obtusi esse luminis, sed fixarum instar mirè
 scintillare. Acceptis post aliquot menseis à Pigno-
 rio literis, didicit Stellam esse recentem, ac obserua-
 ri à Galileo; idque cùm iam ex vespertino in matuti-
 num situm transiisset: at quia in morbum incidit,
 1605. quò initio veris multùm laboravit, cùm simul quo-
 que agrotarent Pater, Frater, Patruus, Nouerca, &
 domesticorum nonnulli, idcirco sibi à studio eam
 obseruandi temperauit. Ne memorem, cùm voluit
 postea ad illas parteis respicere, stellam sic fuisse iam
 imminutam, vt fixis circumstantibus, perpetuisque
 nihilo maior, ac vna earum credita, euaniisse iudi-
 caretur. Posterioribus tamen annis dolere satis non
 poterat, quòd ad tam rarum spectaculum suis ob-
 uium temporibus studiosè magis non attendisset.
 Per ea tempora cùm Massilià Belgenferium conten-
 deret, transire Castelleto voluit, vt Parochum loci
 nomine Iulianum, ob ingenuam curiositatem sibi
 iam carum, saluaret. Cùm ab ipso aliquantisper ex-
 tra vicum deduceretur, occurrit illis Mulio floridum
 ramum ex Myrto gestans, latifolium, & flore pleno,
 qualem Peireskii neque viderat, neque inaudierat
 exstare. Itaque ratam miratus Plantam, perducere vo-
 luit in mediam siluam, vbi enata fuerat, ac trans-
 ferri ipsam curauit, vt excoleretur, propagaretur-
 que. Transferri autem noluit in Belgenferianum
 hortum, quoniam non aderat qui illam satis dili-
 genter curaret; sed in hortum potius ipsius Iuliani,
 cuius futurum circa ipsam exquisitum studium con-
 fidit. Et excoluit ille sanè, vt par fuit, quosque ex
 planta

planta manente incolumi, propagatio fieri Belgen- 1605.
 scrij potuit. Id attingere visum est, quia nusquam
 in tota Europa Myrtus pleno flore fuerat agnita; ac
 debetur Peireskio, quòd iam in hortis Regiis, quòd
 Romæ, quòd in Belgio, quòd alibi gentium visa-
 tur. Prætereo ipsi quoque deberi Fungum Coral-
 loidem dictum, de quo cùm Clusius rescriberet,
mentionem, inquit, faciam in auctario ad Exotico-
rum Historiam, quam spero breui publici iuris facere,
Fungi cognitionem tibi acceptam relaturus. Hec non-
 dum dixi Varium tantoperè fuisse illius consuetu-
 dine delectatum, vt donec fuit Aquis-Sextiis, con-
 tinenter penè habere commensalem voluerit. Quin
 habere etiam voluit peregrinationes, rusticationes-
 que cum illo communis; & cùm sub Iulij initium
 profectus est Massiliam, vt Carolum Neouillam
 Alincurium Ex-legatum Regium Roma redeun-
 tem inuiseret, illum comitem in via facundum con-
 salutaturn deduxit. Cùm destinaret autem pergere
 Parisios, insinuauit ipsi an-non vellet Urbem, au-
 lāmque cognoscere. Ipse nihil quidem sibi esse ma-
 gis in votis professus est, & maximè in tanti viri
 augustissimo comitatu: at obstare dixit volunta-
 tem Patruī, qui paratum aliās negotiorum causā
 cò discedere, id abnuisset, prætulissetque Fratrem
 proximè discessurum. Scilicet in Regis consilio
 tum agitabatur negotium circa solutionem Tallia-
 rum, vt vocant, ad quam Riantienfes contende-
 bant ratione fundorum quorundam Reginaldum
 Patrem teneri. Enimuero Varius sese curaturum

recepit, vt ipse potiùs destinaretur, réque ipsa Patruo persuasit tenerum nimis esse affectum, iniuriámque esse, non beneuolentiam, arcere tantam indolem à consummatione virtutis. Itaque Patruo, propter viri auctoritatem, consentiente (nam Pater alioquin votis filij numquam apertè repugnauit) dedit sese Peireskii in comitatum Varij, Augusti mensis initio, annóque huius sæculi quinto. Incredibile autem dictu quàm citò Parisiis inclaruerit, partim virtutis propriæ, partim Varij commendatione. Primus, quem gestiit salutare, Augustus ille Thuanus fuit, tum vt ob summam humanitatem, ageret coràm gratias; tum vt ab illo acciperet, si à Scaligero quid haberet. Quantâ verò lætitiâ exceptus ab eo fuerit, exprimi non posse ipsemet narrauit. Aperta nimirum statim Bibliotheca tum priuata, tum Regia; apertum quicquid monumentorum ad contexendum historiam asseruabat in scriniis; apertum cor, & viscera sinceritatis miræ profusa. Ipse, tum plura edocuit, quæ ille de viris in Italia eruditis expetiit; tum, quia nonnihil desiderabatur ad conscribendum eorum elogia, recepit se per literas ex amicis consequuturum. Cùm iteratò illum inuisit, accessit illicò fuit Isaacus Casaubonus, cui sub Thuano commissæ erat Bibliothecæ Regiæ custodia. Is à primo statim congressu, nescias an magis suspexerit, an amauerit illum magis. Nimirum tam multa accepit, edoctusque ab eo fuit, vt nec publicè, nec priuatim per familiareis lite-

ras tacere id potuerit. Nam primùm quidem edens 1603.
 Notas ad Epistolam Gregorij Nysseni, quæ est ad
 Eustathiam, Ambrosiam, & Basilissam, meminit
 nummi ærei Rogerij Regis Siciliae, quem, inquit,
inter multos Arabicè inscriptos, cum variis figuris di-
uersorum Principum nobis ostendit Fabricius de Petris-
co Senator Aquì-Sextiensis, vir eruditissimus. Deinde,
 cùm Peireskius illi detexisset errores apud Vrsi-
 num, & Goltzium, qui Iacobo Stradæ, potius
 quàm numismatibus fidentes, corruperant varia
 ex gentilitiis nominibus aliquorum Imperatorum,
 inter triginta Tyrannos sub Gallieno recensito-
 rum, ac nominatim MARCI PIAVONII VI-
 CTORINI, ET LVCII ÆLIANI, (ex
 quibus illi MARCVM AVRELIVM, VICTO-
 RINVM, & SPVRIVM SERVILIVM LOL-
 LIANVM, contra fidem numismatum, quæ ipse
 ostendit, commenti immeritò fuerant) Casaubo-
 nus gratias amplissimas egit, ac pergens, Oro te,
 inquit, per amicitiam nostram nuperam, sed antiquis-
 simam, si per te licet; oro te, inquam, quæ habes eius
 generis mihi communices. Omninò quam ingrederis viam
 illustrandi eas tenebras, certissima est, & unica. Ex-
 pectabo magna aviditate quæ supra huiusmodi *ἑξαπο-*
στολικῆς magnus Scaliger observauerit: sed auguror etiam
 post illius messem tuo spicilegio fore locum. Est enim
 cuiusdam felicitatis incidisse in eos nummos, qui in
 illa caligine lucem tibi affulserunt. Sed ne sum proli-
 xus, excerpo duntaxat quæ in hæc verba ad illum
 scripsit, vno, alteròve post anno. Deum precor, ut


1605. tanto Musarum Patrono omnia lata , ac fausta largiri
 velit. *A* te autem peto , ut qui semel tua benevolen-
 tia me dignum iudicasti , etiam porro eandem mihi im-
 pertiaris , hoc est , rogatus facias , quod ultro cœpisti.
 Ego me tibi & debere iam multa sentio , & debitu-
 rum etiam plura non despero , si tibi dabitur aliqua oc-
 casio de studiis nostris benè merendi. Nescio an rescue-
 ris missum ad me fuisse à Serenissimo Duce *Urbinati*
Codicem Polybij , cuius tu mihi index fuisti : itaque tibi
 cum-primis id beneficium debeo , &c. Notum , ac in-
 ter eruditos celebrem virum heic refero , ut ex eo
 iudicium de cæteris facias. Nam quid memorem
Frontonem Ducæum , *Papyrium Massonum* , &
 nonnullos alios , quibus salutem per ipsum dici à
M. Velfero fuerat expetitur ? Quid *Nicolaum Fa-*
brum , *Iacobum Bongarsium* , *Scæuolam* , & *Lu-*
douicum San-Marthanos fratres , *Franciscum Pi-*
thæum Petri germanum , & alios penè innume-
 ros , quibuscum ex eo tempore familiaritatem con-
 traxit ? Dicere præstat nullam fuisse Bibliothecam
 celebrem , quam euolutam non fecerit , ac præter
 memoratas quidem , *San-Victorianam* potissimum ,
 in qua referebat se , cum multa alia , tum specia-
 tim vidisse omnia *Puellæ Aurelianensis* acta , vindi-
 ciâsque , & effigiem , contexto ex iis magno Co-
 dice , iussu Abbatis contemporanei. Sic & com-
 plura meminerat , quæ obseruârat in priuatis , ac
 nominatim *Ioannis Iacobi Memmij Roissij* , viri in-
 dole generosa , & tam virtute propria , quàm ge-
 nere , & prole illustris , qui etiamnum viuit foelici

senecta princeps Comitum consistorianorum. Itém-
 que Renati Poterij Episcopi Bellouacensis, quem
 predicare solitus erat rarâ doctrinâ spectabilem.
 Ac rursus Pauli Petauij Senatoris summè laudati,
 cuius commendabat quidem supra mille MSS.
 codices: sed faciebat tamen Cimeliarchium pluris.
 Cùm ipsum autem videretur esse cumulatissimum;
 voluit tamen sponte augere variis Regum numis-
 matis tam primæ, quàm secundæ Stirpis. Dedit
 nempe quædam, in quibus nomina Regum lege-
 rentur, v. g. Clotarij coronâ gemmeâ redimiti,
 (Constantini scilicet more, qui pro laurea gem-
 meam vsurpauerat) quædam in quibus Comitum, sub
 quibus numi fuere cusi, vt *FILAPARII* Rhemen-
 sis, cum inscriptione *REMVVS FIT*. Pari ratione
 commendabat Francisci Oliuarij Fontanæi cimelia,
 ac libros. Ex Cimeliarchio autem Regio, cui Ba-
 garrius iam præerat, æquum sanè fuit nihil ipsum
 latere. Probavit porrò consilium, quo Francisci Pe-
 rerij nobilis Aquensis promptuarium præclaris ci-
 meliis instructissimum transferendum in illud erat:
 quippe multa adhuc deesse agnouit, vt dignum
 Regio nomine meritò existimaretur. Quia verò in-
 ter cætera Bagarrius illi ostendit Amethystum per-
 elegantem, in qua cælatus Solonis vultus celebris
 illius Dioscoridis Augusti cælatoris manu; ideò ce-
 pit ansam edocendi ipsum quidnam sibi vellent fo-
 raminula in Inscriptione, quam ostendit, obser-
 uata hac serie,


1605.



Edisseruit enim esse forulos, in quos fuissent inserti clavi continentes Græcas ex metallo literas, quæ cælatoris illius, seu ΔΙΟΚΚΟΥΡΙΑΟΥ exprimerent nomen: sed ordine retrogrado, ut proprium est cælaturarum. Id autem manifestum fecit, ubi depictis in alba charta, uti mox est factum, foraminulis, lineas interduxit, quæ eas literas in hunc modum exprimerent,



Sic se interpretatum dixit foramina quædam, quæ visebantur Assisij in antiquo nescio quo Templo. Cum enim nemo dicere posset ecquid illa significarent, diuinavit ipse inscriptionem esse, seu dedicationem factam ΙΟΒΙ ΟΡΤ. ΜΑΧ. idque demonstravit per lineas foramina sic connectenteis.



Sic speravit se interpretaturum seriem quandam foraminum Nemausensis Basilicæ, quam Quadratam Domum appellant, ubi cætypum obtinisset. Sed

Parisijs vt regrediamur , vix publicum vllum monumentum fuit, quod in examen non reuocârit, de quo iudicium non tulerit. Quippe altero statim mense, ex quo in eam urbem accessit, literas dedit ad Flayosceum, quibus scripsit se nondum quidem monumenta priscorum Regum San-Dionysiana inuississe: sed iam tamen falsi conuicisse Tumulos constructos tum Clodouæo ad Sanctam Genouesam, tum Chilperico, & quibusdam alijs ad Sanctum Germanum. Et paucis post diebus, cum eos expendisset, qui ad Sanctum Dionysium, Nihil potui comperire, inquit, quod ante Diui Ludouici tempora satisfecerit; existimóque omneis illos antiquissimos tumulos tempore eodem, nec multò ante D. Ludouicum constructos. Qui autem placuit maxime, is est nostratis Margaretæ, sororis nimirum Beatricis primogenitæ, S. Ludouici vxoris. Denique commendans vetera sigilla, quæ coràm inspexit, cætypisque expressa tulit, ex Archiuis Abbatiarum S. Dionysij, S. Germani, S. Mauri, & cæterarum, vt in quibus continerentur germanæ effigies Karoli Magni, Hludouici Pij, Hlotarij Imperatoris, Pipini Regis Aquitaniæ, Karoli Calui, Karoli Simplicis, aliorumque Regum ex secunda stirpe, Hæc sanè, inquit, satis refellunt tumulósque, & statuas hisce Principibus confectas ante quadringentos, aut quingentos annos. Nihil non adiiciendum esset circa aliarum rerum studia: quoniam nihil exstare accepit ex mirabilibus seu artis, seu naturæ operibus, quod non studiosè spectauerit, veluti ædificia, opificia, machi-

1605. nas, plantas, animalia, fossilia, omnia denique ob-
 seruatu digna. Hæc inter, varia officia quæ propè,
 quæ procul literatis exhibuit; & cum anxie requisi-
 uisset ex Paulo Seruita, ex Scaligero, ex Casaubono,
 ex eruditis aliis ecquid nouissent de Iuueno Calio
 Callano Dalmata, cuius Codicem MS. de Attilæ vi-
 ta Venetiis absportauerat; is, ut ederetur, animum
 1606. applicuit. Anni sequentis ineunte vere, ac breui in
 Prouinciam redituro Vario, non multo labore ob-
 tinuit, ut liceret sibi inuifere Angliam, comitaturò
 præsertim virum illustrem Antonium Boderium Re-
 gium Oratorem illò destinatum. Neque id modò
 Varius est passus, sed laudato proposito (in quod
 etiam conspirârunt Thuanus, Memmius, Mericus
 Vicus, amici alij) recepit sese curaturum, ut Pater,
 Patruusque factum comprobarent. Discedentem
 voluit Peireskii Aureliam vsque deducere; vnde
 priusquàm regrederetur, spectauit attentius tum
 prisca Ecclesiæ S. Crucis vestigia, quæ vetustatis esse
 duxit mille, ut minimùm, annorum: tum præter alias
 statuas, imaginésque tam Karoli Septimi, quàm
 Ioannæ puellæ, videre eas voluit, quæ in Mu-
 nicipali Curia asseruari perhibebantur; sensitque
 speciatim effigiem, qua Rex est depictus cum barba,
 & San-Michaëliano torque, non esse vndequaue fi-
 dam. Inibat porrò iam mensis Maius, cum disceden-
 te Boderio, ipse paucis diebus retardatus fuit, coactus
 veredis postea subsequi, ut Caletæ assequeretur. Cum
 soluissent, perpauci fuere ex vniuerso comitatu, qui-
 bus ex naus agitatione, halitûque maris stomachus
 non

non fuerit submotus. Peireskius, cùm id præcaueret, cæteris relictis, ad malum confedit, vbi & melius habuit. Causâ requisitâ, respondit agitationem minimam illa in parte fieri; quamobrem se eò declinasse, ne nauicaret, vt cæteri, qui longè magis, tam ad proram, quàm ad puppim agitarentur. Appulsus in Angliam, ac postquàm præeunte Oratore Iacobum Regem salutauit, carus ipsi habitus est, accessitque ab eo non semel. Admissus est etiam in conclaue, seditque inter primores Comites in solemniquodam Conuentu per ea tempora celebrato. Ad viros doctos quod attinet, quos seu Londini, seu Oxonij, seu aliis in locis conuenit, primus fuit ille de sua Britannia benè meritus Guillelmus Camdenus, apud quem cùm aliquando sermo incidisset de antiquitate Britannicæ linguæ, ad quam Aremorica spectat, & præsentem Doctorem Tato, post rogatas circa complureis variarum Galliarum regionum voces, requisisset etiam quid Arelate, quid Tolonum significarent, responsum tulit, Arelatem eâ linguâ dici ciuitatem in vliginoso loco constitutam; & Tolonum citharam, fortè ob vicinum promontorium, cui Citharistes nomen fuit. Accepit & id genus alia, ex quibus penè deductus fuit in Strabonis, Taciti, aliorumque sententiam, qui scripserunt Gallos, & Britannos eadem primitus lingua vsos. Alter fuit Robertus Cottonus; inter curiosos, optimèque animatos conspicuus. Deinde tam Iacobus Collius, quàm illius socer Matthias Lobellius, regius Botanographus, quem vtrumque deuinctum voluit. Post-

1606. cā Albericus Gentilis, Henricus Sauilius, Ioannes Nordenus, & plerique alij. Non tacendus verò eruditus tum iuuenis Ioannes Barclaius, quem quanta beneuolentia prosequutus fuerit, intelligetur inferius. Dolere autem solebat non agnitos sibi nec Gulielmum Gilbertum auctorem libri de Magnete, nec Thomam Lydiatum celebrem Mathematicum. Non heic memorabo Bibliothecas varias, in quibus rariores libros obseruauit; non Musæa, in quibus uidit, & ex quibus comparauit quicquid pretiosum licuit. Magni verò ducebat præ cæteris gemmam, centum & quinquaginta libris Turonicis emptam, propter cælatum Aëtionem cum Tiara Phrygia, quem Patrem Andromaches Hæctoris vxoris argumentabatur. Referam solùm, quia maturius, quam concepta spes, discedere voluit, idcò maximum fuisse factum ipsius desiderium, & in familia Oratoris, & apud eruditos viros, qui cùm postea variè ipsius meminert, sufficiet heic excerpere quod memoratus Camdenus habet in descriptione Britanniae, cùm de numismatibus ad rem suam pertinentibus verba facit. *Cuiusmodi, inquit, non alibi effossa hætenus audiui, priusquam nuperrimè nobilissimus, & in re nummorum antiquaria longè doctissimus, & perspicacissimus Nicolaus Faber Petriscius eiusmodi in Gallia reperta mihi ostendit. Et commoratus quidem fuisset nonnihil ampliùs in Anglia: sed quia treis duntaxat mensibus se abfuturum promiserat, idcò post mensem discessit in Hollandiam, quam ab vsque initio (sed planè tamen tacitus) constituerat perlustrare. Quo*

discessurus tempore fuit, adiungere se illi voluit nobilis turba iuuenum, qui ipsi quoque fuerant ex Gallia Boderium sequuti. Verùm illi quidem ad arma, aliáque studia diuerterunt; ipse perrexit requirere eruditos præsertim viros. Ac salutauit quidem primùm quos Middelburgi, Dordraci, Roterodami, Delphis, Hagæ celebrari acceperat: sed id tamen tum in transcurso solùm, quoniam præcipua illi cura inuisendi Scaligerum Lugduni Batauorum degentem. Constituerat cum ipso primùm quasi ignotus colloqui: quamobrem nomine mutato epistolam commendatitiam, quasi à Peireskio conscriptam, missamque illi obtulit. Scaliger autem eâ perlectâ, ipsum est humanissimè in Peireskij gratiam complexus. Post multos consertos sermones, & productos obiter libros, voluit Peireskius ex nescio quo paucas lineas exscribere: vbi verò ille chartam, calamumque exhibuit, ac inter dictandum primas lineas characterem vidit, & *ιστορικειαν* agnouit, tum in amplexus proruens, gratiosissimè conquestus est fraudem. Cùm deinceps variis de rebus colloquerentur suauissimè, Scaliger inter cætera declarauit velle se quidem iteratò procurare editionem Eusebij (nempe non planè arridebat quæ iam tum primùm absoluebatur) itémque paterni in Aristotelem de Animalibus commentarij: sed esse tamen animum redeundi postea in Galliam, & apponendi ossa sua Iulij parentis ossibus. Cùm excepisset autem Peireskius non esse illum igitur *ερεγδοξον* moriturum, illacrymatus Scaliger verbum ea de re non

1606. adiecit. Interpretatus illi Peireskii numismata varia, ac præsertim Siclos, donatus est, inuitus licet, singulari Semisclo, cuius ille præ cæteris interpretationem fuerat demiratus. Donauit ipse multa vicissim, & quod fuit illi iucundissimum, exhibuit, quam detulerat, expectatam ichnographiam, cum inscriptis carminibus sepulcrorum Scaligeranorum. Scilicet eam demùm superiore Martio Veronâ obtinuerat, nec pluribus literis datis habere prius potuerat, ob varios morbos Nichezolæ, & quod Syluius Donius, qui illam aggressus primus fuerat, inter perficiendum obiisset. Vnum, de quo Peireskii auebat interrogare Scaligerum, & non est tamen vnquam ausus, ne rem molestam faceret, fuit opus illud Cyclometricum, seu de Circuli quadratura ante duodecim annos in lucem emissum, ac statim à Francisco Vieta, Adriano Romano (postea quoque à Christophoro Clauio, hominum Societatis IESV γεωμετρικὰ στοιχεῖα) aliisque in eo puluere exercitatissimis erroris conuictum. Nimirum præmonitus fuit non posse illi eam camarinam sine quadam bile moueri. Quod attinet verò ad Genealogiam, non professus est quidem se subdubitare an reuerâ attineret ad Veronenses Principes, quorum stirpem ille in se desitutam asseuerabat: sed paullò tamen liberiùs, & quasi vellet quid cæteris responderetur, accipere; proposuit ipsi quæ à Scioppio, Guilandino, aliisque fuere obiecta. Post Scaligerum cura fuit inuifendi Karolum Clusium, quem octogenario maiorem podagra tum primùm tentabat, vt & primùm Scaligerum exer-

cuerat , ante paucos menseis. Deprehendit autem imprimi curantem in Appendice altera exoticarum plantarum figuram Fungi Coralloidis , quem ad illum ex Prouincia , cum aliis penè innumeris plantarum , radicum , seminumque generibus transmiserat. Commodum etiam illum admonuit circa Indicas quasdam plantas , in quibus describendis errasset , & quasdam , de quibus nihil audiisset , idque prolatis commentariis iuxta ostensos sibi Parisiis à Vespasiano Robino fructus. Inuisit quoq; post Clusium , præcipua Academiæ lumina , ac speciatim inuit amicitiam cum Bonauentura Vulcanio , qui circa Procopij versionem tum occupabatur ; cum Dominico Baudio , qui ad peritiam historiæ adiciebat poëseos elegantiam , & cum nonnullis aliis. Dolere verò solitus fuit , quòd per ea tempora abfuiſſet Lugduno Daniel Heinſius , quem non ſemel audierat à Scaligero commendari. Fuit deinceps Amſterodami ; vbi ſatiari vix potuit interrogando , & cognoscendo tam multa præclara , & rara , quæ ex vtraque India in id emporium conuehuntur. Fuit Enculæ , vt ſpectaret illeic celebre illud Bernardi Paludani Cimeliarchium , in quo non ægrè tuliffet , tanquam ad Cyaneos ſcopulos conſeſcere. Redeundo , nonnihil Hagæ commoratus , diſcedere noluit , quin priùs agnouiffet Hugonem Grotium , quem , tametſi adoleſcentem , eruditio planè matura , ac omnigena commendabat. Diuertit verò Scheuelingam , vt exploraret veſtigationem , & velocitatem Currus eâ ſolertiâ à paucis annis excogitati , vt paſſis velis in littore

1606. nauigij instar euolaret. Inaudierat nempe Comitē Mauritium post Neoportuensē victoriā experiundi gratiā illum conscendisse, vnā cum capto in prælio Francisco Mendoza, ac intra duas horas attingisse oppidum Puttenum, quod inter, atque Schevelingam horaria milliaria quatuordecim intercipiuntur. Quare ipse quoque experiri voluit, commemorareque solebat stuporem, quo correptus fuerat, cum vento translatus citatissimo, non persentisceret tamen (nempe tam citus erat, quàm ventus) cūque animaduerneret scrobeis occurrenteis præteruolari; restagnantes passim aquas superficie tenus duntaxat attingi; qui antecedeabant cursores visos quasi retrorsum niti; quæ distantissima apparebant, momento penè præteruehi; & quædam id genus similia. Delphis iucundè exceptus fuit ab Abrahamo Goriæo, quem fortè offendit cæleri curantem Græca quædam numismata, quorum aliquot miserat Parisiis, oblatis prius ad vsque mille, quæ ex Italia adduxerat. Satagebat nempe Goriæus complere illa Paralipomena antiquorum numismatum, quæ promiserat in Dactyliotheca; quare & commisit Peireskio descriptionem breui prælo subiiciendam, vt pro suo candore eam expenderet, &, quæ opus foret, duceret lituras: ipse autem morem bona fide gessit, correxitque potissimum nescio quid scriptum circa Traianum. Quo loco narrare solebat rem memoratu non indignam, nempe Goriæum, cū aliàs Latinæ linguæ non studuisset, intellexisse tamē libros omneis circa rem nummariam Latine conscriptos;

eodem modo, quo Forcatulus omncis circa rem Mathematicam : tantum valet improbus labor ex desiderio quidpiam noscendi vehementissimo profectus. Vidit etiam Delphis superstitem adhuc Religiosam quandam ex eo tempore, quo Hollandi à Catholico-Romana religione defeecerant ; viso prius Vltraiecti Canonico in primæua sua professione viuere permissio. Cùmque suspexisset non modò quicquid antiquissimorum ad conclusa illa Rheni ostia monumentorum superest ; sed etiam quicquid dominatio Burgundionum Ducum expressum reliquit ; tum miratus maximè est , maximoperèque laudauit temperasse sibi Hollandos ab euerfione Templorum, & asseruasse intactos Choros, cum affixis insignibus Equitum aurei velleris à Philippo vsque Bono instituti. Cæterùm redire voluît per Brabantiam , Flandriam , reliquasque Belgij Prouincias , impetratis prius ab Hollandis , & ab Archiduce liberî commeatu libellis. Accessit autem primùm Antuerpiam circiter finem Iulij , inistque ibi amicitiam cum Andrea Schotto , & Carolo Scribanio ex Societate IESV viris eruditis : itémque cum Auberto Miræo, Ecclesiæ Decano, rerum Belgicarum, ac totius Historiæ Ecclesiasticæ eximiè perito ; & cum Nicolao Roccioxio rei antiquariæ impensè studioso ; & cum Henrico Sedulio auctore vitæ B. Elziarij. Cùm deinceps Machliniâ peruenisset Louanium, nihil æquè doluit, ac non fuisse ampliùs in viuus Iustum Lipsium , præclarum illud bonarum literarum lumen ante paucos menses extinctum. Sperârat enim sese

1606.

illum non minùs, quàm Scaligerum omnibus officiis breui deuincturum. Doluit pariter non adesse per eos dies Adrianum Romanum Mathematicum illi celebrem, quem gestierat summoperè cum Scaligero conciliare. Postquàm inuisit Academiam, doctòsque, qui in illa viros, visere voluit apud vi-
duam Medici cuiusdam cornutos duos lepores, qui ex Noruegia dicebantur allati. Et quia reperit mortuum alterum, obtinere quouis pretio & illius cornua, & geminorum iconismum voluit. Bruxellæ amicitiam iniit cum Karolo Bromantio, Comite Brouæ, & quibusdam aliis; at suspexit potissimùm celebrem Pictorem Venceslaum Cobergeum, qui tum habebat præ manibus insigne opus quadripartitum de Architectura, de Pictura, scripturæque antiqua, de Deorum imaginibus, de Numismatis, seu maui Medaliis, aut metallicis æneis à Iulio Cæsare ad Gallienum vsque. Memorabat porrò varios circa parteis singulas confertos cum illo sermones, maxime autem circa postremam, propter Cobergei opinionem, quòd Medalia huiusmodi monetales esse non possent; argumento præcipuo, quòd typus seu forma, qua ferirentur, signarenturque, elaborari non posset ante duos menses ab artifice; adeò vt, cum plures ducentis percuti eodem typo non possent, pretium operæ fuisset longè superaturum monetæ valorem. De colloquio, memini solùm obiecisse Peireskium, vsurpatam fuisse Seruorum industriam, quæ pretio non redimeretur; & excepisse Cobergeum, rem peractam fuisse cum Serui edicto

edicto prohiberentur non modò quidpiam pingere, 1606.
sed pingendi etiam addiscere artem. Bruxella discess-
surus, scripsit ad Cottonum epistolam pereruditam,
misitque simul cętypos variorum nummorum, ac
nominatim Commodi, ob inusitatam scripturam
vocis BRITANIA, per duplex TT, & simplex
N. Salutare voluit exinde Gandavi Laurentium
Deebrotium, quem in Italia nouerat. Insulis Flo-
rentium Nallæum, eruditum Canonicum, antiqui-
tatum Liturgicarum auctorem. Tornaci Dionysium
Willerium Canonicum, & Cancellarium, ac Hiero-
nymum Winghemium similiter Canonicum; il-
lum rerum antiquarum instructissimum, istum stu-
diosissimum rariorum Plantarum. Duaci Guillel-
mum Richardotum Ioannis Præsidis filium, quicum
ex vsque Italia colebat amicitiam; & Andream Ho-
ium Professorem Græcum, abs quo memorante ac-
cepi quàm iucundè suauissimis Peireskij, ac Richar-
doti confabulationibus tertius interfuisset. Enim ve-
rò præ cæteris referendus hoc loco est eximius Prin-
ceps Karolus dux Croius, & Arschoranus, qui ipsum
totis decem diebus in celebri domo Bellimontana de-
tinuit, continuò spectantem vt innumera, ita rarif-
sima cimelia, ditissimásque metallothecas, quibus
curiosissimus, eruditissimúsque ille exornauerat no-
bilissimum Musæum. Quin discedentem etiam coë-
git absportare omnia, quæ habebat antiquorum
Galliæ Regum tam aurea, quàm argentea numisma-
ta; itémque ex Græcis ad vsque sexaginta; præter
aliquot vascula, ponderaque, & mensuras antiquas;

1606. cùm tamen nihil aliud à Peiresckio accipere voluerit, quàm æreum nummum Ioannis illius, qui Theodosij, ac Placidij Valentiniani temporibus arripuit Imperium. Quo loco venit in mentem, aduexisse illum ex Flandria numismata Gallorum Regum, ex prima quidem Stirpe quadraginta aurea, præter varia argentea; & ex secunda quinquaginta argentea, præter vnum aureum Ludouici Pij, quod æstimabat maximi, quoniam non modò rarissimum, sed etiam parùm aberat, quin singulare arbitraretur. Instabat tum tempus, quo perhibebatur celeberris fore cæremonias ad Fontem-bellaqueum, in Delphini Principis, hoc est Regis Franciæ Primogeniti, baptismo. Videlicet illius sponsor dicebatur Pontifex Summus, ac nomine Pontificis Masseus Barberinus Nuncius. Quamobrem sub Augusti finem discessit ex Belgio, ac satis tempori adueniens solemni pompæ interfuit, quæ peracta est die mensis sequentis vigesima quarta. Renuntiatum intereà est obiisse domi Nouercam, expectarique eius reditum variis rebus componendis. Quocircà amicis quàm coram, quàm per literas salutatis, regressus in Prouinciam est sub initium alterius mensis. Domi exceptus non abnuitt consilium, quod Pater, Fraterque potissimum sumpserant (nam Patruus nonnihil repugnârat) coëmendi ipsam Riantij Baroniam, cuius quia Valauesum erat subclientelare prædium, idcirco fuerat litigiorum benè multorum seminarium. Heinc ipsemet curam assumpsit paciscendi, contrahendique cum Ludouico Grollæo Medullioneo Marchione Brissiaci, eamque ob caus-

1607.
sam in Delphinatum versus illum profectus est, rediitque confecta re, sub initium sequentis anni, qui fuit salutis millesimus sexcentessimus septimus. Cum rediit, multis quidem rebus præclaris incubuit, sed nulli iucundiùs, quàm procurandæ multiplici vestigiorum vrbis, portùsque Carthaginienſis descriptioni. Nimirùm non alia ratione summos Auctores intelligi, conciliarique posse putauit; cogitauitque ea re gratificari Casaubono, quicum de Portus præferti situm, formaque differuerat, neque illius tamen dubiis nouerat esse factum satis. Scripsit præterea copiosè ad Alardum Compendiensem Canonicum circa rem monetariam, ac inter cætera, de usu Aurei Solidi in Gallia ad tertiæ usque Stirpis initium, ostendendo viginti duos huiuscemodi solidos pependisse integram libram (tametsi quam vocant monetalem libram ex viginti solùm constaret) ac demonstrando Solidum non semper pro duodecim tantum denariis argenteis oblocatum fuisse, sed nonnunquam pro pluribus, etiam ad usque quadraginta. Inuasit illum interea morbus oculorum molestissimus, à quo medio vere vix fuit liberatus. Cœpit tunc illum Patruus vehementer exstimulare, ut sese ad adipiscendum destinatam pridem Senatoriam dignitatem compararet. Ingrauescebat enim valetudo, infestabantque maximè articulorum dolores, quibus leniendis statuerat ad balnea nostra Dinienſia ante æstatem accedere: sed timens ne quid fortè sibi humanitùs contingeret, constituerat simul ex vrbe non antè decedere, quàm Nepotem coopta-

1607. tum inter Senatores vidisset. Et necessebat is quidem semper quàm gratosè poterat, moras; sed ipsum die quadam, tacito consilio, deduxit ad Varium, ut iuberetur illius ore sese necessario examini subiacere, Senatuque aggregare. Tum ratus Peireskii nihil ampliùs cunctandum, postulauit solùm octiduum, ut rem maturiùs aggredieretur. Medius erat Iunius, imminébátque anniuersarium, trimestréque Curia Parlamenti iustitium: quocirca festinandum fuit, cum examinari, approbarique, nisi pro Comitibus curiatis, non posset. Itaque paratus accessit, seseque probauit conuocatis Classibus ad vi. Kalendas Quintileis. Proposita ipsi Lex fuerat ex sexto libro Codicis, qua Gordianus sanxit ab eo, qui neque legatum, neque fidei-commissum, neque hæreditatem, vel mortis causâ donationem accepit, nihil posse per fideicommissum relinqui. Eam porro cum exponeret, oblitus non fuit, quod à Valerio, & Sallustio de Scipionis Æmiliani facinore proditum est, qui à Masinissa Numidiæ Rege sibi coniunctissimo totius Regni hæres testamento nuncupatus, enixéque rogatus, ut ipsum inter quinquaginta quatuor superstites filios æqualiter hercisceretur, egregiè adeo id præstitit, ut ne minimam quidem rem sibi retinendam putârit. Non item oblitus quod Aristoteles in Politicis detestatus est tam Carthaginensium, quàm Locrensiùm instituta, quorum alij patrimonia æqualia habebant, alij quæ habebant, vendere non poterant, ut antiquæ hæreditates penes familias diutiùs starent; quoniam,

præter incommoda cætera, heinc efficeretur, vt ciues inertes tam in expectandis, quàm in possidendis patrimoniis forent. Cætera mitto, vt attingam qua præsertim re admirationem sui creârit. Nempe tametsi quod ad theoriam, quæstionésque Iuris spectaret, existimatus fuerat paratissimus adfuturus; quod attinebat tamen ad vsum, iudiciorúmque formulas, creditus non fuerat perinde instructus. Sed nimirum neque Parisiis, neque Aquis-Sextiis, occasionem vllam prætermiserat sciscitandi pragmaticos, cognitoresque, & structores litium, ac reducendi in commentarios quicquid aut ex ipsorum ore, aut ex inspectis instrumentis, saccularibusque copiis didicisset. Profecerat etiam consilio, exemplóque optimi, consultissimisque Senatoris Antonij Thoronij, dictionem nullam in toto formulario iure intactam relinquens, cuius notationem, causámque non nosset, vt vsum meliùs eliceret, animóque infigeret. Vt paucis expediam, mirus fuit applausus; mirúmque elogium, quo fuit denique Patribus conscriptus. Inardescibat deinde Patruus desiderio veniendi Diniam, sed obstitit increascens morbus, inualescénsque Solis feruor: proxima quippe erat tempestas dierum Canicularium, per quos ab vsurpandis balneis, thermis que mos est abstinere. Auebat etiam Peireskius vnà cum Patruo accedere; tum vt obsequio continentem gratitudinem testaretur, tum vt hanc partem Prouinciæ nondum sibi visam lustraret; tum vt Baronem Flayosceum interuiferet, qui ducta in vxorem filia vnica Guillelmi Falconij Di-

nienſis Proſenſcalli, apud ſocerum morabatur. Ab-
 nuit tamen id Patruus, ſeu ne abſiſteret à iure di-
 cundo in Claſſe per ferias ſtatuas delecta; ſeu ne diſ-
 cederet à Vario, qui illum abs ſe abeſſe ægrè patie-
 batur: ſeu ne curam dimitteret, qua rogatus fuerat
 præſſe Cayero pictori in obducendis laqueatæ Au-
 ditorij Palatini contabulationi Gallorum Regum
 Iconibus. Ipſe nimirum ſolus par fuit ſuppeditare
 maximam quandam germanarum iconum ſeriem,
 quam ex numiſmatis, ſigillis, ſepulcris, vitris, aliſſ-
 que, huiusmodi monumentis deduxerat: meminiſ-
 ſe, cum veram faciem Hugonis Capeti diù deſide-
 raſſet, dixiſſe non ſemel habere ſe gratiam optimo
 viro Auguſto Galandio, quòd illam ab eo obtinuif-
 ſet, ectypo ſigilli expreſſam. Diſceſſit ergo Patruus
 ſine eo, poſt Caniculareis exactos. Enimvero Varius
 rem gratam vtrique factururus, conſtituit per Septem-
 brim menſem vnà aduenire, adducereque Peireſ-
 kium, vt vnà Patrum inuiſerent, vnàque regionem
 ſpectarent. Et nonnulla quidem obſeruanda illis oc-
 currerunt antiquitatis veſtigia: ſed nihil mirabilius
 viſum noſtratibus Thermis, in crypta ſubrupea, quam
 aquæ calentis prætercurrentis alucolus ſic feruefacit,
 vt leniſſimè ſudorem educens, mire conferat pitui-
 toſis, frigidifſque humoribus; idque præſertim vbi
 illi diſpoſiti priùs ad exſolutionem fuerint Balneo
 quodam, Virtutum dicto, ob ſingularem energiam,
 mirabileſſque, & deſperatas aliis remediis curatio-
 nes. Optabant porro illi quidem præterea ſpectare
 Serpentes, ex obuerſa Auiro, ac præceſſa rupe, ad

cuius radicem sunt Thermae, Balneaque deciduos, 1607.
& maxime quidem quia innoxij, expertesque veneni sunt: verum illi non decidunt, nisi Maio, ac Iunio, & ferè quidem copulati, dum prurientes variè discurrent, eque rimis in rimas subeuntes ad precipitium non attendunt. Faciam heic fortè rem non ingratis hominibus nostris, si duo quædam commemorâro, quæ edifferentem Peireskium audierunt. Vnum apud Petrum Trichaudum, San-Martinum Inquisitoriae classis Præsidentem, qui solitus Dinia per ætatem degere, illum cum Vario domo excepit. Cum enim caussa exquireretur caloris aquarum Thermalium, & Guillelmus Alamandus doctus Medicus esse diceret non actu, sed potentiâ ignem; excepit ipse debere potiùs esse ignem actu ardentem in cauernis illis subterraneis, quæ exinde incalcescentes aquam præterfluentem feruifacerent; neque enim seu bitumen, seu sulphur, seu aliam materiam potentiâ solùm calidam excalefacere aquam seu traiectam, seu infusam, etiam vitriolo, halinitro, aliisque huiusmodi mineralibus turgescentem. Adiecit fumos, seu vapores ex aquis thermalium in fissuras rupium subeuntes ita Serpenteis afficere, vt veneni generationem seu impendant, seu corrigant; eadem ratione, qua in Ponto idem facit vsus absinthij, ex Plinio. Qui Plinius quidem, cum aliunde non improbet venenum serpentum in felle esse, & serpentes congressuri dicantur fel euomere; mirum non videri, si quo tempore Serpentes isti coeunt, deciduntque, veneno carcant. Alterum,

1607.

apud Antonium de Bononia Episcopum, qui sequenti die vtrumque, ac etiam Trichaudum conuiuio excepit. Cum enim ex ostensis sibi à Flayosceo in duobus Sacellis maioris Ecclesiæ tam Porcelletanis, quàm Villanouanis insignibus, edisseruisset tempora, quibus Prælatos optimos ex iis familiis habuimus; incidit sermo de tempore, deque titulis, quibus Auenio, Comitatusque Venascinus ad Pontificem Maximum peruénit. Cumque alij nihil scirent aliud, quàm factam à Ioanna Regina Clementi sexto venditionem, anno supra millesimum trecentesimo quadagesimo octauo, ac die nona Iunij, pretio Florenorum octogies mille; retexit ipse totam historiam ab anno vsque ducentesimo nono, quo Raymondus tertius Tolosatum Comes hærescos Albigensum fautor, & Legati interfecti auctor creditus, fuit ab Innocentio tertio iterum excommunicatus. Inde enim cœpit ditioe spoliari, ac post annos nouem-decim transactio Parisiis sic fuit inita, vt Alfonso illius filio sola vrbs Tolosa, cum paucis adiacentibus cesserit; cætera vltra Rhodanum loca ad Regem attinuerint; quæ citrà verò possidebantur, ad Pontificem spectârint. Cum homines autem eiusce regionis non satis lubentes id ferrent, quòd Romam passim prouocarentur, ac ideò Alfonsi partibus fauerent, Bonifacius quidem octauus prouocationes illas remisit, Clemens verò quintus, vt ampliùs demereretur animos, etiam sedere illeic voluit; & cum, post Ioannem vigesimum secundum, Clemens Sextus Pontifex foret, facta

facta est venditio eorum iurium, quæ Comitibus Prouinciæ erant, à partitione vsque facta inter Raymondum Berengarium Comitem Prouinciæ, & Alphonsum Comitem Tolosæ, anno supra millesimum centesimo vigesimo quinto. Et hæc ille quidem, plurâque disseruit, ac denuò comitatus est Varium triduo post redeuntem. Patruus postea, vt restitutam valetudinem tueretur, & vt tranquillius degeret quicquid æui supererat, non Aquas-Sextias, sed Belgenferium, dum regrederetur, contendit. Occurrerat illi Peireskio, ac non modò deduxerat, sed lateri etiam eius adhærere, neque à præstandis obsequiis recedere statuerat: verum non tulit Patruus, voluitque vt potius rediret Aquas-Sextias propter Remigalia, quibus fit Curia instauratio. Rediit ergo Peireskio, ac tantò minùs pœnituit, quantò audire licuit Varium sua illa oris suauitate de Lite, & concordia, deque amore Iustitiæ, Magistratuumque perorantem. Deinceps verò ita cœpit suo defungi officio, vt desiderari nihil posset. Tametsi enim Varius, cum pensa curialia distribueret, nollet initio inspectorem multarum litium designare; quarum tamen paucarum curam illi commissam voluit, eas ipse ita solitus fuit otiosè, acutèque, & per omnes numeros, ac momenta iuris perpendere, vt confectis instrumentorum enucleatissimis breuiariis, explanatissimè deinde, & summa cum fide ad Curiam referret. Cum verò alio expositore ferenda erat sententia, mirè lætabatur, si tempus ad deliberandum daretur, aut controuersiæ commentarios præhaberet.

1607. ret à partibus ; pudebat enim , nisi foret commu-
niendo suffragio instructissimus , calculum conferre.
Rursus autem , quoniam persæpe ob litium anfractus
animo pendebat , conuenire solitus erat memoratum
Thoronium , qui scrupulos eximeret , nec dubitabat
etiam Vario grauiores causas proponere , qui ob
eximiam grauissimi , sanissimique iudicij perspicui-
tatem eas illustraret. Agebat verò id præsertim in
vespertino colloquio : iam tum enim Varius singulis
noctibus aduocabat illum in frugalem cœnam , vt
sermones conferere , sepositis arbitris , posset. Cate-
rùm , quia nescius erat tempus frustra conterere , id-
circo satis supererat , vt bonas artis excoleret , &
cum doctis viris tueretur commercium. Inter cate-
ra , procurauit exquisitam fieri anatomiam magnæ
cuiusdam Testudinis (longitudine nempe cubita-
li) quam è Martigio mari eductam pisciculis nutrie-
rat , à mensibus circiter tribus. Cùm singularia verò
multa in ea dissectione obseruata fuerint , tum illa
non postrema , Quòd omoplatæ anteriorem , non
posteriorem habuerint situm. Quòd arteria aspera
fuerit longitudinis semicubitalis , diuisâque in treis
ramos , tribus à pulmone procùl digitis , ac ramu-
los quosdam ad renes , & vesicam usque producens.
Quòd eadem annulos habuerit omninò , siue vnde-
quaque (etiam versus œsophagum) perfectos , & car-
tilagineos , larinxque epiglottide destituta constite-
rit. Quòd non ex sola vena porta venarum distribu-
tio in interanea fuerit , sed plurimæ etiam ex reliqua
caua hepatis parte prodierint ; ex eadêmque parte

cholidochus porus processerit geminus in dodecadaetylon intestinum. Quòd nulla distinctio gracillium, crassorumque intestinorum, nulla cæci dicti appendicula, nullus item lien, nullus adeps circumuectiens cor (tamen si id aquæ pericardio conclusæ innatauerit) & id genus nonnulla alia. Detexit aliunde non longè ab vrbe insignem quandam copiam non humanorum modo ossium naturæ factorum lapideæ, sed variorum etiam animalculorum, itémque stirpium, foliorum, florum, similiúmque huiusmodi: quam confestim distribuit per vniuersam penè Europam. Adiecit autem tessellas quasdam, seu lapides Rhomboidaleis, tum rubeos, tum crySTALLINOS (videlicet ipsius talchi, seu specularis lapidis speciei) ex Riantiensi agro effossos, eaque in re mirabileis, quòd dum exsoluuntur in minutiores particulas, particulae quæque tuentur rhomboidalem illam figuram. Quin- etiam mittens Parisios, adiectam voluit congeriem diuersissimam conchyliorum, & piscium, qui monstrosâ formâ in mari Mediterraneo visuntur: itémque pellem felis marini, & innumera alia, quæ destinauit præsertim ad pictorem celebrem Danielelem Monstereum, à quo expectabat icones Varij, Thuani, Casauboni, atque Malherbij. In Italiam cum mitteret, nominatim verò ad Gualdum, accepit magno suo dolore obiisse Baronium, deque lamentabili casu ad Flayosceum, & alios scripsit. Cum verò in Belgium, condoluit Villerio ob iacturam ab ipso factam Hadrianei numismatis, in cuius auersa parte ex Villerij quidem

1607.

sententia fuerat Phœnix exhibitus, ex ipsius verò Peireskij interpretatione, Ciconia. Argumentatus autem id fuit, ex proceritate crurumque, & colli, cùm Phœnix soleat potius Aquilæ instar repræsentari: prætereâque ex serpente ipsi ad pedes apposito, & ex inscriptione PATRI, qua designata fuerat Hadriani erga Traianum pietas: denique ex quibusdam aliis satis luculentis indiciis, quibus consolari adnixus est virum, monstrando rem deperditam non fuisse adeò, atque ille existimauerat, raram. Sic consolatus etiam est circa iacturam Iaspidis Argæum montem referentis; idque egens ipse tum quoque consolatione aliqua, quòd famulus quidam suffuratus fuisset numismata aurea primorum Imperatorum, & onychas, gemmâsque alias elaboratissimæ cælaturæ. Incidit intereâ Claudius Patruus in morbum lethalem non longè à Regalibus sequentis anni millesimi sexcentissimi octauî. Inuiserat illum Peireskîus per festa Natalitia; & quia valentem reliquerat, ideo mira consternatione renuntiatum excepit casum, qui septimo die à decubitu carissimum abstulit caput. Constituerat optimus Senex cor, & intestina Belgenserij condi, reliquum verò corpus Aquas-Sextias in maiorum suorum sepulcrum transferri. Id itaque parentatione, magnâque pompa præstitum est, inuitatâ Curiâ actione (vt tum moris erat) panegyrica per Ioannem Petrum Oliuarium Senatorem optimum, & assensu factò per Varium oratione alia eximia, quæ inter funebreis habetur, inque editione posthuma est numero decima sexta. Ad

1608.

cuius calcem videre licet quanti Peireskium fecerit, 1608.
cùm tantoperè commendauit studium, quo Patruus
talem delegerat, parauerátque successorem. Nescio
an dici debeat, quod demirata tota vrbs est, fidissi-
mum defuncti canem affectatione perpetua circum-
stitisse feretrum, non potuisse per plureis dies amo-
ueri à tumulo, & postquàm domum reductus fuit,
coram icone diù constitisse. Peireskius, sedato non-
nihil dolore, sese, vt priùs, ad functionem Senato-
riam composuit; paríque modo non destitit bonas
horas succidere in gratiam liberalium & studiorum,
& studiosorum. Nam primùm quidem varias ad va-
rios amicos literas perscripsit; sed proluxiores tamen
nullas, quàm ad Lælium Paschalinum, circa Vrsini
lapsus, circa Francorum Regum icones, sigilla, nu-
mismata, titulos (conuictis specialiter iis, qui Karo-
lum Pipini filium vsurpasse Magni cognomentum
arbitrarentur) circa statuas thymelicas, circa suum
Aëtionem, quem cùm Velserus opinaretur pictorem
esse, cuius Lucianus in Herodoto meminit, persi-
stit ipse in sententia, propter tiam Phrygiam, seu in-
signe regium, quod ad Patrem Andromaches duce-
ret potius referendum; circa columnas Herculeas,
portum Ostiensem, & cætera curiositatis inèxhaustæ.
Ita egit cum Fontanæo de re nummaria; & cum
Strada specialiter de numismatibus antiquis: cum
Claudio Frereo libellorum supplicum Magistro, &
Gratianopolitani Senatus postea Principe, de histo-
ria Francica: cum San-Marthanis Fratribus de Ge-
nealogistica; cum Pignorio de Purpura; cum Nico-

1608. Iacobi Fabro, cùmque aliis de rebus sexcentis. Deinde innumera fuere, quæ obseruauit circa genera piscium reiectanea, quibus Martigij, alibique condendis curam demandarat; quæ circa conchyliâ, circa plantas, circa lapides, circa cætera (quæ rursus variè distribuit) maximèque cùm per Aprilem diuersatus est Belgenferij, vnà cum Vario; vbi de prolatis compluribus rebus, quas ille nondum viderat, est suauissimè collocutus. Etenim sermo habitus est de Lapide cæruleo, in agro Olbienfi reperto, è quo eiusdem cognominis color extrahitur, vti etiam ex marmore lapidem lazulum imitante; de lapide item Coralloide stellato, de Coralloide punctato; de Lepadite, seu Lepadi conchæ vniuersalium non absimili; qui omnes fuerant eruti ex agro Castelletano. Rursus de Conchite striato, quem ex agro Antipolitano, ac Fossensi habuerat; de Gagate, & Succino flauo, eruto ad turrim Beuontiam. Huius occasione edisseruit Succinum rem fossilem esse. Quippe in Sicilia quoque effodi, & torrentium impetu detegi, deferrique ad mare vsque, & repellente maris aqua, in littoribus sæpè inueniri. Probabile proinde esse, vt quod expiscantur ad Balthicum mare, vi aquarum erutum, translatumque eò fuerit (maximè verò cùm eodem modo plerumque contineat conclusas muscas, cæteraque id genus animalcula.) Quare & fabulosum esse, quod aliqui narrant, arbores prægrandes esse in Noruegia, ex quibus id Succinum, quasi gummi quoddam decidat, concreseat, atque induretur. Enimverò toto hoc anno nihil magis placuit, quàm quod ob-

seruauit, ac philosophatus est circa pluuiam Sanguinea^{1608.}
neam; quam decidisse rumor perccebit sub Iulij
mensis initium; conspicuis nempe maximis guttis,
tam in ipsa vrbe, ad parietes cœmiterij maioris Ec-
clesiæ, quod est prope muros; quàm ad muros ipsos;
ac rursus, ad parietes villarum, pagorum, oppido-
rûmque, ad aliquot milliaria circumuicinarum. Nam
primum quidem accessit ipse ad inspectandum gut-
tas illas, quibus lapides rubescebant; nihilque non
egit, vt alloqui posset quos agricolas memorabant
vltra Lambiscum sic fuisse percussos ex decedente
pluuia, vt derelictis operis in vicinas ædeis citi aufu-
gissent. Deinde, cùm fabulam esse, quod de viris
huiusmodi proditum fuerat, comperisset, non pla-
cuit illi quod Physici referrent huiusmodi pluuiam
ad vapores è rubra terra sublimè euectos, & post con-
cretionem deciduos; quippe vi caloris eductum va-
porem absque colore sursum ferri; vt vel constare
potest ex eo, qui eductus ex rosas rubeis in limpi-
dam aquam concreuit. Minus etiam placuit, quod
vulgus, ac nonnulli Theologi opinarentur facinus
esse Dæmonum, Strigûmve, à quibus fuissent inter-
fecti innocentes infantuli; scilicet hoc esse meram
coniecturam, fortassisque etiam Dei bonitati, pro-
uidentiaque iniurium. Succurrit porro interea casus,
ex quo sibimet visus est germanam causam dete-
xisse. Quippe ante aliquot menses concluderat pyxi-
de inuentam quandam Chrysalin, magnitudine, for-
mæque insignem. Eius cùm amplius non meminisset,
excitari bombum inaudiit intra pyxidem, eaque ad-

1608. aperta, deprehendit chrysalin, deposito spolio, factam ex eruca papilionem pulcherrimum, qui statim auolauerit, reliqueritque in fundo guttam rubeam, amplitudine Solidi vulgaris. Quoniam verò id contigit circiter idem mensis initium, ac per idem tempus obseruata est Papilionum confertim per aërem transuolantium incredibilis multitudo: idcirco opinatus est papiliones huiusmodi interquiescenteis parietibus diffudisse illeic, quasi excrementum, guttas simileis, magnitudine videlicet pareis. Quare iteratò accessit, comprobauitque guttas illas non supra ædificia, non in deuexis lapidum superficiebus existare, vti debuerat contingere, si è cœlo sanguine pluisset; sed in subcauis potius, ac in foraminibus, vbi animalcula potuerant quasi nidulari. Accessit, quòd parietes iis tingeantur, non qui in mediis oppidis, sed qui agrorum vicini erant, neque secundum parietis elatiores, sed ad mediocrem solùm altitudinem, quantam volitare papiliones solent. Hac ratione proinde est interpretatus, quod Gregorius Turo-nensis refert de pluua sanguinea Childeberti tempore conspecta Parisiis, in diuersis partibus; & in domo quadam territorij Syluaneënsis. Itémque quod memoratur temporibus Regis Roberti sanguine pluuisse, circiter finem Iunij; adeò vt sanguis qui cecidisset super carnem, vestem, lapidémque non posset aquâ elui, posset verò qui super lignum. Quippe idem fuit papilionum tempus, & recentes quoque has guttas elui non posse vllâ aquâ è lapidibus comprobatum est. Hac, & similia cum apud Varium magnâ

magnâ coronâ edisseruisset , placuit simul rem explorare, contigitque vt cùm variè per agros incederent, guttas quoque multasprehenderint in lapidibus, rupibûsque: sed ad cauas tamen, subuexâlve, non verò cœlo obuertas parteis. Accepit deinde ex Italia, & transmisit statim ad Thuanum elogia doctorum quorundam virorum , vt Hieronymi Columnæ, Gabrielis Faerni, Cruceij, & similium, quorum ille voluerat in sua Historia meminisse. Rogârat aliunde ipsum Scaliger , vt instauraret commercium, quod per P. Ostagerium hospitem olim Masiliæ suum instituerat in Oriente , coëmendis Samaritanis, Ægyptiacis, Arabicis libris; dolens quòd à quindecim annis, quibus degeret in Hollandia , nihil prorsùs inaudiisset de Pentateucho Samaritano, cuius sibi procurandi Ostagerius fuerat pollicitus studium. Peireskius ergo, cùm priùs quidem aliquid ea in re tentasset, tum tamen incumbendo acriùs, eiusmodi librum inter plureis alios in Ægypto coëmi, afferrique ad se mandauit. Verùm nauis, qua vehebatur, à piratis direpta est, recuperarique is liber non potuit. Ita priuatus Scaliger fuit exoptatissimo Codice, vt etiam nunquam est assequutus expectatissimum responsum, quod Peireskio ab eius morte venit fœliciter in manus. Scripserat nempe Scaliger ad Samaritanos Ægypti, itémque ad magnum eorum Sacerdotem Eleazarum in ciuitate Sichemo morantem, quæsierátque ex ipsis varia circa obseruationem Sabbathi, aliorumque festorum; circa Messiam, eiusque apud ipsos nomen; & ad extre-

1608.

mum, exemplum Legis, Pentateuchive poposcera-
 Ac ipsi quidem geminis Epistolis responderant; sed
 quòd illæ in Genebrardi, aliorumque manus inci-
 dissent, detentæ sunt, donec, Scaligero mortuo, Pei-
 reskii & obtinuit, & per virum impensè doctum
 Ioannem Morinum è Congregatione Oratorij, la-
 tinas fieri nuper curauit. Curam quoque eo tempo-
 re euocandi Pacium resumpsit, & quod est ampliùs,
 efficiendi ne diutiùs in Religione heterodoxa perse-
 ueraret: at nimis multa interuenerunt, quæ sollici-
 tudinem variam, variòsque conatus fecere rursùm
 irritos. Aberat per ea tempora Valauesius frater Pa-
 risiis, ob Riantiensia negotia: & quia ipsi aliquot
 mensium intercedebant induciæ; ideò rogauit illum
 Peireskii, vt, vel sui causâ, inuiferet Angliam, Bel-
 giùmque, & amicos illeic suos saluaret, quæ dona-
 ria misit, offerret, rara quædam nancisceretur. Ora-
 uit etiam quam-maximè Aquis-granum contende-
 ret, vt quicquid illeic monumentorum Caroli Ma-
 gni superesset, attentissimè inspectaret, inscriptio-
 nes exscriberet, icones quasque in Ecclesiasticis seu
 libris, seu vitris, seu vestibus, seu lapidibus, seu qui-
 busuis aliis rebus impressas exprimi curaret; locorum,
 ornamentorumque ichnographiam non negligeret;
 diplomatum apographa, sigillorum ectypa, prece,
 pretiòve obtineret. Adiecit se sic pœnitere, quòd in
 Hollandia cùm versaretur, Aquis-granum non di-
 uertisset, vt nisi Fratri confideret, paratus esset defi-
 nitè, neque alio nomine eò suscipere profectionem.
 Fecit porrò Frater abundè, & satis, mira sollicitudi-

ne, sedulitate, fide; cùm ipse interea post initum annum est digressus Monspelium, ob illa eadem negotia: scilicet Marchio Oresonius Bressiaco litem intenderat, ob diuenditum Riantij ius plenum. Redierat medio circiter vere, dolorem dentium infandum perpeffus, cùm non longè post incidente patre in periculosissimum morbum, contraxit ipse quoque febrim, quæ diuturna admodum fuit, cessansque sic languidum fecit, vt vix denique per autumnum penitus conualuerit. Quo loco referendum est, quod retulit ipse non semel. Cùm ciborum non appetens, fastidiosusque, tabesceret, rogasse Iacobum Fontanum clarum medicum, eiusque affinem, annon aliquid demùm esset, cuius esum appeteret. Annuente ipso aliquid esse, sed quod se non impetraturum, haberet compertissimum; instituisse illum, id modò, quodcumque foret, significaret. Cùm dixisset autem, Pepones: tum excepisse medicum, maeste, bonoque animo esto; neque enim permitto modò, sed adhortor etiam, ac præcipio, addoque, vt nonnihil meri præassumas, postassumasque, & absque pane, aliavere ad initium pastus, in stomachum mittas. Obsequutum igitur fuisse, adeoque benè inde habuisse, vt deinceps, ac donèc vixit innoxie semper eadem ratione pepones esitauerit. Conualefcens variis officiis studiosos varios adiutavit, veluti Ioannem Taxilem Arelatensem Medicum, nescio quid de ea nova stella, quæ per memoratam magnam conjunctionem apparuerat, meditantem; Gasparem Bricium in eadem ciuitate parochum; virum bonum,

1609. industrium, & cælestium obseruatorem. Ioannem Baptistam Hansenium, quem nouerat Romæ in erudita familia Cardinalis Baronij, cuique procurârat, vt toto triennio foret Gymnasiarcha Aquensis. Atque istos quidem, aliósque demeritus est, valetudine adhuc dubia, remissioréque solùm morbo; cui contrahendo, producendoque non contulit parùm iactura trium amicorum insignium, qui in Hollandia elati sunt. Eorum primus fuit Scaliger, qui manum iam admouerat commentationi de Hebræis numismatibus, cum laborare hydrope cœpit, ex intemperie iocinoris, quæ quarto demum, aut quinto mense, ipsum, die Ianuarij vigesima prima, oppressit. Alter fuit Clusius, qui non tam podagra recenti, quàm debilitate naturæ, die quarta Aprilis interiit. Post-huma huius opera, siue Posteriores curas edidit curator testamento datus Franciscus Raphelengius, mentione sæpè facta Peireskij, cuiusmodi illud, *Alata est ex Guinea in Galliam Spica non dissimilis precedenti, nucula Indicæ fructibus constans, cuius iconem nobilissimus, & amplissimus vir Nicolaus Fabricius dominus de Peiresc, Aquis-Sextiis in Gallie Prouincia Senator ad Clusium miserat. Et postea, Sequens Tragacantha icon, quæ nobis transmissa est ex Gallie Prouincia, nempe Aquis-Sextiis, ab amplissimo, & nobilissimo viro Nicolao Fabricio, Domino de Peiresc, Consiliario Regio in supremo Senatu Aquensi, cum literis ad clarissimum Clusium. Tertius fuit Abrahamus Gorlaeus, à quo non potuit cœptum opus Paralipomenon absolui. Parùm porro abfuit quin hisce amicis Varius quartus*

accesserit. Is per iustitium Septembri mense concesserat Antipolim, vt possessionem eius loci regio acquisiti patrimonio, Regis nomine adipisceretur. Cùm inuississet verò Fratrem, Petrum nempe Varium Vintientem Episcopum, incidit in febrim periculossissimam, ac mense penè diuturniorem. Hanc Peireskius cùm accepisset, teneri vix potuit, quin, laborans licèt, laboranti accurreret. Cùm non posset tamen, mira sollicitudine, vel potiùs anxietate fuit, vt quocumque modo operam præstaret. Cætera inter, scripsit Massiliam, ac exstimulauit Carolum Cassaneum clarum Medicum, appararique illi curauit & rhedam, & lembum, vt seu terra mallet, seu mari, cò expedite aduolarèt. Missitauit penè in singulos dies, qui exquisita quædam seu remedia, seu edulia ferrent, & quis foret status morbi renunciarent. Cùmque primùm facta est spes melioris valetudinis, sellam misit gestatoriam, quam domi habebat commodissimam; tametsi ille non potuit, nisi vectorio lecto reduci. Dum vterque deinceps residua autumnu conualescerent, dielque totos in colloquiis familiaribus ducerent, putás-ne illorum sermones nihil habuisse eruditionis? Vnum præterire non possum, qui fuit postmodum aliquoties à Peireskio commemoratus, cuiusque occasione, etiam post eius obitum, superfuit quidpiam peragendum. Ansam fecère Conuentus varij, qui toto Regno Principis iussu habitare recens fuerant, vt de condendis perpetuis circa Monetarum valorem, vsúmque Statutis deliberaretur. Cùm enim ante septem annos statuisset publico edi-

1609. Cto, vt aureus Solatus antea oblocatus sexaginta solidis, valeret exinde sexaginta quinque; euenerat iam, vt pro septuaginta, & pluribus commutaretur. Itaque Vario sententiam poscente, respondit Peireskius vix esse sperandum, vt proserpens malum fisti vnquam posset. Causam enim esse commercium cum vicinis nationibus, apud quas aurum cariùs, quàm apud nos redimeretur. Nam tum quidem aurum nobis esse in proportionem ad argentum non omninò duodecupla; apud Hispanos verò, exempli causâ, in plusquam tredecupla esse, idque edicto recentissimo, quo Rex Hispaniæ auri valorem decima parte adauxerat, intacto valore argenti. Qua in re sanè non fuerat Principem nostrum imitatus, qui maiore solidorum numero aurum æstimans, maiore quoque æstimauit argentum, ne proportio illa euariata censeretur. Subiunxit, tametsi non modò Rex noster, sed etiam Rex Angliæ, ceterisque Principes nouis edictis eam proportionem euariarent, promouerentque; euenturum tamen, vt singulis æmulatione quadam vel aurum pluri facientibus, vel ipsius pondus, aut certè internum argenti valorem, imminuentibus, res definiri nunquam posset. Scilicet nunquam defuturas, vel bellorum occasiones, quibus, exhaustis ærariis, ad id remedium prouocaretur; vel nationes satis consultas, quæ puriores auri, argentique species penes se seruare, aliundèue allicere hoc artificio procurarent. Et exemplo quidem esse posse Romanos, apud quos As æreus, Denarius argenteus, & Solidus aureus ita paullatim

fuere imminuti, vt postremò facti extra vsum fuerint; & Solidus ipse nominatim, qui cùm potuisset initio duobus Solatis exæquari; commutari demùm debuerit in speciem argenteam, quæ ipsa quoque sic degenerauerit, vt existimari possit in Solidum nostrum vsualem abiisse. Verùm ne tam procùl quæreret exemplum, sufficere, si spectaretur vel vnus Solati valor, qui intra centum postremos annos ita increuisset, vt decrefcente simul interna bonitate solidi, duplo solidorum numero iam æstimaretur. Non esse verò probabile, vt deinceps confisteret, sed futurum haud dubiè, vt intra paucos annos triplo, quadruplòque incrementum acciperet, Solidusque interea non imminueretur modò pondere, sed euaderet etiam planè æreus, tunc pondere quoque suo decessurus. Nec verò vana fuit coniectura: quando iam Solatus à nuperis annis taxatus est solidis centum quatuor; idque Edicto publico, cuius occasione ipse, cùm foret adhuc superstes, adnotauit auri ad argentum proportionem proximè quindecuplam esse. Sed ad colloquium vt redeam, cùm retulisset obiter Assem initio pependisse libram integram, seu duodecim vncias; ac diminutum deinceps fuisse ad vsque duas, ad vnā, ad minus: Denarium, cùm tempore Regum pependisset trientem vnciæ; sub antiqua tamen Republica pependisse solum sextantem, sub recentiore partem septimam, sub primis Cæsaribus octauam; seu drachmam (Atticæ nempe drachmæ æqualem:) Solidum denique principio fuisse partem libræ trigessimam octauam,

1609. postea quadragesimam, quadragesimam quintam, quinquagesimam, & ita deinceps: tum requisivit Varius, quæ illæ Libræ, seu Vnciæ à nostratibus diffiderent? Excepit Peireskii, sibi ea in renondum penitus factum satis. Nam habere se quidem pondera antiqua librarum triginta, decem, trium, singulorum, quæ cum libra Parisiensi senum denum vnciarum zygotatica comparasset; sed comperisse tamen solum vncias Romanas duodecim, decem circiter vnciis Parisiensibus exæquari. Circiter, inquam; nam nunc excessum, nunc defectum excurrere ad treis, quatuor, & quinque drachmas. Tametsi verò doctus Budæus proportionem præscripsisset proximè sesqui-alteram, quod putaret libram Romanam semuncia superadditâ libræ Marcæ, seu octo vnciis Parisiensibus æquam esse; attamen se varios Denarios antiquiores, integriorésque, quàm Budæo fuissent ad manum, ad eandem libram exegisse, deprehendisseque libram Romanam cum semuncia decem Parisiensibus vnciis, ut minimùm, æquipollere. Non audere tamen adhuc rem decernere; quod illi quoque denarij passi fuissent intertrimentum, expectareque donec Româ impetrauisset modulum Congij, qui à Vespasiani usque tempore in Capitolio consecratus, existeret, adseruareturque in Farnesiano Palatio, ac decem librarum vini, aut aquæ pondus continens, prodere posset quotnam libris, vnciisque Parisiensibus tale pondus exæquaretur. Probauit ille, rogauitque ecquam putaret Congij ad nostrates liquorum mensuras esse analogiam? Peireskii

verò

verò dixit id quoque determinandum ex modulo; 1609.
interea verò putare se continere Congium tres circiter Potus (sic enim in Prouincia vocantur, quæ Parisiis Pintæ, cum hæ illis minores sint) licereque etiam id explorare, si constiterit quæ proportio inter Romanum Pedem antiquum, & nostrum quem dicimus Pannum, seu mauis Palmum, intercedat. Romani nempe, vt Amphoram Congij octuplam definirunt magnitudine pedis cubici; ita Congij capacitatem dimidio pedis cubico definitam esse voluerunt. Heinc non vnum quidem duntaxat, sed duos quoque modulos Congij temporis progressu obtinuit: verum nunquam satis vacauit rem pro voto expendere, & postquam posteriorem obtinuit, citò nimis interiit, rem certo certiùs exploraturus. Cæterum quia nos, quantum licuit, illius curam supplementum, nescio an, si dixerimus, nimia sit futura digressio. Tenemur certè gratificari hominibus nostris, qui non modò pondera, mensuræque illas inter se, sed cum nostratibus etiam à Peireskio comparatum iri sperârunt. Vt paucis ergo res dicatur, cautiones adhibuimus easdem, quas Lucas Pætus, & Villalpandus; dum vas ipsum ad summum collum puteali aqua oppleuimus, expendimus, vasis pondus subduximus. Deprehendimus autem aquam, quæ Romano pondere esse debuit decem librarum, seu vnciarum centum viginti, esse pondere Parisiensi (quale nempe Parisiis exploratum, missumque est) librarum septem, minus vnciæ quadrante; seu vnciarum centum yndecim, & quadrantum vnciæ trium. Deinde

1609. ex hac proportionē collegimus vnciam Romanam continere grana quingenta, & triginta sex, qualium quingenta septuaginta sex in Parisiensi continentur; unde & illis in drachmas collectis, obuenire cuilibet drachmæ grana sexaginta septem: idque proinde censuimus pondus Denarij Cæsarei, quem dictum est fuisse drachmalem. Adhæc difficile non fuit valorem huiusce Denarij, & cæterorum consequenter, ac monetæ cuiuslibet, monetâ nostrâ exprimerē, & à recentiore præsertim Edicto, anni nempe M. DC. XXXVI. Cum ex præscripto enim argenti valore, atque pondere colligamus argenti vnciam æstimari solidis Turonicis sexaginta quatuor: idcirco Denarius Romanus valebit septem solidis, ac denariis turonicis quinque, cum triente eiusdem turonici denarij (sicque parum prorsus excedet valorem Regalis Hispanici) & tale fuisse intelligetur non modo apud Romanos, sed etiam apud Græcos, ob parem Denarij, Drachmæque valorem, militum stipendium in singulos dies. Quinarius proinde, siue Victoriatus valebit tribus solidis, cum denariis turonicis octo, ac denarij besse; Sester-tius vno solido, cum denariis decem, ac triente denarij. Et quia, verbi causâ, Siclus Hebræorum fuit, ex Iosepho, Tetradrachmalis, seu denariorum Romanorum quatuor; idcirco valuit solidis similibus viginti nouem, cum denariis turonicis nouem; ac triente. Unde & quia triginta vocati Denarij, quibus Christus Seruator à proditore Iuda diuenditus legitur, triginta Sicli fuisse videntur; ideò Pre-

tium colligitur librarum turoicarum quadragin- 1609.
ta quatuor, ac solidorum tredecim, cum denariis
quatuor. Quod spectat ad comparationem cum
Prouinciali pondere, obseruauimus illam eandem
aquam, siue Romanas libras decem pendere libras
Prouincialeis nouem, cum vnciæ triente; seu vncias
centum quadraginta quatuor, & trientem vnciæ.
Obseruauimus aliunde libram Parisiensem cum pro-
typica Nostrate collatam continere ipsam semel,
cum quatuor vnciis, & vnciæ besse. Sed notandum
Zygostatam Stateras ita temperare, vt versus nume-
rum centenarium, singularum librarum pondus sin-
gulis vnciis adaugeat, propter detrimentum earum
mercium, quæ cumulatim emptæ, minutatim ven-
duntur: adeo vt quæ centum libræ Parisienses æqui-
ponderarent nostratibus centum viginti nouem, cum
triente, exæquentur solum centum viginti duabus,
quatuordecimque vnciis, cum besse. Cum liceat ve-
ro mensuram Romanam tam cum Parisiensi, quàm
cum Prouinciali ex ponderibus comparare; addo
duntaxat nos comperisse quatuordecim Pintas Pa-
risienseis adæquari Potibus nostratibus vndecim; &
liquidorum Modium, qui Parisiis continet Pintas
ducentas octoginta, continere nostros Mellereol-
as quatuor, cum potibus viginti octo: continente
Mellereola Potus duodequingaginta, quorum qui-
libet pendit Prouincialeis libras treis, cum quadran-
te. Ex quibus elicies Congium continere Potus no-
strates duos, cum sextis ferè quinque; seu Parisien-
seis Pintas treis, cum semisse proximè: intelligesque,

1609. exempli gratiâ, quantum biberit, qui treis vini Congios vno haustu sicasse coram Tiberio legitur; unde & Tricongij cognomentum tulit. Habebis rursum quantum mensurarum nostrarum contineat Vrina Congij quadrupla, Amphora octupla: quantum Sextarius sexta pars Congij, & Semi-sextarius pars duodecima, aliàs Hemina, seu Cotyle dicta. Vbi notabis, si lubeat, videri Parisienseis appellare quartam Pintæ partem Semi-sextarium, quod illa ad Semi-sextarium Romanum proximè accedat. Dixi porro obiter liquidorum Modium: nam alioquin Modius aridorum constans ex centum quadraginta quatuor Buxeis, ex quibus quatuordecim deprehensi sunt id statuere Onus, quod nos ex quinque Heminis, Pannalibúsve decem constituimus; talis inquam Modius æquiualeat nostris Oneribus decem, pannalibúsque proximè tribus. Atque hæc sunt quidem, quæ homines nostros scire præsertim attineat; nisi adhuc adiiciam diuissse nos Pedem Parisiensem ex prototypo desumptum in mille particulas, obseruasséque Palmum nostratem, qui octaua Cannæ pars est, continere solùm ex iis partibus septingentas sexaginta treis: Pedem verò Romanum antiquum nongentas & sex; ne memorem Anglicanum continere nongentas triginta treis; Hollandum nongentas sexaginta sex; Lugdunensem, & Gratianopolitanum mille, & quinquaginta duas; Bracchium Florentinum mille octingentas, & duas; verùm de his nimis iam multa. Ad Peireskium redeo, qui statim insequente anno millesimo sexcentesimo deci-

mo est rursus profectus Monspelium. Cùm rebus autem prosperè gestis, incunte iam Maio rediret, in somnium illi contigit, quod aliquoties mihi enarrans solitus fuit præmittere se, si ab alio fuisset enarratum, non crediturum. Erat in eius comitatu Iacobus Raynerius Aquisensis ciuis, qui in eodem cubiculo indormire solitus, indormiit speciatim intra id hospitium, quod vocitant Album, Monspelium, ac Nemausum inter. Somniauit autem Peireskios, ac nescio quid insolitum obmurmurare visus est: quare excitatus Raynerius, ipsum, ecquidnam noui esset rogitando, expergefecit. Tum ille, prohi, inquit, quàm gratum, bellumque excussisti somnium! Quærente Raynerio, quid-nam rei foret, somniabam, inquit, me esse Nemausi, oblatumque mihi fuisse ab Aurifice numisma aureum Iulij Cæsaris, pretio scutatorum quatuor; iamque eram illi, ad ipsum habendum, numeraturus pecuniam, cùm excitante te importunè, & ex oculis Aurifex, & ex manibus Numisma euauit. Exinde, somnium nihil moratus, discessit Nemausum, & cùm prandium appareretur, per ciuitatem digressus est. Casu autem planè stupendo in Aurificem ecce incidit, ex quo dum requireret, si quidpiam fortè rarum haberet, habere se ille respondit Iulium Cæsarem aureum. Rogauit quanti cum venderet; responsum, pretio scutatorum quatuor. Itaque id pretium statim numerauit, acceptoque Iulio, suum somnium foelicitate mira compleuit. Mira, inquam; nam facilè quidem cogitare Nemausum potuit, quò sequente luce erat.

1610.

accessurus : potuit illud Iulij numisma , quod vigilans sæpiùs exoptauerat : potuit id repertum in ea ciuitate , in qua tot Romanæ antiquitatis vestigia : potuit apud Aurificem , ad quod genus hominum vulgò referunt qui talia effodiunt : potuit valorem medioerem , quo aurifices potiùs , quàm Antiquarij ista pendunt ; potuit scutatorum quatuor , quo moderato pretio aurifex posset esse contentus : denique potuit Aurifex , & Nemausi quidem , ac eo pretio habere nummum : verùm hæc omnia concurrisse , & euentum somnio ita respondisse admirabile prorsus est. Non is autem erat Peireskii , qui propterea somnij causam præternaturalem putaret , vt fortè fecisset , si sæpiùs contigissent similia : sed cum nosset fortunæ lusus , habebat duntaxat hunc casum inter eos , qui sua raritate stuporem apud vulgus creant , cuiusmodi etiam memorantur de Eudemo Aristorelis familiari ad Pheras ; de duobus Arcadibus ad Megaram , & de nonnullis similibus ; quam historiarum huiusmodi omnium penes auctores fides esto. Commoratus est deinde Peireskii aliquot diebus Arelate , vt præter aliàs obseruitata , exploraret curiosiùs monumenta quædam insignia ad monasterium Montis-maioris. Cum inde autem discessisset , & iam Salonem accederet , attingit eum Cursor ab Archiepiscopo , qui renunciaret mox inauditam Henrici Regis luctuosam mortem. Consternatus mirè , festinauit tamen , vt consolaretur Varium : dolorem quippè præsentens , quo nouerat percussus iri. Et sanè illius accessus leuamen ad-

hibuit non mediocre magno Viro, qui iam factum. 1610.
rescuerat, hominibúsq; & literis missis dare ope-
ram cœperat, vt vniuersa Prouincia in officio conti-
neretur. Memorabile porrò est ab anni vsque ini-
tio, & priusquàm Peireskius Monspelium discede-
ret, allatum ipsi fuisse ex Hispania Prognosticon
annuum, siue Almanach ab Hieronymo Ollerio
Beneficiato Barcinonensi compositum, & Nouem-
bri superiore Valentia impressum, in quo non ob-
scurè prædictus lamentabilis casus foret. Sic ille
nempe designârat & natiuitatis circumstantias, &
euenta quædam præcipua; vt denotari alius Rex,
quàm Magnus Henricus non posset. Illud Vario
cùm ostendisset, communicassétque præterea cum
Iosepho Galterio Priore, & Domino Valletæ, viro
totius quidem Matheseos, sed Astronomica præfer-
tim peritissimo, digna omnino visa est res, quæ, li-
cèt Astrologicis prædictionibus non esset fidendum,
non negligeretur tamen, tanquam sacrum attinens
Caput, pro cuius incolumitate nulla cautio posset
censeri superflua. Itaque Varius ex eo tempore ipsum-
met exemplum transmisit ad Regem. Ac prætereo
quidem vt magnus, veréque generosus Princeps
laudato Varij affectu contemplerit prognosticon:
sed quia euentus comprobauit, ipseque Ollerius
aliud postea edens in sequentem annum, est pro-
pterea mirè gloriatus; idcirco taceri non potest,
quod saltem dubium faciat ex ipsis-ne Astris, an
potius aliunde rem euenturam coniecerit. Nam de
Astrologica quidem vanitate non est quòd hic loci.

1610. quidquam memorem, & maximè cum euulgata ante treis annos Themata, nisi post annos præterea quatuor, nihil ominarentur infaustum. Non is etiam sum, qui subdubitem habuisse Vatem cum prauo Genio, qui id præfagierit, reuelaueritque commercium: dico solum potuisse ipsum aliqua ratione esse conscium machinationis illius, qua infandum adeò parricidium commissum est. Ea certè neque in Hispania, neque in Italia celari planè potuerat; nam etiam Regij Oratores, ac nominatim Venetiis agens ille virorum optimus Ioannes Bochartus Campinius, Regem iam illius præmonuerant. Comprobatur aliunde est Massiliensibus nautas, quotquot ex Hispania ante duos menses aduentarant, retulisse rumorem fuisse in Hispania disseminatum, quòd Rex Francorum nunc occisus, nunc occidendus gladio foret. Narravit etiam Peireskius, scripsitque ad Malherbium, quod in hunc locum inferi possit. Memorabat nempe die Sabbathi, ac triduo post mortem Regis renunciatam, transiisse Aquis-Sextiis illusterrimum Venetum ex Priulorum familia, qui fuerat Orator Parisiis, ac tum pergebat Orator Madritum. Cum inuississet autem Varium, sibi aliunde cognitum, enarrasse ipsi inter cætera, se Mediolano iter facientem salutasse illic Comitem Fontanum; & cum Regiarum copiarum vim inter colloquendum exaggerauisset, tum excepisse Comitem, nihil sibi ex iis metuendum, quòd vnius hominis mors esset breui eas euersura. Sed temperandum ab istis est. Accepit subinde Peireskius scriptas à Pignorio tertiacius

cuius mensis die literas , quibus admonitus est dete- 1610.
xisse Galileum inuento recens Telescopio magnâ
quædam , admirandâque circa stellas spectacula , ac
potissimum quatuor nouos Ioui circumductos Pla-
netas , quos Mediceos nuncupauisset. Scilicet ab
ineunte vsque superiore anno sexcentesimo nono Ia-
cobus Metius Alcmariensis , dum varia vitra compo-
neret , vt effecta experiretur , inciderat casu in eam
conuexi , concauique comparisonem , ex qua , in-
teriecto potissimum tubo , viderentur intuenti res
paruæ grandescere , & sepositæ admoueri , (vnde &
illi prima defertur Telescopij inuentio ; tametsi Ioan-
nes Baptista à Porta tale quidpiam iam euulgârat)
Galileus verò ex solo rumore inuentionis ad se per-
ducto , cœperat ipse excogitare tum causam effe-
ctuum Telescopij , tum conficiendi artificium ; adeò
vt post molimina , ac tentamenta varia , peruenisset
tandem ad vnius exactissimi constructionem. Ipsum
fuit , quo per primos duos anni decimi memorati
menseis obseruationes illas peregit , quas titulo Si-
derei Nuntij mense Martio typis vulgauit. Peires-
kius ergo re cognita , magno cum ardore satagit , vt
& librum , & Telescopium quam-primùm posset ,
nancisceretur. Enimuerò cùm librum habuisset , ex-
quisitum tamen Telescopium sortitus illicò non est ,
quantumuis nonnulla impetrauerit tam ex Italia ,
quàm ex Hollandia , ac etiam Parisiis , ex quo pri-
mùm tempore elaborari illeic cœperunt. Hinc est ,
cur Iouis Satellites ante Nouembrim detegere , ob-
seruarique nequiuert ; certè vt integram Choream

1610. censeretur deprehendisse. Ex quo verò deprehendit, mirum quantâ lætitiâ id spectaculum fuerit contemplatus. Nam statim quidem rem demonstravit Vario, aliisque amicis; sed & ne tempus frustra abiret, apparauit obseruatorium, inuitauitque, ac sæpius per compluribus dies detinuit memoratum Galterium, cumque eo in obseruando biennium penè totum consumpsit. Erat adhuc frater Parisiis: quare illum sollicitare, varièque vrgeri nunquam destitit, donec vitra Telescopica confici curauit, misitque ad usque quadraginta. Videlicet spes erat fore, vt consequeretur tandem optima, & cuiusmodi fuerant à Galileo usurpata. Interea tamen aliquot reuolutiones speculatus, cepit cum Galterio consilium de Motuum hypothesis, tabulisque concinnandis. Quamobrem Galterius eam Spartam aggressus, sic breui perfecit, vt exquisitè, quantum licuit, determinârit tempora, quibus singuli Medicei circumuolutiones proximè absoluunt, Extimus nempe diebus sexdecim, cum sexdecim horis: Sequens septem diebus, cum horis tribus, & semisse horæ: Tertius diebus tribus, cum tredecim horis, ac semisse itidem: Intimus die vnica, cum horis octodecim, ac simul semisse. Minutias non recensco; quandoquidem licet ad usque secundas, vt Astronomi loquuntur, superputatæ fuerint; nihilominus dies docuit addendum quidpiam, demendumque: vt etiamnum quoque restat aliquid, quod obseruatio, ac diligentia temporum sequentium valeat emendare. Hæc solum attingo, vt innuam, quàm vehementer Peireskii in id

incubuerit, vt res adhuc nascens in suo exortu perficeretur. Quippe delegit præterea virum industrium Ioannem Lombardum, qui obseruando operam conferret; ac eruditos adolescentes Petrum Robertum Medicinæ, & Ioannem Baptistam Morinum Philosophiæ candidatos, qui se Galterio addicerent, vt quia nimis molestum erat numeros omneis retinere, calculis præscriptis, ipsum subleuarent. Obtinuit etiam obseruationes, quas præter Galileum, Ioannes Kepplerus clarissimus ille Cæsaris Mathematicus, aliique iam peregerant; vt ex illarum collatione perfici hypotheses possent. Curauit quoque elaborari Theoricen mechanicam, Peurbachianæ vulgaris instar; vt suppositis radicibus motuum, Mediceorum loca possent colligi in annos, menseis, dies, & horas. Nomina præterea imposuit, quibus discerni singuli possent. Nam cum Galileus vniuersè Mediceos indigitasset, noluit ipse nuncupationem vlla ratione immutare; sed principes tamen delegit ex Medicea familia, quorum nomina inderentur. Quia debebat verò præsertim seruato familiæ honore Reginas duas inclytas, quas illa nostræ Galliæ dedisset, sideribus adscribere; ideò extimo planetarum Catharinæ nomen fecit proprium; alteri, qui præcæteris eximiè resplendet, Mariæ; tum sequenti Cosmi maioris, & intimo Cosmi minoris. Cogitauit deinde tam Obseruationes euulgare, quàm Tabulas; sed quia accepit Galileum curis continentibus in id negotium incumbere; ideò ne videretur palam illi debitam prærepturus, sese ab incepto con-

tinuit. Denique venit illi in mentem adiutare Geographos in tradenda methodo Longitudinis inueniendæ. Quippe quia horum Planetarum sunt motus citatissimi, configurationesque per singulas noctes variæ; ideò cogitauit, si illæ, quibus contingunt momentis, in diuersis locis ad ortum, occasumque obseruarentur, posse, pro temporum variationibus, exquisitè designari intercapedines locorum: posseque adeò Tabulas, chartasque Geographicas sic emendari, ac perfici, vt exinde vsus rei Nauticæ consummationem nancisceretur. Heinc ea de re Amsterodamum ad Iodocum Hondium dedit literas, quibus etiam rogauit illum, vt indicaret nomen, & patriam Inuentoris primi Telescopij; scilicet ignorabat adhuc cum fuisse, quem iam diximus. Scripsit & Parisios copiosè ad Fratrem, postulans ab eo varia Telescopia, quæ obseruationibus faciendis in variis locis destinasset, ac potissimum in oriente, & in nouo Orbe, quò nonnulli amicorum erant breui discessuri. Et postmodum quidem obtinuit obseruationes aliquas, ac potissimum à mox antè nominato Ioanne Lombardo, qui profectus Alepum vsque, versus orientem, fuerat; sed neque illæ fecerunt satis; neque peruidit, omnibus etiam horum Planetarum configurationibus in Ephemeridas relatis, fore proptereà inuentionem adeò generalem, ac animo conceperat. Agnouit enim non posse Nautas ad illos attendere, neque interdium, neque cælo nubiloso, neque Ioue Soli coniuncto, aut noctu sub terras delato; neque toto sexennio ad alterum

polum, cùm Iupiter esset versus alterum; & id genus similia. Quamobrem eam curam deposuit; rãtus aliunde Galileum, Kepplerúmve in eam curam incubituros, & pro sua solertia rem perfectiùs exsequuturos. Certè non parùm gauisus est, cùm non ita pridem accepit venisse Galileo in mentem, vt methodum perficeret, & cum Hollandis communicaret, à quibus arcanum Longitudinum est tantoperè expetitur. Porro cùm Peireskius foret circa ista summopere sollicitus; non destitit tamen interea pluribus curis distineri. Annus sæculi vndecimus erat, quo nescio an dicere debeam apparuisse primum in Prouincia, ac in eo hortulo, quem Peireskius intra ædis Aquis-Sextiensis habuit, flores calyceos Tulipas dictos. In eo scilicet ab autumno superiore defoderat missas Tornaco à Winghemio bulbosas illorum radices. Referebat autem, cum eo tempore nonnihil terræ in hortulo excolendo aggestum fuisset, Caniculam quandam nomine Marphisam conquisiisse catulos, quos abiici præceperat, sepeliissèque sub aggere, & aliquot diebus ita incubuisse, vt neminem accedere, etiam prætextu edulij subministrandi, pateretur. Non memini porro an hæc, an dicta ipsi Sultana fuerit, cuius obitum cùm ægrè tulisset, lætatus tamen fuit ob factum circa illam experimentum. Ea educabat treis catellos, qui vnà cum matre eodem morbo laborauerunt. Vno demortuo, proiectoque, ipsa quoque mater interiit. Nemine causam agnoscete, Anatomicum euocauit, incidique iussit, vt interanea dispiceret. Ec-

ce autem secundum totam intestinorum prolixita-
 tem series aliquot cohærentium candidarum mole-
 cularum, cuiusmodi cucurbitæ, aut cucumeris gra-
 na sunt; vnde videtur fuisse vnus ex iis latis lum-
 bricis, quos Cucurbitaleis nonnulli appellant. Erant
 verò infernè quidem maiusculæ, duriusculæque; su-
 pernè verò ita paullatim in minutulas, molliuscu-
 lāsque desinebant, vt in summo tandem nihil, nisi
 confusus albor appareret. Peireskiius ergo, cū non
 placeret quicquid curando illi morbo proferebatur
 tam à Chirurgis, quàm à quibusdam Medicis; iussit,
 nescio quo ductus genio, afferri sibi theriacam, è
 qua cū materiæ illi adhibuisset, obseruauit magno
 suo, circumstantiūque stupore ipsam statim lique-
 scere, effluereque in decliue. Quapropter iussit ca-
 tellis duobus qui supererant, exhiberi theriacam, ale-
 xipharmacum esse ratus. Ac alter quidem animam
 iam agens inter exhibendum extinctus est; alter ve-
 rò adhuc robustior remedio assumpto omninò con-
 ualuit. Contigit illo eodem anno decantatissima hi-
 storia de Ludouico Gaufrido cacomagiæ infamato,
 deque Magdalena Paludana illius præstigiis corre-
 pta à Dæmone. Ea res verò vt totam Curiam, sic
 præsertim ipsum Peireskium admodum sollicitum
 habuit, qui vniuersam penè historiam literis proli-
 xis descripsit. Ac pro tempore quidem ipso in eadem
 cum vulgo opinione fuit, mouebantque præser-
 tim ipsum Stigmata illa insensilia corpori vtriusque
 iniusta, & Cacomagiæ credita indicia: at dubitare
 postmodum cœpit, num in toto negotio impostura

quædam, aut stupor animi latuisset. Placitum tamen 1611.
semper defendit, quo Curia Magum cremari iussit:
quippe qui aliàs sacro-sancta Religionis mysteria
libidinosus pessumdedisset. Aiebat quoque tametsi
Magi non tantum habeant cum Dæmone, quan-
tum putatur, commercium; nihilominus pœna affi-
ciendos ob prauum affectum, quo desciscunt à Nu-
mine, & Cacodæmonem implorant. Sic, licet factis
vñctionibus non transferantur reuerâ in eas Syna-
gogas, in quibus nihil non patrent nefandum; pu-
niendam tamen voluntatem, qua id appetunt, scē-
que operi accingunt. Quod permouit autem ipsum,
impostura fuit, qua non multò post Massiliensis qui-
dam Sacerdos accusatus Magiæ fuit, prodente quo-
dam Dæmone, quem Gaufridus dicebatur in mulier-
culam intrusisse. Is quippe iudicio absolutus est, sed
corpore tamen toto interpunctus, vt designata à
Dæmone conquirentur stigmata, quæ deprehendi
nulla potuerunt. Tantò verò magis Peireskii rem
vocauit in dubium, quantò post treis proximè an-
nos accepit à Winghamio similem historiam conti-
gisse in Flandria, hoc est interpunctum toto cor-
pore Canonicum quendam, qui fuit denique habi-
tus innoxius. Documentum sanè insigne, ne facile
adeò fides adhibeatur siue Dæmoni, quem Sacra
Scriptura appellat Patrem mendacij; siue muliercu-
læ, quæ partim natiua imbecillitate, partim vehe-
mentia vaporum cerebrum exturbantium, partim
malitia, aut odio, partim concepta, innutrita, defixa
altum opinione, imponere facile potest. Quod ad

- 16II. Stigmata illa spectat, hæsit Peireskii num reuerâ non essent notæ Cacomagiæ; idque præsertim ex quo agnouit rem vocatam in controuersiam à Martino Delrio, aliisque viris impensè doctis. Fortè enim esse posse à natura, pertinereque ad singularem Elephantiascos speciem; aut saltem posse ipsos Magos eas sibi, quasi cauteria inurere, ac perturbatæ menti defigere, inuersionem illam perinde referendam ad Dæmonem, ac referre solent vnguenta, quæ ipsimet parant, & inter se communicant, confisi se ipsorum vi ad maligna illa concilia transferri. Habuit Peireskii toto eo anno valetudinem vacillantem. Fuit autem dubia potissimum circiter ætatis initium; tametsi propterea nihil fuit graue passus, neque interquieuit à solitis studiis. Quinetiam visus sibi est pro votis satis confirmatus, vt adesset Varii grauissima febre totos quadraginta dies in villa Massiliensis agri, Florida ab ipso indigitata, laboranti. Non refero quanta se illi assiduitate deuouerit: hoc vnum non est prætereundum. Conualescibat ægrè Varius, quod teneretur anorexiâ, miroque ciborum fastidio. Cùm venaretur autem Peireskii occasionem addiscendi ecquid posset gustum mouere, & datâ plerumque operâ sermones interfereret de rebus gustatu iucundis; contigit aliquando Varium obiter innuere Truttas lacus Geneuensis non iniucundi esse saporis. Ille ergo id subnotans, tantâ obtinuit diligentiam insignem ex eo Lacu Truttam, opere pistorio conditam; vt, nomine licet alieno oblatam, Varius tamen diuinaverit Peireskij facinus esse.

esse. Sic excitare gustatum voluit, cū factum illi obtulit ex linguis Phœnicopterorum; tametsi id per hiemem, quoniam ea sola tempestate aues illæ maritimæ ad Arelatenſeis paludes capiuntur. Parū aberat, quin ex linguæ exæquarentur hœdinis: & quia tamen esca videbatur suauior, nihil pronunciauit Varius, neque diuinauit, quousque Peireskius illud Martialis extulit,

Dat mihi penna rubens nomen, sed lingua gulosis
Nostra sapit.

Rogatus subinde fuit de sapore carnis Phœnicopteri: excepit autem mirari se, cur illam Apicius apud Plinium, & Imperatores Caligula, ac Vitellius apud Suetonium, Heliogabalus apud Lampridium, & nonnulli alij tantis in deliciis habuissent. Esse enim eam iniucundam, aut saporis certè non exquisiti, aquaticarum aliarum instar, cū etiam piscem oleat; vnde à Prouincialibus vt plurimū abiicitur, exuiæque solū sunt vsui, in fastuosis conuiujs, carnibus aliarum auium obtegendis.



DE VITA
PEIRESKII
LIBER TERTIVS.

IN SEQUENTE anno Parisios iterato profectus est. Aduocârat enim illum Valauesius, quo tempore existimabat illa de Riantio negotia extremo iudicio definitum iri. Et contingit quidem, vt cum moras aliquo-usque traheret, iudicium interuenerit, literisque in itinere acceptis id rescierit; verum quia non tam negotiorum causâ, quàm amicorum conuiscendorum desiderio discesserat; idcirco noluit regredi; sed ardentius viæ insistens accessit Parisios, quo tempore frater erat excessurus. Is verò bono suo fato in vrbe adhuc constitit: incidit enim statim in morbum, quo fuit per integrum mensem eâ exagitatus vehementiâ, vt nisi caput carissimum aduenisset, adstitissetque, vix ab illo emergere, conualesceréque potuisset. Cum à mense autem Iunio restitutus fuisset valetudini pristinæ, discedere tamen absque Fratre noluit, qui in

mensē vsque Nouembrim dilatū voluit reditū. 1612.
Prætextus fuit illud nuperum iudiciū, quod litigiorum Riantiensium non fuit penitus decretorium: nam ad cognoscendū quo iure vteretur Prouincia, audiendis Ordinū comitiis locū interpositū fecit. Vnde quia comitia non poterant cogi absque Prorege Guisio, ipsēque Prorex ante id tempus non erat aulā excessurus, ideò Peireskīus hanc sibi metam, redeundique anslam præfixit. Heic nihil necesse memorare quanta cum lætitiā, virtutisque æstimatione exceperint illum Thuanus, Campinius, Roissius, Faber, alique amici, & insignes viri, quorum iam antè meminimus, quisque illum facie, vel famā iam nōrant. Nihil recensere officia, quibus literatos plerosque deuinxit, non modò qui erant in vrbe, cuiusmodi fuēre, præter superius memoratos, Ioannes Sauaro, Carolus Labbeus, & alij; sed etiam qui alibi gentium, vt in cæteris Galliæ ciuitatibus, in Italia, Angliā, ac Belgio. Attexere præstat, cū nullum intermiserit studium promouendi arteis ingenuas, spectabilem præsertim fuisse quam curam continentem gessit obseruandi cœlestia, deque iis corā edisserendi cum viris Mathematicis, bonarūque rerum studiosis. Factum est quippe, vt nemo melius Phænomena noua calleret, quod nemo ardentius, & constantius in iis cognoscendis operam posuisset. Heinc habitum propè miraculo fuit, quod distractus tot aliis curis, consequi potuisset notitiā adeò exquisitā huiusmodi rerum. Quippe non de ipsis Phænomenis solū, sed de

1612. confectiōe etiam, vsūque Telescopij multa declarauit; eāque occasione plerumque ducere secum solitus est, qui tam fabricæ Organi, quàm rationis vtendi inspectores forent. Heic referendum, cū operam circa Mediceos Planetas nauaret, adnotasse eum aliquid, quod, quibus ista curæ sunt, non fuerit fortassis ingratum. Attendit videlicet Iouem transiisse Cordi leonis ad Boream, non multū ante vesperam diei Iunij trigesimæ, & Venerem corniculatam transiisse adhūc magis ad Boream, inter eam vesperam, & consequentem primæ Iulij; qua etiam nonnihil coniunctionem cum Ioue prætergressa fuit: cū & Luna tunc, omnibus borealior, ipsi eidem Cordi leonis instaret proximè coniuncta. Sic Eclipses duas obseruauit, alteram Lunæ, alteram Solis. Et de Lunari quidem, quæ contigit die Maij decimaquarta, retulit in schedas obstitrissse nubeis, ne adnotaret aliud, quàm Eclipsin cœptam, & ad quadrantem propè diametri promotam, cū vrba horologia variè pulsarent horam nonam, ipsæque in autmato haberet nonam, ac semissem; promotam verò vltra trientem, & ad semidiametrum penè, dum ex vrbanis haberetur nona, cum semisse, ex proprio verò decima. At paullò exquisitiùs circa Solarem, quæ eiusdem mensis die trigesima accidit, scripsit se obseruasse Solem fuisse iam factum, qualis est Luna ad dichotomiam proximè accedens, cū iuxta vrba horologia foret hora nona (matutina nempe) ac triens. Deinceps quoque horâ decimâ cum triente, semisse, ac besse, vltimam increuisse Eclipsin; at

horâ vndecimâ iam imminui cœptam, & ad centum Solis reductam. Horâ vndecimâ cum beſſe, vix ſuperfuiſſe digitum: denique horâ duodecimâ, minùs ſexta parte, Eclipſin deſuiſſe. Quæ commemoro, vt intelligas diligentiam ſaltem in eo non potuiſſe deſiderari. Et expetiſſet quidem poſteà obſeruata fuiſſe omnia ſcrupuloſiùs: ſed ſatis tamen peractum duxit, vt ſumma cum lætitia obſeruationem compararet cum Romana quadam Lunaris Eclipſeos, quam Ioannes Remus Quietanus clarus Medicus, & Mathematicus retulit; & cum Hafnienſi duplici, ſeu vtriuſque Eclipſeos, quam celebris vir Chriſtianus Seuerinus Longomontanus, Tychoſis Brahei quondam adiutor, deſcripſit. Prodiit per hæc tempora liber Italicè ſcriptus, titulo Squitini, quo libertas Veneta ab ipſis Reipublicæ fundamentis fuit diſcuſſa. Is, quia viſus eſt continere eximiam quandam Imperij, Gotthorùmque Regum Hiſtoriæ notitiam, idcirco ſtatim creditus fuit (quæ etiamnum eſt multorum perſuaſio) Peireſkium habere auctorem. Enimvero teſtari licet nihil tale ipſi veniſſe in mentem. Quin potiùs ſic ſemper reueritus fuit Reipublicæ maieltatem, quòſque in illa amicos habuit, vt ad præſtandum oblequium potiùs, quàm ad contumeliàm fuerit comparatus. Ac non diſquiro quidem an auctor huiuſce libri fuerit Antonius Albizius, nobilis ille Florentinus, qui Chriſtianorum Principum Stemmata ediderat ante duos annos, vt nonnullis perſuaſum eſt; an, vt videtur verofiſimiliu, inſignis ille Marcus Veſſerus, cuius ſæ-

1612.

piùs meminimus, ob consummatam eruditionem, propensionemque singularem erga domum Austriacam. Addo duntaxat, immerito videri quosdam suspicatos tam Gualdum, quàm Pignorium, aut contulisse operas in eo opere conscribendo, aut communicasse cum Peireskio quos digereret commentarios. Il fuere enim magis ingenui, patriæque suæ magis amantes, quàm vt ea impietatis labe commaculari voluerint. Vt cumque sit, Peireskios certè nihil simile vnquam cogitauit. Parisiis porro discessurus, ac vale iam amicis dicens, recepit, inter cætera, se ad Mericum Vicum, hieme ingruente, transmissurum par Phœnicopterorum. Subierat quippe earum auium enutriendarum desiderium, non ob pulchritudinem modò alarum rubore flammantium, (vnde nostrates *Flammantem* vocant) obque proceritatem crurum, & colli, cuius causâ à Iuvenale Phœnicopterus Ingens dicitur; sed præsertim ob speciem victus, quo Peireskios quasdam apud Varium educatas commemorabat. Referebat enim illas noctu potiùs, quàm interdiù capere cibum (qui ferè illis parabatur ex pane aqua madefacto:) præsentire frigus aduentans, ac tum ad ignem accedere, pedibusque etiam interdum cremari; dolente pedum altero, illius vice vti rostro, ipsoque, & altero pede alternando incedere: dormire erectas in alterum pedem, reliquo in ventrem, plumasque subducto; parci esse somni, aliâque similia. In ipso discessu summopere doluit eripi sibi extremo morbo amantissimum sui Nicolaum Fabrum, qui non mul-

tōs ante dies commendârat apud Regem egregium 1612.
virum Thomam Billonum operosissima illa sua, ac
fœlicitatis miræ Anagrammata oblatum. In itine-
re diuexatus est magna vrinæ difficultate. Postquàm
rediit, nulla res æquè cum affecit, ac iniuria Variorum a Se-
natorum vno illata, tum ante Natalitia, tum initio al- 1613.
terius anni; cuius proinde toto decursu vix à latere
ipsius discessit, nisi quo octiduo graui morbo labo-
rauit sub finem Aprilis. Rediit interea Frater Pari-
sius, ipsèque per illum varia munera ad amicos de-
dit. Misit quoque multa in Italiam ad Paschalinum,
Benedictum, alios, quibuscum varia edisseruit, & ex
quibus aliqua pro amicis alius vicissim expetiit. Hos
inter fuit Casaubonus, itémque Henricus Polanius
Monetalis Ex-præfectus, qui postulârat tum varios
libros operâ ipsius in Italia inuestigandos, tum pon-
dera antiqua varia, aut institutam certè ipsorum
cum Parisiensi comparisonem. Scribens aliunde
Parisiis, nihil æquè fategit, ac Hannibalem Fabro-
tum Iuris professione clarum, & meliōrum litera-
rum studio cum primis insignem, facere tam apud
Thuanum, quàm apud ceteros amicos, quibus il-
lius eruditio iam innotuerat, commendatum. Ad
eruditos alios quod spectat, Edens non multò pōst
Sirmondus in Sidonium Apollinarem Notas, consti-
tutionem retulit, quam Cusanus esse Constantini
Magni, Scaliger Constantini Tyranni opinati fue-
rant; Peireskius verò docuit, ex Codice Arelatensi,
fuisse potiùs Honorij, & Theodosij Augustorum,
scriptam scilicet ad Agricolam Præfectum Galliarum.

1613. de agendo singulis annis Arelate septem Prouinci-
 rum conuentu. Deinde Iacobus Fontanus nuncu-
 pans illi Commentarios in Aphorismos Hippocra-
 tis, hisce verbis inscriptos voluit, *Hunc vero, quem
 in hoc opusculo condendo insumpsi laborem, tuo fauore
 cectum in lucem prodire exopro, qui virtutum, & scien-
 tiarum omnium cumulo coruscans, fugabis omnia omnium
 oblectatorum conuitia, efficiēsque et hoc opus medi inae
 studiosis utile, sit omnibus futurum iucundum; cum ita
 his non tantum placeas, sed etiam reliquis omnibus, qui
 literarum studiis incumbunt, ut nullam sibi ipsis propriam
 virtutem esse putent, nisi tibi testatam, & acceptam in-
 telligant.* Dicatum quoque, editumque eodem tem-
 pore fuit opus à memorato supra Taxillo, continens
 Iudicium de ea noua Stella, quæ colluxerat ante no-
 uem annos. Verum Peireskius neque consilium, ne-
 que iudicium probare potuit; quod ille aduersus
 meliores auctores, etiam à se communicatos, argu-
 mentaretur Stellam sublunarem, ac suprema aëris
 regione non superiorem. Nimirum ferre non po-
 terat, ut obseruationibus, demonstrationibusque
 refragantibus, quærentur argutiæ, quibus opinio-
 nes in scholis inueteratæ stabilirentur; tanquam do-
 cere nihil dies posset, neque experimenta forent ra-
 tiociniis umbratilibus præferenda. Quocirca eodem
 tempore collaudauit Jacij candorem, qui rogatus
 sententiam ferre de Solaribus Maculis Telescopio
 iam obseruatis, ad deliberandum tempus petiit, con-
 turbatum se asserens, & ex obseruationibus nouis
 hypothesibus nouas constituendas sentiens. Sub idem
 tempus


tempus rumor percrebuit de Giganteis ossibus, quæ in Delphinatu reperta Rex imperavit ad se transmitti. Ferebant enim detectum fuisse in fabuloso quodam loco, non longè ab ipso confluente Rhodanum inter, & Isaram, sepulcrum lateritium, triginta longum pedibus, latum duodecim, altum octo, cum superposito lapide, in quo hæc inscriptio, THEV-TOBOCHVS REX. Addebant, sepulchro aperto, apparuisse intus Skeleton humanum, longum pedes viginti quinque, cum semisse; latum ad humeros, seu scapulas decem; profundum ad thoracem quinque. Cranium observatum fuisse quinque pedum secundum longitudinem; secundum verò ambitum, decem. Spectato prodigio per integrum diem, cætera quidem ossa abiisse in cineres; at superfuisse, quæ translata nemo non vidisset Parisiis, partem maxillæ inferioris, vertebrae duas, portiones costæ, humeri, femoris, alterum femur, tibiæ, astragalum, calcaneum; præter non transmissa aliquot fragmenta, ac nominatim femoris, itémque duos dentes. Memorabant etiam reperta argentea numismata, numero circiter quinquaginta, cum effigie Marij, & in aversa parte literis MA, nominis ipsius initialibus; unde & confirmatum volebant sepultum illic Theutobochum Theutonum Regem à Mario devictum, virum tantæ proceritatis, ut Auctores meminerint fuisse trophæis eminentiorem, & quaternos, senosque equos transilire solitum, aliâque id genus. Porro ut Peireskiius rem vertit in dubium; ita expendit quidnam potuisset fabulæ locum facere, idque præ-

1613. fertim, ex quo libellum à Nicolao Habigoto Parisiensi Chirurgo ea de re conscriptum pellegit. Ac non hæsit quidem, quin ossa in ea regione detecta fuissent: concessit posse alicuius vetustioris Gigantis esse; at cuius esse perhibebantur, in animum nunquam induxit. Nam primùm quidem, neque Theutobochus, neque illius subditi latinam linguam vsurpârunt, vt excitato tumulto inscriberetur Latina vox; neque Romani, si pro sua illa hostili pietate monumentum condidissent, illud extruxissent ex lateribus (signinum certè opus non fuisset, quale ad sepulchra tunc vsui non erat) sed potiùs, nisi ex marmore, saltem ex alio lapide, in quo & suæ victoriæ, & pietatis aduersum hosteis insculptæ notæ relinquerentur: cùm aliunde locum delecturi fuissent, nisi sublimem, aut faxeum; saltem non ita arenosum, atque lubricum, cuiusmodi is fuerat; ne facilè obrui, aut subuerti posset. Mirabatur etiam neque asseruatum, ostensùmque fuisse inscriptum illum Lapidem, qui Parisios sanè fuerat transferendus; neque sepulcrum relictum fuisse vel intemeratum, vel cum insignibus vestigiis; vt Dominus illius loci propagandæ ossium Giganteorum famæ curiosus, videbatur cordi habere debuisse. Suspicionem adaugebat, quòd acceptæ Cranij dimensiones perhiberentur, cùm id nimirum solidum, nec cinereum existeret; & tam citò tamen, aliis ossibus superstitis, exsolutum fuisset. Videbantur enim fabulæ auctores subueriti fuisse, ne ex accurata eius inspectione comparationéque cum humano cranio posset veritas scèlicius

exquiri. Ad Numismata quod spectaret, dicebat illas literas designasse non MARIUM, cuius prænomen C. non fuisset omisſum, neque integrum nomen MARIIVS Romanorum more exprimi neglectum; ſed potiùs MAſiliam, tum Rempublicam, cuius, vt ciuitatis Græcæ, ea numiſmatum argenteorum forma erat propriâ, non ipſorum Romanorum. Quoniam verò à paucis annis, neque longè ab eo loco reperta complura huiuſmodi numiſmata fuerant, ipſæque nonnulla ab illuſtri Frereo, cuius eſt ſuperiùs facta mentio, habuerat; eam ob cauſſam ſubdubitaui, num callidè, vt tempora, ita loca forent confuſa. Quòd Theutobochus verò legatur fuiſſe Trophæis procerior, arguere id quidem, fuiſſe illum altitudinis decem, duodecimve pedum noſtrorum vulgariũ, cuiuſmodi erant trophæa, quæ in ouationibus, ac triumphis geſtabantur (idque computata geſtantium, brachiorũque elatorum altitudine) cuiuſque modi etiam Heroum exhibebatur ſtatura (ad humanam nempe communem ſeſqui altera) non verò pedum viginti quinque. Sed neque id, quod legitur de Equis quaternis, ſenſque, ita eſſe intelligendum, quaſi diſtentiſſis cruribus ipſos vnà complecteretur: ſed potiùs, quòd moris haberet ex vno tranſire in alium; hoc eſt, mutare ſæpius equum, tamquam breui ſpatio pondere laſſatum. Argumento eſſe, quòd Florus (à quo id ſcriptum) prodidit illum quaternos, ſenſque equos tranſilire ſolitum, vix vnum, cùm fugeret, aſcendiſſe; quaſi indicetur non vnà deductam equorum multitudinem, vt deduci

1613. moris erat. Denique plura edifferebat & de loco victoriæ, & de triumpho, cuius pars, seu spectaculum Theutobochus fuit, & de nonnullis aliis rebus, quibus euulgato rumori habita fides eleuaretur. Obtinuit etiam postremis annis aliquot fragmenta huiusmodi ossium: sed ex illorum inspectione confirmatus magis in sententia fuit, ratus tum demum grandia ossa, quæ effossis sæpe sepulcris miramur, esse Elephantina; quasi belluarum Domini illa cara habuerint, aut fortè etiam posteritati illudere voluerint ex ea sepeliendorum cura. Opinatus est etiam, commonstrari interdum ossa, quæ effossa fuerint ex arenis, aliisve locis, vbi casu quodam fuerint obruta; cum reperire vix liceat virum aliquem fide dignum, qui sepulcra fabrefacta oculis suis conspexerit, fidesque penes illos sit, qui diuendunt, monstrant, aut se inuenisse, eruisseque profitentur. Heinc optauit sapiùs virum aliquem tam falli, quàm fallere nescium, in Siciliam nauigare, explorareque quæ effossa non procùl Panormo Gigantum ossa perhibentur, ac specialiter Crania. Sperauit enim fieri posse, vt is vteretur ingenua illa voce Suetonij, esse Capreis immanium belluarum, ferarumque membra prægrandia, quæ dicuntur Gigantum ossa. Sed hæc iam nimis. Sequutus annus feralis fuit amicorum illustrium morte. Accepit enim ex literis Aprili mense à Gualdo scriptis, obiisse & Contarenum Procuratorem Venetiis, & Lælium Paschalinum Romæ, & Veronæ Nichezolam. Accepit etiam postmodum obiisse Augustæ optimum Velferum, die Iunij vige-
- 1614.

fina quarta ; quo etiam proximè tempore Casaubonus mortuus in Anglia. Quin ipse quoque literis ad Natalitium Benedictum mense Maio scriptis meminit Ducis Arschorani, tanquam antè demortui. Meminit aliàs, vt vita functi Heidelbergæ, Marquardi Freheri Iuriconsulti, & Historici, cuius amicitiam Velferus parârat. Nescio an alij fuerint ; sed numerare solebat annum ab alio ferali quintum, ereptorum nempe sibi caput carissimorum iacturâ, numeroque infaustissimum. Addebat sibi solatio fuisse, quòd inire intereà amicitiam licuerit cum aliis viris oppidò magnis. Vnus fuit Ioannes Franciscus Vidius à Balneo, Patracensis Archiepiscopus, & per ea tempora Auenionensis Vicelegatus. Singularis enim deinceps necessitudo intercessit, seu donec ille Auenione degit ; seu cùm est versatus perillustis Nuncius tam apud Principes Belgarum, quàm apud Regem Christianissimum ; seu postquàm factus est Cardinalis raræ, & spectatæ virtutis. Alius fuit Franciscus Sauarius Breuius, qui diu fuerat Orator Regius ad portam Ottomanicam, quique tum Roma rediens, vere nouo fuit Aquis-Sextiis ; ac secum habuit Gabrielem Sionitam ex Maronitis Libani montis, linguarum Orientalium interpretatione iam clarum, quicum etiam Peireskius amicitiam contrahere, porroque excolere suauissimum habuit. Alius rursùm fuit Guillelmus Catellus, eximium Senatus Tolosani lumen, quicum multa communicauit, seu ad specialem Comitum Tolosanorum historiam, seu vniuersè ad Occitanicæ commentarios spectantia ; quod



In bibliotheca Domus fl. caroli parisiensis

VIRI ILLVSTRIS

NICOLAI CLAVDII

FABRICII DE PEIRESC.

SENATORIS AQUISEXTIENSIS

VITA. *LD*

Per PETRVM GASSENDVM Præpositum
Ecclesiæ Dinienfis.



PARISIIS,

Sumptibus SEBASTIANI CRAMOISY,
Architypographi Regij, viâ Iacobæâ.

M. DC. XLI.

CVM PRIVILEGIO REGIS.

THE
NATIONAL ANTHROPOLOGICAL ARCHIVES

WASHINGTON, D. C.

1907

1907

1907

1907

1907

1907

1907

1907

ingenuisti praeceptam tibi, magnâ fatorum inuidiâ, illius consuetudinem; ac me, quem nôras fuisse cum ipso familiarissimè versatum, perquàm studiosè de eius studiis, moribûsque es percontatus. Voluisti etiam habitum oris ex effigie cognoscere, & loca adire, in quibus superessent illius vestigia, lustrando ubi habitare, ubi sedere, ubi praestanteis quosque viros, quibusdam quasi Sirenibus, detinere solitus fuisset. Denique in eam raptus es virtutum eius admirationem, ut conscribende illius vitæ non postremus auctor mihi fueris, ac me idcirco non inuitus à te abesse permiseris, ut in secessu hocce meo coronis citius imponeretur. Et poteram quidem germanam excusationem prætendere ex tenuitate virium: at cunctandum non censui, cum ad multiplex officium attendi. Nam primum quidem, quod ad Te spectat, morosus sim planè, nisi obsequar, qui nihil tale cogitans, ac nihil tale meritis, sic fui euocatus ad te salutandum, ut ex eo usque tempore beneuolentia erga me tua esse non potuerit & liberior, & dulcior, & ad omnem comitatem, facilitatè que procliuior. Didici certè experiundo, quàm merito iure te suspiciat, amètque, & suas delicias tota ducat prouincia; fœlix videlicet Prorege, in quo philosophia, & imperium aquis momentis temperentur. Quinetiam ita pacis studia cum artibus belli

componis, ita cum Marte Musas concilias, ut ambiguum fiat, generosiorne, an eruditior emineas; & cum immortale id decus sit tibi gentilitium, nemo tamen ex inclyta, Regiâque Valesiorum stirpe occurrat tecum comparandus. Sed memoranda hæc aliàs: nunc commendari satis non potest, quod fasceis ubique submittis virtuti, neque in solis Principibus regiarum laudum materiam queris. Nihil interesse existimas sub qua veste lateat heroïca mens; & modo pectus diuinum sit, propensum te ad cultum præstas. Exemplo certè erit perpetuo, & magnorum Ducum, Imperatorumque factis accensendo, quod iam tua commendatione Senatorij ordinis virum ob eximias animi doteis, inter Principes euehis; & ne unquam illius fama intermoriatur, curam assis. Oportet nempe in te possideas quas in illo amas laudatas virtutes; neque potest affectus tui non perennare memoria, cui virtus ipsa est elogium pronuntiatura sempiternum. Deinde quod spectat ad Virum, ingratus sim, nisi id præstem, quod singularis erga me amor, & munifica indoles erga omneis efflagitat. Nam me quidem quantum amârit, promptius est animo sentire, quàm verbis exprimere; satisque est dicere me facilitati vertere magna, quod me tam carum habuerit, quod tam frequentem sibi adesse, consilio-

rúmque animi omnium esse consciunt voluerit;
 quòd in meum sinum ut cetera, sic, extrema ver-
 ba, animamque ipsam tandem exhalârit. Eam
 ob causam, cum nulli magis, quàm mihi esse cordi
 debeat capitis tam cari memoria; currenti sanè
 adhibes calcar, cum tuo imperio id exigis, ad quod
 gratitudo, & ius amicitia me procliuem facit.
 Qui enim quoties quidpiam de illo cogito, loquor,
 audio, intima quadam suauissimâque animi lati-
 tia perfundor: quomodo possim non iucunde vita
 eiusdem seriem sic scribendo retexere, ut cum ple-
 risque cõmunicetur? An non videbor adhuc cum illo
 humanissimè conuersari, suaueisque horas consu-
 mere, ac tum mihi demum satisfacere, ubi per me
 non steterit, quin tanti amici gloria efflorescat?
 Quantum verò ad propensionem, qua animatus in
 omneis fuit, exstitisse nemo videtur, qui in com-
 mune bonum natus, id impensius curauerit, ut
 constantissimè prodesset uniuersitati generis hu-
 mani. Nam multis quidem cessisse potest, si fa-
 cultates spectaueris; nemini tamen, si virium mo-
 dum, voluntatèque benefaciendi. Dignus proin-
 de, qui regnârit in animis hominum, ac studioso-
 rum præsertim, quos excitare, fouerèque eruditio-
 ne, consilio, auctoritate, gratia, opibus suis destitit
 nunquam. Testes sunt boni, doctique omnes, qui
 consensu unanimi fatentur nullum unquam fuis-

*se Meccenatem generosorem. Heinc tametsi fama illius non videatur posse extinguì, cuius illu-
 stri nomine litteratorum orbis completur, haud ta-
 men committendum est, ut idem nobis exprobrari,
 quod Meccenatis saculo possit. Nam quòd hu-
 ius historiam nemo coatanens in posteros trans-
 miserit, effectum est, ut prater nomen eruditis ca-
 rissimum, vix quicquam de illo ad nos perman-
 rit; & cum idem Nostro timendum videatur,
 aequum profectò, ut qui illi familiariter conuixe-
 runt, id curent, ut quis fuerit, nepotibus etiam
 seris innotescat. Similis enim crepusculo vesper-
 tino est rerum fama, qua initio clarissima, ita
 paulatim euanescit, ut abeat tandem in tenebras;
 opusque adeò historia est, qua facilius instar illam
 producat. Agnosco porrò neminem esse, cui, po-
 tius, quàm mihi id munus incumbat; quando ne-
 mo est, cui propter diuturnum, familiarémque
 conuictum, ille potuerit esse perspectior. Accedit,
 quòd licuit à morte ipsius ea interrogare, & cum
 ex variis epistolis, tum ex aliis monumentis in-
 telligere, qua non fuissent cuius perinde in prom-
 ptu. Factum certè est ob hanc causam, ut cum
 tot viri eximij huiusmodi Spartam ornare potuis-
 sent, nihilominus tecum conspirarint, meque solli-
 citauerint, ut illi admouerem manum. Postremò
 quod spectat ad Patriam, ad hanc etatem, ad*

posteror, iniurius sim prorsus, si opus detrectem. Et patria quidem; nam species quadam impietatis videretur, si obduci paterer lumen, quo, ut hactenus coruscavit, sic merito in posterum gloriari mirifice potest; si negligi id ornamentum, quo pronunciare penè licet nullum unquam aut existisse, aut existitum magnificentiùs. Quippe non tota modò Europa, sed Asia quoque, & Africa, ac ipse etiam novus orbis conuersos eius occasione in hanc prouinciam oculos habuit; nemòque usquam fuit eruditus, bonarumve appetens rerum, qui non aut illum conuenire, aut cum eo certè agere per literas non affectàrit. Tum presenti quoque atati; siquidem eius interest, ut qui sequentur, intelligant non fuisse effatam in ipsa naturam; potuisseque eam virum magnum, insignemque producere, qui futuris post saculis proponi in exemplum posset. Magna certè eius laus est, quòd videatur in illo vno collegisse omneis omnium seculorum virtutes; possitque adeò sese efferre, quòd in ipso expresserit quicquid præclarum de Pandora fabulosa atas confinxit. Denique ipsis posteris; quoniam incundissimum ducent virum illum cognoscere, cuius singulari affectui sese plurimum debere agnoscent; cuius fortassis imitatione sic tenebuntur aliqui, ut quasi Phœnices enasci ex illius cineribus non sine fructu aliquo generis humani

contendunt. Quod superest, vitam describam,
 qua narrationis simplicitate, non coloribus quasi-
 tis spectetur. Alij, si videbitur, comptiore cala-
 mo expolient, ac historia forma donabunt quos ipse
 commentarios, ceu rudera quadam, digessero so-
 lum, veluti annaleis, in temporum seriem. Siqui-
 dem mihi animus est agere Damidem duntaxat,
 & si qui fortè caussabuntur delectum mihi non ha-
 bitum, minima quaque obseruitanti; dicam quod il-
 le, etiam micæ, quæ ex mensis Deorum sunt, di-
 gnas videri, quæ colligantur. Fortè neque res iis
 erit ingrata, qui, similes tui, pernosse magnos viros
 student, non ob actiones solum illustreis, publicè quæ
 exhibitas; sed ob obscuras etiam, & quas euulgari
 ipsimet noluisent. Quippe quæ in oculis omnium,
 & cum claritate geruntur, nescio quid persona-
 tum habent; unde quidnam intus, & sub cute la-
 teat, internosse perarduum sit; quæ verò procùl ab
 arbitris, & sine fama captatione, atque idcirco si-
 ne fūco, ereptæque personæ fiunt, ea demùm homi-
 nem ostendunt; quod discernere est operæ pretium.
 Id scilicet animos addit ad imitandum præclarè ge-
 sta, cum etiam in heroibus nonnulla deprehen-
 dimus infirmitatis nostræ indicia; neque perin-
 de desperamus eorum virtutes assequi, ac dum
 grandia quaque duntaxat narrantur. Sin verò
 nonnulli requirent illustriora quadam, & am-

pliora facta, quàm commemoraturi simus; nò-
 rint oportet non omneis posse Scipiones esse, aut
 Maximos, ut bella, triumphosque recordari va-
 leant. Abundè illi merentur laudem, quos cùm
 fortuna ad summas opes, atque dignitates non eue-
 xerit; maiores tamen animos gerunt, generosiore
 virtute sunt, ac molliuntur grandiora longè, quàm
 pro conditione sperare quis possit. Talis porro Pei-
 reskius fuit, quem exhibituri non sumus, nisi ut vi-
 rum, qui fuerit gradus, censùsque Senatorij; &
 qui se se tamen ita gesserit, ut se fecerit quolibet en-
 comio, ac panegyri superiorem. Videlicet sumus
 duo quedam toto decursu prosequunturi, ob qua com-
 mendatus summoperè est; alterū eruditio magna,
 ac omnigena, cum ardore sciendi inexplabili: alte-
 rum cura indefessa promouendi arteis ingenuas,
 cum regia planè erga omneis literatos munificen-
 tia. Ex hisce verò capitibus periculum sanè non
 subest, ne efferre quidpiam hyperbolicè videar; le-
 quar enim in ipso ore eruditorum virorum, apud
 quos ille inclaruit, quique tantum abest, ut me
 causentur fuisse nimium, quin vereor potius, ne par-
 cum nimis exstitisse sint conquesturi. Sed ne harere
 heic videar, patere, per optime Princeps, ut qua nos-
 se desideras, deinceps enarraturus, exordiar à ma-
 ioribus: ut vel ex eo capite constet, cur illum aucto-
 res constantissimè Nobilissimum vocitarint.



DE VITA
PEIRESKII
LIBER PRIMVS.

PRINCIPIO genus Peireskio fuit ex
perantiquo illo Fabriorum, seu Fabri-
ciorum stemmate, quod Pisis in Italia
oriundum, translatum est in hanc Pro-
uinciam, à tempore vsque Diui Ludo-
uici, ac partus salutiferi anno supra millesimum du-
centesimo quinquagesimo quarto. Memorant enim
Hugonem Fabrium inter Pisanos nobiles militiæ illi
sacræ adscriptos, fuisse à Sancto Principe in Prouin-
ciæ oras deductum, cum ex Oriente rediens appulit
Arcas, seu Hieras, Olbiam scilicet antiquorum. Il-
le cum morbo detentus fuisset, & à discedente Re-
ge cominendatus, ea fuit apud viros primores aucto-
ritate, & gratia, vt contententium de arcis, & ciui-
tatis dominio dissidia composuerit, ductaque deinceps
ex stirpe Sollerienti coniuge, fixam Areis statue-
rit sedē. Loco deinde cooptato in patrimonium Prin-
cipis, præfectus ipsi legitur anno sæculi illius septua-

DE VITA PEIRESKII

gesimo à Carolo primo Comite Prouinciæ, ac Rege Siciliæ, cui non minus fuit, quàm Ludouico germano carus. Cœpit subinde ciuitatem, castrumque variè communire; sed absoluit opus Aycardus eius filius, relicta ex nomine suo vni portarum nuncupatione, quæ etiam - num vocabulo corrupto dicitur Cafabria. Natus Hugoni præter Aycardum filius alius nomine Paulus, qui fuit à Carolo secundo maior Massiliæ Iudex creatus: itémque alius nomine Guillelmus, qui ex variis peregrinationibus redux, auctor fuit Xenodochij, in quo peregrini cuntes, redeuntésque ex Palæstina curarentur. Sed, vt compendium faciam, successit deinceps nobilis progenies, armis, literis, pietate conspicua; cum subiecto ipsi per propagines, ætatésque varias dominio Regij, Spinosæ, Gramusæ, San-Juliani, San-Ianeti, San-Laurentij, Lauernæ, Calasij, Petrisci, Valauesi, Riantij. Enimuerò taceri non debet abnepos Aycardi Antonius, ad quem, & ad Raymondum filium exstant, legunturque apud Nostradamum humanissimæ Renati Regis literæ, cum sese ante ducentos annos ad Neapolitanam expeditionem compararet. Fuerat Raymondus à puero vnà cum Renato in Ludouici secundi aula educatus; natusque est illi, præter Antonium, Amedeus, qui, quòd esset natu posterior, ideo familiæ insignibus, seu Leonis furui in scuto aureo lemniscum coccineum adiecit. Legitur is quoque Arcatum præfectus, & Carolo tertio, cui Rex Franciæ breui successit, intimè notus. Ab hocce autem familia rursus in duos ramos diuisa est: siquidem ipsi fuere duo filij, alter Fulco, alter

Guillelmus; ambo & petitiâ armorum, & prudentiâ iuris instructi. Quippe, cùm primùm in expeditione Pedemontana militassent, sese ab ipso reditu excolendo iuri totos addixerunt. Nam Guillelmus quidem natu minor, à magno auunculo Elziario Portanerio Brinoniensi, viro literato adoptatus, concessit iuris discendi causâ Aureliam, & Auaricum; ductâque vxore Aruernate, in ea regione pedem fixit, & gratitudinis ergò insignia Portaneriæ domus assumpsit; in scuto nempe cæruleo fasciâque, & rosas argenteas. Reliquit porrò præter Hugonem iurisconsultum celebrem, filium alium nomine Ioannem, patrem Ioannis alterius, à quo procreatus Ioannes alius parens fuit Ioannis illius, qui iam Libellorum supplicum Magister, heroinas habet germanas, tum Magdalenam Petro Seguierio, per-illustri Franciæ Cancellario; tum Mariam, viro generoso Philiberto Pompadorio Lemouicum Proregi nuptam. At Fulco, ex quo supremus Senatus vnâ cum nascente superiore sæculo Aquis-Sextiis creatus fuit, maxima cum laude causas perorauit, factusque sæpius Prouinciæ procuratoribus Assessor, destinatus non semel fuit ad Ludouicum duodecimum, itémque ad Franciscum primum. Is, Fulconis eruditione, & probitate perspecta, Senatorem esse mero nutu iussit, anno eiusdem sæculi supra trigésimum secundo; & cùm Carolus Imperator immineret Prouinciæ, Annæo Mon-morantio Regiæ militiæ Præfecto consiliarium dedit. Memorabile porrò est, fuisse eum auctorem salutaris consilij, quo Mon-morantius regium Archium in

Baulciensem transtulit arcem: sic enim pretiosa illa tabularia euasere id, quod fuit à Sabaudò deinceps A quenſi Palatio illatum incendium. Quin-etiam cùm non poſſet vrbs Imperatoris copiis obſtare, ſeceſſus auctor ciuibz fuit, & ne quid ex ea ſubſidij reſiduum fieret hoſtibus, ita ad peſſundandum cibaria, cætera-que hortari cœpit, vt primus & horrea in puteum, & vaſa vinaria, ac olearia in angiportum effuderit. Fulcone defuncto, admiſſus eſt Nicolaus filius in dignitate Senatoriam anno ſæculi quadrageſimo quinto. Innotuit huius quoque virtus non modò Proregi Claudio Sabaudò Teudæ Comiti; ſed ipſi etiã Carolo IX. qui Senatu interdicto, miſſâque in locum illius ſummorum Iudicum decuriâ, conſcriptum decuriæ Nicolaum voluit, & Carolo ipſius fratri, poſtquàm per expeditionem Corſicanâ copias deduxit, ſeſeque ſtrenuiſſimè geſſit, conceſſit vltro dominium, & proprietatem Brigantij. Iam, vt accedamus ad Peireskij patrem, reliquit Nicolaus duos filios, Claudium nempe, & Reginaldum. Fuit autem Claudius corpore puſillo, ac infirmo quidem; ſed animo tamen planè generoſo, atque vegeto; adeò vt ab anno uſque eius ſæculi ſeptuageſimo ſecundo, quo paterna, atque auita dignitate donatus eſt, magni in Senatu & tota Prouincia fuerit nominis, ac Henrico Engoliſmenſi magno Melitenſium Francorum Priori, Proregique eximiè carus. Reginaldus verò innutritus à puero apud Duciffam Ferrariæ Renatam Ludouici duodecimi filiam, cùm illa exigeret ſenium Montargirij dedit ſe deinceps iuri excolendo, allectusque eſt ſub-

fidiorum, sacrique patrimonij comitibus, & rationalibus Magistris. Cùm incidissent autem illa heno-
tica factionis difficillima tempora, perstitit constans
vnà cum fratre, in fide Regi debita, & (quod Bernar-
dus Nogaretius Valletanus tum Prorex magni æsti-
mauit) Arearum arcem, atque adco totam illam
oram à Sabaudo desciscere, auctoritate sua curauit.
Porro cùm frater viueret cœlebs, duxit ipse in coniu-
gem Margaretam Bompariam, quæ ex paterna stirpe
equites, & præfides habuit; ex materna verò ad fa-
milias Valleuoriam, Forbinámque attinuit. Fando
verò accepimus fuisse illam forma adeò eleganti, &
composita, vt Catharina Medicea Regum mater,
cùm Aquis-Sextiis inuisceretur à nobilibus scœminis,
ipsam vnã delegerit, quam suo osculo dignaretur.
Is itaque fuit Reginaldus Fabrius, hæc Margareta
Bomparia, quos Peireskius noster parentes agnouit.
Quoniam verò editus est in lucem Belgenserij; ideo
sciendum hoc oppidum situm esse in perangusta, sed
peramcœna tamen valle, quam Gapellus fluuiolus in-
terfluens etiam diuitem facit. Distat heinc Tolone,
heinc Areis eodem, quo illæ quoque vrbes inter se di-
stant interuallo; milliarium vt putà prouincialium
trium: & cùm vtrique ad Boream sit, vtrique etiam
aëris bonitate longè præcellit. Fecerat vicinia, vt ma-
iores illi Areis commorantes, tum aliquot prædia in
eo oppido quærerent, tum eò secedentes exciperen-
tur vetere castro, quod nunc temporis iacet dirutum:
scilicet nondum extructa domo præclaris hortis co-
hærente, in quam, vt canalis ex fluuio deriuari tutius,

& vberius posset, Claudius pontem, seu aquæ-
 ductum satis insignem interexstruxit. Natus est ergo
 in memorato Belgenserij castro Peireskii, cum pa-
 rentes eò diuertissent ob pestem memorabilem, quæ
 1580. anno salutis millesimo quingentesimo octogesimo
 grassari tota quidem Prouincia, sed Aquis-Sextiis
 præsertim cœpit. Incidit autem natiuitas in diem
 Decembris anni eius primum, ac horam à meridie
 propemodum septimam. Quod attingo solùm, ne
 videar circa temporis circumstantiam non fuisse satis
 diligens; non verò vt faciam hariolandi ansam con-
 iectoribus, quò iam post viri obitum, certius quàm
 antè, fata retexant. Etenim mirum dictu est, quàm
 multa mentiti Astrologi fuerint, seu annos spectes,
 quibus non vixit; seu vxorem, & liberos, aliâque,
 quibus caruit; seu cætera multa, quæ est consequu-
 tus. Cum parentes porrò aliquot iam annos absque
 liberis exegissent, eam ob causam quamprimum ma-
 ter, grauidam se esse pensens, destinavit proli lu-
 stralem sponsorem, non magnatem aliquem; sed,
 quæ fuit eius pietas, pauperem obuium primò futu-
 rum. Heinc qui pauper primus occurrit, accersitus
 est, fidemque, dum initiaretur, abluereturque pro eo
 spondens à nomine patrui Claudium appellauit. Ve-
 rùm cum patruus superuenisset, etiam aui nomen ge-
 rere illum voluit; vnde, quasi prænomine Nicolai
 imposito, dictus est Nicolaus Claudius. Quanquam
 non modò, cum puer esset, Nicolaus ferè audiuit, sine
 adiuncto Claudij: sed etiam deinceps ætate proue-
 ctus, vt cum est ab auctoribus Nicolaus Faber, seu
 Fabrius,

Fabritius, seu Fabricius appellitatus. Quo loco adnotari potest insignis eruditi viri Ioannis Seldeni æquiuocatio, dum citatum à Baronio Nicolaum Fabrum, qui Præceptor fuit Ludouici XIII. Regis Christianissimi, pro nostro accepit. Præfatus enim in Eadmeri Cantuariensis historiam, & quas Lant-Franci Epistolas Barónius tomo vndécimo Annalium habet, memorans, *Earum, ni fallor, inquit, se agnoscit ipse exemplar accepisse à clarissimo, & doctissimo viro Nicolao Fabro Petrisco Curia Aquensis Assessore dignissimo, atque amico mihi plurimum obseruando.* Et citat quidem Baronius Nicolaum Fabrum; sed *Parisiensem* addit, non *Petriscium*, quod epitheton noster tulit ex montano oppido maternæ ditionis, latine Petrisco, & vulgò *Peiresc*, vnde celebrè ipsi nomen; quod vt debite pronuncietur, nos *Peireskium* inflectimus: non, vt multi, *Petrescium*, *Perezium*, aut simili alia ratione. Cæterum vix erat bimestris, cum ferunt animum maleficam ingressam in cubiculum, proiecisse coram matre securim, quam manu tenebat, aiebatque se reddere; atque ex eo tempore tum ademptam matri vocem, & ploratum infantulo; tum depressum vtrique caput in alterum humerum, ea rigiditate, vt flecti non posset. Addunt patrum, re cognita, vapulare anum iussisse, quæ & ipsa detorto collo sub camino inuenta est; ac illam, cum primum caput extulit, vt satis plagarum esse diceret, renunciasse id, quod fuit, matrem, infantemque valere. Id factum non modò ex aliis, sed ab ipso etiam Peirescio accepi, memorante vt patruus enarrare solitus fuisset. Res planè mira, si veru-

1580. la, cùm deflexerit ipsa caput, ea neruorum contentione euibrare spiritus possit, vt distantis caput perinde defleat, & pari vehementia, qua suam, alterius linguam cohibeat; neque seu caput relaxetur, seu lingua soluatur, donec rigorem ipsa remittens, distentas, sed insensileis veluti chordulas laxarit. Et solent quidem similia multa ad *Cacodæmonas* referri: verum, vtcumque optimus Deus innocenteis infantulos illorum malitiæ permittere possit; vtcumque ipsi ad ea officia, & ad obsequendum miscellis quibusdam animalis se comparent: compertum est tamen magnam eorum partem, quæ commemorantur, fabulosam esse, aut non alio certè niti fundamento, quàm minus solitis quorundam morborum symptomatibus, quibus sunt infantes obnoxij; cùm etiam constet ista præsertim in infima plebe, ac in ipsis agris esse familiaria, vbi minima quæque ansa credulitatem parit, ac fouet. Sesi-qui-anno post, hoc est mense Iunio anni
1582. supra millesimum quingentesimi octogesimi secundi, Kalendarij reformatione memorabilis, natus est illi frater, cui nomen *Palamedes*. Is est, qui deinceps à clientelari fundo dictus est *Valauesius*, ex quo tempore *Nicolaus* quoque cœpit *Peireskii* nominari. Scilicet ad exactam vsque adolescentiam nuncupatisunt nunc *Fabricij*, nunc *Calasij*, quæ fuit etiam patris, patruusque vulgaris nuncupatio ex oppidi *Calati* ditione. Natus *Palamedes* cùm est, aberat pater negotiorum causâ *Gratianopoli*: mater verò altero à partu mense interiit, annos nata viginti duos. Ac superinduxit quidem *Reginaldus* pater aliam coni-

gem, sed quarto-decimo tandem anno. Ea fuit Catharina Vassalla Caradetea, illustri vtrimque progenie, vt cuius maiores ex paterna stirpe inter Achaiae Principes fuissent, ex materna vero attinuissent ad Fliscanos Genuenseis. Vidua tum erat (nupra prius Oliuario de Thulia, ex senatorio ordine) cū superstite filia nomine Marchisa, quae Palamedi postmodum nupsit. Ex altero autem illo matrimonio suscepit Reginaldus cū liberos alios, qui vel in pueritia, vel in adolescentia obierunt; tum superstitem etiamnum Susannam, quam Henricus Seguiranus rationalium magistrorum, & senatorum patrimonialium Praeses primus vxorem duxit. Ad Nicolaum vt redeam, is haud iniuriā Patruum semper, tanquam alterum parentem agnouit. Ille enim suae dignitatis successorem cum destinans, speciale quoddam ingenuae educationis studium assumpsit, ratus scilicet frustrā esse, si quis nascatur foeliciter, nec liberaliter instituitur. Tantō autē magis animatus fuit, vt eius curam gereret, quantō ab ipsis cunabulis gratiorem in corpore pulchro venientem virtutem conspexit. Quippe ablatatus vix fuit, cū genium suum prodidit, nimirū se ad omnia visa, auditāque attentum praebens, ac solitus semper oris gratiā suauitatēque vocis summa à nutrice, à parente, à patruo, à magistro, à quibuscumque poterat inquirere quid, quomodo, quorsum vnaquaeque res foret. Sic cū litterae primum monstrarentur, & libros, chartasque praemanibus habere gestiret; percontabatur frequenter ecquid argumenti contineretur in iis; & quoniam indignè ferebat, si

1582. aliquando responderetur, id superare ipsius captum, confingendum erat, quod illi cum voluptate recitaretur. Leuia hæc profectò, si ipsa spectentur; at non contemnenda tamen, si ad ætatem respexeris, & arbores etiam florentes, gemmantisque considerâris. Admirationi certè fuit viris ætate maioribus, qui & mihi illa narrârunt, & asseruerûnt, ipsum nihil vnquam,
1587. quod puerile foret, sapuisse. Septennis cûm esset, & vnâ cum fratre institueretur Brinoniæ, vbi tum curia subsidiorum, rationûmque, ob pestem Aquis-Sextiis perseuerantem commorabatur, erudiri expetiit in San-Maximitano collegio, quod litterarum studiis efflorescere fama erat. Non tacendum verò quòd patri persuasit, vt fratrem sibi permitteret, tanquam inferiorem ætatem, & iuniora eius studia curaturo. Neque prætereundum, fuisse illum fratri ex hoc tempore præceptoris simul, & parentis loco; fratrémque illum tanquam parentem, atque præceptorem reueritum fuisse. Anno elapso, ac iam peste San-Maximini suborta, euocati sunt Belgenserium, & rursus post annum Aquas-Sextias, vbi patruus tum versabatur. Inardescantibus postea à morte Henrici III. ciuilibus bellis, Auenionem missi sunt, vbi quinquennio integro in Collegio Patrum Societatis Iesv studuerunt. Memorare autem Peireskii solebat debere semultum Antonio Colombatio, & Andreæ Valladerio, quos supremos habuerat litterarum humaniorum professores. Dicebat enim eos faciliè solitos quidpiam ex aliis exercitationibus relaxare, vt dederet se maximè peruolutandis historicis, studio interea

poëſeos & linguæ Græcæ non neglecto. Ij nempè 1590.
gaudebant non tam opus eſſe greſſum illius regere,
quàm eminùs viam demonſtrare; laudandi, quòd
nobile pectus ea ſeruitute non opprimerent, qua ple-
rique aut odium rerum bonarum contrahunt; aut hu-
milibus nimis aſſueſcunt. Referebat etiam quàm ſu-
blimes adderentur animi, cùm illi præterea palàm
commendarent, quòd totam Iuſtini hiftoriam, to-
tàmque Ouidij Metamorphoſin teneret ad vnguem;
nec faceret finem conſulendis libris, ex quibus inno-
teſcere ſingulares rerum circumſtantiæ poſſent. Eam-
obrem certè auerſabatur & ludos, & ſpectacula; vt
legendo, excerptendòque ſingularia quæque incum-
beret totus. Immoderatiùs tamen, vt puto; relaxan-
dus enim animus per vices, nec ſtatim à paſtu con-
tendenda mens; quod cùm ſtudioſorum iplius mode-
ratores non ſatis cauerent, effectum eſt, vt ſtoma-
cho, capiteque doluerit non ſemel. Exegerat iam
penè annum ætatis quintum-decimum, cùm Aquas-
Sextias rediit, illicque anno integro Philoſophiæ 1595.
operam dedit. Voluit patruus, vt interea edoceret
arma tractare, equos regere, tripudiis membra exer-
cere. Verùm quia ſuccidere gratiores quaſdam ho-
ras oportuit; ideò obſequutus eſt quidem; ſed niſi
præſentibus illis, à quibus erudiebatur, retractare ni-
hil voluit; adeò quidpiam vel legere, vel ſcribere,
vel audire ſatius ducebat. Per ea tempora oblatum
fuit patri numiſma aureum Arcadij, quod Belgen-
ſerij fuerat rēpertum. Id ipſe illicò popoſcit, & cùm
circumſcriptas literas legiſſet, Imperatoriſque no-

1595. men adnotasset, ad patrum statim retulit, qui illi gratificaturus, & duo alia numismata, & libros etiam, quibus vberius erudiri posset, concessit. Atque ex hoc quidem tempore exarsit, seu ignis in silvis, curiosissima eius mens; avidè enim conquirere, atque congerere occcepit quotquot antiquos potuit nummos, singulis legendis, ac interpretandis acerrimò incumbens studio: qua occasione cepit etiam inscriptiones omneis siue sepulchrales, siue alias perquirere, & studiosè obseruire. Destinatus est deinde cum fratre Turnonem, ut sub patribus Societatis IESV Philosophiæ curriculum, quod appellant, absolueret; fratre adhuc in studiis humanioribus consistente. Cùm verò studio Matheseos præsertim inardesceret, ardentè arripuit quam illic docebant Cosmographiam, certus historiam sine illa, ac sine Chronologia penitus obscuram, imperuiamque esse. Sic post usum Sphæræ, addidit etiam usum Astrolabij, literis repetitis scribens, & expostulans aduersus quendam artificem, qui in se pridem receperat Astrolabij fabricam, nec ipsi tamen operam satis diligentem nauarât. Nihil interea remittebat neque ex studio rei antiquariæ, cuius causâ Petro Royero professorum vni fuit eximie carus; neque vniuersè ex ipsis humanioribus studiis, quæ, ut à fratre excolebantur, tanquam magister attendebat. Sed ad ista nēpe ut sufficeret, studere solebat in plurimam noctem. Euenit proinde, ut partim ex natua constitutione, partim ex assiduo labore, prolixisque vigiliis debilitatè stomachi antè contractam adauxerit, pulueremque
- 1596.

ideò vsurpauerit, quem literis ad patrem datis appellauit digestiuum. Quia literarum incidit mentio, idcirco adnotari potest illum ex eo iam tempore scripsisse omnia accuratè, stylo videlicet tentato per repetitas schedulas, quæ & mihi incidere in manus, & fidem fecere non fuisse illi vnquam phrasim luxuriantem, aut immaturam. Dixit nimirum semper quod voluit communibus verbis; tametsi non sine delectu, nec sine ea gratia, & vrbauitate, qua testando beneuolentiam, obseruantiam, gratitudinem; qua excusando, commendando, gratulando, ceteraque huiusmodi præstando mirificus fuit. Nam ad nouercam, exempli gratiâ, ob quædam donariola, Fœlices videmur, ô mater, quod beneficiis tuis cumulamur: sed infœlices tamen, quandò sic illis obruimur, vt agnoscendo impares simus. Talia porrò dum scriberet, reponebat interea quæ munuscula poterat; nempe ab ea vsque ætate vinci benefaciendo. nescius, nisi quâ prorsus impotens erat. Ita ad amicum coætaneum scribens, ingratitudeque iam tum detestatus, Mihi ipsi, inquit, intulero manus, si vel minimæ in officio negligentia coargui possim. Eodem spectat, quòd præceptorum sollicitudinem commendabat, vt à patre, ac patruo honoraria promissis longè vberiora consequerentur. De studiis vt iterum dicam, non tulit patruus, vt triennium Philosophiæ impenderet: sed, exacto Turnone anno, reuocatum voluit Aquas-Sextias, vt destinatus Senatui Iurisprudentiæ initiaretur. Id etiam expetierat, cum ille adhuc Turnone foret; scribens scilicet, vt

1597. maturè Rubricarum Enchiridium haberet præ manibus: verùm ipse, vt Iuris studium tantisper adhuc declinaret, hunc prætextum quæsierat, Volueras, patruè, vt operam arti oratoriæ sedulam nauarem: si per teliceatigetur, faciam, quoniam heic possum percommode, ac initiabor prudentiæ Iuris, cùm ex hac vrbe discessero: tu præscribe tamen quod factò sit opus; si perstes enim, nihil mihi fas, nisi vt iussa capeßam tua. Itaque domum euocatus, Iurisprudentiæ nomen dedit sub Francisco Fortio Andino, qui in Aquensi Curia aduocatus, & docendi iuris oppidò peritus, callebat prætereà, si quis alius, elegantiores literas. Is Peireskij parentibus carus cœpit magnâ curâ Institutiones prælegere; ille verò tam occasione huiusmodi studij, quàm, ne cœptam eruditionem omninò intermitteret, texere suo Marte cœpit Imperatorum seriem, à quibus leges fuerant latæ. Texuit & seriem Consulum, magistratuumque cæterorum, conquisitis vndique numismatibus, vt & facie, & rebus gestis Latores legum agnosceret. Sic habere etiam curauit icones celebriorum Iurisconsultorum, vt cùm in illorum responsa, interpretationesque incideret, fieret memoria tenacior ex concepto cuiusque vultu. Erat tum porrò Aquis-Sextiis Petrus Antonius Rascasius Bagarius rei antiquariæ peritissimus: postea quippe Henricus Magnus, propter famæ celebritatem, illum accersiu, & cimeliarchio suo præfecit. Ipsiigitur succisuiis horis Peireskij frequens aderat; vt sciscitaretur, edocereturque; ille verò sagacitatem, crudi-

eruditionemq; miratus, & coniunctam modestiã cum
 discēdi ardore amicē complexus, celare nihil poterat;
 actum varia cimelia diebus variis demonstrabat, tum
 prolatis libris coniecturas suas, explicationesque ful-
 ciebat, tum singulareis Peireskij interpretationes &
 admittere, & commendare non grauabatur. Anno
 superato, Auenionem rursus concessit, vbi priuatus
 illi doctor Petrus Dauid natione Burgundus, qui
 fuit deinceps Semurij capitalis Profenscallus. Huic
 quoque præter peritiã juris suauiores Musæ propi-
 tiæ erant; vnde faciliè ferebat Peireskium interpone-
 re iuris studio rerum antiquarum peruestigationem.
 Ea de causâ non infrequenter cum Bagarrio de re
 nummaria, & de rebus aliis selectis per literas egit.
 Perscripsit aliquando ad illum singularia quæque in
 Romei cuiusdam Arelatensis cimeliarchio obserua-
 ta, misitque inter cætera obtentum pro eo cætypum
 ex eleganti iaspide Deianiræ per Nessum raptæ. In-
 terdum etiam recuperata egregia Neronis, Vitelli-
 que numismata misit ad patrum, exorauitque, vt
 ea exornari perinde curaret, ac exornatum Hercu-
 lem, Agrippinamque iam habebat. Rogauit quo-
 que, vt ad se anulum quemdam mitteret, com-
 mutandum, vti sperabat, cum Corneola, seu Ony-
 che quadam, quæ & præstantissimi, inquit, artificis
 est, & incomparabilis, sed apud possessorem incom-
 perti pretij. Memoro ista ex pluribus, vt quis ex illo
 iam tempore circa hæc fuerit, melius noscatur. Cæ-
 terum qui curiosam eius indolem quammaximè fo-
 uuit, Petrus Antonius Ghibertus Neapolitanus fuit,

1598. quo Auditore Cardinalis Aquaiua tum utebatur. Is enim ipsi rara quædam, ac non prius visa monstrauit; & inter libros alios, etiam quosdam Huberti Goltzj, quos nondum habuerat, in plurimos dies commodatò dedit. Quin-etiam mentem viuidam, sagacemque perspicuens, hortatus est, vt in Italiam iter institueret, habiturus, Romæ præsertim, vnde explere animum posset. Agebat tum annum ætatis decimum octauum; cùm de profectiōe in Italiam cogitans, natandi artem addidicit. Ante id tempus solitus erat se per æstatem abluere in minore Rhodani alueo, qui est Barthalasix insulæ ad ortum, & in quem se Sorga fluuiolus exonerat. Deprehendit autem aliquando fundum, quod aliàs æquabile, & molliusculum obseruârat, induruisse in globulos, moleculasve, qualia oua sunt, cortice detracto, vbi coctiora fuerint. Id demiratus & collegit, & detulit aliquot domum, vt præceptori ostenderet, & facti causam sciscitaretur. Miraculum verò adauctum, vbi post dies non ita multos, cùm rediisset ad fluuium,prehendit moleculas induruisse planè in flumatileis lapides, idemque etiam obseruauit contigisse iis, quas asseruabat repositas domi. Atque exinde quidem cœpit circa lapidum generationem philosophari; sed res dicenda posterius est. Tandem verò cùm desiderio inuisendi Romam flagraret, veritus tamen ne parentes id abnuerent, petiit duntaxat Patauium mitti, vbi celeberrima iuris studia essent. Tacitè autem cogitabat proximè esse annum secularem, veniarumve solemniū; ac se ipsius oc-

casione posse Patauio Romam adire. Incipiebat tum 1599, fluere annus superioris sæculi nonagesimus nonus, cum Cardinalis Ioyosæus discedens in Italiam, erat Ferrariam concessurus. Videlicet Clemens octauus ditionem caducam ex morte Alphonsi secundi Attestini recepturus, eò discesserat; eaque de causa Cardinalis non Romam, sed illuc tendebat. Itaque Peireskij valdè exoptarat se in ipsius comitatum vnà cum fratre dedere; at parentibus secus visum. Nam constituerunt quidem fauere laudato desiderio; sed censuere tamen expectandum autumnium, tum vt tempestas foret moderatior, adolescentésque potiùs hieme, quàm æstate succedente, alieno cælo assuescerent; tum vt commodiùs de necessario apparatu prouideretur. Quarendus porrò primùm fuit, qui studia & mores eorum regeret; tametsi ea erat vtriusque, & ipsius Peireskij præsertim moderatio, atq; prudentia, vt videretur honori potiùs, quàm necessitati ductor designandus. Itaque delectus est ipsis Paulus Gudanes Fonuiuius, nobilis è Bearnia vir, qui ex Italia, Polonia, Germania, aliisque regionibus redux, multorum iam hominum mores, ciuitatésque nouerat, quémque Belleuræus Cancellarius in proximos annos filio destinarat. Discessère ergo cum illo sub Septembris initium, prætulitque Peireskij solvere ex Cannensi portu, tum vt antiquum Monasterium in Lerone insula proximè situm inuiseret; tum vt priùs occurrentia ad forum Iulij monumenta antiquitatis coràm lustraret. Cum appulissent Genuam, ac spectassent abundè satis palatia illa magnifica, fuit quidem præ-

1599.

tercà superandus mari Veneris, ac Ericis portus; sed voluit tamen Peireskiius terrâ deinceps contendere, tum quòd ex mari malè haberet, tum quòd lustrare curiosè vellet, quæ animo conceperat. Videlicet itinerarium suo sibi marte apparârat, statuerâtque non sic ex vrbe in urbem rectâ pergere, quin, si heinc inde aliqua notatu digna memorarentur, diuertere illuc pro libitu posset. Heinc sese nunquàm in extraneorum comitatum sponte adhibuit, & ubi se alij ipsi adiunxerunt, urbana quadam excusatione seijunctionem breui faciendam præuenit. Parùm portò abfuit, quin eæ digressiones, ipso statim initio, illi pessimè cesserint. Cùm enim ad fodinas Massæ inspiciundas desllecteret, ductorem se vnus extorrium, quos Banditos vocant, sic præbuit, vt nisi maturè fuisset agnitus, deduxisset planè in carnificinam. Commoratus nonnihil Lucæ, spectare Pisis voluit insigne cimeliarchium: non potuit tamen, nisi postquam Liburnum inuisit, ac in eam urbem rediit. Memini verò, inter cætera, quæ ibi visâ commemorabat, admiratum illum Corallij plantam, quæ humano cranio supercreuerat: quod adnoto, quia hæc deinceps fuit illi non postrema causa, vt adesset coram in expiscatione Corallij, de qua suo postcà loco dicendum. Vt paucis loca alia perstringam, iter exinde fecit Florentiâ, Bononiâ, Ferrariâ, ac ubi fuit paucis diebus immoratus Venetiis, sedem Patauij denique fixit. Illeic paucos menseis vix fuit, cùm ipsius virtus apud vniuersam Academiam inclaruit. Quippe tametsi vnâ cum fratre professores iuris cir-

cumstaret frequens, ac nominatim Iacobum Gal-
 lum, Bartholomæum Siluaticum, Ioachimum Scatis-
 num, Ottonellum Discalcium: nihilominus alios
 etiam, quotquot aderant, eruditos viros & conuenit,
 & facile in admirationem traxit. Cæteros inter, Tho-
 mas Segetus, illenempe, quem Lipsius centuriâ ter-
 tiâ Epistolarum commendatum iam fecerat, sic suam
 ipsi beneuolentiam, obseruantiamque significauit,
 vt inscriptum prius hoc voluerit, GENIO GALLIÆ
 NARBONENSIS, IN GENIO, ET MATVRÆ, IM-
 MATVRO ÆVO, NICOLAI FABRICII VIRTU-
 TI SACRVM. PATAVII PRID. NATAL. CHRIS-
 TI, CIO. IO. IC. Vir autem eximius Erycius Putea-
 nus, non Lipsio modò collaudatus, ac postmodum
 datus successor; sed iam tum etiam destinatus, qui
 Mediolani ageret & Chronographum regium, &
 artis Oratoriæ interpretem primum, inscriptione ista
 præiuit, LARE SECRETO. CUI GRATIÆ ADO-
 LESCENTIAM ORNANT, ERVDITIO IUVEN-
 TAM, PRVDENTIA SENECTAM; IS ADVLE-
 SCENS VOLVPTATEM AMICIS CREAT, IUVEN-
 NIS HONOREM PATRIÆ, SENEX VTRVM-
 QUE SIBI. TV VERO, NICOLAE FABRICI,
 CVNCTA SIMVL AMICIS, PATRIÆ, TIBI, IN
 SPE ÆTATIS, ET FLOREM IUVENTÆ, ET
 FRVCTVM SENECTÆ PROFESSVS. PATAVII
 ∞. IOC. KAL. FEBR. Atque hosce quidem re- 1600.
 fero è multis. Cùm verò in se omnium ora, oculos-
 que conuerteret; notissimus sanè, & carissimus po-
 tissimum fuit laudatissimo illi Ioanni Vincentio Pi-

1600. nello, qui origine Genuensis, & patria Neapolitanus, eam ciuitatem delegerat, in qua tranquillè æuum degens, totum se bonis artibus, literisque ingenuis promouendis consecraret. Is videlicet Bibliothecam instructissimam apparârat, rerumque omnium exquisitarum promptuarium instruxerat; ac æui illius literatos omnes, quâ propè quâ procul, si quid libris, aliisve rebus opus haberent, adiutabat. Callentissimus ipse rerum, & excitabat omnium studia, & fores suas colloquiis, consuetudinique eruditorum virorum tam aduenarum, quàm indigenarum apertas habebat. Testimonium illi dixerunt & Lipsius, & Scaliger, & Thuanus, & Casaubonus, & Pithæus, & quis non ex laudatis viris? Itaque, talis vir cùm esset, deperit statim Peireskij genium, tanquam sui simillimum, admiratûsque, & reueritus in adolescente est adultam iam, ac penè maturam virtutem, & eruditionem. Superfunt certè schedulæ variæ, quibus ad illum missitatis, testatus est summam familiaritatem; nunc variè consultans circa numismata, circa rerum gestarum loca, circa responsa danda Vrsino, Velfero, & aliis: nunc gratias agens ob varias interpretationes rerum, locorumque apud auctores difficilium, ob communicatos libros, ectypos, apographa, alia: nunc vicissim mittens, si quando aut Romæ, aut aliundè accepisset libros, cimelia, inscriptiones, literas; nunc inuitans ad cognoscendum, colloquendum, spectandum, ferendum iudicium, & id genus cætera, quæ recensere molestum foret; ne quidpiam dicam.

de literis, quas ad quadraginta vsque, dum ille Venetiis, Florentiæ, aut Romæ abesset, perscripsit, omnibus familiarissimas, & singularis beneuolentiæ testificatione plenas. Commencabat autem Peireskius tertio quoque mense Venetias: tum vt necessariam pecuniam, iuxta nummarias tesseras, à nummulariis exigeret; tum vt viros doctos, litterarumque amantes, veluti Paulum Sarpium, Dominicum Molinum, & complures alios conueniret; tum vt nihil, quod foret pretio, raritateve in ea ciuitate commendabile, sineret inuisum. Quam quidem ad rem eximie fauebat egregius Christianissimi Regis nomine Orator Philippus Canaius Fraxineus; cum ipse quoque sibi interea pararet amicos, quorum auctoritate nihil fieret imperuim. Præcipuus in illis fuit Fridericus Contarenus Diui Marci procurator, qui, cum Musæum haberet instructissimum, illius tamen pretium non nouit, donec Peireskius demonstrauit quidnam, & quanti æstimandum vnumquodque cimeliorum foret, quid inscriptiones Græcæ tam numismatum, quàm marmorum significarent, & id genus similia, ex quibus singularem viri beneuolentiam est consequutus. Neque verò ipsius modò, sed & totius etiam familiæ: ex quo intercessit illa cum Angelo Contareno viginti post annis agente in Gallia Reipublicæ Oratorem necessitudo; & cum Vincentio Contareno, qui sex annis post librum variarum lectionum edens, *E Gallia vsque*, inquit, *nobilissimus, & cum iuris, tum antiquitatis totius egregie peritus Nicolaus Fabricius me sibi peramicè monendam*

1600. *putauit.* Prætereo Ioannem Mocenicum, cui fuere oppidò quàm-rara; prætereo Bembum Equitem, cuius vniuersam penè rerum antiquarum suppellectilem à Cardinali vsque Bembo deductam coëmit: prætereo Patriarcham Aquileiensem, in cuius cimeliarchio memorabat se obseruasse ad trecentos vsque Cameos perraros: prætereo & alios complureis. Refero solùm quod Puteanus, cùm Venetiis foret, ad Pinellum scripsit xi. Kal. Iunij eâ Epistolâ, quæ edita est in Promulsæ octogesima secunda. *In ædibus*, inquit, *Scaramelli fui: Septumia monumentum vidi, etsi penè frustrâ: ita similiter omnia expressa, ut nesciam, me hercules, industriam, an memoriam Fabricij nostri, an utramque debeam admirari, qui tam feliciter in summa festinatione ipse pinxit, aut feliciter pingentis postea, ac reformantis manum direxit.* Exinde nempe colligitur, quàm solers foret, ac diligens in singulis obseruitandis. Cæterùm Venetias profectus sub finem Augusti, ardorem tandem explicuit, consiliùmque cepit concedendi exinde Romam, quod tametsi Porta-Sancta aperienda, & Iobelæi celebritas inchoanda non esset, nisi sæculi, atque adeò anni sequentis initio: existimaret tamen, si quos illeic mensis præoccupando transigeret, haud malè collocatum iri. Nôrat aliunde fore, vt breui celebrarentur Florentiæ memoranda sponsalia inter Henricum Regem Christianissimum, & Mariam Mediceam nunc Reginam matrem: neque volebat committere, vt à se coràm non spectarentur. Itaque postquàm Patauium scripsit, ac specialiter ad Pinel-

Pinellum, inscriptiones, aliâque mittens, & simul rogans, vt literas ad familiareis Romam daret; discessit initio Septembris, lembo conducto Ferrariam, aut certè Francolinum vsque. Non peruenit autem Florentiam ante diem mensis vigesimum, quòd vbiunque aliquid spectatu dignum occurreret, quantum ad illud peruidendum opus foret, commoraretur. Constitit verò, retardatusque Bononiæ potissimum est, quòd Iulius Cæsar Velius, qui credebatur hausisse totam antiquitatis notitiam, suauis illius congressu captus, detinere ipsum plusculum voluerit. Neque verò se continere optimus senex potuit, quin de sua felicitate in cognoscendo Fabricio, literas calidissimas, mirisque elogiis plenissimas daret. Calidissimas certè eas dixit Pinellus, commendans aliunde, quòd Fabricius ex iis non esset, qui peregrinando nihil aliud, quàm cursitant, quibûsque, iuxta Senecam, illud evenit, vt multa hospitia habeant, nullas amicitias. Accedens Florentiam, habuit aliquas à parentibus literas, ac, inter quasdam commendatitias, reperit speciales Caroli Lotharingij Ducis Guisij, & in Galloprovincia Proregis, ad Nicolaum Brûlartum Sillerium, qui fuit deinceps Regni Cancellarius, quique tum Regius Romæ Orator, eò venerat, ad sponsalium celebrationem. Quamobrem ille Peireskium, fratremque accitos in familiam voluit, vt suis sub auspiciis omnia liberius contuerentur. Præter verò celebritatem, auidè imprimis spectauit Bibliothecas illas insignis, in quibus agnouit, & penè dicam, adorauit tum magnorum Principum, tum virorum eruditorum, à

quibus bonæ literæ restitui cœpère, vestigia. Nihil speciatim dico de Pandectis, quos, in Palatio magni Ducis religiosissimè licèt asseruatos, curauit tamen inspicere; securus nullum antiquitatis monumentum illustrius in litterario orbe exstare. Amicos quoque illeic parauit; sed, quantum recordor, nullum constantiorem, quàm Richardum Richardi, studiosum plantarum, atque marmorum; qui ipsum quoquo-versum ad opera publica, hortosque deduxit. Mense transacto, Senas petiit, vbi salutare potissimum voluit Celsum Cittadinum, qui tunc habebat præ manibus tractatum de Origine, progressuque Latinæ, & Italicæ, seu vulgaris Linguae. Inde discedens, Romam tandem sub finem Octobris peruenit. Romæ porro dici non potest quàm citò fuerit notissimus; non modò, quia iam Pinelli, aliorumque literæ celebre nomen fecerant; sed maximè etiam, quia cum primùm viris in ea vrbe eruditis cœpit congregi, ingentem sui admirationem, atque amorem conciliauit. Prolixum foret recensere quos eximios viros coluerit, à quibus, ob lumen ingenij, & temperatissimos mores, magni habitus fuerit: sed, cum sileri omnes non possint, commemorandi imprimis sunt magni illi duo Cardinales, Baronius, atque Bellarminus. Ille nempe obstupescerebat, cum de insertis in Annaleis inscriptionibus, aliisque rebus ad historiam abstrusorem spectantibus, edifferentem coràm audiret. Ecquid putas verò, cum ostendit gemmas, numismatæque varia, quibus Basilidiani, Valentiniani, alique hæretici inscribere soliti erant vocabula barbara opinionibus

fuis obtegendis? Collegerat nempe complura, ad illu-
strandum, quod ille in secundum tomum coniecisset
ex Amethysto Fuluij Vrsini, circa vocem ABPAΞAC,
qua Basilidiani intellexêre summum Deum, conti-
nentem Angelos septem, cœlorum septem præfides;
ac præterea eorum trecentas sexaginta quinque virtu-
tes, iuxta anni dies; idque ob septem literas, numera-
lêmque earum valorem (iunctis scilicet numeris, pro
ordine vnus cuiusque in alphabeto literæ) & id genus
similia, quæ deinceps quoque ad Natalitium Benedi-
ctum literis exposuit. Bellarminus verò tum eadem,
tum alia accipiens circa hæreses, veterémque histo-
riam totam, hærebat quid magis probaret, an sagaci-
tatem in peruestigando, an solertiam in coniiciendo,
an iudicium in eligendo, an memoriam in referendo,
an lepôrem in explicando. Meritò autem lenissimis
eius moribus capiebatur: nam, vt omittam cætera,
confidentem in media plebe auditorem ferè habebat,
quoties suos paræcos pro concione erudiret, familia-
ritérque institueret. Dicendus deinde Iacobus Sir-
mondus, inter homines Societatis IESV iam tum
etiam clarissimus: arctissimam enim cum illo amici-
tiam iniit, nihilque studiorum non commune habuit.
Dicendus Lælius Paschalinus, cuius cimeliarchio spe-
ctabilius quicquam non fuit, quisque illius eruditio-
nem ita suspexit, ita amauit indolem, vt aliquando co-
gitârît, ac volücrit pretiosa quæque tradere, quæ ipse
secum absportaret. Dicendus Fuluius ille Vrsinus,
cuius nomine inter viros antiquariæ rei studiosos
maius, celebriúsque nullum est, quisque ex perscriptis

1600. à Pinello interpretationibus, expetierat illum nosse perardenter. Dicendus Philippus Pigafetta, ad quem cum Pinellus initio non dedisset litteras, mirum quantâ commendatione obliuionem compensârit. Dicendus ille ipse Ghibertus, quem Auenione iam no-uerat, quique ad spectandum res varias ipsi deducendo se comitem præbuit. Dicendus, qui etiam cum variè deduxit, Paulus Gualdus, cruditus Vicetinus, qui in Pinelli contubernio ipsum miratus Patauij, Romæ etiam obstupescibat. Dicendi Petrus Stephanonus, Dionysius Octavius Sada, & vniuersè quotquot fuere in vrbe eruditi viri, & bonarum artium, literarumque amantes. Sed & reticendus non est Arnaldus Cardinalis Ossatus, Regia negotia tum Romæ curans, vir eruditione, prudentia, integritate, suauitate morum eximiè conspicuus: qui consuetudine Peireskij exfatiari vix vnquam potuit, neque illum vnquam abs se, dum inuiseretur, non ægrè dimisit. Non reticendus Abbas Montanus, Archiepiscopi Arelatenfis patruus, qui virtutis illius potius, quàm Nepotis commendatione, in perpetuum propemodum contubernium adscitum voluit. Iam neque dici faciliè potest, quàm vehementi studio vniuersa antiquitatis monumenta peruestigârit. Imprimis enim desiderauit situm Urbis cognoscere, & regiones, quas fuit complexa. Visit montium vestigiis, adeò depressos miratus est, quos putârat adeò sublimes. Obstupuit inter cæteros Palatinum summè desertum, quo nullus olim frequentior. Disquisiuit, si fortè posset intelligere, aut subodorari, quâ fuissent Pomerij fines tam à Regi-

bus, quàm ab Imperatoribus prolati; & cùm ad portas, viàsque omneis diligenter attenderet, explorauit tamen præsertim Aureliam, propter eius viæ reliquias, quæ in Prouincia adhuc supersunt. Deinde regiones, vicosque percurrens, agnoscere voluit, quantum licuit, quæ extitissent Præscorum templa, ædes, aræ, luci, sepulcra, asyla, scholæ, bibliothecæ, amphitheatra, theatra, circi, hippodromi, naumachiæ, campi, odææ, fora, emporia, horrea, armamentaria, balnea, thermæ, aquæ, pontes, colossi, obelisci, columnæ, statuæ, & innumera alia, quæ inter legendum auctores adnotauerat, & in commentarios relata circumgestabat. Vix autem vnquam exsatiari contemplando poterat, cùm obseruaret quidpiam adhuc siue integrum, siue mutilatum superstes. Sic dies benè multos posuit circa Pantheon, rarum architecturæ exemplar, considerando, conferendoque quicquid Ludouicus Demontiosius fuerat de illo ratiocinatus. Sic, quia nôrat asseruari in Vaticano Palatio tum Herculem truncum, tum Laocoontem cum duobus filiis, opera exquisitissima, & Michaëli Angelo miracula habitatis; idcirco illis inspiciendis non vna vice adstitit, vt nec semel etiam inuisit geminas illas Alexandri, & Bucephali statuas, quæ exstant adhuc Phidiæ, & Praxitelis monumenta. Sic aliquoties ad inuiscendum C. Sestij Epulonis in via Ostiensi sepulcrum itauit, ob vetustissimas illius, nobilissimæque reliquias. Sic variè spectauit obeliscos varios, sed nullum frequentius, quàm Constantinianum, ob cuius effossionem, translationem, erectionemque laudare satis non poterat

1600. generosum Sixti V. Pontificis institutum? Sic & columnas; sed maximè Traianam, atque Antoninianam. Illam quidem, ut Pinello satisfaceret, cui factum satis non fuerat volumine toto de ea (seu de historia utriusque belli Dacici, à Traiano gesti, prout Alphonsus Ciaconus illam ex columna eruerat) conscripto: unde & exoptauerat tum exemplum libri à Peireskio quàm perfectissimum conquiri; tum depictas in eo figuras personarum, armorum, gestuum, cum insculptis, secundùm totam cochlidem, per ipsum conferri. Hanc verò, hoc est Antoninianam, ut perdiligenter exprimi curaret effusionem illam Iouis Pluvij Romanorum exercitum irrorantis, & hostium copias fulmine ferientis. Eiusmodi certè Iconismum cùm Scaligero postmodùm offerret, ad illustrandum quod Eusebius de prælio commisso inter Antoninum, & Germanos, ac Sarmatas, contulit in annum Olympiadis c. xxx. viii. primum, Hæc, inquit, vna est ex rebus maximè notatu, & spectatu dignis, quas mihi quidem inter omnia antiquitatis monumenta contigit Romæ observare. Nec verò harum modò rerum delineationes habere voluit; sed rariorem etiam quarumvis statuarum, quas disquisiuit in Capitolio, in Vaticano, in Farnesianis, in Cæsianis, in cæteris ædibus; itémque in hortis, ac vineis, & ut breue faciam, in quibuscumque privatis, publicisque locis; pictores deducens, qui non modò statuas, intemerataque alia opera; sed truncos etiam, & ruinas ædificiorum veterum, quæ occurrerent, adumbrarent. Deferre quoque solitus erat selecta

quædam numismata, quæ conferret cum statuis, ex- 1600.
plorans cuiusque ætatem, & agnoscens plerumque
manum: cum eâ foret solertiâ, vt momento discer-
neret quid re verâ, quidque ex sola imitatione foret
antiquum. Sic inscriptionum etiam omnium, quæ
saperent antiquitatem, habere voluit apographa,
tentans pro sua sagacitate ex eas supplere, ac penè
desperatas restituere. Rursus Codices MSS. seu Va-
ticanos, seu Farnesianos, seu alios, non quantum qui-
dem libuit, sed quantum tamen licuit, euoluit; &
quotquot inter cæteros maximè rari visi sunt, adno-
tauit in tabulis. Sic adnotauit etiam vasa, pondera,
mensuras, calaturas, numismata, simulacra, imagi-
nes, & quicquid demùm notatu dignum occurrit in
Metallothecis, iconothecis, in Promptuariis, Mu-
sæis, Xystis, Pergulisque variis; vt præteream innu-
mera, quæ vel pretio quæsiuit, vel commutauit, vel
dono habuit, quorùmque saltem ectypos, ecmag-
mata, aposphragismata, aut iconismos obtinuit.
Vnum doluit, se nec habere, nec videre vsquàm po-
tuisse memorata Goltzio Tulli Hostilij, ac Seruij
Tullij numismata; vt neque alia memorata cum his-
ce inscriptionibus, Col. Aquæ-Sextiæ. Col. Arelate.
Col. Auenio. Col. Arausio Secundanorum, & simi-
lia, quæ amore patriæ ardentissimè, sed frustrâ tamen
requisiuit. Ex hisce porrò ingentem sui admiratio-
nem excitauit, non modò Romæ, vbi illius amicit-
iam eruditi omnes ambierunt, sed in distitis etiam
locis; quòcumque eius fama peruénit. Ex hoc nimi-
rùm tempore cœpit, quæ fuit illi necessitudo cum

1600. Natalitio Benedicto, rebus exquisitis instructissimo, ac Fullinij tum commorante; quæque cum Adolpho Occone Augustano medico, tunc iteratò edente volumen de numismatis Imperatorum Romanorum: ut illos taceam, quos iam nôrat, Hieronymum Rubicum Rauennæ, Cæsarem Nichezolam Veronæ, Antonium Tolentinum Cremonæ, Cæsarem Campanum Vicentiæ, aliisque locis non paucos. Mirum autem quantum Patauij præsertim inclaruerit, adstantibus literis ad ipsum per id tempus datis à Laurentio Pignorio; qui ipse rerum præscarum adeò peritus, professus est tamen se amplius ex vnis eius literis, quàm ex decem Antiquariorum voluminibus erudiri: quisque suspexit non modò copiam conquisitarum ab ipso rerum, sed delectum etiam insignem, cum ex missis duobus quibusdam Constantini numismatibus, agnoscere se, ut ex vngue leonem, dixit. Consimilia scripta ab Edmundo Brutio, Georgio Ragusæo, Iacobo Papifauio, Martino Sandello, & quem nominare primum debui, Hieronymo Aleandro iuniore, vero Musarum delicio; itémque M. Cornaro optimo vrbis Præsule, quicum deinceps per litteras, donec fuit in viuís, amicitiam coluit. Sed quantum quidem fieret Patauij vel id indicat, quòd misso Augustâ Vindellicorum ætÿpo-Sapphiri cuiusdam, inscriptionem præferentis, in qua *Xiphia* vox omnibus curiosis faciebat negotium; Pinellus ad eum scripserit, examénque, & iudiciúm ea de re ipsi detulerit. Prætermitto autem, ut fecerit satis, vocique lucem attulerit ex Strabone potissimum, cum

ex Polybio loquutus est de venatione *Xiphie*, mon- 1600.
 stri videlicet marini. Quod ad statum Romæ recen-
 tioris spectat, nullum fuit Templum, Sacellum, Col-
 legium, Xenodochium, quod ingressus non fuerit:
 nullum Palatium magnificum, nullum celebre Pon-
 tificum opus, ad quod non diuerterit: nulla Raphaë-
 lis Urbini, Michaëlis Angeli, Polydori Carauagij, Ti-
 tiani, aut alterius artificis insignis pictura, quam
 non inspectarit. Sic cæmeteria, cryptasque illas sub-
 terraneas, plena venerationis loca, & Christianæ
 pietatis, constantiæque monumenta. Sic Religiosis
 cæremoniis, quantum sine discrimine posse putauit,
 interfuit. Quippe quod complexione foret non
 robusta magnoperè, coniicere sese in turbam tumult-
 us plenam detrectabat. Hinc quod ad statas, so-
 lemneisque Iobelai attinuit, spectauit quidem, ob-
 seruauitque ex ipsis quantum potuit; cæterum au-
 tem Valauesio fratri, tanquam valentiori demanda-
 uit curam spectandi omnia cominùs, & ad sese re-
 ferendi. Idem præstitum circa cæremonias, quas vo- 1601.
 cant cænæ Domini: quod circiter tempus tam ipse,
 quàm frater, vt Pontificem iis pauperibus, quos die-
 tim pascit, ministrantem, simulque in eadem aula
 discumbentem contuerentur, vices redemere duo-
 rum pauperum, vestibúsque eorum assumptis, adfuê-
 re inter cæteros, & agniti licèt à Pontifice, ipso ta-
 men rem placidè dissimulante, omnia spectârunt.
 Paschalibus Romæ exactis, & postquàm varia mu-
 nera domo accepta distribuit, nonnullaque etiam ad
 Pinellum misit, profectus est Neapolim. Superfluum

1601. foret recensere quantum, quotiesque diuerterit, ut requireret varia, quæ apud auctores celebrata sunt tam Latij, quam Campaniæ loca. Affectum se verò præsertim dicebat, cum memorata Virgilio coram haberet, lustraretque, ut Caietam, ut Cumas, earumque reliquias: ut Misenum montem, & Avernum Lacum, & similia. Cum item loca, in quibus exstitisse dicerentur villæ Ciceronis, & Luculli; aut sepulti fuisse Scipio Africanus, & Virgilius: atque id genus cætera, ad magnos viros attinentia. Addebat se, cum crypten illam, seu, ut appellat Seneca, carcerem longum, & obscurum, Pausilippum scilicet montem per passus mille perforatum, cundo, redeundoque spectaret, doluisse, quod ignoraretur, certumve non esset, qui tam præclarum facinus, tanto viatorum compendio, commodoque attentauisset. Digniore enim commendatione arbitrabatur esse, quam Xerxen, cum Græciæ bellum inferens, Athon montem non à continente modò præcidit, sed medium etiam perforavit. Neapolim quam-primum accessit, tenere se non potuit, quin Portæos illos fratres conueniret. Cum inductus autem fuisset ad natu maiorem, cui nomen Ioannes Vincentius, is breui colloquio sic affectus fuit, ut ipsum exclamabundus ad Ioannem Baptistam natu minorem deduxerit, quod & ipse in similem admirationem raperetur. Enarrare autem solebat Peireskii, licet ipse quoque Ioannes Baptista foret iam grandævus, adpersisque canis venerabilis; ipsum nihilominus eâ reuerentiâ observare solitum iussa, nutusque Ioannis Vincen-

tij, vt maiore non potuiffet ora, atque imperium patris. Cæterum, vt cum ipsis vltro communicauit plurima, ita viciffim ab iis accepit; neque fpectauit modò quæcunque afferuabant in Mufæis, pretiofisque armariis; fed etiam omnigenis penè illorum experimentis, prout fibi in votis effe infinuauit, interfuit. Heinc nata ipfi cum vtroque eximia familiaritas, &, quæ eft deinceps mutuis literis, officiisque variis culta amicitia. Inuifit præterea Mufæum Ferrantis Imperati, ipfum quoque raris naturæ operibus inftitiffimum; itémque Adriani Guillelmi, Martis Gurguftiolæ, & Matthæi Cappuani Conchanorum Principis; tametsi ad hunc extra ciuitatem diuertendum fuit. Monumenta infuper omnia antiquitatis perueftigauit, ac præ cæteris delineatas voluit nescio quas columnas operis Corinthiaci, Apollinémque ad Tripodem, & fimiles quasdam figuras. Ad hæc rogauit, didicitque quicquid licuit cognoscere de familiis Neapolitanis translatis in Prouinciam, & de Prouincialibus translatis in eam regionem. Cùm verò noffet effe in templo Diuæ Claræ nuncupato fepulcra complura Regum, Principumque ex Regia ftirpe ad Carolum primum (quem diximus fuisse S. Ludouici fratrem) attinentium: idcirco ad illa maximè attendit, præcipua adumbravit, Epitaphia exfcripsit. Quinetiam follicitus fuit in exquirendo fepulcro Simonis Portij Philofophi celeberrimi, non ita pridem vita defuncti: fed enim curam explorandi, fi quà fortè inueniretur, & maximè quidem cum Epigraphe, Pinellus ipfi commendarat.

Viuebat tum Neapoli fœmina quædam sanctitate, institutóque vitę illustris. Ea Romam accita à tempore vsque Gregorij tertij-decimi, & ab optimo Bellarmino examinata, probatáque, dicebatur rapi in eam extasim, statim ab assumpto Eucharistico Sacramento, vt, quemadmodum genuflexo erat, ita immota, rigidáque, stipitis instar, consisteret, oculis apertis nihil conspiceret, toto corpore nihil planè sentiret. Itaque noluit Peireskiius ex ea vrbe discedere, quin rem factu mirabilem vidisset, atque exploráset. Ac obtinere illud quidem absque contentione non potuit; sed, vt imperuium ipsi nihil erat, peruicit tandem, ac præter fratrem, deduxit quoque Ioannem Porcelletum Mallianum, qui fuit deinceps Præsul Tullensis. Vidit ergo, explorauitque, & commemorando mirari solebat, si posset quidpiam simile humanitùs contingere; neque facile credebat Cardano referenti sibi quid tale euenire solitum, quoties animo collibuisse. Postquàm urbem satis lustrauit, illiùsque elegantiam, amœnitatémque admiratus est, nihil habuit potius in votis, quàm adire Vesuuium, contemplarique locum, in quo magnus Plinius dicam obiisset. Ea re peracta, insigni quodam flagrauit desiderio inuisendi Siciliam, & pergendi Meliten vsque. Tria autem erant, præ ceteris, quæ auebat coram spectare, Fretum Scyllæum, Æthnę incendium, Antiquitates Syracusanæ: restitit tamen Fonuiuius, neque ipse, illo inuito, progredi vsquam voluit. Quare satis fuit totam eam regionem circum peragraré, & ad loca

etiam aliqua redire, vt Puteolos, & Baias versus, quò posset oculatiùs duo quædam ædificia subterranea inspicere, quæ Piscina mirabilis, & Labyrinthus appellantur. An adiciam verò, cum littus prope Puteolos consideraret, pulueremque requireret aqua marina lapidescentem, detectum ipsi præterea fuisse inter arenas quendam plumbeum, quo cælaturæ, ac præsertim Onychinæ conseruarentur. Quòd autem in eo littore numismata ferè exesa deprehenderentur, opinatus est causam esse sulphur, quod tametsi insensile, in iis tamen oris vbique interuenit, accedente aliundè ex mari salugineo halitu, cum arrodendi facultate. Altero post mense repetiit Romam, idque vt amicis vale diceret, collatis variis munusculis, ac aliquibus etiam aliò missis. Constituerat nempe redire Patauium ante Solstitium, magnòsque æstus; vnde & paucos intra dies non sine relicto sui desiderio ex vrbediscessit. Instituit autem iter Perusiâ, tum Academiæ gratiâ, tum spectandi lacus Thrasumeni causâ. De flexit inde Eugubium, occasione inuentæ illeic non ita pridem Tabulæ æneæ lingua veteri Hetrusca perscriptæ. Salutato postea ad Assisium D. Francisci monumento, inuisit Fullinij Natalitium Benedictum, abs quo expectatus ardentissimè fuerat. Spectauit exinde ad Montem Falconem, inter D. Claræ reliquias, treis insigneis globulos in cistula fellea inuentos, quorum duo, vel tres, non ampliùs, quàm vnus, ponderosi deprehenduntur. Tum votis ad celebre Fanum D. Mariæ Lauretanæ ritè per-

solutis, adiit Anconam, indeque Vrbium, ad
obtinendum licentiam peruolutandi Bibliothecam
Ducis. Digressus Pisaurum, atque Ariminum, ac-
cessit Rauennam, vbi Hieronymus Rubeus clarus
ille Medicus, patriæque scrutator, completi illum
expetebat, demonstrareque in ipsa sede Exarchatus
nescio quas reliquias Barbariei Gothicae, & orna-
menta Imperatorum, contemporaneorumque Re-
gum, cum his nominibus; ATHALARICVS
RIX, WITIGES RIX, THEODVISATVS,
& id genus alia; simulque ostendere ornamenta
quædam Gallæ Placidia, in nescio quo templo,
quæ Velius non esse antiqua censuerat: denique ipsi
sua manu exemplum Historiæ Rauennatis dare. Per-
uenit exinde Venetias, vbi amicis, magna illorum
cum voluptate salutatis, cognoscere non obiter
voluit Antonium Posseuinum, ex Societate IESV,
virum optimum, ad quem cum expetiisset com-
mendatitias literas, *E. quid queris proxenetam, re-*
scripserat ad illum Sirmondus, cum ad quoscunque
veneris, adeo ex teipso innotescere, amabilisque euadere
possis? Postremò non multos post dies, hoc est,
medio circiter Iunio, accessit Patauium, vbi tantâ
est exceptus lætitiâ, vt videretur quasi quispiam
Deus studiosorum eò aduentasse. Maximè verò re-
ditu suo recreauit optimum Pinellum, qui diutur-
nis, sed lentis morbis iam ingrauescentibus, pro-
pendere se in mortem sentiebat. Dies non sufficie-
bant audiendò, quæ compererat; neque inspiciendò,
quæ attulerat, neque cognoscendò, quæ visa

obscura interpretabatur. Dicam-ne , cum inter 1601.
eos viros , quos cognouerat , fœlicitati verteret;
quod amicos sibi Baronium , ac Bellarminum pa-
rauisset , prouocatum fuisse optimum Pinellum , vt
quidnam sibi circa illos contigisset , exponeret ?
Cum , inquit , summus Pontifex ante annos treis
venisset Ferrariam , dignati sunt illi me inuisere ; sed
tacitis nominibus , habitûque dissimulato ; adeo vt
se Presbyteros simpliciter asseuerarent. Ipse ex eo-
rum iconibus , qui viri essent , statim agnoui : sed
fingens tamen me ignorare , in eam Musæi partem
deduxi , in qua virorum illustrium , ac ipsorum spe-
cialiter , imagines erant conspicuæ. Ostensa autem
Baronio Bellarmini effigie , Num hæc imago , in-
quam , ô bone , socium istum tuum repræsentat
eximiè ? & ostensa Bellarmino quæ Baronij aderat ;
Num hæc quoque , inquam , socium istum tuum
exquisitè refert ? Ac tum illi delusos se , cum delu-
derent , agnoscentes in amplexus prolapsi sunt. Por-
rò quia Peireskîus præsentiebat se post annum re-
uocatum iri in patriam ; idcirco se ad intermissa lu-
ris studia composuit : tempore sic dispensato , vt ad
alia præterea innumera sufficeret. Siquidem præter
varia , de quibus paullò post dicetur , in literatos
officia , profecit continuo in notitia abstrusioris hi-
storiæ , altiorisque antiquitatis. Specimen autem in-
signe dedit , cum subortâ inter curiosos de monte
Argæo controuersiâ , edisseruît ex Iaspide , variis-
que numismatibus Cæsareæ , alibique cufis , origi-
nem , ritûsque varios , quibus ille mons fuit olim.

1601.

in Cappadocia adoratus. Linguas præterea semper excoluit, quas credidit vsui futuras. Nam ex Hebraïca quidem, & ex utroque charactere, tam vulgari nempe, quàm Samaritano; ex Syriaca item dialecto, idiomatèque Arabico, tantum ferè delibauit, quantum ad fidorum, similiùmque numismatum interpretationem necessarium duxit; vsus magisterio Iudæi cuiusdam commorantis Patauij, cui nomen Rabbi Salomon fuit. Ad Græcam linguam quod adinet, studiosiorem illi operam impendit, tum propter varias constitutiones Imperatorum Græcorum, ipsamque Iuris originem, quæ ad Græcos fontis refertur; tum propter Philosophiam, seu studium Sapientiæ, proptèrque Poëseos, ac Historiæ, quæ in ea lingua supersunt, antiquissima monumenta; tum propter explicationem gemmarum, numismatum, marmorum, quorum sunt Græcæ inscriptiones, quibûsque illustrandis pulchrum semper duxit, suauissimùmque habuit seriam operam collocare. Hinc cùm ad aliquem scriberet Græcarum literarum amantem, exempli causa ad Occonem, qui suas semper Epistolas sententiis Græcis interferebat, solitus erat ipse quoque eruditionem suam testari, nunc versum Græcum præmittendo, nunc quidpiam carmine, aut prosa appositè interpolando: vt ad memoratum Adolphum Occonem, *Fortunate Senex, Te Diuæ illius antiquæ, & venerandæ Μνημοσύνης filia, non iam Αδελφον, sed Αδελφον duplici nomine Germanum dicent.* Nec verò humaniorum modò literarum studiosus fuit, sed multum etiam

etiam inuigilauit Mathematicis artibus, carus ex eo tempore Galileo Galilei, quem & apud Pinellum primum nouit, & ex inuenta hauriendis aquis tum urbem infestantibus machina, admodum suspexit. Incubuit quoque plurimum in peruestigandis causis rerum naturæ admirabilium. Quippe, & varios variè rogauit de illis Parheliis, siue tribus solibus, ac triplici Iride visis, die Februarij septima, hora circiter vigesima prima. Et de piscibus, aliisque rebus saxificatis philosophaturus, tum variam copiam impetrauit, inque angulo Musæi disposuit; tum ichnographiam eius montis, qui apud Vicetinos iis abundat rebus, obtinuit. Et quicquid fuit cuiquam perspectum circa fossilia, mineralia, rem metallicam, sua seu remuneratione, seu comitate concessum tulit; maximè autem Venetiis; vbi aliunde, cum multa præclara in armamentario se obseruasse diceret, referebat tamen nihil sibi fuisse adspectu iucundius formatione aluminis in octahedricam figuram. Et frequens adiit rariores hortos, perferaturus varietatem, vireisque tam indigenarum, quàm exoticarum plantarum; ac destinans quasdam in Prouinciam, quasdamque vicissim ex Prouincia, nunc in Pinelli, nunc in aliorum viridaria transferri curans. Et interesse solitus fuit non publicis modò Anatomicorum dissectionibus, sed priuatis etiam Hieronymi Fabricij ab Aquapendente, qui illum propter singularem beneuolentiam admisit, cum specialiter ex ouis gallinæ incubanti suppositis, singula in dies singulos subduceret, vt

1601. ab ipso usque incubationis initio obseruaret seriem formationis pulli. Atque hæc quidem de studiis. Sequitur, ut iam infinuemus, quemadmodum illum ex hoc tempore viri studiosi, eruditique arripere agnouerint gubernaculum literarum. Dictum est iam, cum Roma rediit, cœpisse optimum Pinellum solito grauius laborare, inque obitum vergere. Is itaque non multò post, quippe sub Augusti initium, è mortalium vita excessit, propè septuagenarius: magno profectò dolore omnium bonorum, eruditorumque; sed Peireskij potissimum, qui illum, tanquam alterum parentem habebat, ac venerabatur. Cæterum cum ille sui desiderium, quæ patebat orbis literarum reliquisset, consolationi tamen fuit, quòd videretur Peireskio quasi lampada tradidisse. Ipse nimirum ad eius mores ita se composuerat: ita studio rerum nobilium, exemploque benefaciendi, ac promouendi bonas arteis animatus euaserat, ut virtutis heroicæ destinatus hæres iure censeretur. Huiusce rei congerenda aliquot testimonia sunt, quæ pleniorẽ concilient fidem. Imprimis verò citandus occurrit Paulus ille Gualdus, qui Pinelli vitam conscripsit, cuiusque mentio facta iam est. Is postquam viri mortem defleuit, dixitque naturam parcè proferre eiusmodi viros, ac Methonis fortasse annum transigendum iis, qui alterum Pinellum expectent; talem scilicet, cuius studium humaniora studia restituat in pristinum splendorem, cuius opes in nobileis libros colligendos impendantur, cuius dignitas doctis viris patrocinio sit; tum

demum subdit, *Ætas sanè nostra, si quem feret eius-* 1621.
modi, is, ita me Deus amet, non alius erit à NICO-
 LAO FABRICIO Gallo, domo Aquis-Sextiis, cla-
 rissimo adolescente, qui Roma, & Patauij, vix-dum
 plenam pubertatem egressus, eo ardore Pinellum, & Pi-
 nelli studia est complexus, ut omnibus nobis, & doctis vi-
 ris, quotquot his capiuntur literis, miraculo sit. Egre-
 gium sanè vaticinium: sed en etiam votum Erycij
 Puteani, iam tum Mediolani, ut suprà est dictum,
 Eloquentiæ, & Chronologiæ professoris. Is scribens
 ad Peireskium, O vulnus, inquit, quod Pinelli mor-
 te acceptum est! Abiit æternus ille vir, ipse nominis, &
 fama securus: sed nos in desiderio, & dolore reliquit,
 Musas in squalore. Quis succrescet, & dolorem nobis de-
 met, Musis squalorem? Non doctrina, sed opibus quo-
 que opus. Quis? fallor? an tu ipse huc vocare, ut sis
 quod Pinellus fuit? Vouco, vouco, & saluere te iubeo,
 Iuuentutis spes. Quo loco fortassis non ingratum
 erit, si Peireskij responsionem adtexuero. Sic igitur
 ille rescripsit. Peruellis animum meum dolore, dum mihi
 incomparabilis viri morte vulnus inflictum refricas. Me-
 ritiò tu quidem funebreis, ac luctuosas voces ingeminas;
 meritiò vicem nostram deploras, meritiò omneis ad lugen-
 dum inuitans exclamas, Quis nobis dolorem demet, Mu-
 sis squalorem? Sed in fine risum excitas, dum, quasi va-
 ticipinari velles, subiungis me, quod Pinellus fuit, futu-
 rum; idque, tanquam fieri posset, seriò voues. Quod per-
 inde est, ac si ingenti succisa pinu voueres, ut humilis ali-
 qua myrica robur illius, ac proceritatem æquaret. Verùm
 amor erga me tuus hoc tibi, quiduis aliud meditantii, vo-

DE VITA PEIRESKII

52

1601. tum extorsit, cuius, ut reor, nunquam te damnatum iri, aut reum fore sperasti. Quod si ego tibi idipsum vouens, vatis illud accinam, Tu nunc eris alter ab illo, qui te penitus nôrunt, sat scio, me vatem affirmabunt haud vanum; tuæ namque hoc opus opis non meæ. Argutè sanè, & eleganter; tametsi id dissimulauit, quod verissimè à Puteano dictum, ad subeundum id muneri, opibus quoque opus esse. Fuère & aliæ perelegantes vtrimque literæ conscriptæ, exstâtque speciatim vna edita in secundis Ferculis, seu centuria Epistolarum Puteani secunda, qua sub initium sequentis anni, qui fuit supra millesimum, sexcentessimumque secundus, ille gratiosè conquestus est se Deorum genus nominatum. Fuère, inquam, aliæ literæ conscriptæ: sed ad rem facienteis excerpfi, ex quibus abundè intelligitur quàm appositè Ianus Gruterus in præfatione magni illius Inscriptionum voluminis ita coniunctim nominârit, commendaueritque Erycium Puteanum, & Nicolaum Fabricium, ut iuuenes esse præ cæteris dixerit,

— Sacros qui sollicitare flores

Aonidum, totâmq; solent haurire Aganippen.

Versabatur porrò sub prælo ingens illud opus, cum Pinellus concessit fatis: Peireskii autem suppeditauit, quæ in illud infererentur, non modò ex iis, quæ inter Pinelliana cimelia, sed etiam ex iis, quæ Romæ, quæ Venetiis, quæ aliis in locis obseruârat, descripserâtque, ut docet illud toties subiectum inscriptionibus, *Ex Nicolai Fabricij schedis.* Venio iam ad Marcum Velferum, cuius interuentu Gruterus.

chedas illas obtinuit. Ille Pinello propè par, & 1602.
singularis amicus, florebat Augustæ Vindelicorum
Duumvir. Me tacente, scripta illius, omnesque viri
cruditi, opem ipsius munificam, paratissimamque
experti, quantus vir fuerit, satis loquuntur. Velle-
rus ergo, literis ad Peireskium datis, testatus est
tanti se facere ipsum, eiusque amicitiam, ut nihil
sibi fuerit ex tota Pinelli hæreditate expetibilius.
Quin etiam ipse quoque illum non-modò virtutum
Pinelli hæredem agnoscens, sed futurum quoque
suarum successorem coniiciens, diligere cœpit, tan-
quam filium, & literarum frequentiam, quoad vixit,
non destitit testatum facere affectum. Hoc vno ipsi
durus fuit, quòd sui effigiem constantissimè dene-
gavit, pro eo, quo omnibus aliis ardentissimè fla-
gitantibus denegauerat instituto. Et Peireskius ta-
men, ut alios nonnullos, sic illum nescientem pin-
gi procuravit, conducto artifice, qui ipsius vultum
è clandestino loco spectaret. Sic obtinuit quod illi
Occo sperare nefas prædixerat, cum id abs Velfero
tulisset responsum, *Cato maior posteros volebat quære-
re, cur sibi statua nulla posita: mihi contrà, quantum
video, cauendum, ne quis aliquando miretur, si non ex-
indignetur, qua ambitione consortio magnorum virorum,
quorum imagines se colligere Fabricius ostendit, irreps-
erim. Prætereo autem quàm præclarè Noster illud ex-
ceperit: quippe ad Occonem rescribens, Dixit qui-
dem, inquit, Cato non minùs argutè, quàm sapienter,
se malle, ut posteri quærerent quare sibi non esset, quàm
quare esset posita statua: nunquam tamen, quod légerim;*

se pingi, aut fingi renuit; cuius rei testes esse possunt icones eius non pauca, quæ in hodiernum diem circumferuntur. Igitur nec Velserus, vera Catonis imago, id abnuere deberet, & ne abnuat, precor preceris, ores ipsum, atque exores iterum oro. Subnectendus Velsero est Iosephus Iustus Scaliger, vir ille maior, ac celebrior, quàm ut encomio nostro indigeat. Subnectendus, inquam, ut constet quàm sponte, quàmque alacri mente Peireskii se ipsi, aliisque eruditis deuouerit. Nam ille quidem summopere sibi ipsi est gratulatus, quòd in Pinelli defuncti locum talis amicus successisset; ac occasionem ut accipias, ea fuit huiusmodi. Scripserat Scaliger ad Pinellum, rogans, ut sibi procuraret Hebræicos aliquot libros, itemque nummos aliquos Scaligerorum Principum; ac simul miserat tam Patris, quam sui ipsius autographa quædam, & vtriusque etiam icones, prout ille petierat. Scripserat vnà Carolus Clusius, miseratque exemplum suæ rariorum plantarum Historiæ, & iconem desideratam Matthiæ Lobellij: ne quidpiam dicam de destinatis à Scaligero literis ad Carolum Leberoneum Valentinum Episcopum Patauium commorantem. Peruenire ista Patauium, cum non modò iam Pinellus obiisset, sed discessisset etiam ex vrbe Cæsar Dux Acheruntij, qui fuit Pinello ex fratre nepos. Quia verò is Gualdo mandauerat, ut siquid datum foret ad Paruum, id exciperet, & Neapolin ad se mitteret: idcirco Gualdus omnia excepit, ac priusquàm transmitteret, cum Peireskio communicauit. Itaque Peireskii, cala-

mo arrepto, rescripsit ad Scaligerum: nuntiauit non modò Pinelli, sed etiam Episcopi mortem: securum fecit de donariis à memorato Cæsare grato animo accipiendis: recepit in se quam Pinello commiserat curam librorum Hebraïcorum, ac numismatum: pollicitus est se aliqua saltem, quæ haberet iam, occasione prima missurum: obtulit & nonnulla alia ad illustrationem Scaligeræ gentis, quam cum veneretur, adiecit se non commisisse, vt icones illæ abirent, quin exempla sibi earum obtineret. Scripsit pari modo ad Clusium, ac dici non potest, quantum illi se tam generosæ indoli, ac singulari humanitati deuinctos prædicauerint. Hûc spectat illa Scaligeri ad Velsærum Epistola, quæ est in tertium librum inserta, & in qua, *Numismata*, inquit, *gentis Scaligeræ cum literis Fabricij nostri, & tuis accepi; quo nomine gratias tibi ago. Nondum Hebraïcos accepi libros, quos ille ad me ex Italia misit; quia inter mercimonia Raphelengiana sunt, quæ nondum hûc perlata sunt. Prope diem, quum accepero, & illi, vt gratias agam, scribam, & à me quoque alias expecta.* Scripta est autem Epistola 1 v. Idus Maij. An subinde commemorabo aliquos ex iis, quibus alacrem operam nauauit? Impremis certè, si quid fuerat à Pinello priùs tentatum in studiosorum gratiam, id contempione maxima perficere adnixus fuit. Sic nullum lapidem non mouit, vt quam ille spem fecerat Prospero Alpino per celebri Medico recuperandi de tertia Methodicorum secta tractatus, opere ipso posset explere. Deinde, cum dicendi sint, quos Pinelli exemplo iuuat, vnus instar

1602.

omnium esse posset memoratus Pignorius, dum Iliacam mensam exponens (Tabulam nempe illam aeneam Hieroglyphicis Ægyptiis insignem, quæ ex Petri Bembi Cardinalis reliquiis eo tempore in Ducis Mantuæ Bibliotheca asseruabatur) gratias quidem egit imprimis Velfero, sed subiecit tamen, Nicolao dein Fabricio Chalasij Domino, natalium splendore, & recondita eruditione illustri adolescenti, qui non modò insignes antiquitatis reliquias, quibus instructissimus est, in meum, & studiosorum usum munificè contulit; sed etiam aliorum Musæa, ut paterent, sedulò curauit. Eius diligentia factum est, ut non modò Venetiis Friderici Contareni Diui Marci Procuratoris, & Ioannis Mocenici illustrissimorum virorum præclarissima nummorum, & gemmarum κειμήλια mihi in promptu essent; sed & Roma ornatissimi viri Lælij Paschalini κέρας ἀμαλθίας (cur enim hoc nomine non appellem bonæ copiae diuitem thesaurum?) de quo nobis numismata, gemma, sigilla, rara omnia insigni humanitate suppeditata sunt. Eidem Fabricio acceptum ferri debet omne id, quod è Natalitij Benedicti pretiosis oculis euulgamus, è quibus auctario nostro cum robore, & incremento spiritus accessit. Ea enim omnia, quæ ad illustrandam Epiphaniij, Irenæi, & aliorum Patrum historiam Sæctarios antiquos exagitantem attulimus, inde profecta sunt. Hæc fusiufculè refero; quoniam ex iis, quæ iam antè attigi, pluscula confirmant. Addo verò circa Pignorium, cum is librum de Patauinis originibus scriberet, obtinuisse illi Peireskium à Ioanne Vincentio à Porta, quod ipse postea memorauit, & Philippus etiam Tomafinus in Tito Liuiio retulit, circa

circa Parentis historiæ bracchium. Nimirum ci-
 ues Patauini ex asseruatis apud se Titi Liuij ossibus
 alterum bracchium exemerant, concesserantque in-
 clyto illi studiorum fautori Alphonso Arragonum
 Regi, cum illud instantissimè per Antonium Panor-
 mitam Legatum suum exorâisset, ab anno usque sa-
 lutis millesimo quadringentesimo quinquagesimo
 primo. Cum ignoraretur verò ecquid de bracchio
 actum foret, occasionem cepit Peireskius mittendi
 complura ad Portæum munuscula, quasi compen-
 sans ectypum marmoris cuiuspiam, in quo erat ex-
 pressus ritus mittendi milites sub iugum; ac simul
 efflagitauit vt rescriberet, quid pro sua sagacitate de
 bracchio compertum haberet. Rescripsit autem ille
 consequenter, neque Alphonsum morte præuen-
 tum, neque etiam Panormitam condere potuisse pro
 votis id bracchium: successorem verò istius à secre-
 tis regni, conclusisse sub marmore, collocasse-
 que extra Oratorium, cum inscriptione huiusmodi,
 T. LIVII HISTORICI BRACCHIVM, QVOD
 OLIM ANTONIVS PANORMITA A PATAVI-
 NIS IMPETRAVERAT, IO. IOVIANVS PON-
 TANVS MVLTOS POST ANNOS CONDIDIT:
 cæterum à multis iam annis id marmor non fuisse
 conspectum, ob facellum à nescio quibus confra-
 tribus superestructum. Vt fuit porrò Peireskius er-
 ga Pignorium munificus: sic fuit etiam erga Vlyf-
 sem Aldrouandum percelebrem illum de Animalibus
 scriptorem, qui multa ab eo numismata habuit,
 maximèque Asiatica, illustrandis iis, quæ circa ani-

malium symbola iam ediderat, ac tum de nouo apparabat. Atque is quidem Bononiâ scribens animo reuerâ grato pollicitus est se commendaturum per quem profecisset : sed in cæcitatem breui incidens id, quod destinârat, perficere potis non fuit. Idem fuerat pollicitus Ioannes Baptista Villalpandus, de illius nomine, patria, conditione sollicitus, ut testari posset à quo accepisset & ficos, & pleraque alia, amplificando tractatui de nummis Hebræicis, post editos iam magnos illos in Ezechielem commentarios. De Sirmondo heic memorandum, quòd cum accipere à Peireskio Roma discedente noluiisset, nisi ex iis numismatis, quæ geminata illi adessent, postulauisset ipsum tamen, obtinuisseque ab eo, postquam Patauium rediit, plusquam ducentos ecypsos, vel ex Græcanicis duntaxat. Eius scilicet generis cœgerat iam supra mille, quæ forent penitus intacta rei nummarie auctoribus : & cum haberet cusa tam ante, quam post Romanum imperium in ciuitatibus quibusque Græciæ, Asiæque præcipuis, ex quibus contexuerat seriem Seleucidarum Principum, ab Alexandro ad Romanos usque : eamobrem Sirmondus hanc seriem desiderauit cognoscere, ut illius instar seriem Principum Ægyptiorum texere posset. Sed faciendus his modus est. Porro iam penè triennium in Italia exegerat, cum apparare reditum cœpit. Ac habuerat quidem in votis Venetiis tendere Augustam, tum ut Velferum, Occonémque ea in vrbe inuideret : tum ut exinde commissus Danubio circumstantia Germaniæ, Hungariæque loca lustraret.

& Constantinopolim tandem per Euxinum Pontum, Bosphorūque Thracium perueniret, peragraturus deinceps quicquid liceret ex Græcia : verū Fonuius planè abnuit , vel quia censeret Patrem, Patruūque id consilium auersaturos, ob digressionem prolixam nimis , periculūque plenissimam ; vel etiam quia ipse Parisios repetitò accerferetur. Peirefkius ergo nihil planè ausus ipso repugnante moliri, res suas ita composuit , vt imprimis omncis Italiæ amicos, quibus vale coram dicere non potuit, literis salutauerit, oblatōque obsequio, & plerumque etiam adiunctis munusculis deuinxerit. Sic exteros quoque, ac præ aliis Scaligerum , cui ad superius memorata adiecit nummos ab amicis Veronensibus recens habitos , nonnullaque alia spectantia ad Scaligeranam familiam. Coëgit deinde quicquid potuit seu librorum , seu cimeliorum , seu aliarum rerum exquisitarum nancisci : ratus sibi in patria parem copiam non occurruram. Discessurus coniecit omnia cum sarcinulis in aliquot capsas , quas direxit Genūam , conuehendas inde Massiliam : ac reseruauit solūm rariora, & pretiosiora aliqua, quæ vnà translata eandem secum experirentur fortunam. Videlicet , cū sibi satis lustratum putaret ex Liguria, peragrarè Galliam Cisalpinam voluit, emergerēque Lugdunum , vt providere illic posset quemadmodum litteras ab amicis acciperet , & vicissim ad illos daret. Postremū relicto ingenti sui desiderio Patauij præsertim, ac Venetiis (ne quid piam dicam de Augusta, vbi Velserus concepta ipse complectendi illum frustratus,

1602.

quasi dimidium animæ subduceretur, ingemuit) itineri sese commisit. Diuertit autem primum Vicentiam, salutaturus illic amicos, ac inuisurus eum montem, cuius, ut dictum est iam antè, ichnographiam quasierat. Considerauit etiam Gustosâ illam venti dispensationem per canalicis, ac tubulos; acceptique, & in commentarios retulit historiam illius, qui nascentem è crypta ventum in loco satis dislito, domum usque per meatum subterraneum ita deduxit, ut tandem velut secuerit, distribueritque pro arbitrio. Accessit deinde Veronam, attenditque illic præsertim ad Scaligerorum sepulcra, quorum, quia tum non licuit adumbrationem obtinere, impetrauit postea interuentu Cæsaris Nichezola, & Marci Antonij Montani. Mantuæ cum foret, tam multa vidit, atque adnotauit in Ducis Cimeliarchio, ut cum superioribus annis accepisset direptum fuisse, Germanis urbem vastantibus, vix satis sese consolari per multos dies potuerit, tantam ducebat factam iacturam. Inter cætera spectauit curiosè Ægyptiam illam Tabulam, ut varios de ea scrupulos eximere Pignorio posset. Visâ Cremonâ, voluit Brixiam, Bergamumque diuertere, ac tum venire Mediolanum, ubi non modò Erycius Puteanus, & Septalij fratres, aliique amici; sed maximè etiam ille nunquam satis laudatus Archipræsul, Cardinalisque Fridericus Borromæus, Ambrosianæ Bibliothecæ iam tum crebrescentis fundator, sunt illum humanissimè, ac per dies multos complexi. Digressus Ticino, Nouaria, Vercellis, peruenit Taurinum, ac superatis Alpibus,

Geneuam ; vbi peruolutis libris variis , spectatôque 1601.
Lemmano lacu , Tononum vicum adiit , vt fieret
oculatus testis admirandorum facinorum , quæ pa-
trare per illud tempus Dæmoniâci perhibebantur.
Traiecto lacu , perlustratâque circumuicina Heluetia ,
soluere vota placuit ad celebre fanum Sancti Clau-
dij , ac præsertim pro Patruî cognominis incolumi-
tate. Desistere inde volebat Semurium , Dau-
idem illum quondam suum præceptorem salutatu-
rus , ædeisque illas inuisurus , in quibus ante quin-
que annos Genebrardus obierat : sed rerum in Bur-
gundia ob factionem Bironij Marefcalli innouata-
rum , suspectarumque status deterruit. Deslexit ergo
potius Lugdunum , vbi acceptâ pecuniâ , persoluit
largè honorarium Ductori suo Parisios , vt iam di-
ctum est , discessuro. Deinceps , quamuis amore
patriæ , parentumque teneretur , callidè tamen con-
siliû cepit non pergendi recto itinere domum , sed
discedendi Monspelim , vbi Iulius Pacius à Beriga
Iurisconsultus Vicetinus profiteri magna cum laude
Iurisprudentiam ferebatur. Quia enim satis sibi ipsi
circa Iuris studium nondum fecerat , & apud se ta-
men constituerat neque postulare , neque adipisci
quam lauream vocant Doctoream , absque insigni
quadam gloria , testationeque eruditionis ; idcirco
domum tendere noluit , ne inuitus adigeretur ad
consequendum lauream , possêtque prius sub illustri
Antecessore fieri instructior. Itaque concessit Monf-
pelium sub Iulij mensis initium , selesque statim ipsi
Pacio in contubernium cum fratre dedit. Subinde

1602. verò consilium indicauit Patri, ac Patruo, qui nihil tale suspicantes subueriti sunt, ne fortè in Italia non satis studiosè Iuri incubuisset. Præter eum secessum, argumento fuit, quòd tam ex capsis Genuâ acceptis, quam ex transmissis residuis illis, selectioribûsque cimeliis, quibus Monspelium cùm peruenisset, sese exonerauerat, peruiderunt illum debuisse tantum temporis in iis colligendis, cognoscendisque impendere, vt nihil, aut parum omninò, quod impenderetur Iuri, superfuisset. Id autem vbi ille resciauit, quadam veluti apologia suspicionem est amolitus. Nimirum, se nihil detraxisse horis Iuris studio debitis; sed tantum quas alij aut ludicris rebus, aut computationibus, aut Venereis illecebris vulgò dederent, succidisse, contriuisseque in comparanda antiquitatis notitia. Quam viderent de ea congeriem, argumento saltem esse pecuniam sibi creditam non fuisse in nequitiam, perditosve vsus absumptam. Cæterum & se agnouisse non esse studium antiquitatis Iurisprudentiæ inutile, cùm alia ratione non possent pleraque loca seu Digestorum, seu Codicis intelligi; & posse ipsos id experiri, cùm quod, exempli gratiâ, lateret iam Interpretes circa Viriolas ex smaragdis Vlpiano, ac Paulo sapius memoratas, intelligere ex iis possent, quas eruisset Romæ ex quibusdam ruderibus, quasque ad illos mitteret, rem iam à plerisque sæculis inuisam. Existare etiam in sarcinis plureis reliquias ex eo Ære, quod antiqui graue dixerunt (cùm id nimirum penderent) interque parteis Assis varias reperiri Qua-

drantem , qui altera facie Suam præferat, ex quo, 1602.
& ex Oue , ac Tauro pariter signatis , dicta primùm
fuit Pecunia , tanquam à pecudibus. Sic & repertum
iri alia propemodùm innumera , de quibus coràm
differere , sine voluptate vtriusque non posset. Deni-
que tam sese , quàm fratrem non diuertisse ad Pa-
cium , quòd se Iuris ignorantiores suis coætaneis
crederent; sed quòd eximium aliquid supra ipsos sa-
pere vellent. Placuit mirè parentibus instituta de-
fensio , ac Patruo præsertim , qui tanto ardore vi-
dendi ipsius inarsit , vt , vix tertio mense exacto , ac-
cessitum voluerit. Accessit ergo ; sicque Laréis reui-
sit primùm mense Nouembri , sed adducto tamen
secum Pacio , vt vel reducendi ipsius prætextu deti-
neri domi non posset. Relictus verò germanus fuit,
quòd è morbo tum conualescens sese dare itineri
absque periculo non posset. Heic non memorabo
qua exultatione exceptus Peireskius domi fuerit,
neque quo cultu habitus Pacius. Referam duntaxat
magnum illum virum Guillelmum Varium , qui tum
erat princeps Aquensis Senatus , quisque fuit post-
modùm suffectus , vt suo infra loco dicetur , in vi-
cem Cancellarij , mirari satis non potuisse indolem
adeò egregiam , raràmque adeò eruditionem tanta
cum modestia coniunctam ; neque vnquam satis sa-
tiari interrogando , excipiendòque quæ ille scitè ,
perspicuè , suauitèrque commemorabat. Paucis post
diebus Monspelium ynà cum Pacio rediturus , desle-
ctendum è via censuit , vt demonstrare illi posset
scaturiginem Vallis clausæ , non aquarum exundan-

1602. tium copia magis, quàm Petrarchæ, & Lauræ amoribus concelebratam: itémque Arcum illum triumphalem, qui Araufione conspicuus, C. Marij credebatur, cum ipse Fabij Maximi potius esse opinaretur; tum ciuitatem Auenionensem; & fornicatum triplici serie Wardonis, seu Guardonis pontem; ac Nemausentia quoque nonnulla, quæ ille non aduerterat, tametsi illeic biennio moratus. Quam-primum autem rediit, tanta se cum alacritate ad studium Iuris composuit, vt horas decem solidas diebus singulis in eo collocaret. Neque verò id solum tempus consecratum est studiis; sed dictim etiam quasdam horas, ac potissimum ante somnum impendere solitus fuit litteris humanioribus, studioque rerum antiquarum. Non id abnuebat penitus Pacius, qui mirè etiam afficiebatur, quoties illum de rebus variis, ad antiquas præsertim leges pertinentibus, dicentem audiret. Quin non modò etiam est passus, sed penè, dicam, auctor fuit, vt Narbone inuiseret, quæ exstant illeic vetustatis non ignobilia monumenta; ac speciatim votum, factamque Augusto Aræ dedicationem, cuius ante annos triginta effossæ, & Burdigalæ, cum illustratione Eliæ Vineti, excusæ exemplum obtinuerat. Scilicet nondum allatum erat Inscriptio-num Gruteri opus, in quo postea obseruauit Tributiam Augusti potestatem, quæ apud Tacitum legitur trigelima septima, fuisse ex hac ipsissima inscriptione trigessimam octauam. Ad hæc, quia Pacius perlubenter edissererebat de rebus ad Physicæ spectantibus, nullam non occasionem captabat rogitandi

tandi illum de causis naturæ abstrusioribus, & maxi- 1603.
mè quidem per horas relaxando animo datas. Sis-
cùm aliquando noctu incidisset in crustas, squam-
mâsque piscium lucidas, collegit, intulitque clàm
in Pacij Musæum; ac postea cum illo ingressus, quam
præfererat candelam consultò exstinxit, vt illo pri-
mùm attonito, ac deinde lucem mirante, sciscitare-
tur ipsius causâ. Ac recurrit quidem Pacius ad ca-
lorem ex putredine excitatum; sed rogauit Peires-
kius, cur non sentiretur ergo calor neque in iis
squammis, neque in quibusdam lignis putrescenti-
bus? cur horrea præ putredine incalescentia, calx
item madefacta, & alia tantoperè calida non emit-
terent lucem? cur si ob calorem cicindelæ lucent,
non lucerent etiam animalia cætera tantoperè iis ca-
lidiora? Ad quæ Pacius, posse calorem, quem in scho-
lis dicunt virtualem, sufficere; & aliunde exigì cer-
tam dispositionem materiæ, quæ reperitur in rebus
minùs ad sensum calidis, non reperta in aliis calidio-
ribus sensu deprehensis. Prætereo porrò, cùm hæc,
& alia non fecissent satis Peireskio, nihil deinceps
visum fuisse probabilius, quàm lucem omnem flam-
mulam esse, sed rarissimam, tenuissimamve: argu-
mentoque esse lucem Solis, quæ dum cogitur, den-
satúrque, ardet; ad eum modum, quo vapor nihil
aliud, quàm aqua rarefacta, tenuatáque est, quæ rur-
sus coacta, densatáque, humor apparet. Cùm lux
autem Solis directa, seu primaria sit adhuc satis den-
sa, vt calorem sui sensibilem faciat; repercussam ta-
men, secundariamve adeò tenuem euadere, vt eius

1603. calorem sensus non percipiat. Quare & nihil mirum videri, si lucula illa squammarum, similiumque rerum non sentiat calida; cum sit longè tenuior illa solari secundaria, intra quam planè evanescit. Quòd res autem calidiores non perinde luceant, causam dici posse, quòd calor vehementior terriores excitet vapores, seu fuligines, quàm ut connatam luculam patiantur puram emergere, atque idcirco apparere. Rursus, cum foret valdè curiosus rei anatomicae, ac herbariae; ea propter quoties licitum erat, diuertebat in Regios hortos, à quatuor iam annis instructos, ad Richerium Belleuallium vtriusque demonstratorem, cui nunquam non fuit Peireskij & desideratissima, & iucundissima consuetudo. Diuertebat etià frequens ad Franciscum Ranchinum, qui ad peritiam Physices, Medicæque eximiam, pulchrè adiungebat notitiam, cultumque rerum antiquarum. De Ioanne Dortomanno quid dicam, cuius semper solitus fuit & exquisitam doctrinam, & insignem erga se benevolentiam commendare? Hoc certè Medico est usus, cum febriculâ laboravit, cumque vexatus est grauiore, quàm eò usque fuisset expertus, dolore hæmorrhoidum, & nonnulla etiam urinae emittendæ difficultate. An adtexam verò quod retulit sapius, cum Dortomannus aliquando ægotantem inuideret, rogareturque, cur ea vice seriùs solito aduenteret, respondisse ipsum se accedere ex consultatione memorabili pro muliere Belliquadrensi, quæ tum gestaret vtero mensē iam vigesimum tertium. Ea nempe iteratò nupta, cum ex priore coniugio par-

rus aliquot nonimestreis edidisset, ex posteriore tamen ediderat treis, vnum mensium vndecim, aliorum quatuordecim, tertium verò octodecim: & quoniam ex periculis antecedentium puerperiorum, coniciebat sibi ex quarto impendere grauissimum; medicos idè consuleret, si qua ratione incolumis evadere ex illo posset. Et memini quidem obiecisse me, videret, ne esset eadem fœmina, quam non ita pridem Antonius Saporta, aliique Medici propter simile nescio. quid non omnino sanam mente pronuntiassent. Verum perstitit fuisse aliam, adiiciens ipsam non longè post peperisse infantem cum capillitio, ac dentibus, obtinuisseque à coniuge, ne ulterius contingeretur. Vt cumque pbrò hac de re sit, (quam venditare pro vera nolim) occasione partim morborum, partim vehementioris studij, effectum est, vt literas ad amicos scriberet raras. Inde euenit, vt cum semel totos quatuor menses à scribendo abstinuisset, & periissent etiam destinatæ quædam in Italiam epistolæ, idè rumor de eius morte Romæ, ac Patavij præcrebuerit; & Pignorius etiam ad Patrem consolatoriam scripserit; Gualdus verò, falsitate rumoris comperta, illum quasi rediuium salutauerit, crudelem blandè appellans, quod suâ in scribendo negligentia, amicos tam bonos, tamque constantes enecaret. Videlicet non admittebant quod expectandas à se raras literas præmonuerat, donec studium Iuris foret absolutum. Quare compulsus denique fuit, vt sæpiusculè scriberet; neque ad ipsos Italos modò, sed ad ipsos quoque Velsrum,

1603.

Scaligerum, Clusium. Quia porrò ambages nimis erant magnæ; cùm oporteret literas Augustâ, atque Francofurto transdere in Hollandiam; ideò Scaliger auctor fuit, vt literæ mutuo destinarentur Parisios, ad Præsidentem illum eximium Iacobum Augustum Thuanum, cuius nomen diffusius est, quàm vt elogio vllò possit comprehendi. Etenim, quòd Scaliger illum & sui amantissimum, & pro singulari in bonos, eruditòsque omneis affectu ad omne genus officij paratissimum comperisset; idcirco eam ipsi curam non dubitauit committere, vt commendatas ab utroque literas ex æquo curaret. Quare hac primùm occasione, & ex hoc vsque tempore cœpit quæ magna, exultatque deinceps fuit, inter Peireskium, & Thuanum necessitudo. Ad Patrem verò, ac Patrum, æti par fuit, scripsit frequentius: sed maximè vt obtineret, ne ante finem eius anni, qui fuit huius sæculi tertius, Aquas-Sextias euocaretur. Et quia nôrat ciueis Aquenseis ea tempestate procurare, vt non modò Regium Collegium pro humanioribus literis, ac Philosophiæ studio haberent; sed vt priscam etiam Vniuersitatem, Regiis Professoribus illustratam facerent; capropter scribens ad Parentes miro contendit studio, vt Professori primario Iuris ampla forent stipendia, quo Pacius illud accerferetur. Siquidem perspectum habebat tam Palatinum Comitem, quàm Academiæ Curatores euocare illum ingenti pollicitatione Heidelbergam, vbi iam per complurèis annos sui specimen dederat; ipse verò & expecebat posse Aquensem Academiam tan-

ro ornamento gloriari, & ægrè ferebat excidere spe, 1603.
 quam satis firmam conceperat efficiendi demùm ex
 illo virum Catholico-Romanum. Cæterùm, cùm
 non posset ampliùs Patruì votis oblistere, quippe qui
 resignata illi dignitate Senatoria, etiam ab anni ini-
 tio regium diploma quæsierat; accessit tandem
 Aquas Sextias, vt necessarium illi habendæ docto-
 reum gradum consequeretur. Non accessit autem
 nisi priùs optimè exercitatus, ac nisi obtenta in fi-
 nem anni dilatione, tum vt Pacium per ferias Na-
 talitias deduceret, tum vt intereà se ad varias actio-
 nes obeundas meliùs compararet. Etenim quia mo-
 ris tum erat in Aquensi Academia, vt nemo priùs
 ad lauream Doctoratus admitteretur, quàm, præ-
 ter alia tentamenta, triduanas theseis defendisset; id-
 circò theseis miscellaneas exvtroque Iure desumptas,
 maturè & seligere, & mandare typis oportuit. Et
 aliunde, quoniam à Patruo accepturus vno die Do-
 ctoratus insignia, constituerat ipse in fratrem inse-
 quenti die conferre; eapropter habere sibi tempus
 voluit, ad congerendum vnde posset insigniorum
 originem, vetustatèmq; explicare. Accessit ergo
 tandem cum Pacio sub brumam Aquas-Sextias: ta-
 met si gradum adeptus non est, nisi die Ianuarij in-
 sequentis anni decima octaua. Tædium fortassis pa- 1604.
 rerem, si vel per capita attingerem ea, quæ magna
 cum eruditionis testatione edisseruìt singulis illis
 actionibus, quibus est Lauream consequutus. Satis
 esto subiicere, gessisse se illum eo cum vigore animi,
 vt non totam modò coronam in admirationem ra-

1604. puerit; sed ipsi etiam Pacio visus fuerit seipsum longè superare. Biduo post, cum ornamenta Doctorica in Fratrem conferret, dici non potest qua suauitate auditores perfuderit. Scilicet ex statua quadam Metrodori cum galero suo, seu Arcadico pileo, & infulis, cumque pallio philosophico, & annulo in sinistra manu: itemque ex statuis quibusdam Hippocratis cum simili pallio, epomidèque adiuncta: ex inscriptione quadam Eubuli Marathonij, ac infulata statua non ad ceruices, sed circum caput: ex consimilibus Platonis, Theophrasti, Phaulorini, aliorum: ex cimeliis Gotthicis, in quibus mitræ pileis non admodum absimiles; ex innumeris aliis (vt breue faciam) monumentis, ostendit quemadmodum vsus eiusmodi ornamentorum ab vsque Græcis ad Latinos, & ad nos vsque transierit; quemadmodumque ex Philosophia atque vetere Sacerdotio, gradum fecerit in doctrinam, Professionemque multiplicem recentiorum Academicarum; idque citatis passim Conciliis, Patribus, Poëtis, Historicis, Philosophis, Oratoribus, quibus plenam faceret fidem.



DE VITA
PEIRESKII
LIBER SECVNDVS.

Vix iam defierat celebritas, cùm memoratum antè diploma, ne, anno maius, antiquaretur, Senatui exhibendum fuit. Id ergo exhibitum quidem, & in acta referri iussum: verùm obtinuit Peireskius, ne propterea statim admitteretur, conscribereturque reipsa in Senatorum numerum; tum quia videri noluit ex eo numero Patrum amantissimum exegisse; tum quia timuit, ne si semel astringeretur officio, sibi & libertas studiorum, & occasio peregrinandi maturè nimis præriperetur. Heinc quoniam ad amicos scribens, & occupationes doctoreas in excusationem diuturni silentij prætexens, insinuavit simul se ad Senatoriam dignitatem adigi non sponte: responsa tulit varia, congratulantibus plerisque, quòd iam inter Senatores cooptatum arbitrarentur. Ex istis fuit Scaliger, qui & dignitatem nouam commendauit, & con-

1604.

gratulatus ob lauream, subiunxit et aliàs adfuisse
 Aquis-Sextiis, testem seueri examinis, quo Academia
 vteretur. Fuit etiam, Velferus, qui non modò est ob
 dignitatem congratulatus, sed admonitionem etiam,
 adhortationemque paternam adhibuit, ac inter cæ-
 tera, *Non esse animo ipsi despondendum: munus Senato-*
rium tametsi spinosum, id tamen prima fronte duntaxat;
principium solùm molestum esse, lenire tempus cætera: ni-
hil supra vireis exactum iri; fore Numen propitium; de-
beri patriæ operam, & quædam alia in eundem sen-
sum. Sic adhortatus etiam est Pacius, statim ac re-
diit Monspelium, epistolâ nuncupatoriâ, qua Im-
perialium Institutionum Analysin ipsi dicauit; quan-
quam, quòd nosset illum nondum inter Senatores
relatum, dicauit, ac inscripsit solùm, tanquam in
supremo Prouinciæ Senatu Consiliario Regio designato.
 Non pigebit porrò hûc transcribere ipsissima, nun-
 cupationis, & adhortationis verba. Sic ergo illum
 affatus est. *Ad te verò, mi Fabrice, meas lucubrationes*
mitto. Cùm enim tu antiquis moribus præditus, à nostro
conuictu, vnà cum suauissimo fratre tuo in patriam re-
diens, vetusto more, præclara xenia, vel potiùs munera
obtuleris, quibus vestram, vestrorumque Patrum, & Pa-
tris virorum amplissimorum, & regionum in supremis Se-
natibus Consiliariorum erga me, meosque beneuolentiam
testatam reliquistis: me quoque oportuit, ne ab antiqua,
& laudatissima consuetudine discederem, aliquid inuicem
rependere, quod grati animi testimonium esset. Quid au-
tem à me proficisci potuit, quod tibi gratius esset, quàm
aliquid ex his studiis depromptum, quibus nobilissima tua
 familia

familia maximè floret? Nam pecuniâ neque tu eges, neque ego abundo: hæc verò studia amas, & colis; ac te ex nostris prælectionibus, atque exercitiis profecisse lubens fateri soles. Eximia verò laudis, quam tuo merito in doctoreo gradu assumendo es consequutus, participem me quoque esse vis, quasi nostris monitis, & præceptis adiutus, ad illud eruditionis culmen, quò multi frustrà aspirant, ascenderis. De quo tuo, optimique fratris tui nouo honore vobis ex animo gratulor; & ut iam Senatorios animos accipiat, iam in Rempublicam, qua vestram operam requirit, omneis vestras cogitationes conuertatis, publicumque bonum perpetuum vestrorum consiliorum obiectum statuatis, etiam atque etiam hortor. Hac enim re nulla vobis dignior, nulla parentibus vestris (Patrum alterum vestrum parentem agnoscitis) gratior, aut iucundior esse; nulla vos illustriores reddere potest. Hactenus Pacius; Peireskii verò animum quidem allegendi se aliquando Senatoribus non abiicit: non intermisit etiam ptorsus susceptum Iuris studium: verum dilatione obtenta, & liberioribus iam studiis, ad colendum suauiores Musas, ad promouendum bonas artis, ad adiutandum, quantum potuit, viros bene de literis merentis animum applicuit. Ac primum quidem variè sollicitatus de coniugio, cælibem vitam prætulit; ratus non posse se vxoris, succrescentisque familiæ sollicitudinem gerere, & expeditum se erga studia, virósque studiosos tueri. Heinc cum Pater, ipso inconsulto, conuenisset propè de nuptiis cum viri illustris Ioannis Ceppedæi primi Rationum Præsidis vnica filia contrahendis, veniam

1604. ardentè petiit non discedendi ab instituto. Quippe se Palladi, ac Musis nomen, fidemque ita dedisse, ut sacrilegium duceret de aliis nuptiis cogitare. Et Pinelli quidem exemplum, alta licet mente repositum, noluit Patri proponere; sed proposuit tamen exemplum Varij, quod præsens ac illustre erat; adiecitque sibi præ aliis domesticum esse coram oculis, quod se non posse, nisi cum laude imitari arbitraretur. Itaque imitatus Patruum ducere uxorem germano concessit; illéque propterea sequente ætate memoratam suprà Marchisam à Tullia duxit coniugem, ex eaque tertio anno post Filium suscepit, quem Claudius Patruus, superstes adhuc, cognominem fecit. Deinde, non admodum longè à doctoreo gradu suscepto, perlustrare placuit maritimam oram, tum ut omnia antiquitatis monumenta peruestigaret, tum ut rariores quasdam plantas per eam regionem deligeret in Belgenferianum hortum transferendas. Quòd duxerit autem initium à Foroiulienfibus antiquitatis reliquiis, circa quas sibi prima vice (discedendo nempe in Italiam) abundè factum non putabat, fuit occasio deducendi Draguinianum usque nobileis consanguineos, qui ad Doctoratus accesserant pompam. Visere autem imprimis voluit opus Romano nomine dignum, intercisam scilicet Rupem, seu excavatum amplum canalem in declivi quadam montis facie, quà Cyanci fluij scaturigo altera forum Iulium, à quinto usque Prouinciali lapide, per anfractus vallium, siluarumque fuit perducenda. Quàm multa verò toto progressu obseruârè,

collegeritque, enumerare prolixum foret: adnoto 1604.
 solum ipsum exinde cepisse ansam conscribendi,
 mittendique varia ad amicos varios. Cætera inter
 plurimi fecit Consulare quoddam numisma, quod
 dicebat insolitum, & neque Goltzio, neque Vrlino,
 neque aliis memoratum, quodque destinavit ad Pi-
 gnorium, vt cum Friderico Contareno communi-
 caret. Plurimi etiam inscriptiones quasdam Flami-
 nij, & Dudistij, de quibus supplendis (nam exesæ
 erant) cum Velfero præsertim egit. Plurimi quædam
 alia selecta, quæ misit ad Scaligerum, & ex rebus aliis
 conchas nescio quas, quarum occasione scripsit ad
 Penam Medicum de Concha anatifera mituli instar
 conformata. Sed vt de Plantis speciatim dicam, co-
 mitem adhibuit Botanicum quendam plantarum
 quouis tempore internoscendarum peritum, capro-
 pterque non solum plantas in suum hortum destina-
 uit, sed plerarumque etiam radices transmisit ad
 Clusium, ac inter cæteras Tragacanthæ, Aristolo-
 chiæ, Asphodeli, Arbuti vtriusque. Significauit au-
 tem simul desiderium, quo vellet Clusium aliquan-
 tisper Belgenferij detinere, ostensurus illi Styracem,
 seu arbutum foliis cotoneæ malo, floribus arantiæ
 non absimilem, & liquoris fragrantia nequaquam
 Syrio posthabendum. Is enim ad vnum milliare iux-
 ta oppidum itanascitur, vt aliàs frustra requiratur.
 Ostensurus etiam Lentiscum, quæ non minùs Ma-
 stichen fudet, quàm quæ in Chio insula nasci specia-
 lis dicitur. Ostensurus & alia quædam vix aliàs vs-
 quam obseruabilia. Cùm rediisset, agere cœpit de

1604. instituendo Eremitarum Camaldulensium cœnobio in egregia illa solitudine, subrupeâque Ecclesia, quæ Diuæ Mariæ de Angelis sacra, æquâ propè distantia est Massiliam inter, & Aquas-Sextias. Occasioni fuit, quòd Patauij degens eorum institutum valdè probauisset, eruditusque inter ipsos Religiosus nomine Elias, Nouitij cuiusdam causâ, Aquis-Sextiis tum versaretur. Peireskii itaque illius conuersatione delectatus, ipsum per multos menses detinuit, in solitudine sustentauit, ac sæpiùs per complureis dies commoraturus inuisit. Procurauit intereà vt ciuium tam Aquensium, quàm Massiliensium decreto id cœnobium postularetur. Licentiam quoque instituendi à Mintensi domino, in cuius ditione est locus, obtinuit, ac circumuicinum dominium, seu fundum pretio acquisiuit. Satagit quàm enixè potuit per Patauinum Episcopum, & Cardinalem Palauicinum, vt Congregationis eius Superiores non Eliam modò illeic loci relinquerent, sed religiosos etiam alios in amplissimam messem destinarent. Rogauit, vt aliquos saltem loco visendo committerent, pecuniâque intereà sumptibus faciendis necessariam misit. Et facta quidem plurima spes: sed postremò tamen irriti conatus. Sic votis etiam non respondit redintegratus pro Pacio labor. Siquidem cùm incunte vere euicisset, vt Aquenses destinarent Pacio primariam Iuris cathedram, præstituto stipendio librarum Turonicarum bis mille, & quadringentarum, proficisci ipse Monspelium cum Assessore urbis voluit, vt si quidpiam difficultatis obstete-

ret, amoliretur. Et rediit tamen re infecta; præ- 1604.
xente quidem Pacio, quòd tria librarum millia, præ-
ter occurrentia emolumenta, expeteret; sed causâ
reuerâ ab vxore datâ, quæ Catholicam urbem exo-
sa, Heidelbergensem præoptaret. Incidit verò sta-
tim in morbum, è quo vix initio æstatis conualuit.
Importuna præsertim fuit mira cutis teneritudo;
nam quacumque corporis parte tantilla fieret ve-
stium compressio, rubescens tumor cum vehementi
prurigine cooriebatur. Casus hic ansam illi præbuit
philosophandi de Maculis, quas ab vtero plerique
fortiuntur. Quippe cogitatio illum subiit fieri simi-
liter posse, vt qua parte corporis grauidæ mulieres
sefe attræctauerint, dum expetitæ cuiuspiam rei ima-
ginatione tentantur, in eadem Embryonis parte
eiusmodi rei character suboritur, exprimatúrque.
Ita non semel tetulit, ac non multis speciatim an-
nis ante obitum, cum vnâ philosopharemur de qua-
dam canis imagine intra vrinam hominis à rabido
cane demorsæ conspectæ. Ac difficultas quidem erat,
cur ille character non corpori matris, sed Embryo-
nis inureretur: sed assensit tamen Embryonem vte-
ro gestatum vnum corpus cum matre esse; eadẽ-
que specie alimenti, iisdẽque spiritibus secundum
omneis sui partẽs sic enutrirĩ, vegetarĩque, vt se-
mine ex omnibus partibus deciduo fuit primũ for-
matus. Quare & tenue corpusculum iisdẽ affici
casibus, quibus ipsum corpus maternum; ac posse
ipsi tantò facilius notam aliquam imprimi; dum,
spiritibus speciem conceptam deuchentibus, eo ma-

1604.

tris contactu veluti defigitur, quantò ipsum est mollius, ac tenerius. Memini verò id confirmatum memorabili quodam facto, quod ipsi fando accepimus; Muliere nempe grauida in oppido huius Prouinciæ Cipperiis dicto, ante annos circiter sexaginta, pugione confossa, eductum fuisse ex ea Embryonem cum totidem notis liuescentibus, & ad easdem partibus conspicuis, in quibus mater fuerat percussa. Quòd autem, dum illæ fructuum species, cerasa, fraga, aliæque rubescunt, impressi quoque characteres viuidiore rubore sint, causam dici posse affectionem aëris secundum eandem tempestatem similibus spiritibus concitandis idoneam, vt dum vitibus florescentibus vinum in doliis commouetur; sed non est quorsum ea de re vberius quidpiam heic proferatur. Repeto potiùs Peireskium balneorum vsu conualuisse (sanguine putà temperato, perspirabileque facto corpore) ac magno fuisse leuamento, quòd iucundissimam intereà familiaritatem duplicem parauit. Altera fuit cum nobili Francisco Villanouano Flayosci Barone, & Marchionis Transij germano, qui linguæ Græcæ, omnigenæque historię callentissimus, quicquid penèrat in tota Prouincia monumentorum vetustatis perspectum ad vnguem habebat. Altera cum celebri viro Francisco Malherbio, qui deinceps habitus fuit Gallicæ linguæ arbiter, & Poëseos facilè princeps. Inuisebat enim vterque; & cum priorem quidem ipsi patria communis, ac studium earundem rerum conciliasset, posteriorem illi quæsiuit commendatio Va-

rij, clarumque in Prouincia nomen, ex quo tempore fuerat memorato magno Franciæ Priori à Secretis. Heinc proinde cœpit Peireskius Malherbij poemata cognoscere, suspicere, apud exteros commendare. Siquidem cum mense Septembri illa memorabilis Ostendæ obsidio exitum habuisset, pulchraque illa carmina, *Area Parua ducum*, &c. fuissent Gallieis versibus non modò à Vario, sed à Malherbio etiam expressa, misit illicò cum ad alios, tum ad ipsum Scaligerum, quem Latinorum carminum arbitrabatur esse auctorem. Taceo autem ut Scaliger ad ipsum rescripserit auctorem esse Hugonem Grotium, adolescentem lectissimum; puellas verò ex Helicone se, ut senescentem, pridem auersatas; ex quo etiam se excusauit, quòd versus ab eo pro Pinello expetitos non mitteret. Diuersatus per Autumnum Belgenferij, spectauit Rarum illum concursum trium superiorum Planetarum, qui nonnisi anno quoque octingentesimo contingit, & Magna, seu Maxima potius, Coniunctio meritò vocatur. Et mirabile quidem fuit nasci in eo conuentu Stellam magnitudine Iouem æmulatam, quæ supra annum in eodem Serpentarij pede sic perseuerauerit, ut perseuerauerat alia in sidere Cassiopeiæ ante annos triginta duos, & alia rursus ante triennium in constellatione Cyeni. Verum quia tum Peireskio cœlestis globus non aderat, quò fieret certior de siderum non errantium nomenclatura; ideo facilè credidit Nouam illam stellam ex antiquis esse, ac potissimum videns ipsam non, ut Planetas circumstan-

1604. teis, obtusi esse luminis, sed fixarum instar mirè
 scintillare. Acceptis post aliquot menseis à Pigno-
 rio literis, didicit Stellam esse recentem, ac obserua-
 ri à Galileo; idque cùm iam ex vespertino in matuti-
 num situm transiisset: at quia in morbum incidit,
 1605. quò initio veris multùm laboravit, cùm simul quo-
 que agrotarent Pater, Frater, Patruus, Nouerca, &
 domesticorum nonnulli, idcirco sibi à studio eam
 obseruandi temperauit. Ne memorem, cùm voluit
 postea ad illas parteis respicere, stellam sic fuisse iam
 imminutam, vt fixis circumstantibus, perpetuisque
 nihilo maior, ac vna earum credita, euaniisse iudi-
 caretur. Posterioribus tamen annis dolere satis non
 poterat, quòd ad tam rarum spectaculum suis ob-
 uium temporibus studiosè magis non attendisset.
 Per ea tempora cùm Massilià Belgenferium conten-
 deret, transire Castelleto voluit, vt Parochum loci
 nomine Iulianum, ob ingenuam curiositatem sibi
 iam carum, saluaret. Cùm ab ipso aliquantisper ex-
 tra vicum deduceretur, occurrit illis Mulio floridum
 ramum ex Myrto gestans, latifolium, & flore pleno,
 qualem Peireskii neque viderat, neque inaudierat
 exstare. Itaque ratam miratus Plantam, perducere vo-
 luit in mediam siluam, vbi enata fuerat, ac trans-
 ferri ipsam curauit, vt excoleretur, propagaretur-
 que. Transferri autem noluit in Belgenferianum
 hortum, quoniam non aderat qui illam satis dili-
 genter curaret; sed in hortum potius ipsius Iuliani,
 cuius futurum circa ipsam exquisitum studium con-
 fidit. Et excoluit ille sanè, vt par fuit, quosque ex
 planta

planta manente incolumi, propagatio fieri Belgen- 1605.
 scrij potuit. Id attingere visum est, quia nusquam
 in tota Europa Myrtus pleno flore fuerat agnita; ac
 debetur Peireskio, quòd iam in hortis Regiis, quòd
 Romæ, quòd in Belgio, quòd alibi gentium visa-
 tur. Prætereo ipsi quoque deberi Fungum Coral-
 loidem dictum, de quo cùm Clusius rescriberet,
mentionem, inquit, faciam in auctario ad Exotico-
rum Historiam, quam spero breui publici iuris facere,
Fungi cognitionem tibi acceptam relaturus. Hec non-
 dum dixi Varium tantoperè fuisse illius consuetu-
 dine delectatum, vt donec fuit Aquis-Sextiis, con-
 tinenter penè habere commensalem voluerit. Quin
 habere etiam voluit peregrinationes, rusticationes-
 que cum illo communis; & cùm sub Iulij initium
 profectus est Massiliam, vt Carolum Neouillam
 Alincurium Ex-legatum Regium Roma redeun-
 tem inuiseret, illum comitem in via facundum con-
 salutaturn deduxit. Cùm destinaret autem pergere
 Parisios, insinuauit ipsi an-non vellet Urbem, au-
 lāmque cognoscere. Ipse nihil quidem sibi esse ma-
 gis in votis professus est, & maximè in tanti viri
 augustissimo comitatu: at obstare dixit volunta-
 tem Patruī, qui paratum aliās negotiorum causā
 cò discedere, id abnuisset, prætulissetque Fratrem
 proximè discessurum. Scilicet in Regis consilio
 tum agitabatur negotium circa solutionem Tallia-
 rum, vt vocant, ad quam Riantienfes contende-
 bant ratione fundorum quorundam Reginaldum
 Patrem teneri. Enimuero Varius sese curaturum

recepit, ut ipse potius destinaretur, réque ipsa Patruo persuasit tenerum nimis esse affectum, iniuriámque esse, non benevolentiam, arcere tantam indolem à consummatione virtutis. Itaque Patruo, propter viri auctoritatem, consentiente (nam Pater alioquin votis filij numquam apertè repugnauit) dedit sese Peireskii in comitatum Varij, Augusti mensis initio, annóque huius sæculi quinto. Incredibile autem dictu quàm citò Parisiis inclaruerit, partim virtutis propriæ, partim Varij commendatione. Primus, quem gestiit salutare, Augustus ille Thuanus fuit, tum ut ob summam humanitatem, ageret coràm gratias; tum ut ab illo acciperet, si à Scaligero quid haberet. Quantâ verò lætitiâ exceptus ab eo fuerit, exprimi non posse ipsemet narrauit. Aperta nimirum statim Bibliotheca tum priuata, tum Regia; apertum quicquid monumentorum ad contexendum historiam asseruabat in scriniis; apertum cor, & viscera sinceritatis miræ profusa. Ipse, tum plura edocuit, quæ ille de viris in Italia eruditis expetiit; tum, quia nonnihil desiderabatur ad conscribendum eorum elogia, recepit se per literas ex amicis consequuturum. Cùm iteratò illum inuisit, accessit illicò fuit Isaacus Casaubonus, cui sub Thuano commissæ erat Bibliothecæ Regiæ custodia. Is à primo statim congressu, nescias an magis suspexerit, an amauerit illum magis. Nimirum tam multa accepit, edoctusque ab eo fuit, ut nec publicè, nec priuatim per familiareis lite-

ras tacere id potuerit. Nam primùm quidem edens 1603.
 Notas ad Epistolam Gregorij Nysseni, quæ est ad
 Eustathiam, Ambrosiam, & Basilissam, meminit
 nummi ærei Rogerij Regis Siciliae, quem, inquit,
inter multos Arabicè inscriptos, cum variis figuris di-
uersorum Principum nobis ostendit Fabricius de Petris-
co Senator Aquì-Sextiensis, vir eruditissimus. Deinde,
 cùm Peireskius illi detexisset errores apud Vrsi-
 num, & Goltzium, qui Iacobo Stradæ, potius
 quàm numismatibus fidentes, corruperant varia
 ex gentilitiis nominibus aliquorum Imperatorum,
 inter triginta Tyrannos sub Gallieno recensito-
 rum, ac nominatim MARCI PIAVONII VI-
 CTORINI, ET LVCII ÆLIANI, (ex
 quibus illi MARCVM AVRELIVM, VICTO-
 RINVM, & SPVRIVM SERVILIVM LOL-
 LIANVM, contra fidem numismatum, quæ ipse
 ostendit, commenti immeritò fuerant) Casaubo-
 nus gratias amplissimas egit, ac pergens, Oro te,
 inquit, per amicitiam nostram nuperam, sed antiquis-
 simam, si per te licet; oro te, inquam, quæ habes eius
 generis mihi communices. Omninò quam ingrederis viam
 illustrandi eas tenebras, certissima est, & unica. Ex-
 pectabo magna aviditate quæ supra huiusmodi *ἑξαπο-*
στολικῆς magnus Scaliger observauerit: sed auguror etiam
 post illius messem tuo spicilegio fore locum. Est enim
 cuiusdam felicitatis incidisse in eos nummos, qui in
 illa caligine lucem tibi affulserunt. Sed ne sum proli-
 xus, excerpo duntaxat quæ in hæc verba ad illum
 scripsit, vno, alteròve post anno. Deum precor, ut


1605. tanto Musarum Patrono omnia lata , ac fausta largiri
 velit. *A* te autem peto , ut qui semel tua beneuolen-
 tia me dignum iudicasti , etiam porro eandem mihi im-
 pertiaris , hoc est , rogatus facias , quod ultro cœpisti.
 Ego me tibi & debere iam multa sentio , & debitu-
 rum etiam plura non despero , si tibi dabitur aliqua oc-
 casio de studiis nostris benè merendi. Nescio an rescue-
 ris missum ad me fuisse à Serenissimo Duce *Urbinati*
Codicem Polybij , cuius tu mihi index fuisti : itaque tibi
 cum-primis id beneficium debeo , &c. Notum , ac in-
 ter eruditos celebrem virum heic refero , ut ex eo
 iudicium de cæteris facias. Nam quid memorem
Frontonem Ducæum , *Papyrium Massonum* , &
 nonnullos alios , quibus salutem per ipsum dici à
M. Velfero fuerat expetitur ? Quid *Nicolaum Fa-*
brum , *Iacobum Bongarsium* , *Scæuolam* , & *Lu-*
douicum San-Marthanos fratres , *Franciscum Pi-*
thæum Petri germanum , & alios penè innume-
 ros , quibuscum ex eo tempore familiaritatem con-
 traxit ? Dicere præstat nullam fuisse Bibliothecam
 celebrem , quam euolutam non fecerit , ac præter
 memoratas quidem , *San-Victorianam* potissimum ,
 in qua referebat se , cum multa alia , tum specia-
 tim vidisse omnia *Puellæ Aurelianensis* acta , vindi-
 ciâsque , & effigiem , contexto ex iis magno Co-
 dice , iussu *Abbatis* contemporanei. Sic & com-
 plura meminerat , quæ obseruârat in priuatis , ac
 nominatim *Ioannis Iacobi Memmij Roissij* , viri in-
 dole generosa , & tam virtute propria , quàm ge-
 nere , & prole illustris , qui etiamnum viuit foelici

senecta princeps Comitum consistorianorum. Itém-
 que Renati Poterij Episcopi Bellouacensis, quem
 predicare solitus erat rarâ doctrinâ spectabilem.
 Ac rursus Pauli Petauij Senatoris summè laudati,
 cuius commendabat quidem supra mille MSS.
 codices: sed faciebat tamen Cimeliarchium pluris.
 Cùm ipsum autem videretur esse cumulatissimum;
 voluit tamen sponte augere variis Regum numis-
 matis tam primæ, quàm secundæ Stirpis. Dedit
 nempe quædam, in quibus nomina Regum lege-
 rentur, v. g. Clotarij coronâ gemmeâ redimiti,
 (Constantini scilicet more, qui pro laurea gem-
 meam vsurpauerat) quædam in quibus Comitum, sub
 quibus numi fuere cusi, vt *FILAPARII* Rhemen-
 sis, cum inscriptione *REMVVS FIT*. Pari ratione
 commendabat Francisci Oliuarij Fontanæi cimelia,
 ac libros. Ex Cimeliarchio autem Regio, cui Ba-
 garrius iam præerat, æquum sanè fuit nihil ipsum
 latere. Probauit porrò consilium, quo Francisci Pe-
 rerij nobilis Aquensis promptuarium præclaris ci-
 meliis instructissimum transferendum in illud erat:
 quippe multa adhuc deesse agnouit, vt dignum
 Regio nomine meritò existimaretur. Quia verò in-
 ter cætera Bagarrius illi ostendit Amethystum per-
 elegantem, in qua cælatus Solonis vultus celebris
 illius Dioscoridis Augusti cælatoris manu; ideò ce-
 pit ansam edocendi ipsum quidnam sibi vellent fo-
 ramina in Inscriptione, quam ostendit, obser-
 uata hac serie,


1605.



Edisseruit enim esse forulos, in quos fuissent inserti clavi continentes Græcas ex metallo literas, quæ cælatoris illius, seu ΔΙΟΚΚΟΥΡΙΑΟΥ exprimerent nomen: sed ordine retrogrado, ut proprium est cælaturarum. Id autem manifestum fecit, ubi depictis in alba charta, uti mox est factum, foraminulis, lineas interduxit, quæ eas literas in hunc modum exprimerent,



Sic se interpretatum dixit foramina quædam, quæ visebantur Assisij in antiquo nescio quo Templo. Cum enim nemo dicere posset ecquid illa significarent, diuinavit ipse inscriptionem esse, seu dedicationem factam I O V I O P T. M A X. idque demonstravit per lineas foramina sic connectenteis.



Sic speravit se interpretaturum seriem quandam foraminum Nemausensis Basilicæ, quam Quadratam Domum appellant, ubi cætypum obtinisset. Sed

Parisijs vt regrediamur , vix publicum vllum monumentum fuit, quod in examen non reuocârit, de quo iudicium non tulerit. Quippe altero statim mense, ex quo in eam urbem accessit, literas dedit ad Flayofceum, quibus scripsit se nondum quidem monumenta priscorum Regum San-Dionysiana inuississe: sed iam tamen falsi conuicisse Tumulos constructos tum Clodouæo ad Sanctam Genouesam, tum Chilperico, & quibusdam aliis ad Sanctum Germanum. Et paucis post diebus, cum eos expendisset, qui ad Sanctum Dionysium, Nihil potui comperire, inquit, quod ante Diui Ludouici tempora satisfecerit; existimóque omneis illos antiquissimos tumulos tempore eodem, nec multò ante D. Ludouicum constructos. Qui autem placuit maxime, is est nostratis Margaretæ, sororis nimirum Beatricis primogenitæ, S. Ludouici vxoris. Denique commendans vetera sigilla, quæ coràm inspexit, cætypisque expressa tulit, ex Archiuis Abbatiarum S. Dionysij, S. Germani, S. Mauri, & cæterarum, vt in quibus continerentur germanæ effigies Karoli Magni, Hludouici Pij, Hlotarij Imperatoris, Pipini Regis Aquitaniæ, Karoli Calui, Karoli Simplicis, aliorumque Regum ex secunda stirpe, Hæc sanè, inquit, satis refellunt tumulósque, & statuas hisce Principibus confectas ante quadringentos, aut quingentos annos. Nihil non adiiciendum esset circa aliarum rerum studia: quoniam nihil exstare accepit ex mirabilibus seu artis, seu naturæ operibus, quod non studiosè spectauerit, veluti ædificia, opificia, machi-

1605. nas, plantas, animalia, fossilia, omnia denique ob-
 seruatu digna. Hæc inter, varia officia quæ propè,
 quæ procul literatis exhibuit; & cùm anxie requisi-
 uisset ex Paulo Seruita, ex Scaligero, ex Casaubono,
 ex eruditis aliis ecquid nouissent de Iuueno Calio
 Callano Dalmata, cuius Codicem MS. de Attilæ vi-
 ta Venetiis absportauerat; is, vt ederetur, animum
 1606. applicuit. Anni sequentis ineunte vere, ac breui in
 Prouinciam redituro Vario, non multo labore ob-
 tinuit, vt liceret sibi inuisere Angliam, comitatus
 præsertim virum illustrem Antonium Boderium Re-
 gium Oratorem illò destinatum. Neque id modò
 Varius est passus, sed laudato proposito (in quod
 etiam conspirârunt Thuanus, Memmius, Mericus
 Vicus, amici alij) recepit sese curaturum, vt Pater,
 Patruusque factum comprobarent. Discedentem
 voluit Peireskii Aureliam vsque deducere; vnde
 priusquàm regrederetur, spectauit attentius tum
 prisca Ecclesiæ S. Crucis vestigia, quæ vetustatis esse
 duxit mille, vt minimùm, annorum: tum præter alias
 statuas, imaginésque tam Karoli Septimi, quàm
 Ioannæ puellæ, videre eas voluit, quæ in Mu-
 nicipali Curia asseruari perhibebantur; sensitque
 speciatim effigiem, qua Rex est depictus cum barba,
 & San-Michaëliano torque, non esse vndequaue fi-
 dam. Inibat porrò iam mensis Maius, cùm disceden-
 te Boderio, ipse paucis diebus retardatus fuit, coactus
 veredis postea subsequi, vt Caleti assequeretur. Cùm
 soluissent, perpauci fuere ex vniuerso comitatu, qui-
 bus ex naus agitatione, halitûque maris stomachus
 non

non fuerit submotus. Peireskius, cùm id præcaueret, cæteris relictis, ad malum confedit, vbi & melius habuit. Causâ requisitâ, respondit agitationem minimam illa in parte fieri; quamobrem se eò declinasse, ne nauicaret, vt cæteri, qui longè magis, tam ad proram, quàm ad puppim agitarentur. Appulsus in Angliam, ac postquàm præeunte Oratore Iacobum Regem salutauit, carus ipsi habitus est, accersitusque ab eo non semel. Admissus est etiam in conclaue, seditque inter primores Comites in solemnino quodam Conuentu per ea tempora celebrato. Ad viros doctos quod attinet, quos seu Londini, seu Oxonij, seu aliis in locis conuênit, primus fuit ille de sua Britannia benè meritus Guillelmus Camdenus, apud quem cùm aliquando sermo incidisset de antiquitate Britannicæ linguæ, ad quam Aremorica spectat, & præsentem Doctorem Tato, post rogatas circa complureis variarum Galliarum regionum voces, requisisset etiam quid Arelate, quid Tolonum significarent, responsum tulit, Arelatem eâ linguâ dici ciuitatem in vliginoso loco constitutam; & Tolonum citharam, fortè ob vicinum promontorium, cui Citharistes nomen fuit. Accepit & id genus alia, ex quibus penè deductus fuit in Strabonis, Taciti, aliorumque sententiam, qui scripserunt Gallos, & Britannos eadem primitus lingua vsos. Alter fuit Robertus Cottonus; inter curiosos, optimèque animatos conspicuus. Deinde tam Iacobus Collius, quàm illius socer Matthias Lobellius, regius Botanographus, quem vtrumque deuinctum voluit. Post-

1606. cā Albericus Gentilis, Henricus Sauilius, Ioannes Nordenus, & plerique alij. Non tacendus verò eruditus tum iuuenis Ioannes Barclaius, quem quanta beneuolentia prosequutus fuerit, intelligetur inferius. Dolere autem solebat non agnitos sibi nec Gulielmum Gilbertum auctorem libri de Magnete, nec Thomam Lydiatum celebrem Mathematicum. Non heic memorabo Bibliothecas varias, in quibus rariores libros obseruauit; non Musæa, in quibus uidit, & ex quibus comparauit quicquid pretiosum licuit. Magni verò ducebat præ cæteris gemmam, centum & quinquaginta libris Turonicis emptam, propter cælatum Aëtionem cum Tiara Phrygia, quem Patrem Andromaches Hæctoris vxoris argumentabatur. Referam solùm, quia maturius, quam concepta spes, discedere voluit, idcò maximum fuisse factum ipsius desiderium, & in familia Oratoris, & apud eruditos viros, qui cum postea variè ipsius meminerint, sufficiet heic excerpere quod memoratus Camdenus habet in descriptione Britanniae, cum de numismatibus ad rem suam pertinentibus verba facit. *Cuiusmodi, inquit, non alibi effossa hætenus audiui, priusquam nuperrimè nobilissimus, & in re nummorum antiquaria longè doctissimus, & perspicacissimus Nicolaus Faber Petriscius eiusmodi in Gallia reperta mihi ostendit. Et commoratus quidem fuisset nonnihil ampliùs in Anglia: sed quia treis duntaxat mensibus se abfuturum promiserat, idcò post mensem discessit in Hollandiam, quam ab vsque initio (sed planè tamen tacitus) constituerat perlustrare. Quo*

discessurus tempore fuit, adiungere se illi voluit nobilis turba iuuenum, qui ipsi quoque fuerant ex Gallia Boderium sequuti. Verùm illi quidem ad arma, aliáque studia diuerterunt; ipse perrexit requirere eruditos præsertim viros. Ac salutauit quidem primùm quos Middelburgi, Dordraci, Roterodami, Delphis, Hagæ celebrari acceperat: sed id tamen tum in transcurso solùm, quoniam præcipua illi cura inuisendi Scaligerum Lugduni Batauorum degentem. Constituerat cum ipso primùm quasi ignotus colloqui: quamobrem nomine mutato epistolam commendatitiam, quasi à Peireskio conscriptam, missamque illi obtulit. Scaliger autem eâ perlectâ, ipsum est humanissimè in Peireskij gratiam complexus. Post multos consertos sermones, & productos obiter libros, voluit Peireskius ex nescio quo paucas lineas exscribere: vbi verò ille chartam, calamumque exhibuit, ac inter dictandum primas lineas characterem vidit, & *ιστορικειαν* agnouit, tum in amplexus proruens, gratiosissimè conquestus est fraudem. Cùm deinceps variis de rebus colloquerentur suauissimè, Scaliger inter cætera declarauit velle se quidem iteratò procurare editionem Eusebij (nempe non planè arridebat quæ iam tum primùm absoluebatur) itémque paterni in Aristotelem de Animalibus commentarij: sed esse tamen animum redeundi postea in Galliam, & apponendi ossa sua Iulij parentis ossibus. Cùm excepisset autem Peireskius non esse illum igitur *ερεγδοξον* moriturum, illacrymatus Scaliger verbum ea de re non

1606. adiecit. Interpretatus illi Peireskii numismata varia, ac præsertim Siclos, donatus est, inuitus licet, singulari Semisclo, cuius ille præ cæteris interpretationem fuerat demiratus. Donauit ipse multa vicissim, & quod fuit illi iucundissimum, exhibuit, quam detulerat, expectatam ichnographiam, cum inscriptis carminibus sepulcrorum Scaligeranorum. Scilicet eam demùm superiore Martio Veronâ obtinuerat, nec pluribus literis datis habere prius potuerat, ob varios morbos Nichezolæ, & quod Syluius Donius, qui illam aggressus primus fuerat, inter perficiendum obiisset. Vnum, de quo Peireskii auebat interrogare Scaligerum, & non est tamen vnquam ausus, ne rem molestam faceret, fuit opus illud Cyclometricum, seu de Circuli quadratura ante duodecim annos in lucem emissum, ac statim à Francisco Vieta, Adriano Romano (postea quoque à Christophoro Clauio, hominum Societatis IESV γεωμετρικὰ στοιχεῖα) aliisque in eo puluere exercitatissimis erroris conuictum. Nimirum præmonitus fuit non posse illi eam camarinam sine quadam bile moueri. Quod attinet verò ad Genealogiam, non professus est quidem se subdubitare an reuerâ attineret ad Veronenses Principes, quorum stirpem ille in se desitutam asseuerabat: sed paullò tamen liberius, & quasi vellet quid cæteris responderetur, accipere; proposuit ipsi quæ à Scioppio, Guilandino, aliisque fuere obiecta. Post Scaligerum cura fuit inuifendi Karolum Clusium, quem octogenario maiorem podagra tum primùm tentabat, vt & primùm Scaligerum exer-

cuerat , ante paucos menseis. Deprehendit autem 1606.
imprimi curantem in Appendice altera exoticarum
plantarum figuram Fungi Coralloidis , quem ad il-
lum ex Prouincia , cum aliis penè innumeris planta-
rum , radicum , seminúmque generibus transmiserat.
Commodùm etiam illum admonuît circa Indicas
quasdam plantas , in quibus describendis errasset , &
quasdam , de quibus nihil audiisset , idque prolatis
commentariis iuxta ostensos sibi Parisiis à Vespasiano
Robino fructus. Inuisit quoq; post Clusium , præcipua
Academiæ lumina , ac speciatim iniiit amicitiam cum
Bonauentura Vulcanio , qui circa Procopij versio-
nem tum occupabatur ; cum Dominico Baudio , qui
ad peritiam historiæ adiciebat poëseos elegantiam ,
& cum nonnullis aliis. Dolere verò solitus fuit ,
quòd per ea tempora abfuiſſet Lugduno Daniel
Heinsius , quem non semel audierat à Scaligero com-
mendari. Fuit deinceps Amsterodami ; vbi fatiari
vix potuit interrogando , & cognoscendo tam mul-
ta præclara , & rara , quæ ex vtraque India in id
emporium conuehuntur. Fuit Enculæ , vt spectaret
illeic celebre illud Bernardi Paludani Cimeliarchium ,
in quo non ægrè tulisset , tanquam ad Cyaneos sco-
pulos consenescere. Redeundo , nonnihil Hagæ
commoratus , discedere noluit , quin priùs agnouis-
set Hugonem Grotium , quem , tametsi adolescen-
tem , eruditio planè matura , ac omnigena com-
mendabat. Diuertit verò Scheuelingam , vt explo-
raret vegetationem , & velocitatem Currus eâ solertiâ
à paucis annis excogitati , vt passis velis in littore

1606. nauigij instar euolaret. Inaudierat nempe Comitē Mauritium post Neoportuensē victoriā experiundi grātiā illum conscendisse, vnā cum capto in praelio Francisco Mendoza, ac intra duas horas attingisse oppidum Puttenum, quod inter, atque Schevelingam horaria milliaria quatuordecim intercipiuntur. Quare ipse quoque experiri voluit, commemorareque solebat stuporem, quo correptus fuerat, cum vento translatus citatissimo, non persentisceret tamen (nempe tam citus erat, quā ventus) cūque animaduerneret scrobeis occurrenteis præteruolari; restagnantes passim aquas superficie tenus duntaxat attingi; qui antecedeabant cursores visos quasi retrorsum niti; quæ distantissima apparebant, momento penè præteruehi; & quædam id genus similia. Delphis iucundè exceptus fuit ab Abrahamo Goriæo, quem fortè offendit cæleri curantem Græca quædam numismata, quorum aliquot miserat Parisiis, oblatis prius ad vsque mille, quæ ex Italia adduxerat. Satagebat nempe Goriæus complere illa Paralipomena antiquorum numismatum, quæ promiserat in Dactyliotheca; quare & commisit Peireskio descriptionem breui prælo subiiciendam, vt pro suo candore eam expenderet, &, quā opus foret, duceret lituras: ipse autem morem bona fide gessit, correxitque potissimum nescio quid scriptum circa Traianum. Quo loco narrare solebat rem memoratu non indignam, nempe Goriæum, cū aliās Latinæ linguæ non studuisset, intellexisse tamē libros omneis circa rem nummariam Latine conscriptos;

eodem modo, quo Forcatulus omncis circa rem Mathematicam : tantum valet improbus labor ex desiderio quidpiam noscendi vehementissimo profectus. Vidit etiam Delphis superstitem adhuc Religiosam quandam ex eo tempore, quo Hollandi à Catholico-Romana religione defeecerant ; viso prius Vltraiecti Canonico in primæua sua professione viuere permissio. Cùmque suspexisset non modò quicquid antiquissimorum ad conclusa illa Rheni ostia monumentorum superest ; sed etiam quicquid dominatio Burgundionum Ducum expressum reliquit ; tum miratus maximè est , maximoperèque laudauit temperasse sibi Hollandos ab euerfione Templorum, & asseruasse intactos Choros, cum affixis insignibus Equitum aurei velleris à Philippo vsque Bono instituti. Cæterum redire voluît per Brabantiam , Flandriam , reliquasque Belgij Prouincias , impetratis prius ab Hollandis , & ab Archiduce liberî com meatus libellis. Accessit autem primùm Antuerpiam circiter finem Iulij , inistque ibi amicitiam cum Andrea Schotto , & Carolo Scribanio ex Societate IESV viris eruditis : itémque cum Auberto Miræo, Ecclesiæ Decano, rerum Belgicarum, ac totius Historiæ Ecclesiasticæ eximiè perito ; & cum Nicolao Roccioxio rei antiquariæ impensè studioso ; & cum Henrico Sedulio auctore vitæ B. Elziarij. Cùm deinceps Machliniâ peruenisset Louanium, nihil æquè doluit, ac non fuisse ampliùs in viuus Iustum Lipsium , præclarum illud bonarum literarum lumen ante paucos menses extinctum. Sperârat enim sese

1606.

illum non minùs, quàm Scaligerum omnibus officiis breui deuincturum. Doluit pariter non adesse per eos dies Adrianum Romanum Mathematicum illum celebrem, quem gestierat summoperè cum Scaligero conciliare. Postquàm inuisit Academiam, doctòsque, qui in illa viros, visere voluit apud vi-
duam Medici cuiusdam cornutos duos lepores, qui ex Noruegia dicebantur allati. Et quia reperit mortuum alterum, obtinere quouis pretio & illius cornua, & geminorum iconismum voluit. Bruxellæ amicitiam iniiit cum Karolo Bromantio, Comite Brouæ, & quibusdam aliis; at suspexit potissimùm celebrem Pictorem Venceslaum Cobergeum, qui tum habebat præ manibus insigne opus quadripartitum de Architectura, de Pictura, scripturæque antiqua, de Deorum imaginibus, de Numismatis, seu mauis Medaliis, aut metallicis æneis à Iulio Cæsare ad Gallienum vsque. Memorabat porrò varios circa parteis singulas confertos cum illo sermones, maxime autem circa postremam, propter Cobergei opinionem, quòd Medalia huiusmodi monetales esse non possent; argumento præcipuo, quòd typus seu forma, qua ferirentur, signarenturque, elaborari non posset ante duos menses ab artifice; adeò vt, cum plures ducentis percuti eodem typo non possent, pretium operæ fuisset longè superaturum monetæ valorem. De colloquio, memini solùm obiecisse Peireskium, vsurpatam fuisse Seruorum industriam, quæ pretio non redimeretur; & excepisse Cobergeum, rem peractam fuisse cum Serui edicto

edicto prohiberentur non modò quidpiam pingere, 1606.
 sed pingendi etiam addiscere artem. Bruxella discess-
 furus, scripsit ad Cottonum epistolam pereruditam,
 misitque simul cętypos variorum nummorum, ac
 nominatim Commodi, ob inusitatam scripturam
 vocis BRITANIA, per duplex TT, & simplex
 N. Salutare voluit exinde Gandavi Laurentium
 Deebronium, quem in Italia nouerat. Insulis Flo-
 rentium Nallæum, eruditum Canonicum, antiqui-
 tatum Liturgicarum auctorem. Tornaci Dionysium
 Willerium Canonicum, & Cancellarium, ac Hiero-
 nymum Winghemium similiter Canonicum; il-
 lum rerum antiquarum instructissimum, istum stu-
 diosissimum rariorum Plantarum. Duaci Guillel-
 mum Richardotum Ioannis Præsidis filium, quicum
 ex vsque Italia colebat amicitiam; & Andream Ho-
 ium Professorem Græcum, abs quo memorante ac-
 cepi quàm iucundè suauissimis Peireskij, ac Richar-
 doti confabulationibus tertius interfuisset. Enim ve-
 rò præ cæteris referendus hoc loco est eximius Prin-
 cepts Karolus dux Croius, & Arschoranus, qui ipsum
 totis decem diebus in celebri domo Bellimontana de-
 tinuit, continuò spectantem vt innumera, ita rarif-
 sima cimelia, ditissimásque metallothecas, quibus
 curiosissimus, eruditissimúsque ille exornauerat no-
 bilissimum Musæum. Quin discedentem etiam coë-
 git absportare omnia, quæ habebat antiquorum
 Galliæ Regum tam aurea, quàm argentea numisma-
 ta; itémque ex Græcis ad vsque sexaginta; præter
 aliquot vascula, ponderaque, & mensuras antiquas;

1606. cùm tamen nihil aliud à Peiresckio accipere voluerit, quàm æreum nummum Ioannis illius, qui Theodosij, ac Placidij Valentiniani temporibus arripuit Imperium. Quo loco venit in mentem, aduexisse illum ex Flandria numismata Gallorum Regum, ex prima quidem Stirpe quadraginta aurea, præter varia argentea; & ex secunda quinquaginta argentea, præter vnum aureum Ludouici Pij, quod æstimabat maximi, quoniam non modò rarissimum, sed etiam parùm aberat, quin singulare arbitraretur. Instabat tum tempus, quo perhibebatur celeberrime fore cæremonias ad Fontem-bellaqueum, in Delphini Principis, hoc est Regis Franciæ Primogeniti, baptismo. Videlicet illius sponsor dicebatur Pontifex Summus, ac nomine Pontificis Masseus Barberinus Nuncius. Quamobrem sub Augusti finem discessit ex Belgio, ac satis tempori adueniens solemni pompæ interfuit, quæ peracta est die mensis sequentis vigesima quarta. Renuntiatum interea est obiisse domi Nouercam, expectarique eius reditum variis rebus componendis. Quocirca amicis quàm coram, quàm per literas salutatis, regressus in Prouinciam est sub initium alterius mensis. Domi exceptus non abnuitt consilium, quod Pater, Fraterque potissimum sumpserant (nam Patruus nonnihil repugnarat) coëmendi ipsam Riantij Baroniam, cuius quia Valauesum erat subclientelare prædium, idcirco fuerat litigiorum bene multorum seminarium. Hinc ipsemet curam assumpsit paciscendi, contrahendique cum Ludouico Grollæo Medullioneo Marchione Brissiaci, eamque ob caus-

1607.
sam in Delphinatum versus illum profectus est, rediitque confecta re, sub initium sequentis anni, qui fuit salutis millesimus sexcentismus septimus. Cum rediit, multis quidem rebus præclaris incubuit, sed nulli iucundiùs, quàm procurandæ multiplici vestigiorum vrbs, portusque Carthaginienſis descriptioni. Nimirum non alia ratione summos Auctores intelligi, conciliarique posse putauit; cogitauitque ea re gratificari Casaubono, quicum de Portus præsertim situ, formaque differuerat, neque illius tamen dubiis nouerat esse factum satis. Scripsit præterea copiosè ad Alardum Compendiensem Canonicum circa rem monetariam, ac inter cætera, de usu Aurei Solidi in Gallia ad tertiæ usque Stirpis initium, ostendendo viginti duos huiuscemodi solidos pependisse integram libram (tametsi quam vocant monetalem libram ex viginti solùm constaret) ac demonstrando Solidum non semper pro duodecim tantum denariis argenteis oblocatum fuisse, sed nonnunquam pro pluribus, etiam ad usque quadraginta. Inuasit illum interea morbus oculorum molestissimus, à quo medio vere vix fuit liberatus. Cœpit tunc illum Patruus vehementer exstimulare, ut sese ad adipiscendum destinatam pridem Senatoriam dignitatem compararet. Ingrauescebat enim valetudo, infestabantque maximè articulorum dolores, quibus leniendis statuerat ad balnea nostra Dinienſia ante æstatem accedere: sed timens ne quid fortè sibi humanitùs contingeret, constituerat simul ex vrbe non antè decedere, quàm Nepotem coopta-

1607. tum inter Senatores vidisset. Et necessebat is quidem semper quàm gratosè poterat, moras; sed ipsum die quadam, tacito consilio, deduxit ad Varium, ut iuberetur illius ore sese necessario examini subiacere, Senatuque aggregare. Tum ratus Peireskii nihil ampliùs cunctandum, postulauit solùm octiduum, ut rem maturiùs aggredieretur. Medius erat Iunius, imminébátque anniuersarium, trimestréque Curia Parlamenti iustitium: quocirca festinandum fuit, cum examinari, approbarique, nisi pro Comitibus curiatis, non posset. Itaque paratus accessit, seseque probauit conuocatis Classibus ad vi. Kalendas Quintileis. Proposita ipsi Lex fuerat ex sexto libro Codicis, qua Gordianus sanxit ab eo, qui neque legatum, neque fidei-commissum, neque hæreditatem, vel mortis causâ donationem accepit, nihil posse per fideicommissum relinqui. Eam porro cum exponeret, oblitus non fuit, quod à Valerio, & Sallustio de Scipionis Æmiliani facinore proditum est, qui à Masinissa Numidiæ Rege sibi coniunctissimo totius Regni hæres testamento nuncupatus, enixéque rogatus, ut ipsum inter quinquaginta quatuor superstites filios æqualiter hercisceretur, egregiè adeo id præstitit, ut ne minimam quidem rem sibi retinendam putârit. Non item oblitus quod Aristoteles in Politicis detestatus est tam Carthaginensium, quàm Locrensiùm instituta, quorum alij patrimonia æqualia habebant, alij quæ habebant, vendere non poterant, ut antiquæ hæreditates penes familias diutiùs starent; quoniam,

præter incommoda cætera, heinc efficeretur, vt ci-
ues inertes tam in expectandis, quàm in possiden-
dis patrimoniis forent. Cætera mitto, vt attingam
qua præsertim re admirationem sui creârit. Nempe
tamen quod ad theoriam, quæstionésque Iuris spe-
ctaret, existimatus fuerat paratissimus adfuturus;
quod attinebat tamen ad vsum, iudiciorúmque for-
mulas, creditus non fuerat perinde instructus. Sed
nimirum neque Parisiis, neque Aquis-Sextiis, oc-
casionem vllam prætermiserat sciscitandi pragmati-
cos, cognitoresque, & structores litium, ac redu-
cendi in commentarios quicquid aut ex ipsorum ore,
aut ex inspectis instrumentis, saccularibusque copiis
didicisset. Profecerat etiam consilio, exemplóque
optimi, consultissimisque Senatoris Antonij Thoro-
nij, dictionem nullam in toto formulario iure in-
tactam relinquens, cuius notationem, causámque
non nosset, vt vsum meliùs eliceret, animóque in-
figeret. Vt paucis expediam, mirus fuit applausus;
mirúmque elogium, quo fuit denique Patribus con-
scriptus. Inardescibat deinde Patruus desiderio ve-
niendi Diniam, sed obstitit increscens morbus, in-
ualescénsque Solis feruor: proxima quippe erat tem-
pestas dierum Canicularium, per quos ab vsurpan-
dis balneis, thermis que mos est abstinere. Auebat
etiam Peireskii vnà cum Patruo accedere; tum vt
obsequio continentem gratitudinem testaretur, tum
vt hanc partem Prouinciæ nondum sibi visam lu-
straret; tum vt Baronem Flayosceum interuiferet, qui
ducta in vxorem filia vnica Guillelmi Falconij Di-

nienſis Proſenſcalli, apud ſocerum morabatur. Ab-
 nuit tamen id Patruus, ſeu ne abſiſteret à iure di-
 cundo in Claſſe per ferias ſtatuas delecta; ſeu ne diſ-
 cederet à Vario, qui illum abs ſe abeſſe ægrè patie-
 batur: ſeu ne curam dimitteret, qua rogatus fuerat
 præſſe Cayero pictori in obducendis laqueatæ Au-
 ditorij Palatini contabulationi Gallorum Regum
 Iconibus. Ipſe nimirum ſolus par fuit ſuppeditare
 maximam quandam germanarum iconum ſeriem,
 quam ex numiſmatis, ſigillis, ſepulcris, vitris, aliſſ-
 que, huiusmodi monumentis deduxerat: meminiſſe
 que, cum veram faciem Hugonis Capeti diu deſide-
 raſſet, dixiſſe non ſemel habere ſe gratiam optimo
 viro Auguſto Galandio, quod illam ab eo obtinuif-
 ſet, ectypo ſigilli expreſſam. Diſceſſit ergo Patruus
 ſine eo, poſt Caniculareis exactos. Enimvero Varius
 rem gratam vtrique factururus, conſtituit per Septem-
 brim menſem vnà aduenire, adducereque Peireſ-
 kium, vt vnà Patrum inuiſerent, vnàque regionem
 ſpectarent. Et nonnulla quidem obſeruanda illis oc-
 currerunt antiquitatis veſtigia: ſed nihil mirabilius
 viſum noſtratibus Thermis, in crypta ſubrupea, quam
 aquæ calentis prætercurrentis alucolus ſic feruefacit,
 vt leniſſimè ſudorem educens, mire conferat pitui-
 toſis, frigidiſſque humoribus; idque præſertim vbi
 illi diſpoſiti prius ad exſolutionem fuerint Balneo
 quodam, Virtutum dicto, ob ſingularem energiam,
 mirabileſſque, & deſperatas aliis remediis curatio-
 nes. Optabant porro illi quidem præterea ſpectare
 Serpentes, ex obuerſa Auiſtro, ac præceſſa rupe, ad

cuius radicem sunt Thermae, Balneaque deciduos, 1607.
& maxime quidem quia innoxij, expertesque veneni sunt: verum illi non decidunt, nisi Maio, ac Iunio, & ferè quidem copulati, dum prurientes variè discurrent, eque rimis in rimas subeuntes ad precipitium non attendunt. Faciam heic fortè rem non ingratis hominibus nostris, si duo quædam commemorâro, quæ edifferentem Peireskium audierunt. Vnum apud Petrum Trichaudum, San-Martinum Inquisitoriae classis Præsidentem, qui solitus Dinia per ætatem degere, illum cum Vario domo exceperit. Cum enim caussa exquireretur caloris aquarum Thermalium, & Guillelmus Alamandus doctus Medicus esse diceret non actu, sed potentiâ ignem; excepit ipse debere potiùs esse ignem actu ardentem in cauernis illis subterraneis, quæ exinde incalcescentes aquam præterfluentem feruifacerent; neque enim seu bitumen, seu sulphur, seu aliam materiam potentiâ solùm calidam excalefacere aquam seu traiectam, seu infusam, etiam vitriolo, halinitro, aliisque huiusmodi mineralibus turgescentem. Adiecit fumos, seu vapores ex aquis thermalium in fissuras rupium subeuntes ita Serpenteis afficere, vt veneni generationem seu impendant, seu corrigant; eadem ratione, qua in Ponto idem facit vsus absinthij, ex Plinio. Qui Plinius quidem, cum aliunde non improbet venenum serpentum in felle esse, & serpentes congressuri dicantur fel euomere; mirum non videri, si quo tempore Serpentes isti coeunt, deciduntque, veneno carcant. Alterum,

1607.

apud Antonium de Bononia Episcopum, qui sequenti die vtrumque, ac etiam Trichaudum conuiuio excepit. Cum enim ex ostensis sibi à Flayosceo in duobus Sacellis maioris Ecclesiæ tam Porcelletanis, quàm Villanouanis insignibus, edisseruisset tempora, quibus Prælatos optimos ex iis familiis habuimus; incidit sermo de tempore, deque titulis, quibus Auenio, Comitatusque Venascinus ad Pontificem Maximum peruénit. Cumque alij nihil scirent aliud, quàm factam à Ioanna Regina Clementi sexto venditionem, anno supra millesimum trecentesimo quadagesimo octauo, ac die nona Iunij, pretio Florenorum octogies mille; retexit ipse totam historiam ab anno vsque ducentesimo nono, quo Raymondus tertius Tolosatum Comes hærescos Albigensum fautor, & Legati interfecti auctor creditus, fuit ab Innocentio tertio iterum excommunicatus. Inde enim cœpit ditioe spoliari, ac post annos nouem-decim transactio Parisiis sic fuit inita, vt Alfonso illius filio sola vrbs Tolosa, cum paucis adiacentibus cesserit; cætera vltra Rhodanum loca ad Regem attinuerint; quæ citrà verò possidebantur, ad Pontificem spectârint. Cum homines autem eiusce regionis non satis lubentes id ferrent, quòd Romam passim prouocarentur, ac ideò Alfonsi partibus fauerent, Bonifacius quidem octauus prouocationes illas remisit, Clemens verò quintus, vt ampliùs demereretur animos, etiam sedere illeic voluit; & cum, post Ioannem vigesimum secundum, Clemens Sextus Pontifex foret, facta

facta est venditio eorum iurium, quæ Comitibus Prouinciæ erant, à partitione vsque facta inter Raymondum Berengarium Comitem Prouinciæ, & Alphonsum Comitem Tolosæ, anno supra millesimum centesimo vigesimo quinto. Et hæc ille quidem, plurâque disseruit, ac denuò comitatus est Varium triduo post redeuntem. Patruus postea, vt restitutam valetudinem tueretur, & vt tranquillius degeret quicquid æui supererat, non Aquas-Sextias, sed Belgenferium, dum regrederetur, contendit. Occurrerat illi Peireskius, ac non modò deduxerat, sed lateri etiam eius adhærere, neque à præstandis obsequiis recedere statuerat: verum non tulit Patruus, voluitque vt potius rediret Aquas-Sextias propter Remigalia, quibus fit Curia instauratio. Rediit ergo Peireskius, ac tantò minùs pœnituit, quantò audire licuit Varium sua illa oris suauitate de Lite, & concordia, deque amore Iustitiæ, Magistratuumque perorantem. Deinceps verò ita cœpit suo defungi officio, vt desiderari nihil posset. Tametsi enim Varius, cum pensa curialia distribueret, nollet initio inspectorem multarum litium designare; quarum tamen paucarum curam illi commissam voluit, eas ipse ita solitus fuit otiosè, acutèque, & per omnes numeros, ac momenta iuris perpendere, vt confectis instrumentorum enucleatissimis breuiariis, explanatissimè deinde, & summa cum fide ad Curiam referret. Cum verò alio expositore ferenda erat sententia, mirè lætabatur, si tempus ad deliberandum daretur, aut controuersia commentarios præhaberet.

1607. ret à partibus ; pudebat enim , nisi foret continu-
niendo suffragio instructissimus , calculum conferre.
Rursus autem , quoniam persæpe ob litium anfractus
animo pendebat , conuenire solitus erat memoratum
Thoronium , qui scrupulos eximeret , nec dubitabat
etiam Vario grauiores causas proponere , qui ob
eximiam grauissimi , sanissimique iudicij perspicui-
tatem eas illustraret. Agebat verò id præsertim in
vespertino colloquio : iam tum enim Varius singulis
noctibus aduocabat illum in frugalem cœnam , vt
sermones conferere , sepositis arbitris , posset. Cate-
rùm , quia nescius erat tempus frustra conterere , id-
circo satis supererat , vt bonas artis excoleret , &
cum doctis viris tueretur commercium. Inter cate-
ra , procurauit exquisitam fieri anatomiam magnæ
cuiusdam Testudinis (longitudine nempe cubita-
li) quam è Martigio mari eductam pisciculis nutrie-
rat , à mensibus circiter tribus. Cùm singularia verò
multa in ea dissectione obseruata fuerint , tum illa
non postrema , Quòd omoplatæ anteriorem , non
posteriorem habuerint situm. Quòd arteria aspera
fuerit longitudinis semicubitalis , diuisâque in treis
ramos , tribus à pulmone procùl digitis , ac ramu-
los quosdam ad renes , & vesicam usque producens.
Quòd eadem annulos habuerit omninò , siue vnde-
quaque (etiam versus œsophagum) perfectos , & car-
tilagineos , larinxque epiglottide destituta constite-
rit. Quòd non ex sola vena porta venarum distribu-
tio in interanea fuerit , sed plurimæ etiam ex reliqua
caua hepatis parte prodierint ; ex eadêmque parte

cholidochus porus processerit geminus in dodecadaetylon intestinum. Quòd nulla distinctio gracillium, crassorumque intestinorum, nulla cæci dicti appendicula, nullus item lien, nullus adeps circumuectiens cor (tamen si id aquæ pericardio conclusæ innatauerit) & id genus nonnulla alia. Detexit aliunde non longè ab vrbe insignem quandam copiam non humanorum modo ossium naturæ factorum lapideæ, sed variorum etiam animalculorum, itémque stirpium, foliorum, florum, similiúmque huiusmodi: quam confestim distribuit per vniuersam penè Europam. Adiecit autem tessellas quasdam, seu lapides Rhomboidaleis, tum rubeos, tum crySTALLINOS (videlicet ipsius talchi, seu specularis lapidis speciei) ex Riantienti agro effossos, eaque in re mirabileis, quòd dum exsoluuntur in minutiores particulas, particulae quæque tuentur rhomboidalem illam figuram. Quin- etiam mittens Parisios, adiectam voluit congeriem diuersissimam conchyliorum, & piscium, qui monstrosâ formâ in mari Mediterraneo visuntur: itémque pellem felis marini, & innumera alia, quæ destinauit præsertim ad pictorem celebrem Daniele Monstereum, à quo expectabat icones Varij, Thuani, Casauboni, atque Malherbij. In Italiam cum mitteret, nominatim verò ad Gualdum, accepit magno suo dolore obiisse Baronium, deque lamentabili casu ad Flayosceum, & alios scripsit. Cum verò in Belgium, condoluit Villerio ob iacturam ab ipso factam Hadrianei numismatis, in cuius auersa parte ex Villerij quidem

1607.

sententia fuerat Phœnix exhibitus, ex ipsius verò Peireskij interpretatione, Ciconia. Argumentatus autem id fuit, ex proceritate crurumque, & colli, cùm Phœnix soleat potius Aquilæ instar repræsentari: prætereâque ex serpente ipsi ad pedes apposito, & ex inscriptione PATRI, qua designata fuerat Hadriani erga Traianum pietas: denique ex quibusdam aliis satis luculentis indiciis, quibus consolari adnixus est virum, monstrando rem deperditam non fuisse adeò, atque ille existimauerat, raram. Sic consolatus etiam est circa iacturam Iaspidis Argæum montem referentis; idque egens ipse tum quoque consolatione aliqua, quòd famulus quidam suffuratus fuisset numismata aurea primorum Imperatorum, & onychas, gemmâsque alias elaboratissimæ cælaturæ. Incidit intereâ Claudius Patruus in morbum lethalem non longè à Regalibus sequentis anni millesimi sexcentissimi octau. Inuiserat illum Peireskios per festa Natalitia; & quia valentem reliquerat, ideo mira consternatione renuntiatum excepit casum, qui septimo die à decubitu carissimum abstulit caput. Constituerat optimus Senex cor, & intestina Belgenserij condi, reliquum verò corpus Aquas-Sextias in maiorum suorum sepulcrum transferri. Id itaque parentatione, magnâque pompa præstitum est, inuitatâ Curiâ actione (vt tum moris erat) panegyrica per Ioannem Petrum Oliuarium Senatorem optimum, & assensu factò per Varium oratione alia eximia, quæ inter funebreis habetur, inque editione posthuma est numero decima sexta. Ad

1608.

eius calcem videre licet quanti Peireskium fecerit, 1608.
 cùm tantoperè commendauit studium, quo Patruus
 talem delegerat, parauerátque successorem. Nescio
 an dici debeat, quod demirata tota vrbs est, fidissi-
 mum defuncti canem affectatione perpetua circum-
 stitisse feretrum, non potuisse per plureis dies amo-
 ueri à tumulo, & postquàm domum reductus fuit,
 coram icone diù constitisse. Peireskius, sedato non-
 nihil dolore, sese, vt priùs, ad functionem Senato-
 riam composuit; paríque modo non destitit bonas
 horas succidere in gratiam liberalium & studiorum,
 & studiosorum. Nam primùm quidem varias ad va-
 rios amicos literas perscripsit; sed proluxiores tamen
 nullas, quàm ad Lælium Paschalinum, circa Vrsini
 lapsus, circa Francorum Regum icones, sigilla, nu-
 mismata, titulos (conuictis specialiter iis, qui Karo-
 lum Pipini filium vsurpasse Magni cognomentum
 arbitrarentur) circa statuas thymelicas, circa suum
 Aëtionem, quem cùm Velserus opinaretur pictorem
 esse, cuius Lucianus in Herodoto meminit, persiti-
 tit ipse in sententia, propter tiam Phrygiam, seu in-
 signe regium, quod ad Patrem Andromaches duce-
 ret potius referendum; circa columnas Herculeas,
 portum Ostiensem, & cætera curiositatis inèxhaustæ.
 Ita egit cum Fontanæo de re nummaria; & cum
 Strada specialiter de numismatibus antiquis: cum
 Claudio Frereo libellorum supplicum Magistro, &
 Gratianopolitani Senatus postea Principe, de histo-
 ria Francica: cum San-Marthanis Fratribus de Ge-
 nealogistica; cum Pignorio de Purpura; cum Nico-

1608. Iacobi Fabro, cumque aliis de rebus sexcentis. Deinde innumera fuere, quae obseruauit circa genera piscium reiectanea, quibus Martigij, alibi que condendis curam demandarat; quae circa conchylia, circa plantas, circa lapides, circa caetera (quae rursus variè distribuit) maximèque cum per Aprilem diuersatus est Belgenferij, vna cum Vario; vbi de prolatis compluribus rebus, quas ille nondum viderat, est suauissimè collocutus. Etenim sermo habitus est de Lapide caeruleo, in agro Olbienfi reperto, è quo eiusdem cognominis color extrahitur, vti etiam ex marmore lapidem lazulum imitante; de lapide item Coralloide stellato, de Coralloide punctato; de Lepadite, seu Lepadi conchae vniuersalium non absimili; qui omnes fuerant eruti ex agro Castelletano. Rursus de Conchite striato, quem ex agro Antipolitano, ac Fossensi habuerat; de Gagate, & Succino flauo, eruto ad turrim Beuontiam. Huius occasione edisseruit Succinum rem fossilem esse. Quippe in Sicilia quoque effodi, & torrentium impetu detegi, deferri que ad mare vsque, & repellente maris aqua, in littoribus saepe inueniri. Probabile proinde esse, vt quod expiscantur ad Balthicum mare, vi aquarum erutum, translatumque eò fuerit (maximè verò cum eodem modo plerumque contineat conclusas muscas, caeteraque id genus animalcula.) Quare & fabulosum esse, quod aliqui narrant, arbores praegrandeis esse in Noruegia, ex quibus id Succinum, quasi gummi quoddam decidat, concreseat, atque induretur. Enimvero toto hoc anno nihil magis placuit, quam quod ob-

seruauit, ac philosophatus est circa pluuiam Sanguinea^{1608.}
neam; quam decidisse rumor perccebit sub Iulij
mensis initium; conspicuis nempe maximis guttis,
tam in ipsa vrbe, ad parietes cœmiterij maioris Ec-
clesiæ, quod est prope muros; quam ad muros ipsos;
ac rursus, ad parietes villarum, pagorum, oppido-
rumque, ad aliquot milliaria circumuicinarum. Nam
primum quidem accessit ipse ad inspectandum gut-
tas illas, quibus lapides rubescebant; nihilque non
egit, vt alloqui posset quos agricolas memorabant
vltra Lambiscum sic fuisse percussos ex decedente
pluuia, vt derelictis operis in vicinas ædeis citi aufu-
gissent. Deinde, cum fabulam esse, quod de viris
huiusmodi proditum fuerat, comperisset, non pla-
cuit illi quod Physici referrent huiusmodi pluuiam
ad vapores è rubra terra sublimè euectos, & post con-
cretionem deciduos; quippe vi caloris eductum va-
porem absque colore sursum ferri; vt vel constare
potest ex eo, qui eductus ex rosas rubeis in limpi-
dam aquam concreuit. Minus etiam placuit, quod
vulgus, ac nonnulli Theologi opinarentur facinus
esse Dæmonum, Strigumve, à quibus fuissent inter-
fecti innocentes infantuli; scilicet hoc esse meram
coniecturam, fortassisque etiam Dei bonitati, pro-
videntiæque iniuriam. Succurrit porro interea casus,
ex quo sibimet visus est germanam causam dete-
xisse. Quippe ante aliquot menses concluderat pyxi-
de inuentam quandam Chrysalin, magnitudine, for-
mæque insignem. Eius cum amplius non meminisset,
excitari bombum inaudiit intra pyxidem, eaque ad-

1608. aperta, deprehendit chrysalin, deposito spolio, factam ex eruca papilionem pulcherrimum, qui statim auolauerit, reliqueritque in fundo guttam rubeam, amplitudine Solidi vulgaris. Quoniam verò id contigit circiter idem mensis initium, ac per idem tempus obseruata est Papilionum confertim per aërem transuolantium incredibilis multitudo: idcirco opinatus est papiliones huiusmodi interquiescentis parietibus diffudisse illeic, quasi excrementum, guttas simileis, magnitudine videlicet pareis. Quare iteratò accessit, comprobauitque guttas illas non supra ædificia, non in deuexis lapidum superficiebus existare, vti debuerat contingere, si è cœlo sanguine pluisset; sed in subcauis potius, ac in foraminibus, vbi animalcula potuerant quasi nidulari. Accessit, quòd parietes iis tingeantur, non qui in mediis oppidis, sed qui agrorum vicini erant, neque secundum parietis elatiores, sed ad mediocrem solum altitudinem, quantam volitare papiliones solent. Hac ratione proinde est interpretatus, quod Gregorius Turo-nensis refert de pluua sanguinea Childeberti tempore conspecta Parisiis, in diuersis partibus; & in domo quadam territorij Syluaneënsis. Itémque quod memoratur temporibus Regis Roberti sanguine pluuisse, circiter finem Iunij; adeò vt sanguis qui cecidisset super carnem, vestem, lapidémque non posset aquâ elui, posset verò qui super lignum. Quippe idem fuit papilionum tempus, & recentes quoque has guttas elui non posse vllâ aquâ è lapidibus comprobatum est. Hac, & similia cum apud Varium magnâ

magnâ coronâ edisseruisset , placuit simul rem explorare, contigitque vt cùm variè per agros incederent, guttas quoque multasprehenderint in lapidibus, rupibûsque: sed ad cauas tamen, subuexâlve, non verò cælo obuertas parteis. Accepit deinde ex Italia, & transmisit statim ad Thuanum elogia doctorum quorundam virorum , vt Hieronymi Columnæ, Gabrielis Faerni, Cruceij, & similium, quorum ille voluerat in sua Historia meminisse. Rogârat aliunde ipsum Scaliger , vt instauraret commercium, quod per P. Ostagerium hospitem olim Masiliæ suum instituerat in Oriente , coëmendis Samaritanis, Ægyptiacis, Arabicis libris; dolens quòd à quindecim annis, quibus degeret in Hollandia , nihil prorsùs inaudiisset de Pentateucho Samaritano, cuius sibi procurandi Ostagerius fuerat pollicitus studium. Peireskius ergo, cùm priùs quidem aliquid ea in re tentasset, tum tamen incumbendo acriùs, eiusmodi librum inter plureis alios in Ægypto coëmi, afferrique ad se mandauit. Verùm nauis, qua vehebatur, à piratis direpta est, recuperarique is liber non potuit. Ita priuatus Scaliger fuit exoptatissimo Codice, vt etiam nunquam est assequutus expectatissimum responsum, quod Peireskio ab eius morte venit fœliciter in manus. Scripserat nempe Scaliger ad Samaritanos Ægypti, itémque ad magnum eorum Sacerdotem Eleazarum in ciuitate Sichemo morantem, quæsierátque ex ipsis varia circa obseruationem Sabbathi, aliorumque festorum; circa Messiam, eiusque apud ipsos nomen; & ad extre-

1608.

mum, exemplum Legis, Pentateuchive poposcera-
 Ac ipsi quidem geminis Epistolis responderant; sed
 quòd illæ in Genebrardi, aliorumque manus inci-
 dissent, detentæ sunt, donec, Scaligero mortuo, Pei-
 reskii & obtinuit, & per virum impensè doctum
 Ioannem Morinum è Congregatione Oratorij, la-
 tinas fieri nuper curauit. Curam quoque eo tempo-
 re euocandi Pacium resumpsit, & quod est ampliùs,
 efficiendi ne diutiùs in Religione heterodoxa perse-
 ueraret: at nimis multa interuenerunt, quæ sollici-
 tudinem variam, variòsque conatus fecere rursum
 irritos. Aberat per ea tempora Valauesius frater Pa-
 risiis, ob Riantiensia negotia: & quia ipsi aliquot
 mensium intercedebant induciæ; ideò rogauit illum
 Peireskii, vt, vel sui causâ, inuiferet Angliam, Bel-
 giùmque, & amicos illeic suos saluaret, quæ dona-
 ria misit, offerret, rara quædam nancisceretur. Ora-
 uit etiam quam-maximè Aquis-granum contende-
 ret, vt quicquid illeic monumentorum Caroli Ma-
 gni superesset, attentissimè inspectaret, inscriptio-
 nes exscriberet, icones quasque in Ecclesiasticis seu
 libris, seu vitris, seu vestibus, seu lapidibus, seu qui-
 busuis aliis rebus impressas exprimi curaret; locorum,
 ornamentorumque ichnographiam non negligeret;
 diplomatum apographa, sigillorum ectypa, prece,
 pretiòve obtineret. Adiecit se sic pœnitere, quòd in
 Hollandia cum versaretur, Aquis-granum non di-
 uertisset, vt nisi Fratri confideret, paratus esset defi-
 nitè, neque alio nomine eò suscipere profectionem.
 Fecit porrò Frater abundè, & satis, mira sollicitudi-

ne, sedulitate, fide; cùm ipse interea post initum annum est digressus Monspelium, ob illa eadem negotia: scilicet Marchio Oresonius Bressiaco litem intenderat, ob diuenditum Riantij ius plenum. Redierat medio circiter vere, dolorem dentium infandum perpeffus, cùm non longè post incidente patre in periculosissimum morbum, contraxit ipse quoque febrim, quæ diuturna admodum fuit, cessansque sic languidum fecit, vt vix denique per autumnum penitus conualuerit. Quo loco referendum est, quod retulit ipse non semel. Cùm ciborum non appetens, fastidiosusque, tabesceret, rogasse Iacobum Fontanum clarum medicum, eiusque affinem, annon aliquid demùm esset, cuius esum appeteret. Annuente ipso aliquid esse, sed quod se non impetraturum, haberet compertissimum; instituisse illum, id modò, quodcumque foret, significaret. Cùm dixisset autem, Pepones: tum excepisse medicum, maeste, bonoque animo esto; neque enim permitto modò, sed adhortor etiam, ac præcipio, addoque, vt nonnihil meri præassumas, postassumasque, & absque pane, aliavere ad initium pastus, in stomachum mittas. Obsequutum igitur fuisse, adeoque benè inde habuisse, vt deinceps, ac donèc vixit innoxie semper eadem ratione pepones esitauerit. Conualefcens variis officiis studiosos varios adiutavit, veluti Ioannem Taxilem Arelatensem Medicum, nescio quid de ea nova stella, quæ per memoratam magnam coniunctionem apparuerat, meditantem; Gasparem Bricium in eadem ciuitate parochum; virum bonum,

1609. industrium, & cælestium obseruatorem. Ioannem Baptistam Hansenium, quem nouerat Romæ in erudita familia Cardinalis Baronij, cuique procurârat, vt toto triennio foret Gymnasiarcha Aquensis. Atque istos quidem, aliôsque demeritus est, valetudine adhuc dubia, remissiorêque solùm morbo; cui contrahendo, producendoque non contulit parùm iactura trium amicorum insignium, qui in Hollandia elati sunt. Eorum primus fuit Scaliger, qui manum iam admouerat commentationi de Hebræis numismatibus, cùm laborare hydrope cœpit, ex intemperie iocinoris, quæ quarto demùm, aut quinto mense, ipsum, die Ianuarij vigesima prima, oppressit. Alter fuit Clusius, qui non tam podagra recenti, quàm debilitate naturæ, die quarta Aprilis interiit. Post-huma huius opera, siue Posteriores curas edidit curator testamento datus Franciscus Raphelengius, mentione sæpè facta Peireskij, cuiusmodi illud, *Alata est ex Guinea in Galliam Spica non dissimilis præcedenti, nucula Indicæ fructibus constans, cuius iconem nobilissimus, & amplissimus vir Nicolaus Fabricius dominus de Peiresc, Aquis-Sextiis in Gallie Prouincia Senator ad Clusium miserat. Et postea, Sequens Tragacantha icon, quæ nobis transmissa est ex Gallie Prouincia, nempe Aquis-Sextiis, ab amplissimo, & nobilissimo viro Nicolao Fabricio, Domino de Peiresc, Consiliario Regio in supremo Senatu Aquensi, cum literis ad clarissimum Clusium. Tertius fuit Abrahamus Gorlæus, à quo non potuit cœptum opus Paralipomenon absolui. Parùm porro abfuit quin hisce amicis Varius quartus*

accesserit. Is per iustitium Septembri mense concesserat Antipolim, vt possessionem eius loci regio acquisiti patrimonio, Regis nomine adipisceretur. Cùm inuississet verò Fratrem, Petrum nempe Varium Vintientem Episcopum, incidit in febrim periculossissimam, ac mense penè diuturniorem. Hanc Peireskius cùm accepisset, teneri vix potuit, quin, laborans licèt, laboranti accurreret. Cùm non posset tamen, mira sollicitudine, vel potiùs anxietate fuit, vt quocumque modo operam præstaret. Cætera inter, scripsit Massiliam, ac exstimulauit Carolum Cassaneum clarum Medicum, appararique illi curauit & rhedam, & lembum, vt seu terra mallet, seu mari, cò expedite aduolarèt. Missitauit penè in singulos dies, qui exquisita quædam seu remedia, seu edulia ferrent, & quis foret status morbi renunciarent. Cùmque primùm facta est spes melioris valetudinis, sellam misit gestatoriam, quam domi habebat commodissimam; tametsi ille non potuit, nisi vectorio lecto reduci. Dum vterque deinceps residua autumnu conualescerent, dielque totos in colloquiis familiaribus ducerent, putàs-ne illorum sermones nihil habuisse eruditionis? Vnum præterire non possum, qui fuit postmodum aliquoties à Peireskio commemoratus, cuiusque occasione, etiam post eius obitum, superfuit quidpiam peragendum. Ansam fecère Conuentus varij, qui toto Regno Principis iussu habitare recens fuerant, vt de condendis perpetuis circa Monetarum valorem, vsumque Statutis deliberaretur. Cùm enim ante septem annos statuisset publico edi-

1609. Cto, vt aureus Solatus antea oblocatus sexaginta solidis, valeret exinde sexaginta quinque; euenerat iam, vt pro septuaginta, & pluribus commutaretur. Itaque Vario sententiam poscente, respondit Peireskii vix esse sperandum, vt proserpens malum fisti vnquam posset. Causam enim esse commercium cum vicinis nationibus, apud quas aurum cariùs, quàm apud nos redimeretur. Nam tum quidem aurum nobis esse in proportionem ad argentum non omninò duodecupla; apud Hispanos verò, exempli causâ, in plusquam tredecupla esse, idque edicto recentissimo, quo Rex Hispaniæ auri valorem decima parte adauxerat, intacto valore argenti. Qua in re sanè non fuerat Principem nostrum imitatus, qui maiore solidorum numero aurum æstimans, maiore quoque æstimauit argentum, ne proportio illa euariata censeretur. Subiunxit, tametsi non modò Rex noster, sed etiam Rex Angliæ, cæterisque Principes nouis edictis eam proportionem euariarent, promouerentque; euenturum tamen, vt singulis æmulatione quadam vel aurum pluri facientibus, vel ipsius pondus, aut certè internum argenti valorem, imminuentibus, res definiri nunquam posset. Scilicet nunquam defuturas, vel bellorum occasiones, quibus, exhaustis ærariis, ad id remedium prouocaretur; vel nationes satis consultas, quæ puriores auri, argentique species penes se seruare, aliundèue allicere hoc artificio procurarent. Et exemplo quidem esse posse Romanos, apud quos As æreus, Denarius argenteus, & Solidus aureus ita paullatim

fuere imminuti, vt postremò facti extra vsum fuerint; & Solidus ipse nominatim, qui cùm potuisset initio duobus Solatis exæquari; commutari demùm debuerit in speciem argenteam, quæ ipsa quoque sic degenerauerit, vt existimari possit in Solidum nostrum vsualem abiisse. Verùm ne tam procùl quæreret exemplum, sufficere, si spectaretur vel vnus Solati valor, qui intra centum postremos annos ita increuisset, vt decrefcente simul interna bonitate solidi, duplo solidorum numero iam æstimaretur. Non esse verò probabile, vt deinceps confisteret, sed futurum haud dubiè, vt intra paucos annos triplo, quadruplòque incrementum acciperet, Solidusque interea non imminueretur modò pondere, sed euaderet etiam planè æreus, tunc pondere quoque suo decessurus. Nec verò vana fuit coniectura: quando iam Solatus à nuperis annis taxatus est solidis centum quatuor; idque Edicto publico, cuius occasione ipse, cùm foret adhuc superstes, adnotauit auri ad argentum proportionem proximè quindecuplam esse. Sed ad colloquium vt redeam, cùm retulisset obiter Assem initio pependisse libram integram, seu duodecim vncias; ac diminutum deinceps fuisse ad vsque duas, ad vnā, ad minus: Denarium, cùm tempore Regum pependisset trientem vnciæ; sub antiqua tamen Republica pependisse solum sextantem, sub recentiore partem septimam, sub primis Cæsaribus octauam; seu drachmam (Atticæ nempe drachmæ æqualem:) Solidum denique principio fuisse partem libræ trigessimam octauam,

1609. postea quadragesimam, quadragesimam quintam, quinquagesimam, & ita deinceps: tum requisivit Varius, quæ illæ Libræ, seu Vnciæ à nostratibus diffiderent? Excepit Peireskii, sibi ea in renondum penitus factum satis. Nam habere se quidem pondera antiqua librarum triginta, decem, trium, singulorum, quæ cum libra Parisiensi senum denum vnciarum zygotatica comparasset; sed comperisse tamen solum vncias Romanas duodecim, decem circiter vnciis Parisiensibus exæquari. Circiter, inquam; nam nunc excessum, nunc defectum excurrere ad treis, quatuor, & quinque drachmas. Tametsi verò doctus Budæus proportionem præscripsisset proximè sesqui-alteram, quod putaret libram Romanam semuncia superadditâ libræ Marcæ, seu octo vnciis Parisiensibus æquam esse; attamen se varios Denarios antiquiores, integriorésque, quàm Budæo fuissent ad manum, ad eandem libram exegisse, deprehendisseque libram Romanam cum semuncia decem Parisiensibus vnciis, ut minimùm, æquipollere. Non audere tamen adhuc rem decernere; quod illi quoque denarij passi fuissent intertrimentum, expectareque donec Româ impetrauisset modulum Congij, qui à Vespasiani usque tempore in Capitolio consecratus, existeret, adseruareturque in Farnesiano Palatio, ac decem librarum vini, aut aquæ pondus continens, prodere posset quotnam libris, vnciisque Parisiensibus tale pondus exæquaretur. Probauit ille, rogauitque ecquam putaret Congij ad nostrates liquorum mensuras esse analogiam? Peireskii

verò

verò dixit id quoque determinandum ex modulo; 1609.
interea verò putare se continere Congium tres circiter Potus (sic enim in Prouincia vocantur, quæ Parisiis Pintæ, cum hæ illis minores sint) licereque etiam id explorare, si constiterit quæ proportio inter Romanum Pedem antiquum, & nostrum quem dicimus Pannum, seu mauis Palmum, intercedat. Romani nempe, vt Amphoram Congij octuplam definirunt magnitudine pedis cubici; ita Congij capacitatem dimidio pedis cubico definitam esse voluerunt. Heinc non vnum quidem duntaxat, sed duos quoque modulos Congij temporis progressu obtinuit: verum nunquam satis vacauit rem pro voto expendere, & postquam posteriorem obtinuit, citò nimis interiit, rem certo certius exploraturus. Cæterum quia nos, quantum licuit, illius curam supplementum, nescio an, si dixerimus, nimia sit futura digressio. Tenemur certè gratificari hominibus nostris, qui non modò pondera, mensuræque illas inter se, sed cum nostratibus etiam à Peireskio comparatum iri sperârunt. Vt paucis ergo res dicatur, cautiones adhibuimus easdem, quas Lucas Pætus, & Villalpandus; dum vas ipsum ad summum collum puteali aqua oppleuimus, expendimus, vasis pondus subduximus. Deprehendimus autem aquam, quæ Romano pondere esse debuit decem librarum, seu vnciarum centum viginti, esse pondere Parisiensi (quale nempe Parisiis exploratum, missumque est) librarum septem, minus vnciæ quadrante; seu vnciarum centum yndecim, & quadrantum vnciæ trium. Deinde

1609. ex hac proportionē collegimus vnciam Romanam continere grana quingenta, & triginta sex, qualium quingenta septuaginta sex in Parisiensi continentur; unde & illis in drachmas collectis, obuenire cuilibet drachmæ grana sexaginta septem: idque proinde censuimus pondus Denarij Cæsarei, quem dictum est fuisse drachmalem. Adhæc difficile non fuit valorem huiusce Denarij, & cæterorum consequenter, ac monetæ cuiuslibet, monetâ nostrâ exprimerē, & à recentiore præsertim Edicto, anni nempe M. DC. XXXVI. Cum ex præscripto enim argenti valore, atque pondere colligamus argenti vnciam æstimari solidis Turonicis sexaginta quatuor: idcirco Denarius Romanus valebit septem solidis, ac denariis turonicis quinque, cum triente eiusdem turonici denarij (sicque parum prorsus excedet valorem Regalis Hispanici) & tale fuisse intelligetur non modo apud Romanos, sed etiam apud Græcos, ob parem Denarij, Drachmæque valorem, militum stipendium in singulos dies. Quinarius proinde, siue Victoriatus valebit tribus solidis, cum denariis turonicis octo, ac denarij besse; Sester-tius vno solido, cum denariis decem, ac triente denarij. Et quia, verbi causâ, Siclus Hebræorum fuit, ex Iosepho, Tetradrachmalis, seu denariorum Romanorum quatuor; idcirco valuit solidis similibus viginti nouem, cum denariis turonicis nouem; ac triente. Unde & quia triginta vocati Denarij, quibus Christus Seruator à proditore Iuda diuenditus legitur, triginta Sicli fuisse videntur; ideò Pre-

tium colligitur librarum turoicarum quadragin- 1609.
ta quatuor, ac solidorum tredecim, cum denariis
quatuor. Quod spectat ad comparationem cum
Prouinciali pondere, obseruauimus illam eandem
aquam, siue Romanas libras decem pendere libras
Prouincialeis nouem, cum vnciæ triente; seu vncias
centum quadraginta quatuor, & trientem vnciæ.
Obseruauimus aliunde libram Parisiensem cum pro-
typica Nostrate collatam continere ipsam semel,
cum quatuor vnciis, & vnciæ besse. Sed notandum
Zygostatam Stateras ita temperare, vt versus nume-
rum centenarium, singularum librarum pondus sin-
gulis vnciis adaugeat, propter detrimentum earum
mercium, quæ cumulatim emptæ, minutatim ven-
duntur: adeo vt quæ centum libræ Parisienses æqui-
ponderarent nostratibus centum viginti nouem, cum
triente, exæquentur solum centum viginti duabus,
quatuordecimque vnciis, cum besse. Cum liceat ve-
ro mensuram Romanam tam cum Parisiensi, quàm
cum Prouinciali ex ponderibus comparare; addo
duntaxat nos comperisse quatuordecim Pintas Pa-
risienseis adæquari Potibus nostratibus vndecim; &
liquidorum Modium, qui Parisiis continet Pintas
ducentas octoginta, continere nostros Mellereol-
as quatuor, cum potibus viginti octo: continente
Mellereola Potus duodequingaginta, quorum qui-
libet pendit Prouincialeis libras treis, cum quadran-
te. Ex quibus elicies Congium continere Potus no-
strates duos, cum sextis ferè quinque; seu Parisien-
seis Pintas treis, cum semisse proximè: intelligesque,

1609. exempli gratiâ, quantum biberit, qui treis vini Congios vno haustu sicasse coram Tiberio legitur; unde & Tricongij cognomentum tulit. Habebis rursum quantum mensurarum nostrarum contineat Vrina Congij quadrupla, Amphora octupla: quantum Sextarius sexta pars Congij, & Semi-sextarius pars duodecima, aliàs Hemina, seu Cotyle dicta. Vbi notabis, si lubeat, videri Parisienseis appellare quartam Pintæ partem Semi-sextarium, quod illa ad Semi-sextarium Romanum proximè accedat. Dixi porro obiter liquidorum Modium: nam alioquin Modius aridorum constans ex centum quadraginta quatuor Buxeis, ex quibus quatuordecim deprehensi sunt id statuere Onus, quod nos ex quinque Heminis, Pannalibúsve decem constituimus; talis inquam Modius æquiualeat nostris Oneribus decem, pannalibúsque proximè tribus. Atque hæc sunt quidem, quæ homines nostros scire præsertim attineat; nisi adhuc adiiciam diuissse nos Pedem Parisiensem ex prototypo desumptum in mille particulas, obseruasséque Palmum nostratem, qui octaua Cannæ pars est, continere solum ex iis partibus septingentas sexaginta treis: Pedem verò Romanum antiquum nongentas & sex; ne memorem Anglicanum continere nongentas triginta treis; Hollandum nongentas sexaginta sex; Lugdunensem, & Gratianopolitanum mille, & quinquaginta duas; Bracchium Florentinum mille octingentas, & duas; verum de his nimis iam multa. Ad Peireskium redeo, qui statim insequente anno millesimo sexcentesimo deci-

mo est rursus profectus Monspelium. Cùm rebus autem prosperè gestis, incunte iam Maio rediret, in somnium illi contigit, quod aliquoties mihi enarrans solitus fuit præmittere se, si ab alio fuisset enarratum, non crediturum. Erat in eius comitatu Iacobus Raynerius Aquisensis ciuis, qui in eodem cubiculo indormire solitus, indormiit speciatim intra id hospitium, quod vocitant Album, Monspelium, ac Nemausum inter. Somniauit autem Peireskios, ac nescio quid insolitum obmurmurare visus est: quare excitatus Raynerius, ipsum, ecquidnam noui esset rogitando, expergefecit. Tum ille, prohi, inquit, quàm gratum, bellumque excussisti somnium! Quærente Raynerio, quid-nam rei foret, somniabam, inquit, me esse Nemausi, oblatumque mihi fuisse ab Aurifice numisma aureum Iulij Cæsaris, pretio scutatorum quatuor; iamque eram illi, ad ipsum habendum, numeraturus pecuniam, cùm excitante te importunè, & ex oculis Aurifex, & ex manibus Numisma euauit. Exinde, somnium nihil moratus, discessit Nemausum, & cùm prandium appareretur, per ciuitatem digressus est. Casu autem planè stupendo in Aurificem ecce incidit, ex quo dum requireret, si quidpiam fortè rarum haberet, habere se ille respondit Iulium Cæsarem aureum. Rogauit quanti cum venderet; responsum, pretio scutatorum quatuor. Itaque id pretium statim numerauit, acceptoque Iulio, suum somnium foelicitate mira compleuit. Mira, inquam; nam facilè quidem cogitare Nemausum potuit, quò sequente luce erat.

accessurus : potuit illud Iulij numisma , quod vigilans sæpiùs exoptauerat : potuit id repertum in ea ciuitate , in qua tot Romanæ antiquitatis vestigia : potuit apud Aurificem , ad quod genus hominum vulgò referunt qui talia effodiunt : potuit valorem medioerem , quo aurifices potiùs , quàm Antiquarij ista pendunt ; potuit scutatorum quatuor , quo moderato pretio aurifex posset esse contentus : denique potuit Aurifex , & Nemausi quidem , ac eo pretio habere nummum : verùm hæc omnia concurrisse , & euentum somnio ita respondisse admirabile prorsus est. Non is autem erat Peireskii , qui propterea somnij causam præternaturalem putaret , vt fortè fecisset , si sæpiùs contigissent similia : sed cum nosset fortunæ lusus , habebat duntaxat hunc casum inter eos , qui sua raritate stuporem apud vulgus creant , cuiusmodi etiam memorantur de Eudemo Aristorelis familiari ad Pheras ; de duobus Arcadibus ad Megaram , & de nonnullis similibus ; quam historiarum huiusmodi omnium penes auctores fides esto. Commoratus est deinde Peireskii aliquot diebus Arelate , vt præter aliàs obseruitata , exploraret curiosius monumenta quædam insignia ad monasterium Montis-maioris. Cum inde autem discessisset , & iam Salonem accederet , attingit eum Cursor ab Archiepiscopo , qui renunciaret mox inauditam Henrici Regis luctuosam mortem. Consternatus mirè , festinauit tamen , vt consolaretur Varium : dolorem quippè præsentens , quo nouerat percussus iri. Et sanè illius accessus leuamen ad-

hibuit non mediocre magno Viro, qui iam factum. 1610.
resciuerat, hominibúsq; & literis missis dare ope-
ram cœperat, vt vniuersa Prouincia in officio conti-
neretur. Memorabile porrò est ab anni vsque ini-
tio, & priusquàm Peireskius Monspelium discede-
ret, allatum ipsi fuisse ex Hispania Prognosticon
annuum, siue Almanach ab Hieronymo Ollerio
Beneficiato Barcinonensi compositum, & Nouem-
bri superiore Valentia impressum, in quo non ob-
scure prædictus lamentabilis casus foret. Sic ille
nempe designârat & natiuitatis circumstantias, &
euenta quædam præcipua; vt denotari alius Rex,
quàm Magnus Henricus non posset. Illud Vario
cùm ostendisset, communicassétque præterea cum
Iosepho Galterio Priore, & Domino Valletæ, viro
totius quidem Matheseos, sed Astronomica præfer-
tim peritissimo, digna omnino visa est res, quæ, li-
cèt Astrologicis prædictionibus non esset fidendum,
non negligeretur tamen, tanquam sacrum attinens
Caput, pro cuius incolumitate nulla cautio posset
censeri superflua. Itaque Varius ex eo tempore ipsum-
met exemplum transmisit ad Regem. Ac prætereo
quidem vt magnus, veréque generosus Princeps
laudato Varij affectu contemplerit prognosticon:
sed quia euentus comprobauit, ipseque Ollerius
aliud postea edens in sequentem annum, est pro-
pterea mirè gloriatus; idcirco taceri non potest,
quod saltem dubium faciat ex ipsis Astris, an
potius aliunde rem euenturam coniecerit. Nam de
Astrologica quidem vanitate non est quòd hic loci.

1610. quidquam memorem, & maximè cum euulgata ante treis annos Themata, nisi post annos præterea quatuor, nihil ominarentur infaustum. Non is etiam sum, qui subdubitem habuisse Vatem cum prauo Genio, qui id præfagierit, reuelaueritque commercium: dico solum potuisse ipsum aliqua ratione esse conscium machinationis illius, qua infandum adeò parricidium commissum est. Ea certè neque in Hispania, neque in Italia celari planè potuerat; nam etiam Regij Oratores, ac nominatim Venetiis agens ille virorum optimus Ioannes Bochartus Campinius, Regem iam illius præmonuerant. Comprobatum aliunde est Massiliensibus nautas, quotquot ex Hispania ante duos menses aduentarant, retulisse rumorem fuisse in Hispania disseminatum, quòd Rex Francorum nunc occisus, nunc occidendus gladio foret. Narrauit etiam Peireskius, scripsitque ad Malherbium, quod in hunc locum inferi possit. Memorabat nempe die Sabbathi, ac triduo post mortem Regis renunciatam, transiisse Aquis-Sextiis illusterrimum Venetum ex Priulorum familia, qui fuerat Orator Parisiis, ac tum pergebat Orator Madritum. Cum inuississet autem Varium, sibi aliunde cognitum, enarrasse ipsi inter cætera, se Mediolano iter facientem salutasse illic Comitem Fontanum; & cum Regiarum copiarum vim inter colloquendum exaggerauisset, tum excepsisse Comitem, nihil sibi ex iis metuendum, quòd vnius hominis mors esset breui eas euersura. Sed temperandum ab istis est. Accepit subinde Peireskius scriptas à Pignorio tertiacius

cuius mensis die literas , quibus admonitus est dete- 1610.
xisse Galileum inuento recens Telescopio magnâ
quædam , admirandâque circa stellas spectacula , ac
potissimum quatuor nouos Ioui circumductos Pla-
netas , quos Mediceos nuncupauisset. Scilicet ab
ineunte usque superiore anno sexcentesimo nono Ia-
cobus Metius Alcmariensis , dum varia vitra compo-
neret , vt effecta experiretur , inciderat casu in eam
conuexi , concauique comparisonem , ex qua , in-
teriecto potissimum tubo , viderentur intuenti res
paruæ grandescere , & sepositæ admoueri , (vnde &
illi prima defertur Telescopij inuentio ; tametsi Ioan-
nes Baptista à Porta tale quidpiam iam euulgârat)
Galileus verò ex solo rumore inuentionis ad se per-
ducto , cœperat ipse excogitare tum causam effe-
ctuum Telescopij , tum conficiendi artificium ; adeo
vt post molimina , ac tentamenta varia , peruenisset
tandem ad vnius exactissimi constructionem. Ipsum
fuit , quo per primos duos anni decimi memorati
mensis obseruationes illas peregit , quas titulo Si-
derei Nuntij mense Martio typis vulgauit. Peires-
kius ergo re cognita , magno cum ardore satagit , vt
& librum , & Telescopium quam-primùm posset ,
nancisceretur. Enimuerò cùm librum habuisset , ex-
quisitum tamen Telescopium sortitus illicò non est ,
quantumuis nonnulla impetrauerit tam ex Italia ,
quàm ex Hollandia , ac etiam Parisiis , ex quo pri-
mùm tempore elaborari illeic cœperunt. Hinc est ,
cur Iouis Satellites ante Nouembrim detegere , ob-
seruarique nequiuert ; certè vt integram Choream

1610. censeretur deprehendisse. Ex quo verò deprehendit, mirum quantâ lætitiâ id spectaculum fuerit contemplatus. Nam statim quidem rem demonstravit Vario, aliisque amicis; sed & ne tempus frustra abiret, apparauit obseruatorium, inuitauitque, ac sæpius per compluribus dies detinuit memoratum Galterium, cumque eo in obseruando biennium penè totum consumpsit. Erat adhuc frater Parisiis: quare illum sollicitare, varièque vrgeri nunquam destitit, donec vitra Telescopica confici curauit, misitque ad vsque quadraginta. Videlicet spes erat fore, vt consequeretur tandem optima, & cuiusmodi fuerant à Galileo usurpata. Interea tamen aliquot reuolutiones speculatus, cepit cum Galterio consilium de Motuum hypothesis, tabulisque concinnandis. Quamobrem Galterius eam Spartam aggressus, sic breui perfecit, vt exquisitè, quantum licuit, determinârit tempora, quibus singuli Medicei circumuolutiones proximè absoluunt, Extimus nempe diebus sexdecim, cum sexdecim horis: Sequens septem diebus, cum horis tribus, & semisse horæ: Tertius diebus tribus, cum tredecim horis, ac semisse itidem: Intimus die vnica, cum horis octodecim, ac simul semisse. Minutias non recensco; quandoquidem licet ad vsque secundas, vt Astronomi loquuntur, supputatæ fuerint; nihilominus dies docuit addendum quidpiam, demendumque: vt etiamnum quoque restat aliquid, quod obseruatio, ac diligentia temporum sequentium valeat emendare. Hæc solum attingo, vt innuam, quàm vehementer Peireskii in id

incubuerit, vt res adhuc nascens in suo exortu perficeretur. Quippe delegit præterea virum industrium Ioannem Lombardum, qui obseruando operam conferret; ac eruditos adolescentes Petrum Robertum Medicinæ, & Ioannem Baptistam Morinum Philosophiæ candidatos, qui se Galterio addicerent, vt quia nimis molestum erat numeros omneis retinere, calculis præscriptis, ipsum subleuarent. Obtinuit etiam obseruationes, quas præter Galileum, Ioannes Kepplerus clarissimus ille Cæsaris Mathematicus, aliique iam peregerant; vt ex illarum collatione perfici hypotheses possent. Curauit quoque elaborari Theoricen mechanicam, Peurbachianæ vulgaris instar; vt suppositis radicibus motuum, Mediceorum loca possent colligi in annos, menses, dies, & horas. Nomina præterea imposuit, quibus discerni singuli possent. Nam cum Galileus vniuersè Mediceos indigitasset, noluit ipse nuncupationem vlla ratione immutare; sed principes tamen delegit ex Medicea familia, quorum nomina inderentur. Quia debebat verò præsertim seruato familiæ honore Reginas duas inclytas, quas illa nostræ Galliæ dedisset, sideribus adscribere; ideò extimo planetarum Catharinæ nomen fecit proprium; alteri, qui præcæteris eximiè resplendet, Mariæ; tum sequenti Cosmi maioris, & intimo Cosmi minoris. Cogitauit deinde tam Obseruationes euulgare, quàm Tabulas; sed quia accepit Galileum curis continentibus in id negotium incumbere; ideò ne videretur palmam illi debitam prærepturus, sese ab incepto con-

tinuit. Denique venit illi in mentem adiutare Geographos in tradenda methodo Longitudinis inueniendæ. Quippe quia horum Planetarum sunt motus citatissimi, configurationesque per singulas noctes variæ; ideò cogitauit, si illæ, quibus contingunt momentis, in diuersis locis ad ortum, occasumque obseruarentur, posse, pro temporum variationibus, exquisitè designari intercapedines locorum: posseque adeò Tabulas, chartasque Geographicas sic emendari, ac perfici, vt exinde vsus rei Nauticæ consummationem nancisceretur. Heinc ea de re Amsterodamum ad Iodocum Hondium dedit literas, quibus etiam rogauit illum, vt indicaret nomen, & patriam Inuentoris primi Telescopij; scilicet ignorabat adhuc cum fuisse, quem iam diximus. Scripsit & Parisios copiosè ad Fratrem, postulans ab eo varia Telescopia, quæ obseruationibus faciendis in variis locis destinasset, ac potissimum in oriente, & in nouo Orbe, quò nonnulli amicorum erant breui discessuri. Et postmodum quidem obtinuit obseruationes aliquas, ac potissimum à mox antè nominato Ioanne Lombardo, qui profectus Alepum vsque, versus orientem, fuerat; sed neque illæ fecerunt satis; neque peruidit, omnibus etiam horum Planetarum configurationibus in Ephemeridas relatis, fore proptereà inuentionem adeò generalem, ac animo conceperat. Agnouit enim non posse Nautas ad illos attendere, neque interdiu, neque cælo nubiloso, neque Ioue Soli coniuncto, aut noctu sub terras delato; neque toto sexennio ad alterum

polum, cùm Iupiter esset versus alterum; & id genus similia. Quamobrem eam curam deposuit; rãtus aliunde Galileum, Kepplerúmve in eam curam incubituros, & pro sua solertia rem perfectiùs exsequuturos. Certè non parùm gauisus est, cùm non ita pridem accepit venisse Galileo in mentem, vt methodum perficeret, & cum Hollandis communicaret, à quibus arcanum Longitudinum est tantoperè expetitur. Porro cùm Peireskius foret circa ista summopere sollicitus; non destitit tamen interea pluribus curis distineri. Annus sæculi vndecimus erat, quo nescio an dicere debeam apparuisse primum in Prouincia, ac in eo hortulo, quem Peireskius intra ædis Aquis-Sextiensis habuit, flores calyceos Tulipas dictos. In eo scilicet ab autumno superiore defoderat missas Tornaco à Winghamio bulbosas illorum radices. Referebat autem, cum eo tempore nonnihil terræ in hortulo excolendo aggestum fuisset, Caniculam quandam nomine Marphisam conquisiisse catulos, quos abiici præceperat, sepeliisque sub aggere, & aliquot diebus ita incubuisse, vt neminem accedere, etiam prætextu edulij subministrandi, pateretur. Non memini porro an hæc, an dicta ipsi Sultana fuerit, cuius obitum cùm ægrè tulisset, lætatus tamen fuit ob factum circa illam experimentum. Ea educabat treis catellos, qui vnà cum matre eodem morbo laborauerunt. Vno demortuo, proiectoque, ipsa quoque mater interiit. Nemine causam agnoscete, Anatomicum euocauit, incidique iussit, vt interanea dispiceret. Ec-

ce autem secundum totam intestinorum prolixita-
 tem series aliquot cohærentium candidarum mole-
 cularum, cuiusmodi cucurbitæ, aut cucumeris gra-
 na sunt; vnde videtur fuisse vnus ex iis latis lum-
 bricis, quos Cucurbitaleis nonnulli appellant. Erant
 verò infernè quidem maiusculæ, duriusculæque; su-
 pernè verò ita paullatim in minutulas, molliuscu-
 lāsque desinebant, vt in summo tandem nihil, nisi
 confusus albor appareret. Peireskius ergo, cùm non
 placeret quicquid curando illi morbo proferebatur
 tam à Chirurgis, quàm à quibusdam Medicis; iussit,
 nescio quo ductus genio, afferri sibi theriacam, è
 qua cùm materiæ illi adhibuisset, obseruauit magno
 suo, circumstantiūque stupore ipsam statim lique-
 scere, effluereque in decliue. Quapropter iussit ca-
 tellis duobus qui supererant, exhiberi theriacam, ale-
 xipharmacum esse ratus. Ac alter quidem animam
 iam agens inter exhibendum extinctus est; alter ve-
 rò adhuc robustior remedio assumpto omninò con-
 ualuit. Contigit illo eodem anno decantatissima hi-
 storia de Ludouico Gaufrido cacomagiæ infamato,
 deque Magdalena Paludana illius præstigiis corre-
 pta à Dæmone. Ea res verò vt totam Curiam, sic
 præsertim ipsum Peireskium admodum sollicitum
 habuit, qui vniuersam penè historiam literis proli-
 xis descripsit. Ac pro tempore quidem ipso in eadem
 cum vulgo opinione fuit, mouebantque præser-
 tim ipsum Stigmata illa insensilia corpori vtriusque
 inusta, & Cacomagiæ credita indicia: at dubitare
 postmodum cœpit, num in toto negotio impostura

quædam, aut stupor animi latuisset. Placitum tamen 1611.
semper defendit, quo Curia Magum cremari iussit:
quippe qui aliàs sacro-sancta Religionis mysteria
libidinosus pessumdedisset. Aiebat quoque tametsi
Magi non tantum habeant cum Dæmone, quan-
tum putatur, commercium; nihilominus pœna affi-
ciendos ob prauum affectum, quo desciscunt à Nu-
mine, & Cacodæmonem implorant. Sic, licet factis
vñctionibus non transferantur reuerà in eas Syna-
gogas, in quibus nihil non patrent nefandum; pu-
niendam tamen voluntatem, qua id appetunt, scē-
que operi accingunt. Quod permouit autem ipsum,
impostura fuit, qua non multò pòst Massiliensis qui-
dam Sacerdos accusatus Magiæ fuit, prodente quo-
dam Dæmone, quem Gaufridus dicebatur in mulier-
culam intrusisse. Is quippe iudicio absolutus est, sed
corpore tamen toto interpunctus, vt designata à
Dæmone conquirentur stigmata, quæ deprehendi
nulla potuerunt. Tantò verò magis Peireskiius rem
vocauit in dubium, quantò post treis proximè an-
nos accepit à Winghamio similem historiam conti-
gisse in Flandria, hoc est interpunctum toto cor-
pore Canonicum quendam, qui fuit denique habi-
tus innoxius. Documentum sanè insigne, ne facilè
ad eò fides adhibeatur siue Dæmoni, quem Sacra
Scriptura appellat Patrem mendacij; siue muliercu-
læ, quæ partim natiua imbecillitate, partim vehe-
mentia vaporum cerebrum exturbantium, partim
malitia, aut odio, partim concepta, innutrita, defixa
altum opinione, imponere facilè potest. Quod ad

- 16II. Stigmata illa spectat, hæsit Peireskii num reuerâ non essent notæ Cacomagiæ; idque præsertim ex quo agnouit rem vocatam in controuersiam à Martino Delrio, aliisque viris impensè doctis. Fortè enim esse posse à natura, pertinereque ad singularem Elephantiascos speciem; aut saltem posse ipsos Magos eas sibi, quasi cauteria inurere, ac perturbatæ menti defigere, inuisionem illam perinde referendam ad Dæmonem, ac referre solent vnguenta, quæ ipsimet parant, & inter se communicant, confisi se ipsorum vi ad maligna illa concilia transferri. Habuit Peireskii toto eo anno valetudinem vacillantem. Fuit autem dubia potissimum circiter ætatis initium; tametsi propterea nihil fuit graue passus, neque interquieuit à solitis studiis. Quinetiam visus sibi est pro votis satis confirmatus, vt adesset Varius grauiissima febre totos quadraginta dies in villa Massiliensis agri, Florida ab ipso indigitata, laboranti. Non refero quanta se illi assiduitate deuouerit: hoc vnum non est prætereundum. Conualescibat ægrè Varius, quod teneretur anorexiâ, miroque ciborum fastidio. Cum venaretur autem Peireskii occasionem addiscendi ecquid posset gustum mouere, & datâ plerumque operâ sermones interfereret de rebus gustatu iucundis; contigit aliquando Varium obiter innuere Truttas lacus Geneuensis non iniucundi esse saporis. Ille ergo id subnotans, tantâ obtinuit diligentiam insignem ex eo Lacu Truttam, opere pistorio conditam; vt, nomine licet alieno oblatam, Varius tamen diuinaverit Peireskij facinus esse.

esse. Sic excitare gustatum voluit, cū factum illi obtulit ex linguis Phœnicopterorum; tametsi id per hiemem, quoniam ea sola tempestate aues illæ maritimæ ad Arelatenſeis paludes capiuntur. Parū aberat, quin ex linguæ exæquarentur hœdinis: & quia tamen esca videbatur suauior, nihil pronunciauit Varius, neque diuinauit, quousque Peireskius illud Martialis extulit,

Dat mihi penna rubens nomen, sed lingua gulosis
Nostra sapit.

Rogatus subinde fuit de sapore carnis Phœnicopteri: excepit autem mirari se, cur illam Apicius apud Plinium, & Imperatores Caligula, ac Vitellius apud Suetonium, Heliogabalus apud Lampridium, & nonnulli alij tantis in deliciis habuissent. Esse enim eam iniucundam, aut saporis certè non exquisiti, aquaticarum aliarum instar, cū etiam piscem oleat; vnde à Prouincialibus vt plurimū abiicitur, exuiæque solū sunt vsui, in fastuosis conuiujs, carnibus aliarum auium obtegendis.



DE VITA
PEIRESKII
LIBER TERTIVS.

IN SEQUENTE anno Parisios iteratò profectus est. Aduocârat enim illum Valauesius, quo tempore existimabat illa de Riantio negotia extremo iudicio definitum iri. Et contingit quidem, vt cùm moras aliquo-usque traheret, iudicium interuenerit, literisque in itinere acceptis id rescierit; verùm quia non tam negotiorum causâ, quàm amicorum conuiscendorum desiderio discesserat; idcirco noluit regredi; sed ardentius viæ insistens accessit Parisios, quo tempore frater erat excessurus. Is verò bono suo fato in vrbe adhuc constitit: incidit enim statim in morbum, quo fuit per integrum mensem eâ exagitatus vehementiâ, vt nisi caput carissimum aduenisset, adstitissetque, vix ab illo emergere, conualesceréque potuisset. Cùm à mense autem Iunio restitutus fuisset valetudini pristinæ, discedere tamen absque Fratre noluit, qui in

mensē vsque Nouembrim dilatū voluit reditū. 1612.
Prætextus fuit illud nuperum iudiciū, quod litigiorum Riantiensium non fuit penitus decretorium: nam ad cognoscendū quo iure vteretur Prouincia, audiendis Ordinū comitiis locū interpositū fecit. Vnde quia comitia non poterant cogi absque Prorege Guisio, ipsēque Prorex ante id tempus non erat aulā excessurus, ideò Peireskīus hanc sibi metam, redeundique anslam præfixit. Heic nihil necesse memorare quanta cum lætitiā, virtutisque æstimatione exceperint illum Thuanus, Campinius, Roissius, Faber, aliique amici, & insignes viri, quorum iam antè meminimus, quisque illum facie, vel famā iam nōrant. Nihil recensere officia, quibus literatos plerosque deuinxit, non modò qui erant in vrbe, cuiusmodi fuere, præter superius memoratos, Ioannes Sauaro, Carolus Labbeus, & alij; sed etiam qui alibi gentium, vt in cæteris Galliæ ciuitatibus, in Italia, Angliā, ac Belgio. Attexere præstat, cū nullum intermiserit studium promouendi arteis ingenuas, spectabilem præsertim fuisse quam curam continentem gessit obseruandi cœlestia, deque iis corā edisserendi cum viris Mathematicis, bonarūque rerum studiosis. Factum est quippe, vt nemo melius Phænomena noua calleret, quod nemo ardentius, & constantius in iis cognoscendis operam posuisset. Heinc habitum propè miraculo fuit, quod distractus tot aliis curis, consequi potuisset notitiā adeò exquisitā huiusmodi rerum. Quippe non de ipsis Phænomenis solū, sed de

1612. confectiōe etiam, vsūque Telescopij multa declarauit; eāque occasione plerumque ducere secum solitus est, qui tam fabricæ Organi, quàm rationis vtendi inspectores forent. Heic referendum, cū operam circa Mediceos Planetas nauaret, adnotasse eum aliquid, quod, quibus ista curæ sunt, non fuerit fortassis ingratum. Attendit videlicet Iouem transiisse Cordi leonis ad Boream, non multū ante vesperam diei Iunij trigesimæ, & Venerem corniculatam transiisse adhūc magis ad Boream, inter eam vesperam, & consequentem primæ Iulij; qua etiam nonnihil coniunctionem cum Ioue prætergressa fuit: cū & Luna tunc, omnibus borealior, ipsi eidem Cordi leonis instaret proximè coniuncta. Sic Eclipses duas obseruauit, alteram Lunæ, alteram Solis. Et de Lunari quidem, quæ contigit die Maij decimaquarta, retulit in schedas obstitrissse nubeis, ne adnotaret aliud, quàm Eclipsin cœptam, & ad quadrantem propè diametri promotam, cū vrba horologia variè pulsarent horam nonam, ipsæque in autmato haberet nonam, ac semissem; promotam verò vltra trientem, & ad semidiametrum penè, dum ex vrbanis haberetur nona, cum semisse, ex proprio verò decima. At paullò exquisitiùs circa Solarem, quæ eiusdem mensis die trigesima accidit, scripsit se obseruasse Solem fuisse iam factum, qualis est Luna ad dichotomiam proximè accedens, cū iuxta vrba horologia foret hora nona (matutina nempe) ac triens. Deinceps quoque horâ decimâ cum triente, semisse, ac besse, vltimam increuisse Eclipsin; at

horâ vndecimâ iam imminui cœptam, & ad centum Solis reductam. Horâ vndecimâ cum beſſe, vix ſuperfuiſſe digitum: denique horâ duodecimâ, minùs ſexta parte, Eclipſin deſuiſſe. Quæ commemoro, vt intelligas diligentiam ſaltem in eo non potuiſſe deſiderari. Et expetiſſet quidem poſteà obſeruata fuiſſe omnia ſcrupuloſiùs: ſed ſatis tamen peractum duxit, vt ſumma cum lætitia obſeruationem compararet cum Romana quadam Lunaris Eclipſeos, quam Ioannes Remus Quietanus clarus Medicus, & Mathematicus retulit; & cum Hafnienſi duplici, ſeu vtriuſque Eclipſeos, quam celebris vir Chriſtianus Seuerinus Longomontanus, Tychoſis Brahei quondam adiutor, deſcripſit. Prodiit per hæc tempora liber Italicè ſcriptus, titulo Squitini, quo libertas Veneta ab ipſis Reipublicæ fundamentis fuit diſcuſſa. Is, quia viſus eſt continere eximiam quandam Imperij, Gotthorùmque Regum Hiſtoriæ notitiam, idcirco ſtatim creditus fuit (quæ etiamnum eſt multorum perſuaſio) Peireskium habere auctorem. Enimvero teſtari licet nihil tale ipſi veniſſe in mentem. Quin potiùs ſic ſemper reueritus fuit Reipublicæ maieltatem, quòſque in illa amicos habuit, vt ad præſtandum oblequium potiùs, quàm ad contumeliàm fuerit comparatus. Ac non diſquiro quidem an auctor huiuſce libri fuerit Antonius Albizius, nobilis ille Florentinus, qui Chriſtianorum Principum Stemmata ediderat ante duos annos, vt nonnullis perſuaſum eſt; an, vt videtur verofiſimiliu, inſignis ille Marcus Vellerus, cuius ſæ-

1612.

piùs meminimus, ob consummatam eruditionem, propensionemque singularem erga domum Austriacam. Addo duntaxat, immerito videri quosdam suspicatos tam Gualdum, quàm Pignorium, aut contulisse operas in eo opere conscribendo, aut communicasse cum Peireskio quos digereret commentarios. Il fuere enim magis ingenui, patriæque suæ magis amantes, quàm vt ea impietatis labe commaculari voluerint. Vt cumque sit, Peireskios certè nihil simile vnquam cogitauit. Parisiis porro discessurus, ac vale iam amicis dicens, recepit, inter cætera, se ad Mericum Vicum, hieme ingruente, transmissurum par Phœnicopterorum. Subierat quippe earum auium enutriendarum desiderium, non ob pulchritudinem modò alarum rubore flammantium, (vnde nostrates *Flammantem* vocant) obque proceritatem crurum, & colli, cuius causâ à Iuvenale Phœnicopterus Ingens dicitur; sed præsertim ob speciem victus, quo Peireskios quasdam apud Varium educatas commemorabat. Referebat enim illas noctu potiùs, quàm interdiù capere cibum (qui ferè illis parabatur ex pane aqua madefacto:) præsentire frigus aduentans, ac tum ad ignem accedere, pedibusque etiam interdum cremari; dolente pedum altero, illius vice vti rostro, ipsoque, & altero pede alternando incedere: dormire erectas in alterum pedem, reliquo in ventrem, plumasque subducto; parci esse somni, aliâque similia. In ipso discessu summopere doluit eripi sibi extremo morbo amantissimum sui Nicolaum Fabrum, qui non mul-

tōs ante dies commendârat apud Regem egregium 1612.
virum Thomam Billonum operosissima illa sua, ac
fœlicitatis miræ Anagrammata oblatum. In itine-
re diuexatus est magna vrinæ difficultate. Postquàm
rediit, nulla res æquè cum affecit, ac iniuria Variorum a Se-
natorum vno illata, tum ante Natalitia, tum initio al- 1613.
terius anni; cuius proinde toto decursu vix à latere
ipsius discessit, nisi quo octiduo graui morbo labo-
rauit sub finem Aprilis. Rediit interea Frater Pari-
sius, ipsèque per illum varia munera ad amicos de-
dit. Misit quoque multa in Italiam ad Paschalinum,
Benedictum, alios, quibuscum varia edisseruit, & ex
quibus aliqua pro amicis aliis vicissim expetiit. Hos
inter fuit Casaubonus, itémque Henricus Polanius
Monetalis Ex-præfectus, qui postulârat tum varios
libros operâ ipsius in Italia inuestigandos, tum pon-
dera antiqua varia, aut institutam certè ipsorum
cum Parisiensi comparisonem. Scribens aliunde
Parisiis, nihil æquè fategit, ac Hannibalem Fabro-
tum Iuris professione clarum, & meliōrum litera-
rum studio cum primis insignem, facere tam apud
Thuanum, quàm apud ceteros amicos, quibus il-
lius eruditio iam innotuerat, commendatum. Ad
eruditos alios quod spectat, Edens non multò pōst
Sirmondus in Sidonium Apollinarem Notas, consti-
tutionem retulit, quam Cusanus esse Constantini
Magni, Scaliger Constantini Tyranni opinati fue-
rant; Peireskius verò docuit, ex Codice Arelatensi,
fuisse potiùs Honorij, & Theodosij Augustorum,
scriptam scilicet ad Agricolam Præfectum Galliarum.

1613. de agendo singulis annis Arelate septem Prouinci-
 rum conuentu. Deinde Iacobus Fontanus nuncu-
 pans illi Commentarios in Aphorismos Hippocra-
 tis, hisce verbis inscriptos voluit, *Hunc vero, quem
 in hoc opusculo condendo insumpsi laborem, tuo fauore
 cectum in lucem prodire exopro, qui virtutum, & scien-
 tiarum omnium cumulo coruscans, fugabis omnia omnium
 oblectatorum conuitia, efficiēsque et hoc opus medi inae
 studiosis utile, sit omnibus futurum iucundum; cum ita
 his non tantum placeas, sed etiam reliquis omnibus, qui
 literarum studiis incumbunt, ut nullam sibi ipsis propriam
 virtutem esse putent, nisi tibi testatam, & acceptam in-
 telligant.* Dicatum quoque, editumque eodem tem-
 pore fuit opus à memorato supra Taxillo, continens
 Iudicium de ea noua Stella, quæ colluxerat ante no-
 uem annos. Verum Peireskii neque consilium, ne-
 que iudicium probare potuit; quod ille aduersus
 meliores auctores, etiam à se communicatos, argu-
 mentaretur Stellam sublunarem, ac suprema aëris
 regione non superiorem. Nimirum ferre non po-
 terat, ut obseruationibus, demonstrationibusque
 refragantibus, quærentur argutiæ, quibus opinio-
 nes in scholis inueteratæ stabilirentur; tanquam do-
 cere nihil dies posset, neque experimenta forent ra-
 tiociniis umbratilibus præferenda. Quocirca eodem
 tempore collaudauit Jacij candorem, qui rogatus
 sententiam ferre de Solaribus Maculis Telescopio
 iam obseruatis, ad deliberandum tempus petiit, con-
 turbatum se asserens, & ex obseruationibus nouis
 hypotheseis nouas constituendas sentiens. Sub idem
 tempus


tempus rumor percrebuit de Giganteis ossibus, quæ in Delphinatu reperta Rex imperavit ad se transmitti. Ferebant enim detectum fuisse in fabuloso quodam loco, non longè ab ipso confluente Rhodanum inter, & Isaram, sepulcrum lateritium, triginta longum pedibus, latum duodecim, altum octo, cum superposito lapide, in quo hæc inscriptio, THEV-TOBOCHVS REX. Addebant, sepulchro aperto, apparuisse intus Skeleton humanum, longum pedes viginti quinque, cum semisse; latum ad humeros, seu scapulas decem; profundum ad thoracem quinque. Cranium observatum fuisse quinque pedum secundum longitudinem; secundum verò ambitum, decem. Spectato prodigio per integrum diem, cætera quidem ossa abiisse in cineres; at superfuisse, quæ translata nemo non vidisset Parisiis, partem maxillæ inferioris, vertebrae duas, portiones costæ, humeri, femoris, alterum femur, tibiæ, astragalum, calcaneum; præter non transmissa aliquot fragmenta, ac nominatim femoris, itémque duos dentes. Memorabant etiam reperta argentea numismata, numero circiter quinquaginta, cum effigie Marij, & in aversa parte literis MA, nominis ipsius initialibus; unde & confirmatum volebant sepultum illic Theutobochum Theutonum Regem à Mario devictum, virum tantæ proceritatis, ut Auctores meminerint fuisse trophæis eminentiorem, & quaternos, senosque equos transilire solitum, aliâque id genus. Porro ut Peireskiius rem vertit in dubium; ita expendit quidnam potuisset fabulæ locum facere, idque præ-

1613. fertim, ex quo libellum à Nicolao Habigoto Parisiensi Chirurgo ea de re conscriptum pellegit. Ac non hæsit quidem, quin ossa in ea regione detecta fuissent: concessit posse alicuius vetustioris Gigantis esse; at cuius esse perhibebantur, in animum nunquam induxit. Nam primùm quidem, neque Theutobochus, neque illius subditi latinam linguam vsurpârunt, vt excitato tumulto inscriberetur Latina vox; neque Romani, si pro sua illa hostili pietate monumentum condidissent, illud extruxissent ex lateribus (signinum certè opus non fuisset, quale ad sepulchra tunc vsui non erat) sed potiùs, nisi ex marmore, saltem ex alio lapide, in quo & suæ victoriæ, & pietatis aduersum hosteis insculptæ notæ relinquerentur: cùm aliunde locum delecturi fuissent, nisi sublimem, aut faxeum; saltem non ita arenosum, atque lubricum, cuiusmodi is fuerat; ne facilè obrui, aut subuerti posset. Mirabatur etiam neque asseruatum, ostensùmque fuisse inscriptum illum Lapidem, qui Parisios sanè fuerat transferendus; neque sepulcrum relictum fuisse vel intemeratum, vel cum insignibus vestigiis; vt Dominus illius loci propagandæ ossium Giganteorum famæ curiosus, videbatur cordi habere debuisse. Suspicionem adaugebat, quòd acceptæ Cranij dimensiones perhiberentur, cùm id nimirum solidum, nec cinereum existeret; & tam citò tamen, aliis ossibus superstitis, exsolutum fuisset. Videbantur enim fabulæ auctores subueriti fuisse, ne ex accurata eius inspectione comparationeque cum humano cranio posset veritas scèlicius

exquiri. Ad Numismata quod spectaret, dicebat illas literas designasse non MARIUM, cuius prænomen C. non fuisset omisſum, neque integrum nomen MARIIVS Romanorum more exprimi neglectum; ſed potiùs MAſiliam, tum Rempublicam, cuius, vt ciuitatis Græcæ, ea numismatum argenteorum forma erat propriâ, non ipſorum Romanorum. Quoniam verò à paucis annis, neque longè ab eo loco reperta complura huiusmodi numismata fuerant, ipſæque nonnulla ab illuſtri Frereo, cuius eſt ſuperiùs facta mentio, habuerat; eam ob cauſam ſubdubitaui, num callidè, vt tempora, ita loca forent confuſa. Quòd Theutobochus verò legatur fuiſſe Trophæis procerior, arguere id quidem, fuiſſe illum altitudinis decem, duodecimve pedum noſtrorum vulgariũ, cuiusmodi erant trophæa, quæ in ouationibus, ac triumphis geſtabantur (idque computata geſtantium, brachiorũque elatorum altitudine) cuiusque modi etiam Heroum exhibebatur ſtatura (ad humanam nempe communem ſeſqui altera) non verò pedum viginti quinque. Sed neque id, quod legitur de Equis quaternis, ſenſque, ita eſſe intelligendum, quaſi diſtantis cruribus ipſos vnà complecteretur: ſed potiùs, quòd moris haberet ex vno tranſire in alium; hoc eſt, mutare ſæpius equum, tamquam breui ſpatio pondere laſſatum. Argumento eſſe, quòd Florus (à quo id ſcriptum) prodidit illum quaternos, ſenſque equos tranſilire ſolitum, vix vnum, cùm fugeret, aſcendiſſe; quaſi indicetur non vnà deductam equorum multitudinem, vt deduci

1613. moris erat. Denique plura edifferebat & de loco victoriæ, & de triumpho, cuius pars, seu spectaculum Theutobochus fuit, & de nonnullis aliis rebus, quibus euulgato rumori habita fides eleuaretur. Obtinuit etiam postremis annis aliquot fragmenta huiusmodi ossium: sed ex illorum inspectione confirmatus magis in sententia fuit, ratus tum demum grandia ossa, quæ effossis sæpe sepulcris miramur, esse Elephantina; quasi belluarum Domini illa cara habuerint, aut fortè etiam posteritati illudere voluerint ex ea sepeliendorum cura. Opinatus est etiam, commonstrari interdum ossa, quæ effossa fuerint ex arenis, aliisve locis, vbi casu quodam fuerint obruta; cum reperire vix liceat virum aliquem fide dignum, qui sepulcra fabrefacta oculis suis conspexerit, fidesque penes illos sit, qui diuendunt, monstrant, aut se inuenisse, eruisseque profitentur. Heinc optauit sapiùs virum aliquem tam falli, quàm fallere nescium, in Siciliam nauigare, explorareque quæ effossa non procùl Panormo Gigantum ossa perhibentur, ac specialiter Crania. Sperauit enim fieri posse, vt is vteretur ingenua illa voce Suetonij, esse Capreis immanium belluarum, ferarumque membra prægrandia, quæ dicuntur Gigantum ossa. Sed hæc iam nimis. Sequutus annus feralis fuit amicorum illustrium morte. Accepit enim ex literis Aprili mense à Gualdo scriptis, obiisse & Contarenum Procuratorem Venetiis, & Lælium Paschalinum Romæ, & Veronæ Nichezolan. Accepit etiam postmodum obiisse Augustæ optimum Velferum, die Iunij vige-
- 1614.

suma quarta ; quo etiam proximè tempore Casaubonus mortuus in Anglia. Quin ipse quoque literis ad Natalitium Benedictum mense Maio scriptis meminit Ducis Arschorani, tanquam antè demortui. Meminit aliàs, vt vita functi Heidelbergæ, Marquardi Freheri Iuriconsulti, & Historici, cuius amicitiam Velferus parârat. Nescio an alij fuerint ; sed numerare solebat annum ab alio ferali quintum, ereptorum nempe sibi caput carissimorum iacturâ, numeroque infaustissimum. Addebat sibi solatio fuisse, quòd inire intereà amicitiam licuerit cum aliis viris oppidò magnis. Vnus fuit Ioannes Franciscus Vidius à Balneo, Patracensis Archiepiscopus, & per ea tempora Auenionensis Vicelegatus. Singularis enim deinceps necessitudo intercessit, seu donec ille Auenione degit ; seu cùm est versatus perillustis Nuncijs tam apud Principes Belgarum, quàm apud Regem Christianissimum ; seu postquàm factus est Cardinalis raræ, & spectatæ virtutis. Alius fuit Franciscus Sauarius Breuius, qui diu fuerat Orator Regius ad portam Ottomanicam, quique tum Roma rediens, vere nouo fuit Aquis-Sextiis ; ac secum habuit Gabrielem Sionitam ex Maronitis Libani montis, linguarum Orientalium interpretatione iam clarum, quicum etiam Peireskius amicitiam contrahere, porroque excolere suauissimum habuit. Alius rursùm fuit Guillelmus Catellus, eximium Senatus Tolosani lumen, quicum multa communicauit, seu ad specialem Comitum Tolosanorum historiam, seu vniuersè ad Occitanicæ commentarios spectantia ; quod



In bibliotheca Domus fl. caroli parisiensis

VIRI ILLVSTRIS

NICOLAI CLAVDII

FABRICII DE PEIRESC.

SENATORIS AQUISEXTIENSIS

VITA. *LD*

Per PETRVM GASSENDVM Præpositum
Ecclesiæ Dinienfis.



PARISIIS,

Sumptibus SEBASTIANI CRAMOISY,
Architypographi Regij, viâ Iacobæâ.

M. DC. XLI.

CVM PRIVILEGIO REGIS.

THE
NATIONAL ANTHROPOLOGICAL ARCHIVES

WASHINGTON, D. C.

1907

1907

1907

1907

1907

1907

1907

1907



PRINCIPI MAGNO,
SAPIENTI, BONO,
LUDOVICO
VALESIO
ALENSI COMITI,
LEVIORIS EQVITATVS PER
Gallias Magistro, & Gallo-Pro-
uinciæ Proregi.

PETRVS GASSENDVS *lib. theol.*



AGNE PRINCEPS,

*Scribere aggredior quam abs me deposcis lau-
datissimi Peireskij vitam. Quippe non prius in
hanc Prouinciæm faustis auibz accessisti, quàm*

A ij

ingenuisti praeceptam tibi, magnâ fatorum inui-
 diâ, illius consuetudinem; ac me, quem nôras
 fuisse cum ipso familiarissimè versatum, perquàm
 studiosè de eius studiis, moribûsque es perconta-
 tus. Voluisti etiam habitum oris ex effigie co-
 gnoscere, & loca adire, in quibus superessent illius
 vestigia, lustrando ubi habitare, ubi sedere, ubi
 praestanteis quosque viros, quibusdam quasi Sire-
 nibus, detinere solitus fuisset. Denique in eam
 raptus es virtutum eius admirationem, ut con-
 scribende illius vitæ non postremus auctor mihi
 fueris, ac me idcirco non inuitus à te abesse permi-
 seris, ut in secessu hocce meo coronis citius impo-
 neretur. Et poteram quidem germanam excusa-
 tionem prætendere ex tenuitate virium: at cunctan-
 dum non censui, cum ad multiplex officium at-
 tendi. Nam primum quidem, quod ad Te spectat,
 morosus sum planè, nisi obsequar, qui nihil tale co-
 gitans, ac nihil tale meritis, sic fui euocatus ad
 te salutandum, ut ex eo usque tempore beneuolen-
 tia erga me tua esse non potuerit & liberior, &
 dulcior, & ad omnem comitatem, facilitatè que
 procliuior. Didici certè experiundo, quàm merito
 iure te suspiciat, amètque, & suas delicias tota du-
 cat prouincia; fœlix videlicet Prorege, in quo phi-
 losophia, & imperium aquis momentis temperen-
 tur. Quinetiam ita pacis studia cum artibus belli

componis, ita cum Marte Musas concilias, ut
 ambiguum fiat, generosiorne, an eruditior emi-
 neas; & cum immortale id decus sit tibi genti-
 litium, nemo tamen ex inclyta, Regiâque Valesio-
 rum stirpe occurrat tecum comparandus. Sed me-
 moranda hac aliàs: nunc commendari satis non
 potest, quòd fasceis ubique submittis virtuti, ne-
 que in solis Principibus regiarum laudum mate-
 riam queris. Nihil interesse existimas sub qua
 veste lateat heroïca mens; & modo pectus diui-
 num sit, propensum te ad cultum præstas. Exem-
 plo certè erit perpetuo, & magnorum Ducum, Im-
 peratorumque factis accensendo, quòd iam tua
 commendatione Senatorij ordinis virum ob exi-
 mias animi doteis, inter Principes euehis; & ne
 unquam illius fama intermoriatur, curam assis-
 mis. Oportet nempe in te possideas quas in illo
 amas laudatas virtutes; neque potest affectus
 tui non perennare memoria, cui virtus ipsa est
 elogium pronuntiatura sempiternum. Deinde
 quod spectat ad Virum, ingratus sim, nisi id præ-
 stem, quod singularis erga me amor, & munifica
 indoles erga omneis efflagitat. Nam me quidem
 quantum amârit, promptius est animo sentire,
 quàm verbis exprimere; satisque est dicere me fæ-
 licitati vertere magna, quòd me tam carum ha-
 buerit, quòd tam frequentem sibi adesse, consilio-

rúmque animi omnium esse conscium voluerit;
 quòd in meum sinum ut cetera, sic, extrema ver-
 ba, animámque ipsam tandem exhalárit. Eam
 ob causam, cum nulli magis, quàm mihi esse cordi
 debeat capitis tam cari memoria; currenti sanè
 adhibes calcar, cum tuo imperio id exigis, ad quod
 gratitudo, & ius amicitia me procliuem facit.
 Qui enim quoties quidpiam de illo cogito, loquor,
 audio, intima quadam suauissimáque animi lati-
 tia perfundor: quomodo possim non iucunde vita
 eiusdem seriem sic scribendo retexere, ut cum ple-
 risque cōmunicetur? An non videbor adhuc cum illo
 humanissimè conuersari, suaueisque horas consu-
 mere, ac tum mihi demùm satisfacere, ubi per me
 non steterit, quin tanti amici gloria efflorescat?
 Quantum verò ad propensionem, qua animatus in
 omneis fuit, exstitisse nemo videtur, qui in com-
 mune bonum natus, id impensius curauerit, ut
 constantissimè prodesset uniuersitati generis hu-
 mani. Nam multis quidem cessisse potest, si fa-
 cultates spectaueris; nemini tamen, si virium mo-
 dum, voluntatémque benefaciendi. Dignus proin-
 de, qui regnàrit in animis hominum, ac studioso-
 rum praesertim, quos excitare, foueréque eruditio-
 ne, consilio, auctoritate, gratia, opibus suis destitit
 nunquam. Testes sunt boni, doctique omnes, qui
 consensu unanimi fatentur nullum unquam fuis-

*se Meccenatem generosorem. Heinc tametsi fama illius non videatur posse exstingui, cuius illustri nomine litteratorum orbis completur, haud tamen committendum est, ut idem nobis exprobrari, quod Meccenatis saculo possit. Nam quod huius historiam nemo coatanens in posteros trans-
 miserit, effectum est, ut praefer nomen eruditissimum, vix quicquam de illo ad nos perman-
 rit; & cum idem Nostro timendum videatur, aequum profecto, ut qui illi familiariter conuixe-
 runt, id curent, ut quis fuerit, nepotibus etiam seris innotescat. Similis enim crepusculo vesper-
 tino est rerum fama, quae initio clarissima, ita paulatim euanescit, ut abeat tandem in tenebras;
 opusque adeo historia est, quae facilius instar illam producat. Agnosco porro neminem esse, cui, potius, quam mihi id munus incumbat; quando nemo est, cui propter diuturnum, familiarémque conuictum, ille potuerit esse perspectior. Accedit, quod licuit à morte ipsius ea interrogare, & cum ex variis epistolis, tum ex aliis monumentis in-
 telligere, quae non fuissent cuius perinde in promptu. Factum certè est ob hanc causam, ut cum tot viri eximij huiusmodi Spartam ornare potuis-
 sent, nihilominus tecum conspirarint, meque sollicitauerint, ut illi admouerem manum. Postremo quod spectat ad Patriam, ad hanc aetatem, ad*

posteror, iniurius sim prorsus, si opus detrectem. Et patria quidem; nam species quadam impietatis videretur, si obduci paterer lumen, quo, ut hactenus coruscavit, sic merito in posterum gloriari mirifice potest; si negligi id ornamentum, quo pronunciare penè licet nullum unquam aut existisse, aut existitum magnificentiùs. Quippe non tota modò Europa, sed Asia quoque, & Africa, ac ipse etiam novus orbis conuersos eius occasione in hanc prouinciam oculos habuit; nemòque usquam fuit eruditus, bonarumve appetens rerum, qui non aut illum conuenire, aut cum eo certè agere per literas non affectàrit. Tum presenti quoque atati; siquidem eius interest, ut qui sequentur, intelligant non fuisse effatam in ipsa naturam; potuisseque eam virum magnum, insignemque producere, qui futuris post saculis proponi in exemplum posset. Magna certè eius laus est, quòd videatur in illo vno collegisse omneis omnium seculorum virtutes; possitque adeò sese efferre, quòd in ipso expresserit quicquid præclarum de Pandora fabulosa atas confinxit. Denique ipsis posteris; quoniam incundissimum ducent virum illum cognoscere, cuius singulari affectui sese plurimum debere agnoscent; cuius fortassis imitatione sic tenebuntur aliqui, ut quasi Phœnices enasci ex illius cineribus non sine fructu aliquo generis humani

contendunt. Quod superest, vitam describam,
 qua narrationis simplicitate, non coloribus quasi-
 tis spectetur. Alij, si videbitur, comptiore cala-
 mo expolient, ac historia forma donabunt quos ipse
 commentarios, ceu rudera quadam, digessero so-
 lum, veluti annaleis, in temporum seriem. Siqui-
 dem mihi animus est agere Damidem duntaxat,
 & si qui fortè caussabuntur delectum mihi non ha-
 bitum, minima quaque obseruitanti; dicam quod il-
 le, etiam micæ, quæ ex mensis Deorum sunt, di-
 gnas videri, quæ colligantur. Fortè neque res iis
 erit ingrata, qui, similes tui, pernosse magnos viros
 student, non ob actiones solum illustreis, publicè quæ
 exhibitas; sed ob obscuras etiam, & quas euulgari
 ipsimet noluisent. Quippe quæ in oculis omnium,
 & cum claritate geruntur, nescio quid persona-
 tum habent; unde quidnam intus, & sub cute la-
 teat, internosse perarduum sit; quæ verò procùl ab
 arbitris, & sine fama captatione, atque idcirco si-
 ne fuco, ereptæque personæ fiunt, ea demùm homi-
 nem ostendunt; quod discernere est operæ pretium.
 Id scilicet animos addit ad imitandum præclare ge-
 sta, cum etiam in heroibus nonnulla deprehen-
 dimus infirmitatis nostræ indicia; neque perin-
 de desperamus eorum virtutes assequi, ac dum
 grandia quaque duntaxat narrantur. Sin verò
 nonnulli requirent illustriora quadam, & am-

pliora facta, quàm commemoraturi simus; nò-
 rint oportet non omneis posse Scipiones esse, aut
 Maximos, ut bella, triumphosque recordari va-
 leant. Abundè illi merentur laudem, quos cùm
 fortuna ad summas opes, atque dignitates non eue-
 xerit; maiores tamen animos gerunt, generosiore
 virtute sunt, ac molliuntur grandiora longè, quàm
 pro conditione sperare quis possit. Talis porro Pei-
 reskius fuit, quem exhibituri non sumus, nisi ut vi-
 rum, qui fuerit gradus, censûsque Senatorij; &
 qui se tamen ita gesserit, ut se fecerit quolibet en-
 comio, ac panegyri superiorem. Videlicet sumus
 duo quedam toto decursu prosequunturi, ob qua com-
 mendatus summoperè est; alterû eruditio magna,
 ac omnigena, cum ardore sciendi inexplebili: alte-
 rum cura indefessa promouendi arteis ingenuas,
 cum regia planè erga omneis literatos munificen-
 tia. Ex hisce verò capitibus periculum sanè non
 subest, ne efferre quidpiam hyperbolicè videar; le-
 quar enim in ipso ore eruditorum virorum, apud
 quos ille inclaruit, quique tantum abest, ut me
 causentur fuisse nimium, quin vereor potius, ne par-
 cum nimis exstitisse sint conquesturi. Sed ne harere
 heic videar, patere, per optime Princeps, ut qua nos-
 se desideras, deinceps enarraturus, exordiar à ma-
 ioribus: ut vel ex eo capite constet, cur illum aucto-
 res constantissimè Nobilissimum vocitarint.



DE VITA
PEIRESKII
LIBER PRIMVS.

PRINCIPIO genus Peireskio fuit ex
perantiquo illo Fabriorum, seu Fabri-
ciorum stemmate, quod Pisis in Italia
oriundum, translatum est in hanc Pro-
uinciam, à tempore vsque Diui Ludo-
uici, ac partus salutiferi anno supra millesimum du-
centesimo quinquagesimo quarto. Memorant enim
Hugonem Fabrium inter Pisanos nobiles militiæ illi
sacræ adscriptos, fuisse à Sancto Principe in Prouin-
ciæ oras deductum, cum ex Oriente rediens appulit
Arcas, seu Hieras, Olbiam scilicet antiquorum. Il-
le cum morbo detentus fuisset, & à discedente Re-
ge cominendatus, ea fuit apud viros primores aucto-
ritate, & gratia, vt contententium de arcis, & ciui-
tatis dominio dissidia composuerit, ductaque deinceps
ex stirpe Sollerienti coniuge, fixam Areis statue-
rit sedē. Loco deinde cooptato in patrimonium Prin-
cipis, præfectus ipsi legitur anno sæculi illius septua-

DE VITA PEIRESKII

gesimo à Carolo primo Comite Prouinciæ, ac Rege Siciliæ, cui non minus fuit, quàm Ludouico germano carus. Cœpit subinde ciuitatem, castrumque variè communire; sed absoluit opus Aycardus eius filius, relicta ex nomine suo vni portarum nuncupatione, quæ etiam - num vocabulo corrupto dicitur Cafabria. Natus Hugoni præter Aycardum filius alius nomine Paulus, qui fuit à Carolo secundo maior Massiliæ Iudex creatus: itémque alius nomine Guillelmus, qui ex variis peregrinationibus redux, auctor fuit Xenodochij, in quo peregrini cuntes, redeuntésque ex Palæstina curarentur. Sed, vt compendium faciam, successit deinceps nobilis progenies, armis, literis, pietate conspicua; cum subiecto ipsi per propagines, ætatésque varias dominio Regij, Spinosæ, Gramusæ, San-Juliani, San-Ianeti, San-Laurentij, Lauernæ, Calasij, Petrisci, Valauesi, Riantij. Enimuerò taceri non debet abnepos Aycardi Antonius, ad quem, & ad Raymondum filium exstant, legunturque apud Nostradamum humanissimæ Renati Regis literæ, cum sese ante ducentos annos ad Neapolitanam expeditionem compararet. Fuerat Raymondus à puero vnà cum Renato in Ludouici secundi aula educatus; natusque est illi, præter Antonium, Amedeus, qui, quòd esset natu posterior, ideo familiæ insignibus, seu Leonis furui in scuto aureo lemniscum coccineum adiecit. Legitur is quoque Arearum præfectus, & Carolo tertio, cui Rex Franciæ breui successit, intimè notus. Ab hocce autem familia rursus in duos ramos diuisa est: siquidem ipsi fuere duo filij, alter Fulco, alter

Guillelmus; ambo & petitiâ armorum, & prudentiâ iuris instructi. Quippe, cùm primùm in expeditione Pedemontana militassent, sese ab ipso reditu excolendo iuri totos addixerunt. Nam Guillelmus quidem natu minor, à magno auunculo Elziario Portanerio Brinoniensi, viro literato adoptatus, concessit iuris discendi causâ Aureliam, & Auaricum; ductâque vxore Aruernate, in ea regione pedem fixit, & gratitudinis ergò insignia Portaneriæ domus assumpsit; in scuto nempe cæruleo fasciâque, & rosas argenteas. Reliquit porrò præter Hugonem iurisconsultum celebrem, filium alium nomine Ioannem, patrem Ioannis alterius, à quo procreatus Ioannes alius parens fuit Ioannis illius, qui iam Libellorum supplicum Magister, heroinas habet germanas, tum Magdalenam Petro Seguierio, per-illustri Franciæ Cancellario; tum Mariam, viro generoso Philiberto Pompadorio Lemouicum Proregi nuptam. At Fulco, ex quo supremus Senatus vnâ cum nascente superiore sæculo Aquis-Sextiis creatus fuit, maxima cum laude causas perorauit, factusque sæpius Prouinciæ procuratoribus Assessor, destinatus non semel fuit ad Ludouicum duodecimum, itémque ad Franciscum primum. Is, Fulconis eruditione, & probitate perspecta, Senatorem esse mero nutu iussit, anno eiusdem sæculi supra trigésimum secundo; & cùm Carolus Imperator immineret Prouinciæ, Annæo Mon-morantio Regiæ militiæ Præfecto consiliarium dedit. Memorabile porrò est, fuisse eum auctorem salutaris consilij, quo Mon-morantius regium Archium in

Baulciensem transtulit arcem: sic enim pretiosa illa tabularia euasere id, quod fuit à Sabaudò deinceps Aqueusi Palatio illatum incendium. Quin-etiam cùm non posset vrbs Imperatoris copiis obstare, secessus auctor ciuibz fuit, & ne quid ex ea subsidij residuum fieret hostibus, ita ad pessundandum cibaria, ceteraque hortari cœpit, vt primus & horrea in puteum, & vasa vinaria, ac olearia in angiportum effuderit. Fulcone defuncto, admissus est Nicolaus filius in dignitate Senatoriam anno sæculi quadragesimo quinto. Innotuit huius quoque virtus non modò Proregi Claudio Sabaudò Teudæ Comiti; sed ipsi etiã Carolo IX. qui Senatu interdicto, missaque in locum illius summorum Iudicum decuriâ, conscriptum decuriæ Nicolaum voluit, & Carolo ipsius fratri, postquàm per expeditionem Corsicanâ copias deduxit, selèque strenuissimè gessit, concessit vltro dominium, & proprietatem Brigantij. Iam, vt accedamus ad Peireskij patrem, reliquit Nicolaus duos filios, Claudium nempe, & Reginaldum. Fuit autem Claudius corpore pusillo, ac infirmo quidem; sed animo tamen planè generoso, atque vegeto; adeò vt ab anno vsque eius sæculi septuagesimo secundo, quo paterna, atque auita dignitate donatus est, magni in Senatu & tota Prouincia fuerit nominis, ac Henrico Engolismensi magno Melitensium Francorum Priori, Proregique eximiè carus. Reginaldus verò innutritus à puero apud Ducissam Ferrariæ Renatam Ludouici duodecimi filiam, cùm illa exigeret senium Montargirij dedit se deinceps iuri excolendo, allectusque est sub-

fidiorum, sacrique patrimonij comitibus, & rationalibus Magistris. Cùm incidissent autem illa heno-
tica factionis difficillima tempora, perstitit constans
vnà cum fratre, in fide Regi debita, & (quod Bernar-
dus Nogaretius Valletanus tum Prorex magni æsti-
mauit) Arearum arcem, atque adco totam illam
oram à Sabaudo desciscere, auctoritate sua curauit.
Porro cùm frater viueret cœlebs, duxit ipse in coniu-
gem Margaretam Bompariam, quæ ex paterna stirpe
equites, & præfides habuit; ex materna verò ad fa-
milias Valleuoriam, Forbinámque attinuit. Fando
verò accepimus fuisse illam forma adeò eleganti, &
composita, vt Catharina Medicea Regum mater,
cùm Aquis-Sextiis inuisceretur à nobilibus scœminis,
ipsam vnã delegerit, quam suo osculo dignaretur.
Is itaque fuit Reginaldus Fabrius, hæc Margareta
Bomparia, quos Peireskius noster parentes agnouit.
Quoniam verò editus est in lucem Belgenferij; ideo
sciendum hoc oppidum situm esse in perangusta, sed
peramœna tamen valle, quam Gapellus fluuiolus in-
terfluens etiam diuitem facit. Distat heinc Tolone,
heinc Areis eodem, quo illæ quoque vrbes inter se di-
stant intervallo; milliarium vt putà prouincialium
trium: & cùm vtrique ad Boream sit, vtrique etiam
aëris bonitate longè præcellit. Fecerat vicinia, vt ma-
iores illi Areis commorantes, tum aliquot prædia in
eo oppido quærerent, tum eò secedentes exciperen-
tur vetere castro, quod nunc temporis iacet dirutum:
scilicet nondum extructa domo præclaris hortis co-
hærente, in quam, vt canalis ex fluuio deriuari tutius,

& vberius posset, Claudius pontem, seu aquæ-
 ductum satis insignem interexstruxit. Natus est ergo
 in memorato Belgenferij castro Peireskii, cum pa-
 rentes eò diuerissent ob pestem memorabilem, quæ
 1580. anno salutis millesimo quingentesimo octogesimo
 grassari tota quidem Prouincia, sed Aquis-Sextiis
 præsertim cœpit. Incidit autem natiuitas in diem
 Decembris anni eius primum, ac horam à meridie
 propemodum septimam. Quod attingo solùm, ne
 videar circa temporis circumstantiam non fuisse satis
 diligens; non verò vt faciam hariolandi ansam con-
 iectoribus, quò iam post viri obitum, certius quàm
 antè, fata retexant. Etenim mirum dictu est, quàm
 multa mentiti Astrologi fuerint, seu annos spectes,
 quibus non vixit; seu vxorem, & liberos, aliâque,
 quibus caruit; seu cætera multa, quæ est consequu-
 tus. Cum parentes porrò aliquot iam annos absque
 liberis exegissent, eam ob causam quamprimum ma-
 ter, grauidam se esse persensit, destinavit proli lu-
 stralem sponsorem, non magnatem aliquem; sed,
 quæ fuit eius pietas, pauperem obuium primò futu-
 rum. Heinc qui pauper primus occurrit, accersitus
 est, fidemque, dum initiaretur, abluereturque pro eo
 spondens à nomine patrui Claudium appellauit. Ve-
 rùm cum patruus superuenisset, etiam aui nomen ge-
 rere illum voluit; vnde, quasi prænomine Nicolai
 imposito, dictus est Nicolaus Claudius. Quanquam
 non modò, cum puer esset, Nicolaus ferè audiuit, sine
 adiuncto Claudij: sed etiam deinceps ætate proue-
 ctus, vt cum est ab auctoribus Nicolaus Faber, seu
 Fabrius,

Fabritius, seu Fabricius appellitatus. Quo loco adnotari potest insignis eruditi viri Ioannis Seldeni æquiuocatio, dum citatum à Baronio Nicolaum Fabrum, qui Præceptor fuit Ludouici XIII. Regis Christianissimi, pro nostro accepit. Præfatus enim in Eadmeri Cantuariensis historiam, & quas Lant-Franci Epistolas Barónius tomo vndécimo Annalium habet, memorans, *Earum, ni fallor, inquit, se agnoscit ipse exemplar accepisse à clarissimo, & doctissimo viro Nicolao Fabro Petrisco Curia Aquensis Assessore dignissimo, atque amico mihi plurimum obseruando.* Et citat quidem Baronius Nicolaum Fabrum; sed *Parisiensem* addit, non *Petriscium*, quod epitheton noster tulit ex montano oppido maternæ ditionis, latine Petrisco, & vulgò *Peiresc*, vnde celebrè ipsi nomen; quod vt debite pronuncietur, nos *Peireskium* inflectimus: non, vt multi, *Petrescium*, *Perezium*, aut simili alia ratione. Cæterum vix erat bimestris, cum ferunt animum maleficam ingressam in cubiculum, proiecisse coram matre securim, quam manu tenebat, aiebatque se reddere; atque ex eo tempore tum ademptam matri vocem, & ploratum infantulo; tum depressum vtrique caput in alterum humerum, ea rigiditate, vt flecti non posset. Addunt patrum, re cognita, vapulare anum iussisse, quæ & ipsa detorto collo sub camino inuenta est; ac illam, cum primum caput extulit, vt satis plagarum esse diceret, renunciasse id, quod fuit, matrem, infantemque valere. Id factum non modò ex aliis, sed ab ipso etiam Peirescio accepi, memorante vt patruus enarrare solitus fuisset. Res planè mira, si veru-

1580. la, cùm deflexerit ipsa caput, ea neruorum contentione euibrare spiritus possit, vt distantis caput perinde defleat, & pari vehementia, qua suam, alterius linguam cohibeat; neque seu caput relaxetur, seu lingua soluatur, donec rigorem ipsa remittens, distentas, sed insensileis veluti chordulas laxarit. Et solent quidem similia multa ad *Cacodæmonas* referri: verum, vtcumque optimus Deus innocenteis infantulos illorum malitiæ permittere possit; vtcumque ipsi ad ea officia, & ad obsequendum miscellis quibusdam animalis se comparent: compertum est tamen magnam eorum partem, quæ commemorantur, fabulosam esse, aut non alio certè niti fundamento, quàm minus solitis quorundam morborum symptomatibus, quibus sunt infantes obnoxij; cùm etiam constet ista præsertim in infima plebe, ac in ipsis agris esse familiaria, vbi minima quæque ansa credulitatem parit, ac fouet. Sesi-qui-anno post, hoc est mense Iunio anni
1582. supra millesimum quingentesimi octogesimi secundi, Kalendarij reformatione memorabilis, natus est illi frater, cui nomen *Palamedes*. Is est, qui deinceps à clientelari fundo dictus est *Valauesius*, ex quo tempore *Nicolaus* quoque cœpit *Peireskii* nominari. Scilicet ad exactam vsque adolescentiam nuncupatisunt nunc *Fabricij*, nunc *Calasij*, quæ fuit etiam patris, patruisque vulgaris nuncupatio ex oppidi *Calati* ditione. Natus *Palamedes* cùm est, aberat pater negotiorum causâ *Gratianopoli*: mater verò altero à partu mense interiit, annos nata viginti duos. Ac superinduxit quidem *Reginaldus* pater aliam coni-

gem, sed quarto-decimo tandem anno. Ea fuit Catharina Vassalla Caradetea, illustri vtrimque progenie, vt cuius maiores ex paterna stirpe inter Achaiae Principes fuissent, ex materna vero attinuissent ad Fliscanos Genuenseis. Vidua tum erat (nupra prius Oliuario de Thulia, ex senatorio ordine) cū superstite filia nomine Marchisa, quae Palamedi postmodum nupsit. Ex altero autem illo matrimonio suscepit Reginaldus cū liberos alios, qui vel in pueritia, vel in adolescentia obierunt; tum superstitem etiamnum Susannam, quam Henricus Seguiranus rationalium magistrorum, & senatorum patrimonialium Praeses primus vxorem duxit. Ad Nicolaum vt redeam, is haud iniuriā Patruum semper, tanquam alterum parentem agnouit. Ille enim suae dignitatis successorem cum destinans, speciale quoddam ingenuae educationis studium assumpsit, ratus scilicet frustrā esse, si quis nascatur foeliciter, nec liberaliter instituitur. Tantō autē magis animatus fuit, vt eius curam gereret, quantō ab ipsis cunabulis gratiorem in corpore pulchro venientem virtutem conspexit. Quippe ablatatus vix fuit, cū genium suum prodidit, nimirū se ad omnia visa, auditāque attentum praebens, ac solitus semper oris gratiā suauitatēque vocis summa à nutrice, à parente, à patruo, à magistro, à quibuscumque poterat inquirere quid, quomodo, quorsū vnāquaeque res foret. Sic cū litterae primum monstrarentur, & libros, chartasque praemanibus habere gestiret; percontabatur frequenter ecquid argumenti contineretur in iis; & quoniam indignē ferebat, si

1582. aliquando responderetur, id superare ipsius captum, confingendum erat, quod illi cum voluptate recitaretur. Leuia hæc profectò, si ipsa spectentur; at non contemnenda tamen, si ad ætatem respexeris, & arbores etiam florentes, gemmantesque considerâris. Admirationi certè fuit viris ætate maioribus, qui & mihi illa narrârunt, & asseruerûnt, ipsum nihil vnquam,
1587. quod puerile foret, sapuisse. Septennis cûm esset, & vnâ cum fratre institueretur Brinoniæ, vbi tum curia subsidiorum, rationûmque, ob pestem Aquis-Sextiis perseuerantem commorabatur, erudiri expetiit in San-Maximitano collegio, quod litterarum studiis efflorescere fama erat. Non tacendum verò quòd patri persuasit, vt fratrem sibi permitteret, tanquam inferiorem ætatem, & iuniora eius studia curaturo. Neque prætereundum, fuisse illum fratri ex hoc tempore præceptoris simul, & parentis loco; fratrémque illum tanquam parentem, atque præceptorem reueritum fuisse. Anno elapso, ac iam peste San-Maximini suborta, euocati sunt Belgenserium, & rursus post annum Aquas-Sextias, vbi patruus tum versabatur. Inardescens postea à morte Henrici III. ciuilibus bellis, Auenionem missi sunt, vbi quinquennio integro in Collegio Patrum Societatis Iesv studuerunt. Memorare autem Peireskii solebat debere semultum Antonio Colombatio, & Andrea Vallerio, quos supremos habuerat litterarum humaniorum professores. Dicebat enim eos faciliè solitos quidpiam ex aliis exercitationibus relaxare, vt dederet se maximè peruolutandis historicis, studio interea

poëſeos & linguæ Græcæ non neglecto. Ij nempè 1590.
gaudebant non tam opus eſſe greſſum illius regere,
quàm eminùs viam demonſtrare; laudandi, quòd
nobile pectus ea ſeruitute non opprimerent, qua ple-
rique aut odium rerum bonarum contrahunt; aut hu-
milibus nimis aſſueſcunt. Referebat etiam quàm ſu-
blimes adderentur animi, cùm illi præterea palàm
commendarent, quòd totam Iuſtini hiftoriam, to-
tàmque Ouidij Metamorphoſin teneret ad vnguem;
nec faceret finem conſulendis libris, ex quibus inno-
teſcere ſingulares rerum circumſtantia poſſent. Eam-
obrem certè auerſabatur & ludos, & ſpectacula; vt
legendo, excerptendòque ſingularia quæque incum-
beret totus. Immoderatiùs tamen, vt puto; relaxan-
dus enim animus per vices, nec ſtatim à paſtu con-
tendenda mens; quod cùm ſtudioſorum iplius mode-
ratores non ſatis cauerent, effectum eſt, vt ſtoma-
cho, capiteque doluerit non ſemel. Exegerat iam
penè annum ætatis quintum-decimum, cùm Aquas-
Sextias rediit, illicque anno integro Philoſophiæ 1595.
operam dedit. Voluit patruus, vt interea edoceret
arma tractare, equos regere, tripudiis membra exer-
cere. Verùm quia ſuccidere gratiores quaſdam ho-
ras oportuit; ideò obſequutus eſt quidem; ſed niſi
præſentibus illis, à quibus erudiebatur, retractare ni-
hil voluit; adeò quidpiam vel legere, vel ſcribere,
vel audire ſatius ducebat. Per ea tempora oblatum
fuit patri numiſma aureum Arcadij, quod Belgen-
ſerij fuerat rèpertum. Id ipſe illicò popoſcit, & cùm
circumſcriptas literas legiſſet, Imperatoriſque no-

1595. men adnotasset, ad patrum statim retulit, qui illi gratificaturus, & duo alia numismata, & libros etiam, quibus vberius erudiri posset, concessit. Atque ex hoc quidem tempore exarsit, seu ignis in siluis, curiosissima eius mens; avidè enim conquirere, atque congerere occcepit quotquot antiquos potuit nummos, singulis legendis, ac interpretandis acerrimò incumbens studio: qua occasione cœpit etiam inscriptiones omneis siue sepulchrales, siue alias perquirere, & studiosè obseruire. Destinatus est deinde cum fratre Turnonem, ut sub patribus Societatis IESV Philosophiæ curriculum, quod appellant, absolueret; fratre adhuc in studiis humanioribus consistente. Cùm verò studio Matheseos præsertim inardesceret, ardentè arripuit quam illic docebant Cosmographiam, certus historiam sine illa, ac sine Chronologia penitus obscuram, imperuiamque esse. Sic post usum Sphæræ, addidit etiam usum Astrolabij, literis repetitis scribens, & expostulans aduersus quendam artificem, qui in se pridem receperat Astrolabij fabricam, nec ipsi tamen operam satis diligentem nauarât. Nihil interea remittebat neque ex studio rei antiquariæ, cuius causâ Petro Royero professorum vni fuit eximie carus; neque vniuersè ex ipsis humanioribus studiis, quæ, ut à fratre excolebantur, tanquam magister attendebat. Sed ad ista nēpe ut sufficeret, studere solebat in plurimam noctem. Euenit proinde, ut partim ex natua constitutione, partim ex assiduo labore, prolixisque vigiliis debilitatè stomachi antè contractam adauxerit, pulueremque
- 1596.

ideò vsurpauerit, quem literis ad patrem datis appellauit digestiuum. Quia literarum incidit mentio, idcirco adnotari potest illum ex eo iam tempore scripsisse omnia accuratè, stylo videlicet tentato per repetitas schedulas, quæ & mihi incidere in manus, & fidem fecere non fuisse illi vnquam phrasim luxuriantem, aut immaturam. Dixit nimirum semper quod voluit communibus verbis; tametsi non sine delectu, nec sine ea gratia, & vrbanitate, qua testando benevolentiam, obseruantiam, gratitudinem; qua excusando, commendando, gratulando, ceteraque huiusmodi præstando mirificus fuit. Nam ad nouercam, exempli gratiâ, ob quædam donariola, Fœlices videmur, ô mater, quod beneficiis tuis cumulamur: sed infœlices tamen, quandò sic illis obruimur, vt agnoscendo impares simus. Talia porrò dum scriberet, reponebat interea quæ munuscula poterat; nempe ab ea vsque ætate vinci benefaciendo. nescius, nisi quâ prorsus impotens erat. Ita ad amicum coætaneum scribens, ingratitudeque iam tum detestatus, Mihi ipsi, inquit, intulero manus, si vel minimæ in officio negligentia coargui possim. Eodem spectat, quòd præceptorum sollicitudinem commendabat, vt à patre, ac patruo honoraria promissis longè vberiora consequerentur. De studiis vt iterum dicam, non tulit patruus, vt triennium Philosophiæ impenderet: sed, exacto Turnone anno, reuocatum voluit Aquas-Sextias, vt destinatus Senatui Iurisprudentiæ initiaretur. Id etiam expetierat, cum ille adhuc Turnone foret; scribens scilicet, vt

1597. maturè Rubricarum Enchiridium haberet præ manibus: verùm ipse, vt Iuris studium tantisper adhuc declinaret, hunc prætextum quæsierat, Volueras, patruè, vt operam arti oratoriæ sedulam nauarem: si per teliceatigetur, faciam, quoniam heic possum percommode, ac initiabor prudentiæ Iuris, cùm ex hac vrbe discessero: tu præscribe tamen quod factò sit opus; si perstes enim, nihil mihi fas, nisi vt iussa capeßam tua. Itaque domum euocatus, Iurisprudentiæ nomen dedit sub Francisco Fortio Andino, qui in Aquensi Curia aduocatus, & docendi iuris oppidò peritus, callebat prætereà, si quis alius, elegantiores literas. Is Peireskij parentibus carus cœpit magnâ curâ Institutiones prælegere; ille verò tam occasione huiusmodi studij, quàm, ne cœptam eruditionem omninò intermitteret, texere suo Marte cœpit Imperatorum seriem, à quibus leges fuerant latæ. Texuit & seriem Consulum, magistratuumque cæterorum, conquisitis vndique numismatibus, vt & facie, & rebus gestis Latores legum agnosceret. Sic habere etiam curauit icones celebriorum Iurisconsultorum, vt cùm in illorum responsa, interpretationesque incideret, fieret memoria tenacior ex concepto cuiusque vultu. Erat tum porrò Aquis-Sextiis Petrus Antonius Rascasius Bagarius rei antiquariæ peritissimus: postea quippe Henricus Magnus, propter famæ celebritatem, illum accersiuìt, & cimeliarchio suo præfecit. Ipsigitur succisuiis horis Peireskij frequens aderat; vt sciscitaretur, edocereturque; ille verò sagacitatem, crudi-

eruditionemq; miratus, & coniunctam modestiã cum
 discēdi ardore amicè complexus, celare nihil poterat;
 actum varia cimelia diebus variis demonstrabat, tum
 prolatis libris coniecturas suas, explicationesque ful-
 ciebat, tum singulareis Peireskij interpretationes &
 admittere, & commendare non grauabatur. Anno
 superato, Auenionem rursus concessit, vbi priuatus
 illi doctor Petrus Dauid natione Burgundus, qui
 fuit deinceps Semurij capitalis Profenscallus. Huic
 quoque præter peritiã juris suauiores Musæ propi-
 tiæ erant; vnde faciliè ferebat Peireskium interpone-
 re iuris studio rerum antiquarum peruestigationem.
 Ea de caussa non infrequenter cum Bagarrio de re
 nummaria, & de rebus aliis selectis per literas egit.
 Perscripsit aliquando ad illum singularia quæque in
 Romei cuiusdam Arelatensis cimeliarchio obserua-
 ta, misitque inter cætera obtentum pro eo cætypum
 ex eleganti iaspide Deianiræ per Nessum raptæ. In-
 terdum etiam recuperata egregia Neronis, Vitelli-
 que numismata misit ad patrum, exorauitque, vt
 ea exornari perinde curaret, ac exornatum Hercu-
 lem, Agrippinamque iam habebat. Rogauit quo-
 que, vt ad se anulum quemdam mitteret, com-
 mutandum, vti sperabat, cum Corneola, seu Ony-
 che quadam, quæ & præstantissimi, inquit, artificis
 est, & incomparabilis, sed apud possessorem incom-
 perti pretij. Memoro ista ex pluribus, vt quis ex illo
 iam tempore circa hæc fuerit, melius noscatur. Cæ-
 terum qui curiosam eius indolem quammaximè fo-
 uuit, Petrus Antonius Ghibertus Neapolitanus fuit,

1598. quo Auditore Cardinalis Aquaiuia tum utebatur. Is enim ipsi rara quædam, ac non prius visa monstrauit; & inter libros alios, etiam quosdam Huberti Goltzj, quos nondum habuerat, in plurimos dies commodatò dedit. Quin-etiam mentem viuidam, sagacemque perspicuens, hortatus est, vt in Italiam iter institueret, habiturus, Romæ præsertim, vnde explere animum posset. Agebat tum annum ætatis decimum octauum; cùm de profectiōe in Italiam cogitans, natandi artem addidicit. Ante id tempus solitus erat se per æstatem abluere in minore Rhodani alueo, qui est Barthalasix insulæ ad ortum, & in quem se Sorga fluuiolus exonerat. Deprehendit autem aliquando fundum, quod aliàs æquabile, & molliusculum obseruârat, induruisse in globulos, moleculasve, qualia oua sunt, cortice detecto, vbi coctiora fuerint. Id demiratus & collegit, & detulit aliquot domum, vt præceptori ostenderet, & facti causam sciscitaretur. Miraculum verò adauctum, vbi post dies non ita multos, cùm rediisset ad fluuium, deprehendit moleculas induruisse planè in flumatilis lapides, idemque etiam obseruauit contigisse iis, quas asseruabat repositas domi. Atque exinde quidem cœpit circa lapidum generationem philosophari; sed res dicenda posterius est. Tandem verò cùm desiderio inuisendi Romam flagraret, veritus tamen ne parentes id abnuerent, petiit duntaxat Patauium mitti, vbi celeberrima iuris studia essent. Tacitè autem cogitabat proximè esse annum secularem, veniarumve solemniū; ac se ipsius oc-

casione posse Patauio Romam adire. Incipiebat tum 1599, fluere annus superioris sæculi nonagesimus nonus, cum Cardinalis Ioyosæus discedens in Italiam, erat Ferrariam concessurus. Videlicet Clemens octauus ditionem caducam ex morte Alphonsi secundi Attestini recepturus, eò discesserat; eaque de causa Cardinalis non Romam, sed illuc tendebat. Itaque Peireskius valdè exoptarat se in ipsius comitatum vnà cum fratre dedere; at parentibus secus visum. Nam constituerunt quidem fauere laudato desiderio; sed censuere tamen expectandum autumnium, tum vt tempestas foret moderatior, adolescentésque potiùs hieme, quàm æstate succedente, alieno cælo assuescerent; tum vt commodiùs de necessario apparatu prouideretur. Quarendus porrò primùm fuit, qui studia & mores eorum regeret; tametsi ea erat vtriusque, & ipsius Peireskij præsertim moderatio, atq; prudentia, vt videretur honori potiùs, quàm necessitati ductor designandus. Itaque delectus est ipsis Paulus Gudanes Fonuiuius, nobilis è Bearnia vir, qui ex Italia, Polonia, Germania, aliisque regionibus redux, multorum iam hominum mores, ciuitatésque nouerat, quémque Belleuræus Cancellarius in proximos annos filio destinarat. Discessere ergo cum illo sub Septembris initium, prætulitque Peireskius soluere ex Cannensi portu, tum vt antiquum Monasterium in Lerone insula proximè situm inuiseret; tum vt priùs occurrentia ad forum Iulij monumenta antiquitatis coràm lustraret. Cum appulissent Genuam, ac spectassent abundè satis palatia illa magnifica, fuit quidem præ-

1599.

tercà superandus mari Veneris, ac Ericis portus; sed voluit tamen Peireskiius terrâ deinceps contendere, tum quòd ex mari malè haberet, tum quòd lustrare curiosè vellet, quæ animo conceperat. Videlicet itinerarium suo sibi marte apparârat, statuerâtque non sic ex vrbe in urbem rectâ pergere, quin, si heinc inde aliqua notatu digna memorarentur, diuertere illuc pro libitu posset. Heinc sese nunquàm in extraneorum comitatum sponte adhibuit, & ubi se alij ipsi adiunxerunt, urbana quadam excusatione seijunctionem breui faciendam præuenit. Parùm portò abfuit, quin eæ digressiones, ipso statim initio, illi pessimè cesserint. Cùm enim ad fodinas Massæ inspiciundas desleckeret, ductorem se vnus extorrium, quos Banditos vocant, sic præbuit, vt nisi maturè fuisset agnitus, deduxisset planè in carnificinam. Commoratus nonnihil Lucæ, spectare Pisis voluit insigne cimeliarchium: non potuit tamen, nisi postquam Liburnum inuisit, ac in eam urbem rediit. Memini verò, inter cætera, quæ ibi visâ commemorabat, admiratum illum Corallij plantam, quæ humano cranio supercreuerat: quod adnoto, quia hæc deinceps fuit illi non postrema causa, vt adesset coram in expiscatione Corallij, de qua suo postcà loco dicendum. Vt paucis loca alia perstringam, iter exinde fecit Florentiâ, Bononiâ, Ferrariâ, ac ubi fuit paucis diebus immoratus Venetiis, sedem Patauij denique fixit. Illeic paucos menseis vix fuit, cùm ipsius virtus apud vniuersam Academiam inclaruit. Quippe tametsi vnâ cum fratre professores iuris cir-

cumstaret frequens, ac nominatim Iacobum Gal-
 lum, Bartholomæum Siluaticum, Ioachimum Scatis-
 num, Ottonellum Discalcium: nihilominus alios
 etiam, quotquot aderant, eruditos viros & conuenit,
 & facile in admirationem traxit. Cæteros inter, Tho-
 mas Segetus, illenempe, quem Lipsius centuriâ ter-
 tiâ Epistolarum commendatum iam fecerat, sic suam
 ipsi beneuolentiam, obseruantiamque significauit,
 vt inscriptum prius hoc voluerit, GENIO GALLIÆ
 NARBONENSIS, IN GENIO, ET MATVRÆ, IM-
 MATVRO ÆVO, NICOLAI FABRICII VIRTU-
 TI SACRVM. PATAVII PRID. NATAL. CHRIS-
 TI, CIO. IO. IC. Vir autem eximius Erycius Putea-
 nus, non Lipsio modò collaudatus, ac postmodum
 datus successor; sed iam tum etiam destinatus, qui
 Mediolani ageret & Chronographum regium, &
 artis Oratoriæ interpretem primum, inscriptione ista
 præiuit, LARE SECRETO. CUI GRATIÆ ADO-
 LESCENTIAM ORNANT, ERVDITIO IUVEN-
 TAM, PRVDENTIA SENECTAM; IS ADVLE-
 SCENS VOLVPTATEM AMICIS CREAT, IUVEN-
 NIS HONOREM PATRIÆ, SENEX VTRVM-
 QUE SIBI. TV VERO, NICOLAE FABRICI,
 CVNCTA SIMVL AMICIS, PATRIÆ, TIBI, IN
 SPE ÆTATIS, ET FLOREM IUVENTÆ, ET
 FRVCTVM SENECTÆ PROFESSVS. PATAVII
 ∞. IOC. KAL. FEBR. Atque hosce quidem re- 1600.
 fero è multis. Cùm verò in se omnium ora, oculós-
 que conuerteret; notissimus sanè, & carissimus po-
 tissimum fuit laudatissimo illi Ioanni Vincentio Pi-

1600. nello, qui origine Genuensis, & patria Neapolita-
 nus, eam ciuitatem delegerat, in qua tranquille æ-
 uum degens, totum se bonis artibus, literisque in-
 genuis promouendis consecraret. Is videlicet Bi-
 bliothecam instructissimam apparârat, rerumque
 omnium exquisitarum promptuarium instruxerat;
 ac æui illius literatos omneis, quâ propè quâ pro-
 cûl, si quid libris, aliisve rebus opus haberent, ad-
 iutabat. Callentissimus ipse rerum, & excitabat om-
 nium studia, & fores suas colloquiis, consuetudinî-
 que eruditorum virorum tam aduenarum, quàm in-
 digenarum apertas habebat. Testimonium illi dixe-
 runt & Lipsius, & Scaliger, & Thuanus, & Casau-
 bonus, & Pithœus, & quis non ex laudatis viris?
 Itaque, talis vir cûm esset, deperit statim Peireskij
 genium, tanquam sui simillimum, admiratûsque,
 & reueritus in adolescente est adultam iam, ac penè
 maturam virtutem, & eruditionem. Superfunt certè
 schedulæ variæ, quibus ad illum missitatis, testatus
 est summam familiaritatem; nunc variè consultans
 circa numismata, circa rerum gestarum loca, circa
 responsa danda Vrsino, Velfero, & aliis: nunc gra-
 tias agens ob varias interpretationes rerum, loco-
 rumque apud auctores difficilium, ob communica-
 tos libros, ectypos, apographa, alia: nunc vicif-
 sim mittens, si quando aut Romæ, aut aliundè ac-
 cepisset libros, cimelia, inscriptiones, literas; nunc
 inuitans ad cognoscendum, colloquendum, spe-
 ctandum, ferendum iudicium, & id genus cætera,
 quæ recensere molestum foret; ne quidpiam dicam.

de literis, quas ad quadraginta vsque, dum ille Venetiis, Florentiæ, aut Romæ abesset, perscripsit, omnibus familiarissimas, & singularis beneuolentiæ testificatione plenas. Commencabat autem Peireskius tertio quoque mense Venetias: tum vt necessariam pecuniam, iuxta nummarias tesseras, à nummulariis exigeret; tum vt viros doctos, litterarumque amantes, veluti Paulum Sarpium, Dominicum Molinum, & complures alios conueniret; tum vt nihil, quod foret pretio, raritateve in ea ciuitate commendabile, sineret inuisum. Quam quidem ad rem eximie fauebat egregius Christianissimi Regis nomine Orator Philippus Canaius Fraxineus; cum ipse quoque sibi interea pararet amicos, quorum auctoritate nihil fieret imperuium. Præcipuus in illis fuit Fridericus Contarenus Diui Marci procurator, qui, cum Musæum haberet instructissimum, illius tamen pretium non nouit, donec Peireskius demonstrauit quidnam, & quanti æstimandum vnumquodque cimeliorum foret, quid inscriptiones Græcæ tam numismatum, quàm marmorum significarent, & id genus similia, ex quibus singularem viri beneuolentiam est consequutus. Neque verò ipsius modò, sed & totius etiam familiæ: ex quo intercessit illa cum Angelo Contareno viginti post annis agente in Gallia Reipublicæ Oratorem necessitudo; & cum Vincentio Contareno, qui sex annis post librum variarum lectionum edens, *E Gallia vsque*, inquit, *nobilissimus, & cum iuris, tum antiquitatis totius egregie peritus Nicolaus Fabricius me sibi peramicè monendam*

1600. *putauit.* Prætereo Ioannem Mocenicum, cui fuere oppidò quàm-rara; prætereo Bembum Equitem, cuius vniuersam penè rerum antiquarum suppellectilem à Cardinali vsque Bembo deductam coëmit: prætereo Patriarcham Aquileiensem, in cuius cimeliarchio memorabat se obseruasse ad trecentos vsque Cameos perraros: prætereo & alios complureis. Refero solùm quod Puteanus, cùm Venetiis foret, ad Pinellum scripsit xi. Kal. Iunij eâ Epistolâ, quæ edita est in Promulsæ octogesima secunda. *In ædibus*, inquit, *Scaramelli fui: Septumia monumentum vidi, etsi penè frustra: ita similiter omnia expressa, ut nesciam, me hercules, industriam, an memoriam Fabricij nostri, an utramque debeam admirari, qui tam feliciter in summa festinatione ipse pinxit, aut feliciter pingentis postea, ac reformantis manum direxit.* Exinde nempe colligitur, quàm solers foret, ac diligens in singulis obseruitandis. Cæterùm Venetias profectus sub finem Augusti, ardorem tandem explicuit, consiliùmque cepit concedendi exinde Romam, quòd tametsi Porta-Sancta aperienda, & Iobelæi celebritas inchoanda non esset, nisi sæculi, atque adeò anni sequentis initio: existimaret tamen, si quos illeic mensis præoccupando transigeret, haud malè collocatum iri. Nôrat aliunde fore, vt breui celebrarentur Florentiæ memoranda sponsalia inter Henricum Regem Christianissimum, & Mariam Mediceam nunc Reginam matrem: neque volebat committere, vt à se coràm non spectarentur. Itaque postquàm Patauium scripsit, ac specialiter ad Pinel-

Pinellum, inscriptiones, aliáque mittens, & simul rogans, vt literas ad familiareis Romam daret; discessit initio Septembris, lembo conducto Ferrariam, aut certè Francolinum vsque. Non peruenit autem Florentiam ante diem mensis vigesimum, quòd vbiunque aliquid spectatu dignum occurreret, quantum ad illud peruidendum opus foret, commoraretur. Constitit verò, retardatusque Bononiæ potissimum est, quòd Iulius Cæsar Velius, qui credebatur hausisse totam antiquitatis notitiam, suauis illius congressu captus, detinere ipsum plusculum voluerit. Neque verò se continere optimus senex potuit, quin de sua felicitate in cognoscendo Fabricio, literas calidissimas, mirisque elogiis plenissimas daret. Calidissimas certè eas dixit Pinellus, commendans aliunde, quòd Fabricius ex iis non esset, qui peregrinando nihil aliud, quàm cursitant, quibùsque, iuxta Senecam, illud evenit, vt multa hospitia habeant, nullas amicitias. Accedens Florentiam, habuit aliquas à parentibus literas, ac, inter quasdam commendatitias, reperit speciales Caroli Lotharingij Ducis Guisij, & in Galloprovincia Proregis, ad Nicolaum Brùlartum Sillerium, qui fuit deinceps Regni Cancellarius, quique tum Regius Romæ Orator, eò venerat, ad sponsalium celebrationem. Quamobrem ille Peireskium, fratremque accitos in familiam voluit, vt suis sub auspiciis omnia liberius contuerentur. Præter verò celebritatem, auidè imprimis spectauit Bibliothecas illas insignis, in quibus agnouit, & penè dicam, adorauit tum magnorum Principum, tum virorum eruditorum, à

quibus bonæ literæ restitui cœpère, vestigia. Nihil speciatim dico de Pandectis, quos, in Palatio magni Ducis religiosissimè licèt asseruatos, curauit tamen inspicere; securus nullum antiquitatis monumentum illustrius in litterario orbe exstare. Amicos quoque illeic parauit; sed, quantum recordor, nullum constantiorem, quàm Richardum Richardi, studiosum plantarum, atque marmorum; qui ipsum quoquo-versum ad opera publica, hortosque deduxit. Mense transacto, Senas petiit, vbi salutare potissimum voluit Celsum Cittadinum, qui tunc habebat præ manibus tractatum de Origine, progressuque Latinæ, & Italicæ, seu vulgaris Linguae. Inde discedens, Romam tandem sub finem Octobris peruenit. Romæ porro dici non potest quàm citò fuerit notissimus; non modò, quia iam Pinelli, aliorumque literæ celebre nomen fecerant; sed maximè etiam, quia cum primùm viris in ea vrbe eruditis cœpit congregi, ingentem sui admirationem, atque amorem conciliauit. Prolixum foret recensere quos eximios viros coluerit, à quibus, ob lumen ingenij, & temperatissimos mores, magni habitus fuerit: sed, cum sileri omnes non possint, commemorandi imprimis sunt magni illi duo Cardinales, Baronius, atque Bellarminus. Ille nempe obstupescerebat, cum de insertis in Annaleis inscriptionibus, aliisque rebus ad historiam abstrusorem spectantibus, edifferentem coràm audiret. Ecquid putas verò, cum ostendit gemmas, numismatæque varia, quibus Basilidiani, Valentiniani, alique hæretici inscribere soliti erant vocabula barbara opinionibus

fuis obtegendis? Collegerat nempe complura, ad illu-
strandum, quod ille in secundum tomum coniecisset
ex Amethysto Fuluij Vrsini, circa vocem ABPAΞAC,
qua Basilidiani intellexêre summum Deum, conti-
nentem Angelos septem, cœlorum septem præfides;
ac præterea eorum trecentas sexaginta quinque virtu-
tes, iuxta anni dies; idque ob septem literas, numera-
lêmque earum valorem (iunctis scilicet numeris, pro
ordine vnus cuiusque in alphabeto literæ) & id genus
similia, quæ deinceps quoque ad Natalitium Benedi-
ctum literis exposuit. Bellarminus verò tum eadem,
tum alia accipiens circa hæreses, veterêmque histo-
riam totam, hærebat quid magis probaret, an sagaci-
tatem in peruestigando, an solertiam in coniiciendo,
an iudicium in eligendo, an memoriam in referendo,
an lepôrem in explicando. Meritò autem lenissimis
eius moribus capiebatur: nam, vt omittam cætera,
confidentem in media plebe auditorem ferè habebat,
quoties suos paræcos pro concione erudiret, familia-
ritérque institueret. Dicendus deinde Iacobus Sir-
mondus, inter homines Societatis IESV iam tum
etiam clarissimus: arctissimam enim cum illo amici-
tiam iniit, nihilque studiorum non commune habuit.
Dicendus Lælius Paschalinus, cuius cimeliarchio spe-
ctabilius quicquam non fuit, quisque illius eruditio-
nem ita suspexit, ita amauit indolem, vt aliquando co-
gitârît, ac volücrit pretiosa quæque tradere, quæ ipse
secum absporraret. Dicendus Fuluius ille Vrsinus,
cuius nomine inter viros antiquariæ rei studiosos
maius, celebriúsque nullum est, quisque ex perscriptis

1600. à Pinello interpretationibus, expetierat illum nosse perardenter. Dicendus Philippus Pigafetta, ad quem cum Pinellus initio non dedisset litteras, mirum quantâ commendatione obliuionem compensârit. Dicendus ille ipse Ghibertus, quem Auenione iam no-uerat, quique ad spectandum res varias ipsi deducendo se comitem præbuit. Dicendus, qui etiam cum variè deduxit, Paulus Gualdus, cruditus Vicetinus, qui in Pinelli contubernio ipsum miratus Patavij, Romæ etiam obstupescēbat. Dicendi Petrus Stephanonus, Dionysius Octavius Sada, & vniuersè quotquot fuēre in vrbe eruditi viri, & bonarum artium, literarumque amantes. Sed & reticendus non est Arnaldus Cardinalis Ossatus, Regia negotia tum Romæ curans, vir eruditione, prudentia, integritate, suauitate morum eximiè conspicuus: qui consuetudine Peireskij exfatiari vix vnquam potuit, neque illum vnquam abs se, dum inuiseretur, non ægrè dimisit. Non reticendus Abbas Montanus, Archiepiscopi Arelatenfis patruus, qui virtutis illius potius, quàm Nepotis commendatione, in perpetuum propemodum contubernium adscitum voluit. Iam neque dici faciliè potest, quàm vehementi studio vniuersa antiquitatis monumenta peruestigârit. Imprimis enim desiderauit situm Urbis cognoscere, & regiones, quas fuit complexa. Visit montium vestigiis, adeò depressos miratus est, quos putârat adeò sublimes. Obstupuit inter cæteros Palatinum summè desertum, quo nullus olim frequentior. Disquisiuit, si fortè posset intelligere, aut subodorari, quâ fuissent Pomerij fines tam à Regi-

bus, quàm ab Imperatoribus prolati; & cùm ad portas, viàsque omneis diligenter attenderet, explorauit tamen præsertim Aureliam, propter eius viæ reliquias, quæ in Prouincia adhuc supersunt. Deinde regiones, vicosque percurrens, agnoscere voluit, quantum licuit, quæ extitissent Præscorum templa, ædes, aræ, luci, sepulcra, asyla, scholæ, bibliothecæ, amphitheatra, theatra, circi, hippodromi, naumachiæ, campi, odææ, fora, emporia, horrea, armamentaria, balnea, thermæ, aquæ, pontes, colossi, obelisci, columnæ, statuæ, & innumera alia, quæ inter legendum auctores adnotauerat, & in commentarios relata circumgestabat. Vix autem vnquam exsatiari contemplando poterat, cùm obseruaret quidpiam adhuc siue integrum, siue mutilatum superstes. Sic dies benè multos posuit circa Pantheon, rarum architecturæ exemplar, considerando, conferendoque quicquid Ludouicus Demontiosius fuerat de illo ratiocinatus. Sic, quia nôrat asseruari in Vaticano Palatio tum Herculem truncum, tum Laocoontem cum duobus filiis, opera exquisitissima, & Michaëli Angelo miracula habitatis; idcirco illis inspiciendis non vna vice adstitit, vt nec semel etiam inuisit geminas illas Alexandri, & Bucephali statuas, quæ exstant adhuc Phidiæ, & Praxitelis monumenta. Sic aliquoties ad inuiscendum C. Sestij Epulonis in via Ostiensi sepulcrum itauit, ob vetustissimas illius, nobilissimæque reliquias. Sic variè spectauit obeliscos varios, sed nullum frequentius, quàm Constantinianum, ob cuius effossionem, translationem, erectionemque laudare satis non poterat

1600. generosum Sixti V. Pontificis institutum? Sic & columnas; sed maximè Traianam, atque Antoninianam. Illam quidem, ut Pinello satisfaceret, cui factum satis non fuerat volumine toto de ea (seu de historia utriusque belli Dacici, à Traiano gesti, prout Alphonsus Ciaconus illam ex columna eruerat) conscripto: unde & exoptauerat tum exemplum libri à Peireskio quàm perfectissimum conqueri; tum depictas in eo figuras personarum, armorum, gestuum, cum insculptis, secundùm totam cochlidem, per ipsum conferri. Hanc verò, hoc est Antoninianam, ut perdiligenter exprimi curaret effusionem illam Iouis Pluvij Romanorum exercitum irrorantis, & hostium copias fulmine ferientis. Eiusmodi certè Iconismum cùm Scaligero postmodùm offerret, ad illustrandum quod Eusebius de prælio commisso inter Antoninum, & Germanos, ac Sarmatas, contulit in annum Olympiadis c. xxx. viii. primum, Hæc, inquit, vna est ex rebus maximè notatu, & spectatu dignis, quas mihi quidem inter omnia antiquitatis monumenta contigit Romæ observare. Nec verò harum modò rerum delineationes habere voluit; sed rariorem etiam quarumvis statuarum, quas disquisiuit in Capitolio, in Vaticano, in Farnesianis, in Cæsianis, in cæteris ædibus; itémque in hortis, ac vineis, & ut breue faciam, in quibuscumque privatis, publicisque locis; pictores deducens, qui non modò statuas, intemerataque alia opera; sed truncos etiam, & ruinas ædificiorum veterum, quæ occurrerent, adumbrarent. Deferre quoque solitus erat selecta

quædam numismata, quæ conferret cum statuis, ex- 1600.
plorans cuiusque ætatem, & agnoscens plerumque
manum: cum eâ foret solertiâ, vt momento discer-
neret quid re verâ, quidque ex sola imitatione foret
antiquum. Sic inscriptionum etiam omnium, quæ
saperent antiquitatem, habere voluit apographa,
tentans pro sua sagacitate ex eas supplere, ac penè
desperatas restituere. Rursus Codices MSS. seu Va-
ticanos, seu Farnesianos, seu alios, non quantum qui-
dem libuit, sed quantum tamen licuit, euoluit; &
quotquot inter cæteros maximè rari visi sunt, adno-
tauit in tabulis. Sic adnotauit etiam vasa, pondera,
mensuras, calaturas, numismata, simulacra, imagi-
nes, & quicquid demùm notatu dignum occurrit in
Metallothecis, iconothecis, in Promptuariis, Mu-
sæis, Xystis, Pergulisque variis; vt præteream innu-
mera, quæ vel pretio quæsiuit, vel commutauit, vel
dono habuit, quorùmque saltem ectypos, ecmag-
mata, aposphragismata, aut iconismos obtinuit.
Vnum doluit, se nec habere, nec videre vsquàm po-
tuisse memorata Goltzio Tulli Hostilij, ac Seruij
Tullij numismata; vt neque alia memorata cum his-
ce inscriptionibus, Col. Aquæ-Sextiæ. Col. Arelate.
Col. Auenio. Col. Arausio Secundanorum, & simi-
lia, quæ amore patriæ ardentissimè, sed frustrâ tamen
requisiuit. Ex hisce porrò ingentem sui admiratio-
nem excitauit, non modò Romæ, vbi illius amicit-
iam eruditi omnes ambierunt, sed in distitis etiam
locis; quòcumque eius fama peruénit. Ex hoc nimi-
rùm tempore cœpit, quæ fuit illi necessitudo cum

1600. Natalitio Benedicto, rebus exquisitis instructissimo, ac Fullinij tum commorante; quæque cum Adolpho Occone Augustano medico, tunc iteratò edente volumen de numismatis Imperatorum Romanorum: ut illos taceam, quos iam nôrat, Hieronymum Rubicum Rauennæ, Cæsarem Nichezolan Veronæ, Antonium Tolentinum Cremonæ, Cæsarem Campanum Vicentiæ, aliisque locis non paucos. Mirum autem quantum Patauij præsertim inclaruerit, adstantibus literis ad ipsum per id tempus datis à Laurentio Pignorio; qui ipse rerum præscarum adeò peritus, professus est tamen se amplius ex vnis eius literis, quàm ex decem Antiquariorum voluminibus erudiri: quisque suspexit non modò copiam conquisitarum ab ipso rerum, sed delectum etiam insignem, cùm ex missis duobus quibusdam Constantini numismatibus, agnoscere se, ut ex vngue leonem, dixit. Consimilia scripta ab Edmundo Brutio, Georgio Ragusæo, Iacobo Papifauio, Martino Sandello, & quem nominare primum debui, Hieronymo Aleandro iuniore, vero Musarum delicio; itémque M. Cornaro optimo vrbs Præsule, quicum deinceps per litteras, donec fuit in viuís, amicitiam coluit. Sed quantum quidem fieret Patauij vel id indicat, quòd misso Augustâ Vindellicorum ætÿpo-Sapphiri cuiusdam, inscriptionem præferentis, in qua *Xiphia* vox omnibus curiosis faciebat negotium; Pinellus ad eum scripserit, examénque, & iudiciu[m] ea de re ipsi detulerit. Prætermitto autem, ut fecerit satis, vocique lucem attulerit ex Strabone potissimum, cùm

ex Polybio loquutus est de venatione *Xiphie*, mon- 1600.
 stri videlicet marini. Quod ad statum Romæ recen-
 tioris spectat, nullum fuit Templum, Sacellum, Col-
 legium, Xenodochium, quod ingressus non fuerit:
 nullum Palatium magnificum, nullum celebre Pon-
 tificum opus, ad quod non diuerterit: nulla Raphaë-
 lis Urbini, Michaëlis Angeli, Polydori Carauagij, Ti-
 tiani, aut alterius artificis insignis pictura, quam
 non inspectarit. Sic cæmeteria, cryptasque illas sub-
 terraneas, plena venerationis loca, & Christianæ
 pietatis, constantiæque monumenta. Sic Religiosis
 cæremoniis, quantum sine discrimine posse putauit,
 interfuit. Quippe quod complexione foret non
 robusta magnoperè, coniicere sese in turbam tumult-
 us plenam detrectabat. Hinc quod ad statas, so-
 lemneisque Iobelai attinuit, spectauit quidem, ob-
 seruauitque ex ipsis quantum potuit; cæterum au-
 tem Valauesio fratri, tanquam valentiori demanda-
 uit curam spectandi omnia cominùs, & ad sese re-
 ferendi. Idem præstitum circa cæremonias, quas vo- 1601.
 cant cænæ Domini: quod circiter tempus tam ipse,
 quàm frater, vt Pontificem iis pauperibus, quos die-
 tim pascit, ministrantem, simulque in eadem aula
 discumbentem contuerentur, vices redemere duo-
 rum pauperum, vestibúsque eorum assumptis, adfuê-
 re inter cæteros, & agniti licèt à Pontifice, ipso ta-
 men rem placidè dissimulante, omnia spectârunt.
 Paschalibus Romæ exactis, & postquàm varia mu-
 nera domo accepta distribuit, nonnullaque etiam ad
 Pinellum misit, profectus est Neapolim. Superfluum

1601. foret recensere quantum, quotiesque diuerterit, ut requireret varia, quæ apud auctores celebrata sunt tam Latij, quam Campaniæ loca. Affectum se verò præsertim dicebat, cum memorata Virgilio coram haberet, lustraretque, ut Caietam, ut Cumas, earumque reliquias: ut Misenum montem, & Avernum Lacum, & similia. Cum item loca, in quibus exstitisse dicerentur villæ Ciceronis, & Luculli; aut sepulti fuisse Scipio Africanus, & Virgilius: atque id genus cætera, ad magnos viros attinentia. Addebat se, cum crypten illam, seu, ut appellat Seneca, carcerem longum, & obscurum, Pausilippum scilicet montem per passus mille perforatum, cundo, redeundoque spectaret, doluisse, quod ignoraretur, certumve non esset, qui tam præclarum facinus, tanto viatorum compendio, commodoque attentauisset. Digniore enim commendatione arbitrabatur esse, quam Xerxen, cum Græciæ bellum inferens, Athon montem non à continente modò præcidit, sed medium etiam perforavit. Neapolim quam-primum accessit, tenere se non potuit, quin Portæos illos fratres conueniret. Cum inductus autem fuisset ad natu maiorem, cui nomen Ioannes Vincentius, is breui colloquio sic affectus fuit, ut ipsum exclamabundus ad Ioannem Baptistam natu minorem deduxerit, quod & ipse in similem admirationem raperetur. Enarrare autem solebat Peireskii, licet ipse quoque Ioannes Baptista foret iam grandæuus, adpersisque canis venerabilis; ipsum nihilominus eâ reuerentiâ observare solitum iussa, nutusque Ioannis Vincen-

tij, vt maiore non potuiffet ora, atque imperium patris. Cæterum, vt cum ipsis vltro communicauit plurima, ita viciffim ab iis accepit; neque fpectauit modò quæcunque afferuabant in Mufæis, pretiofisque armariis; fed etiam omnigenis penè illorum experimentis, prout fibi in votis effe infinuauit, interfuit. Heinc nata ipfi cum vtroque eximia familiaritas, &, quæ eft deinceps mutuis literis, officiisque variis culta amicitia. Inuifit præterea Mufæum Ferrantis Imperati, ipfum quoque raris naturæ operibus inftitutiffimum; itémque Adriani Guillelmi, Martis Gurguftiolæ, & Matthæi Cappuani Conchanorum Principis; tametsi ad hunc extra ciuitatem diuertendum fuit. Monumenta infuper omnia antiquitatis perueftigauit, ac præ cæteris delineatas voluit nescio quas columnas operis Corinthiaci, Apollinémque ad Tripodem, & fimiles quasdam figuras. Ad hæc rogauit, didicitque quicquid licuit cognoscere de familiis Neapolitanis translatis in Prouinciam, & de Prouincialibus translatis in eam regionem. Cùm verò noffet effe in templo Diuæ Claræ nuncupato fepulcra complura Regum, Principumque ex Regia ftirpe ad Carolum primum (quem diximus fuisse S. Ludouici fratrem) attinentium: idcirco ad illa maximè attendit, præcipua adumbravit, Epitaphia exfcripsit. Quinetiam follicitus fuit in exquirendo fepulcro Simonis Portij Philofophi celeberrimi, non ita pridem vita defuncti: fed enim curam explorandi, fi quà fortè inueniretur, & maximè quidem cum Epigraphe, Pinellus ipfi commendarat.

Viuebat tum Neapoli fœmina quædam sanctitate, institutóque vitę illustris. Ea Romam accita à tempore vsque Gregorij tertij-decimi, & ab optimo Bellarmino examinata, probatáque, dicebatur rapi in eam extasim, statim ab assumpto Eucharistico Sacramento, vt, quemadmodum genuflexo erat, ita immota, rigidáque, stipitis instar, consisteret, oculis apertis nihil conspiceret, toto corpore nihil planè sentiret. Itaque noluit Peireskiius ex ea vrbe discedere, quin rem factu mirabilem vidisset, atque exploráset. Ac obtinere illud quidem absque contentione non potuit; sed, vt imperuium ipsi nihil erat, peruicit tandem, ac præter fratrem, deduxit quoque Ioannem Porcelletum Mallianum, qui fuit deinceps Præsul Tullensis. Vidit ergo, explorauitque, & commemorando mirari solebat, si posset quidpiam simile humanitùs contingere; neque facile credebat Cardano referenti sibi quid tale euenire solitum, quoties animo collibuisse. Postquàm urbem satis lustrauit, illiùsque elegantiam, amœnitatémque admiratus est, nihil habuit potius in votis, quàm adire Vesuuium, contemplarique locum, in quo magnus Plinius dicam obiisset. Ea re peracta, insigni quodam flagrauit desiderio inuisendi Siciliam, & pergendi Meliten vsque. Tria autem erant, præ ceteris, quæ auebat coram spectare, Fretum Scyllæum, Æthnę incendium, Antiquitates Syracusanæ: restitit tamen Fonuiuius, neque ipse, illo inuito, progredi vsquam voluit. Quare satis fuit totam eam regionem circum peragraré, & ad loca

etiam aliqua redire, vt Puteolos, & Baias versus, quò posset oculatiùs duo quædam ædificia subterranea inspicere, quæ Piscina mirabilis, & Labyrinthus appellantur. An adiciam verò, cum littus prope Puteolos consideraret, pulueremque requireret aqua marina lapidescentem, detectum ipsi præterea fuisse inter arenas quendam plumbeum, quo cælaturæ, ac præsertim Onychinæ conseruarentur. Quòd autem in eo littore numismata ferè exesa deprehenderentur, opinatus est causam esse sulphur, quod tametsi insensile, in iis tamen oris vbique interuenit, accedente aliundè ex mari salugineo halitu, cum arrodendi facultate. Altero post mense repetiit Romam, idque vt amicis vale diceret, collatis variis munusculis, ac aliquibus etiam aliò missis. Constituerat nempe redire Patauium ante Solstitium, magnòsque æstus; vnde & paucos intra dies non sine relicto sui desiderio ex vrbediscessit. Instituit autem iter Perusiâ, tum Academiæ gratiâ, tum spectandi lacus Thrasumeni causâ. De flexit inde Eugubium, occasione inuentæ illeic non ita pridem Tabulæ æneæ lingua veteri Hetrusca perscriptæ. Salutato postea ad Assisium D. Francisci monumento, inuisit Fullinij Natalitium Benedictum, abs quo expectatus ardentissimè fuerat. Spectauit exinde ad Montem Falconem, inter D. Claræ reliquias, treis insigneis globulos in cistula fellea inuentos, quorum duo, vel tres, non ampliùs, quàm vnus, ponderosi deprehenduntur. Tum votis ad celebre Fanum D. Mariæ Lauretanæ ritè per-

solutis, adiit Anconam, indeque Vrbium, ad
obtinendum licentiam peruolutandi Bibliothecam
Ducis. Digressus Pisaurum, atque Ariminum, ac-
cessit Rauennam, vbi Hieronymus Rubeus clarus
ille Medicus, patriæque scrutator, completi illum
expetebat, demonstrareque in ipsa sede Exarchatus
nescio quas reliquias Barbariei Gothicae, & orna-
menta Imperatorum, contemporaneorumque Re-
gum, cum his nominibus; ATHALARICVS
RIX, WITIGES RIX, THEODVISATVS,
& id genus alia; simulque ostendere ornamenta
quædam Gallæ Placidia, in nescio quo templo,
quæ Velius non esse antiqua censuerat: denique ipsi
sua manu exemplum Historiæ Rauennatis dare. Per-
uenit exinde Venetias, vbi amicis, magna illorum
cum voluptate salutatis, cognoscere non obiter
voluit Antonium Posseuinum, ex Societate IESV,
virum optimum, ad quem cum expetiisset com-
mendatitias literas, *E. quid queris proxenetam, re-*
scripserat ad illum Sirmondus, cum ad quoscunque
veneris, adeo ex teipso innotescere, amabilisque euadere
possis? Postremò non multos post dies, hoc est,
medio circiter Iunio, accessit Patauium, vbi tantâ
est exceptus lætitiâ, vt videretur quasi quispiam
Deus studiosorum eò aduentasse. Maximè verò re-
ditu suo recreauit optimum Pinellum, qui diutur-
nis, sed lentis morbis iam ingrauescentibus, pro-
pendere se in mortem sentiebat. Dies non sufficie-
bant audiendò, quæ compererat; neque inspiciendò,
quæ attulerat, neque cognoscendò, quæ visa

obscura interpretabatur. Dicam-ne , cum inter 1601.
eos viros , quos cognouerat , fœlicitati verteret;
quod amicos sibi Baronium , ac Bellarminum pa-
rauisset , prouocatum fuisse optimum Pinellum , vt
quidnam sibi circa illos contigisset , exponeret ?
Cum , inquit , summus Pontifex ante annos treis
venisset Ferrariam , dignati sunt illi me inuisere ; sed
tacitis nominibus , habitûque dissimulato ; adeo vt
se Presbyteros simpliciter asseuerarent. Ipse ex eo-
rum iconibus , qui viri essent , statim agnoui : sed
fingens tamen me ignorare , in eam Musæi partem
deduxi , in qua virorum illustrium , ac ipsorum spe-
cialiter , imagines erant conspicuæ. Ostensa autem
Baronio Bellarmini effigie , Num hæc imago , in-
quam , ô bone , socium istum tuum repræsentat
eximiè ? & ostensa Bellarmino quæ Baronij aderat ;
Num hæc quoque , inquam , socium istum tuum
exquisitè refert ? Ac tum illi delusos se , cum delu-
derent , agnoscentes in amplexus prolapsi sunt. Por-
rò quia Peireskîus præsentiebat se post annum re-
uocatum iri in patriam ; idcirco se ad intermissa lu-
ris studia composuit : tempore sic dispensato , vt ad
alia præterea innumera sufficeret. Siquidem præter
varia , de quibus paullò post dicetur , in literatos
officia , profecit continuo in notitia abstrusioris hi-
storiæ , altiorisque antiquitatis. Specimen autem in-
signe dedit , cum subortâ inter curiosos de monte
Argæo controuersiâ , edisseruît ex Iaspide , variis-
que numismatibus Cæsareæ , alibique cufis , origi-
nem , ritûsque varios , quibus ille mons fuit olim.

1601.

in Cappadocia adoratus. Linguas præterea semper excoluit, quas credidit vsui futuras. Nam ex Hebraïca quidem, & ex vtroque charactere, tam vulgari nempe, quàm Samaritano; ex Syriaca item dialecto, idiomatèque Arabico, tantum ferè delibauit, quantum ad fidorum, similiùmque numismatum interpretationem necessarium duxit; vsus magisterio Iudæi cuiusdam commorantis Patauij, cui nomen Rabbi Salomon fuit. Ad Græcam linguam quod adinet, studiosiorem illi operam impendit, tum propter varias constitutiones Imperatorum Græcorum, ipsamque Iuris originem, quæ ad Græcos fontis refertur; tum propter Philosophiam, seu studium Sapientiæ, proptèrque Poëseos, ac Historiæ, quæ in ea lingua supersunt, antiquissima monumenta; tum propter explicationem gemmarum, numismatum, marmorum, quorum sunt Græcæ inscriptiones, quibûsque illustrandis pulchrum semper duxit, suauissimùmque habuit seriam operam collocare. Heinc cùm ad aliquem scriberet Græcarum literarum amantem, exempli causa ad Occonem, qui suas semper Epistolas sententiis Græcis interferebat, solitus erat ipse quoque eruditionem suam testari, nunc versum Græcum præmittendo, nunc quidpiam carmine, aut prosa appositè interpolando: vt ad memoratum Adolphum Occonem, *Fortunate Senex, Te Diuæ illius antiquæ, & venerandæ Μνημοσύνης filia, non iam Αδελφον, sed Αδελφον duplici nomine Germanum dicent.* Nec verò humaniorum modò literarum studiosus fuit, sed multum etiam

etiam inuigilauit Mathematicis artibus, carus ex eo tempore Galileo Galilei, quem & apud Pinellum primum nouit, & ex inuenta hauriendis aquis tum urbem infestantibus machina, admodum suspexit. Incubuit quoque plurimum in peruestigandis causis rerum naturæ admirabilium. Quippe, & varios variè rogauit de illis Parheliis, siue tribus solibus, ac triplici Iride visis, die Februarij septima, hora circiter vigesima prima. Et de piscibus, aliisque rebus saxificatis philosophaturus, tum variam copiam impetrauit, inque angulo Musæi disposuit; tum ichnographiam eius montis, qui apud Vicetinos iis abundat rebus, obtinuit. Et quicquid fuit cuiquam perspectum circa fossilia, mineralia, rem metallicam, sua seu remuneratione, seu comitate concessum tulit; maximè autem Venetiis; vbi aliunde, cum multa præclara in armamentario se obseruasse diceret, referebat tamen nihil sibi fuisse adspectu iucundius formatione aluminis in octahedricam figuram. Et frequens adiit rariores hortos, perferaturus varietatem, vireisque tam indigenarum, quàm exoticarum plantarum; ac destinans quasdam in Prouinciam, quasdamque vicissim ex Prouincia, nunc in Pinelli, nunc in aliorum viridaria transferri curans. Et interesse solitus fuit non publicis modò Anatomicorum dissectionibus, sed priuatis etiam Hieronymi Fabricij ab Aquapendente, qui illum propter singularem beneuolentiam admisit, cum specialiter ex ouis gallinæ incubanti suppositis, singula in dies singulos subduceret, vt

1601. ab ipso usque incubationis initio obseruaret seriem formationis pulli. Atque hæc quidem de studiis. Sequitur, ut iam infinuemus, quemadmodum illum ex hoc tempore viri studiosi, eruditique arripere agnouerint gubernaculum literarum. Dictum est iam, cum Roma rediit, cœpisse optimum Pinellum solito grauius laborare, inque obitum vergere. Is itaque non multò post, quippe sub Augusti initium, è mortalium vita excessit, propè septuagenarius: magno profectò dolore omnium bonorum, eruditorumque; sed Peireskij potissimum, qui illum, tanquam alterum parentem habebat, ac venerabatur. Cæterum cum ille sui desiderium, quæ patebat orbis literarum reliquisset, consolationi tamen fuit, quòd videretur Peireskio quasi lampada tradidisse. Ipse nimirum ad eius mores ita se composuerat: ita studio rerum nobilium, exemploque benefaciendi, ac promouendi bonas arteis animatus euaserat, ut virtutis heroicæ destinatus hæres iure censeretur. Huiusce rei congerenda aliquot testimonia sunt, quæ pleniorẽ concilient fidem. Imprimis verò citandus occurrit Paulus ille Gualdus, qui Pinelli vitam conscripsit, cuiusque mentio facta iam est. Is postquam viri mortem defleuit, dixitque naturam parcè proferre eiusmodi viros, ac Methonius fortasse annum transigendum iis, qui alterum Pinellum expectent; talem scilicet, cuius studium humaniora studia restituat in pristinum splendorem, cuius opes in nobileis libros colligendos impendantur, cuius dignitas doctis viris patrocinio sit; tum

demum subdit, *Ætas sanè nostra, si quem feret eius-* 1621.
modi, is, ita me Deus amet, non alius erit à NICO-
 LAO FABRICIO Gallo, domo Aquis-Sextiis, cla-
 rissimo adolescente, qui Roma, & Patauij, vix-dum
 plenam pubertatem egressus, eo ardore Pinellum, & Pi-
 nelli studia est complexus, ut omnibus nobis, & doctis vi-
 ris, quotquot his capiuntur literis, miraculo sit. Egre-
 gium sanè vaticinium: sed en etiam votum Erycij
 Puteani, iam tum Mediolani, ut suprà est dictum,
 Eloquentiæ, & Chronologiæ professoris. Is scribens
 ad Peireskium, O vulnus, inquit, quod Pinelli mor-
 te acceptum est! Abiit æternus ille vir, ipse nominis, &
 fama securus: sed nos in desiderio, & dolore reliquit,
 Musas in squalore. Quis succrescet, & dolorem nobis de-
 met, Musis squalorem? Non doctrina, sed opibus quo-
 que opus. Quis? fallor? an tu ipse huc vocare, ut sis
 quod Pinellus fuit? Vouco, vouco, & saluere te iubeo,
 Iuuentutis spes. Quo loco fortassis non ingratum
 erit, si Peireskij responsionem adtexuero. Sic igitur
 ille rescripsit. Peruellis animum meum dolore, dum mihi
 incomparabilis viri morte vulnus inflictum refricas. Me-
 ritiò tu quidem funebreis, ac luctuosas voces ingeminas;
 meritiò vicem nostram deploras, meritiò omneis ad lugen-
 dum inuitans exclamas, Quis nobis dolorem demet, Mu-
 sis squalorem? Sed in fine risum excitas, dum, quasi va-
 ticipinari velles, subiungis me, quod Pinellus fuit, futu-
 rum; idque, tanquam fieri posset, seriò voues. Quod per-
 inde est, ac si ingenti succisa pinu voueres, ut humilis ali-
 qua myrica robur illius, ac proceritatem æquaret. Verùm
 amor erga me tuus hoc tibi, quiduis aliud meditantii, vo-

1601. tum extorsit, cuius, ut reor, nunquam te damnatum iri, aut reum fore sperasti. Quod si ego tibi idipsum vouens, vatis illud accinam, Tu nunc eris alter ab illo, qui te penitus nôrunt, sat scio, me vatem affirmabunt haud vanum; tuæ namque hoc opus opis non meæ. Argutè sanè, & eleganter; tametsi id dissimulauit, quod verissimè à Puteano dictum, ad subeundum id muneri, opibus quoque opus esse. Fuêre & aliæ perelegantes vtrîque literæ conscriptæ, extâtque speciatim vna edita in secundis Ferculis, seu centuria Epistolarum Puteani secunda, qua sub initium sequentis anni, qui fuit supra millesimum, sexcentessimumque secundus, ille gratiosè conquestus est se Deorum genus nominatum. Fuêre, inquam, aliæ literæ conscriptæ: sed ad rem facienteis excerpfi, ex quibus abundè intelligitur quàm appositè Ianus Gruterus in præfatione magni illius Inscriptionum voluminis ita coniunctim nominârit, commendaueritque Erycium Puteanum, & Nicolaum Fabricium, ut iuuenes esse præ cæteris dixerit,

— Sacros qui sollicitare flores

Aonidum, totâmq; solent haurire Aganippen.

Versabatur porro sub prælo ingens illud opus, cum Pinellus concessit fatis: Peireskii autem suppeditauit, quæ in illud infererentur, non modò ex iis, quæ inter Pinelliana cimelia, sed etiam ex iis, quæ Romæ, quæ Venetiis, quæ aliis in locis obseruârat, descripserâtque, ut docet illud toties subiectum inscriptionibus, *Ex Nicolai Fabricij schedis.* Venio iam ad Marcum Velferum, cuius interuentu Gruterus.

chedas illas obtinuit. Ille Pinello propè par, & 1602.
singularis amicus, florebat Augustæ Vindelicorum
Duumvir. Me tacente, scripta illius, omnesque viri
cruditi, opem ipsius munificam, paratissimamque
experti, quantus vir fuerit, satis loquuntur. Velle-
rus ergo, literis ad Peireskium datis, testatus est
tanti se facere ipsum, eiusque amicitiam, ut nihil
sibi fuerit ex tota Pinelli hæreditate expetibilius.
Quin etiam ipse quoque illum non-modò virtutum
Pinelli hæredem agnoscens, sed futurum quoque
suarum successorem coniiciens, diligere cœpit, tan-
quam filium, & literarum frequentiam, quoad vixit,
non destitit testatum facere affectum. Hoc vno ipsi
durus fuit, quòd sui effigiem constantissimè dene-
gavit, pro eo, quo omnibus aliis ardentissimè fla-
gitantibus denegauerat instituto. Et Peireskius ta-
men, ut alios nonnullos, sic illum nescientem pin-
gi procuravit, conducto artifice, qui ipsius vultum
è clandestino loco spectaret. Sic obtinuit quod illi
Occo sperare nefas prædixerat, cum id abs Velfero
tulisset responsum, *Cato maior posteros volebat quære-
re, cur sibi statua nulla posita: mihi contrà, quantum
video, cauendum, ne quis aliquando miretur, si non ex-
indignetur, qua ambitione consortio magnorum virorum,
quorum imagines se colligere Fabricius ostendit, irreps-
erim. Prætereo autem quàm præclarè Noster illud ex-
ceperit: quippe ad Occonem rescribens, Dixit qui-
dem, inquit, Cato non minùs argutè, quàm sapienter,
se malle, ut posteri quærerent quare sibi non esset, quàm
quare esset posita statua: nunquam tamen, quod légerim;*

se pingi, aut fingi renuit; cuius rei testes esse possunt icones eius non pauca, quæ in hodiernum diem circumferuntur. Igitur nec Velserus, vera Catonis imago, id abnuere deberet, & ne abnuat, precor preceris, ores ipsum, atque exores iterum oro. Subnectendus Velsero est Iosephus Iustus Scaliger, vir ille maior, ac celebrior, quàm ut encomio nostro indigeat. Subnectendus, inquam, ut constet quàm sponte, quàmque alacri mente Peireskii se ipsi, aliisque eruditis deuouerit. Nam ille quidem summopere sibi ipsi est gratulatus, quòd in Pinelli defuncti locum talis amicus successisset; ac occasionem ut accipias, ea fuit huiusmodi. Scripserat Scaliger ad Pinellum, rogans, ut sibi procuraret Hebræicos aliquot libros, itemque nummos aliquos Scaligerorum Principum; ac simul miserat tam Patris, quam sui ipsius autographa quædam, & vtriusque etiam icones, prout ille petierat. Scripserat vnà Carolus Clusius, miseratque exemplum suæ rariorum plantarum Historiæ, & iconem desideratam Matthiæ Lobellij: ne quidpiam dicam de destinatis à Scaligero literis ad Carolum Leberoneum Valentinum Episcopum Patauium commorantem. Peruenire ista Patauium, cum non modò iam Pinellus obiisset, sed discessisset etiam ex vrbe Cæsar Dux Acheruntij, qui fuit Pinello ex fratre nepos. Quia verò is Gualdo mandauerat, ut siquid datum foret ad Paruum, id exciperet, & Neapolin ad se mitteret: idcirco Gualdus omnia excepit, ac priusquàm transmitteret, cum Peireskio communicauit. Itaque Peireskii, cala-

mo arrepto, rescripsit ad Scaligerum: nuntiauit non modò Pinelli, sed etiam Episcopi mortem: securum fecit de donariis à memorato Cæsare grato animo accipiendis: recepit in se quam Pinello commiserat curam librorum Hebraïcorum, ac numismatum: pollicitus est se aliqua saltem, quæ haberet iam, occasione prima missurum: obtulit & nonnulla alia ad illustrationem Scaligeræ gentis, quam cum veneretur, adiecit se non commisisse, vt icones illæ abirent, quin exempla sibi earum obtineret. Scripsit pari modo ad Clusium, ac dici non potest, quantum illi se tam generosæ indoli, ac singulari humanitati deuinctos prædicauerint. Hûc spectat illa Scaligeri ad Velsærum Epistola, quæ est in tertium librum inserta, & in qua, *Numismata*, inquit, *gentis Scaligeræ cum literis Fabricij nostri, & tuis accepi; quo nomine gratias tibi ago. Nondum Hebraïcos accepi libros, quos ille ad me ex Italia misit; quia inter mercimonia Raphelengiana sunt, quæ nondum hûc perlata sunt. Prope diem, quum accepero, & illi, vt gratias agam, scribam, & à me quoque alias expecta.* Scripta est autem Epistola 1 v. Idus Maij. An subinde commemorabo aliquos ex iis, quibus alacrem operam nauauit? Impremis certè, si quid fuerat à Pinello priùs tentatum in studiosorum gratiam, id contempione maxima perficere adnixus fuit. Sic nullum lapidem non mouit, vt quam ille spem fecerat Prospero Alpino per celebri Medico recuperandi de tertia Methodicorum secta tractatus, opere ipso posset explere. Deinde, cum dicendi sint, quos Pinelli exemplo iuuat, vnus instar

1602.

omnium esse posset memoratus Pignorius, dum Iliacam mensam exponens (Tabulam nempe illam aeneam Hieroglyphicis Ægyptiis insignem, quæ ex Petri Bembi Cardinalis reliquiis eo tempore in Ducis Mantuæ Bibliotheca asseruabatur) gratias quidem egit imprimis Velfero, sed subiecit tamen, Nicolao dein Fabricio Chalasij Domino, natalium splendore, & recondita eruditione illustri adolescenti, qui non modò insignes antiquitatis reliquias, quibus instructissimus est, in meum, & studiosorum usum munificè contulit; sed etiam aliorum Musæa, ut paterent, sedulò curauit. Eius diligentia factum est, ut non modò Venetiis Friderici Contareni Diui Marci Procuratoris, & Ioannis Moecenici illustrissimorum virorum præclarissima nummorum, & gemmarum κειμήλια mihi in promptu essent; sed & Roma ornatissimi viri Lælij Paschalini κέρας ἀμαλθίας (cur enim hoc nomine non appellem bonæ copiae diuitem thesaurum ?) de quo nobis numismata, gemma, sigilla, rara omnia insigni humanitate suppeditata sunt. Eidem Fabricio acceptum ferri debet omne id, quod è Natalitij Benedicti pretiosis oculis euulgamus, è quibus auctario nostro cum robore, & incremento spiritus accessit. Ea enim omnia, quæ ad illustrandam Epiphaniij, Irenæi, & aliorum Patrum historiam Sæctarios antiquos exagitantem attulimus, inde profecta sunt. Hæc fusiuseulè refero; quoniam ex iis, quæ iam antè attigi, pluscula confirmant. Adde verò circa Pignorium, cum is librum de Patauinis originibus scriberet, obtinuisse illi Peireskium à Ioanne Vincentio à Porta, quod ipse postea memorauit, & Philippus etiam Tomafinus in Tito Liuiio retulit, circa

circa Parentis historiæ bracchium. Nimirum ci-
 ues Patauini ex asseruatis apud se Titi Liuij ossibus
 alterum bracchium exemerant, concesserantque in-
 clyto illi studiorum fautori Alphonso Arragonum
 Regi, cum illud instantissimè per Antonium Panor-
 mitam Legatum suum exorâssset, ab anno usque sa-
 lutis millesimo quadringentesimo quinquagesimo
 primo. Cum ignoraretur verò ecquid de bracchio
 actum foret, occasionem cepit Peireskius mittendi
 complura ad Portæum munuscula, quasi compen-
 sans ectypum marmoris cuiuspiam, in quo erat ex-
 pressus ritus mittendi milites sub iugum; ac simul
 efflagitauit vt rescriberet, quid pro sua sagacitate de
 bracchio compertum haberet. Rescripsit autem ille
 consequenter, neque Alphonsum morte præuen-
 tum, neque etiam Panormitam condere potuisse pro
 votis id bracchium: successorem verò istius à secre-
 tis regni, conclusisse sub marmore, collocassè-
 que extra Oratorium, cum inscriptione huiusmodi,
 T. LIVII HISTORICI BRACCHIVM, QVOD
 OLIM ANTONIVS PANORMITA A PATAVI-
 NIS IMPETRAVERAT, IO. IOVIANVS PON-
 TANVS MVLTOS POST ANNOS CONDIDIT:
 cæterum à multis iam annis id marmor non fuisse
 conspectum, ob facellum à nescio quibus confra-
 tribus superestructum. Vt fuit porrò Peireskius er-
 ga Pignorium munificus: sic fuit etiam erga Vlyf-
 sem Aldrouandum percelebrem illum de Animalibus
 scriptorem, qui multa ab eo numismata habuit,
 maximèque Asiatica, illustrandis iis, quæ circa ani-

malium symbola iam ediderat, ac tum de nouo apparabat. Atque is quidem Bononiâ scribens animo reuerâ grato pollicitus est se commendaturum per quem profecisset : sed in cæcitatem breui incidens id, quod destinârat, perficere potis non fuit. Idem fuerat pollicitus Ioannes Baptista Villalpandus, de illius nomine, patria, conditione sollicitus, ut testari posset à quo accepisset & fidos, & pleraque alia, amplificando tractatui de nummis Hebræicis, post editos iam magnos illos in Ezechielem commentarios. De Sirmondo heic memorandum, quòd cum accipere à Peireskio Roma discedente noluiisset, nisi ex iis numismatis, quæ geminata illi adessent, postulauisset ipsum tamen, obtinuisseque ab eo, postquam Patauium rediit, plusquam ducentos ecypsos, vel ex Græcanicis duntaxat. Eius scilicet generis cœgerat iam supra mille, quæ forent penitus intacta rei nummarie auctoribus : & cum haberet cusa tam ante, quam post Romanum imperium in ciuitatibus quibusque Græciæ, Asiæque præcipuis, ex quibus contexuerat seriem Seleucidarum Principum, ab Alexandro ad Romanos usque : eamobrem Sirmondus hanc seriem desiderauit cognoscere, ut illius instar seriem Principum Ægyptiorum texere posset. Sed faciendus his modus est. Porro iam penè triennium in Italia exegerat, cum apparare reditum cœpit. Ac habuerat quidem in votis Venetiis tendere Augustam, tum ut Velferum, Occonémque ea in vrbe inuiseret : tum ut exinde commissus Danubio circumstantia Germaniæ, Hungariæque loca lustraret.

& Constantinopolim tandem per Euxinum Pontum, Bosphorūque Thracium perueniret, peragraturus deinceps quicquid liceret ex Græcia : verū Fonuius planè abnuit , vel quia censeret Patrem, Patruūque id consilium auersaturos, ob digressionem prolixam nimis , periculūque plenissimam ; vel etiam quia ipse Parisios repetitò accerferetur. Peirefkius ergo nihil planè ausus ipso repugnante moliri, res suas ita composuit , vt imprimis omncis Italiæ amicos, quibus vale coram dicere non potuit, literis salutauerit, oblatōque obsequio, & plerumque etiam adiunctis munusculis deuinxerit. Sic exteros quoque, ac præ aliis Scaligerum , cui ad superiūs memorata adiecit nummos ab amicis Veronensibus recens habitos , nonnullaque alia spectantia ad Scaligeranam familiam. Coëgit deinde quicquid potuit seu librorum , seu cimeliorum , seu aliarum rerum exquisitarum nancisci : ratus sibi in patria parem copiam non occurruram. Discessurus coniecit omnia cum sarcinulis in aliquot capsas , quas direxit Genūam , conuehendas inde Massiliam : ac reseruauit solūm rariora, & pretiosiora aliqua, quæ vnà translata eandem secum experirentur fortunam. Videlicet , cū sibi satis lustratum putaret ex Liguria, peragrarè Galliam Cisalpinam voluit, emergerēque Lugdunum , vt prouidere illeic posset quemadmodum litteras ab amicis acciperet , & vicissim ad illos daret. Postremū relicto ingenti sui desiderio Patauij præsertim, ac Venetiis (ne quid piam dicam de Augusta, vbi Velserus concepta ipse complectendi illum frustratus,

1602.

quasi dimidium animæ subduceretur, ingemuit) itineri sese commisit. Diuertit autem primum Vicentiam, salutaturus illic amicos, ac inuisurus eum montem, cuius, ut dictum est iam antè, ichnographiam quasierat. Considerauit etiam Gustosâ illam venti dispensationem per canaleis, ac tubulos; accepitque, & in commentarios retulit historiam illius, qui nascentem è crypta ventum in loco satis dislito, domum vsque per meatum subterraneum ita deduxit, ut tandem velut secuerit, distribueritque pro arbitrio. Accessit deinde Veronam, attenditque illic præsertim ad Scaligerorum sepulcra, quorum, quia tum non licuit adumbrationem obtinere, impetrauit postea interuentu Cæsaris Nichezola, & Marci Antonij Montani. Mantuæ cum foret, tam multa vidit, atque adnotauit in Ducis Cimeliarchio, ut cum superioribus annis accepisset direptum fuisse, Germanis urbem vastantibus, vix satis sese consolari per multos dies potuerit, tantam ducebat factam iacturam. Inter cætera spectauit curiosè Ægyptiam illam Tabulam, ut varios de ea scrupulos eximere Pignorio posset. Visâ Cremonâ, voluit Brixiam, Bergamumque diuertere, ac tum venire Mediolanum, ubi non modò Erycius Puteanus, & Septalij fratres, aliique amici; sed maximè etiam ille nunquam satis laudatus Archipræsul, Cardinalisque Fridericus Borromæus, Ambrosianæ Bibliothecæ iam tum crebrescentis fundator, sunt illum humanissimè, ac per dies multos complexi. Digressus Ticino, Nouaria, Vercellis, peruenit Taurinum, ac superatis Alpibus,

Geneuam ; vbi peruolutis libris variis , spectatôque 1601.
Lemmano lacu , Tononum vicum adiit , vt fieret
oculatus testis admirandorum facinorum , quæ pa-
trare per illud tempus Dæmoniâci perhibebantur.
Traiecto lacu , perlustratâque circumuicina Heluetia ,
soluere vota placuit ad celebre fanum Sancti Clau-
dij , ac præsertim pro Patruî cognominis incolumi-
tate. Desistere inde volebat Semurium , Dau-
idem illum quondam suum præceptorem salutatu-
rus , ædeisque illas inuisurus , in quibus ante quin-
que annos Genebrardus obierat : sed rerum in Bur-
gundia ob factionem Bironij Marefcalli innouata-
rum , suspectarumque status deterruit. Deslexit ergo
potius Lugdunum , vbi acceptâ pecuniâ , persoluit
largè honorarium Ductori suo Parisios , vt iam di-
ctum est , discessuro. Deinceps , quamuis amore
patriæ , parentumque teneretur , callidè tamen con-
siliû cepit non pergendi recto itinere domum , sed
discedendi Monspelim , vbi Iulius Pacius à Beriga
Iurisconsultus Vicetinus profiteri magna cum laude
Iurisprudentiam ferebatur. Quia enim satis sibi ipsi
circa Iuris studium nondum fecerat , & apud se ta-
men constituerat neque postulare , neque adipisci
quam lauream vocant Doctoream , absque insigni
quadam gloria , testationeque eruditionis ; idcirco
domum tendere noluit , ne inuitus adigeretur ad
consequendum lauream , possêtque prius sub illustri
Antecessore fieri instructior. Itaque concessit Monf-
pelium sub Iulij mensis initium , seque statim ipsi
Pacio in contubernium cum fratre dedit. Subinde

1602. verò consilium indicauit Patri, ac Patruo, qui nihil tale suspicantes subueriti sunt, ne fortè in Italia non satis studiosè Iuri incubuisset. Præter eum secessum, argumento fuit, quòd tam ex capsis Genuâ acceptis, quam ex transmissis residuis illis, selectioribûsque cimeliis, quibus Monspelium cùm peruenisset, sese exonerauerat, peruiderunt illum debuisse tantum temporis in iis colligendis, cognoscendisque impendere, vt nihil, aut parum omninò, quod impenderetur Iuri, superfuisset. Id autem vbi ille resciauit, quadam veluti apologia suspicionem est amolitus. Nimirum, se nihil detraxisse horis Iuris studio debitis; sed tantum quas alij aut ludicris rebus, aut computationibus, aut Venereis illecebris vulgò dederent, succidisse, contriuisseque in comparanda antiquitatis notitia. Quam viderent de ea congeriem, argumento saltem esse pecuniam sibi creditam non fuisse in nequitiam, perditosve vsus absumptam. Cæterum & se agnouisse non esse studium antiquitatis Iurisprudentiæ inutile, cùm alia ratione non possent pleraque loca seu Digestorum, seu Codicis intelligi; & posse ipsos id experiri, cùm quod, exempli gratiâ, lateret iam Interpretes circa Viriolas ex smaragdis Vlpiano, ac Paulo sapius memoratas, intelligere ex iis possent, quas eruisset Romæ ex quibusdam ruderibus, quasque ad illos mitteret, rem iam à plerisque sæculis inuisam. Existare etiam in sarcinis plureis reliquias ex eo Ære, quod antiqui graue dixerunt (cùm id nimirum penderent) interque parteis Assis varias reperiri Qua-

drantem , qui altera facie Suam præferat, ex quo, 1602.
& ex Oue , ac Tauro pariter signatis , dicta primùm
fuit Pecunia, tanquam à pecudibus. Sic & repertum
iri alia propemodùm innumera , de quibus coràm
differere, sine voluptate vtriusque non posset. Deni-
que tam sese , quàm fratrem non diuertisse ad Pa-
cium , quòd se Iuris ignorantiores suis coætaneis
crederent; sed quòd eximium aliquid supra ipsos sa-
pere vellent. Placuit mirè parentibus instituta de-
fensio , ac Patruo præsertim , qui tanto ardore vi-
dendi ipsius inarfit, vt, vix tertio mense exacto, ac-
cessitum voluerit. Accessit ergo ; sicque Larcis reui-
sit primùm mense Nouembri , sed adducto tamen
secum Pacio , vt vel reducendi ipsius prætextu deti-
neri domi non posset. Relictus verò germanus fuit,
quòd è morbo tum conualescens sese dare itineri
absque periculo non posset. Heic non memorabo
qua exultatione exceptus Peireskius domi fuerit,
neque quo cultu habitus Pacius. Referam duntaxat
magnum illum virum Guillelmum Varium, qui tum
erat princeps Aquensis Senatus , quisque fuit post-
modùm suffectus, vt suo infra loco dicetur , in vi-
cem Cancellarij , mirari satis non potuisse indolem
adeò egregiam , raràmque adeò eruditionem tanta
cum modestia coniunctam ; neque vnquam satis sa-
tiari interrogando , excipiendòque quæ ille scitè,
perspicuè, suauitèrque commemorabat. Paucis post
diebus Monspelium ynà cum Pacio rediturus, desle-
ctendum è via censuit, vt demonstrare illi posset
scaturiginem Vallis clausæ, non aquarum exundan-

1602. tium copia magis, quàm Petrarchæ, & Lauræ amoribus concelebratam: itémque Arcum illum triumphalem, qui Araufione conspicuus, C. Marij credebatur, cum ipse Fabij Maximi potius esse opinaretur; tum ciuitatem Auenionensem; & fornicatum triplici serie Wardonis, seu Guardonis pontem; ac Nemausentia quoque nonnulla, quæ ille non aduerterat, tametsi illeic biennio moratus. Quam-primum autem rediit, tanta se cum alacritate ad studium Iuris composuit, vt horas decem solidas diebus singulis in eo collocaret. Neque verò id solum tempus consecratum est studiis; sed dictum etiam quasdam horas, ac potissimum ante somnum impendere solitus fuit litteris humanioribus, studioque rerum antiquarum. Non id abnuebat penitus Pacius, qui mirè etiam afficiebatur, quoties illum de rebus variis, ad antiquas præsertim leges pertinentibus, dicentem audiret. Quin non modò etiam est passus, sed penè, dicam, auctor fuit, vt Narbone inuiseret, quæ exstant illeic vetustatis non ignobilia monumenta; ac speciatim votum, factamque Augusto Aræ dedicationem, cuius ante annos triginta effossæ, & Burdigalæ, cum illustratione Eliæ Vineti, excusæ exemplum obtinuerat. Scilicet nondum allatum erat Inscriptio-num Gruteri opus, in quo postea obseruauit Tributiam Augusti potestatem, quæ apud Tacitum legitur trigelima septima, fuisse ex hac ipsissima inscriptione trigessimam octauam. Ad hæc, quia Pacius perlubenter edissererebat de rebus ad Physicam spectantibus, nullam non occasionem captabat rogandi

tandi illum de causis naturæ abstrusioribus, & maxi- 1603.
mè quidem per horas relaxando animo datas. Sis-
cùm aliquando noctu incidisset in crustas, squam-
mâsque piscium lucidas, collegit, intulitque clàm
in Pacij Musæum; ac postea cum illo ingressus, quam
præferbat candelam consultò exstinxit, vt illo pri-
mùm attonito, ac deinde lucem mirante, sciscitare-
tur ipsius causâ. Ac recurrit quidem Pacius ad ca-
lorem ex putredine excitatum; sed rogauit Peires-
kius, cur non sentiretur ergo calor neque in iis
squammis, neque in quibusdam lignis putrescenti-
bus? cur horrea præ putredine incalescentia, calx
item madefacta, & alia tantoperè calida non emit-
terent lucem? cur si ob calorem cicindelæ lucent,
non lucerent etiam animalia cætera tantoperè iis ca-
lidiora? Ad quæ Pacius, posse calorem, quem in scho-
lis dicunt virtualem, sufficere; & aliunde exigì cer-
tam dispositionem materiæ, quæ reperitur in rebus
minùs ad sensum calidis, non reperta in aliis calidio-
ribus sensu deprehensis. Prætereo porrò, cùm hæc,
& alia non fecissent satis Peireskio, nihil deinceps
visum fuisse probabilius, quàm lucem omnem flam-
mulam esse, sed rarissimam, tenuissimamve: argu-
mentoque esse lucem Solis, quæ dum cogitur, den-
satúrque, ardet; ad eum modum, quo vapor nihil
aliud, quàm aqua rarefacta, tenuatáque est, quæ rur-
sùs coacta, densatáque, humor apparet. Cùm lux
autem Solis directâ, seu primaria sit adhuc satis den-
sa, vt calorem sui sensibilem faciat; repercussam ta-
men, secundariamve adeò tenuem euadere, vt eius

1603. calorem sensus non percipiat. Quare & nihil mirum videri, si lucula illa squammarum, similiumque rerum non sentiat calida; cum sit longè tenuior illa solari secundaria, intra quam planè evanescit. Quòd res autem calidiores non perinde luceant, causam dici posse; quòd calor vehementior terriores excitet vapores, seu fuligines, quàm ut connatam luculam patiantur puram emergere, atque idcirco apparere. Rursus, cum foret valdè curiosus rei anatomicae, ac herbariae; ea propter quoties licitum erat, diuertebat in Regios hortos, à quatuor iam annis instructos, ad Richerium Belleuallium vtriusque demonstratorem, cui nunquam non fuit Peireskij & desideratissima, & iucundissima consuetudo. Diuertebat etià frequens ad Franciscum Ranchinum, qui ad peritiam Physices, Medicæque eximiam, pulchrè adiungebat notitiam, cultumque rerum antiquarum. De Ioanne Dortomanno quid dicam, cuius semper solitus fuit & exquisitam doctrinam, & insignem erga se benevolentiam commendare? Hoc certè Medico est usus, cum febriculâ laboravit, cùmque vexatus est grauiore, quàm eò usque fuisset expertus, dolore hæmorrhoidum, & nonnulla etiam urinæ emittendæ difficultate. An adtexam verò quod retulit sapiùs, cum Dortomannus aliquando ægotantem inuideret, rogareturque, cur ea vice seriùs solito aduenteret, respondisse ipsum se accedere ex consultatione memorabili pro muliere Belliquadrensi, quæ tum gestaret vtero mensē iam vigesimum tertium. Ea nempe iteratò nupta, cum ex priore coniugio par-

rus aliquot nonimestreis edidisset, ex posteriore tamen ediderat treis, vnum mensium vndecim, aliorum quatuordecim, tertium verò octodecim: & quoniam ex periculis antecedentium puerperiorum, coniciebat sibi ex quarto impendere grauissimum; medicos idè consuleret, si qua ratione incolumis evadere ex illo posset. Et memini quidem obiecisse me, videret, ne esset eadem scemina, quam non ita pridem Antonius Saporta, aliique Medici propter simile nescio. quid non omnino sanam mente pronuntiassent. Verum perstitit fuisse aliam, adiiciens ipsam non longè post peperisse infantem cum capillitio, ac dentibus, obtinuisseque à coniuge, ne ulterius contingeretur. Vt cumque pbrò hac de re sit, (quam venditare pro vera nolim) occasione partim morborum, partim vehementioris studij, effectum est, vt literas ad amicos scriberet raras. Inde euenit, vt cum semel totos quatuor menses à scribendo abstinuisset, & periissent etiam destinata quedam in Italiam epistolæ, idè rumor de eius morte Romæ, ac Patauij præcrebuerit; & Pignorius etiam ad Patrem consolatoriam scripserit; Gualdus verò, falsitate rumoris comperta, illum quasi rediuium salutauerit, crudelem blandè appellans, quod suâ in scribendo negligentia, amicos tam bonos, tamque constantes enecaret. Videlicet non admittebant quod expectandas à se raras literas præmonuerat, donec studium Iuris foret absolutum. Quare compulsus denique fuit, vt sapiusculè scriberet; neque ad ipsos Italos modò, sed ad ipsos quoque Velsorum,

1603.

Scaligerum, Clusium. Quia porrò ambages nimis erant magnæ; cùm oporteret literas Augustâ, atque Francofurto transdere in Hollandiam; ideò Scaliger auctor fuit, vt literæ mutuo destinarentur Parisios, ad Præsidentem illum eximium Iacobum Augustum Thuanum, cuius nomen diffusius est, quàm vt elogio vlllo possit comprehendi. Etenim, quòd Scaliger illum & sui amantissimum, & pro singulari in bonos, eruditòsque omneis affectu ad omne genus officij paratissimum comperisset; idcirco eam ipsi curam non dubitauit committere, vt commendatas ab utroque literas ex æquo curaret. Quare hac primùm occasione, & ex hoc vsque tempore cœpit quæ magna, exultatque deinceps fuit, inter Peireskium, & Thuanum necessitudo. Ad Patrem verò, ac Patrum, æti par fuit, scripsit frequentius: sed maximè vt obtineret, ne ante finem eius anni, qui fuit huius sæculi tertius, Aquas-Sextias euocaretur. Et quia nôrat ciueis Aquenseis ea tempestate procurare, vt non modò Regium Collegium pro humanioribus literis, ac Philosophiæ studio haberent; sed vt priscam etiam Vniuersitatem, Regiis Professoribus illustratam facerent; capropter scribens ad Parentes miro contendit studio, vt Professori primario Iuris ampla forent stipendia, quo Pacius illud accerferetur. Siquidem perspectum habebat tam Palatinum Comitem, quàm Academiæ Curatores euocare illum ingenti pollicitatione Heidelbergam, vbi iam per complurèis annos sui specimen dederat; ipse verò & expecebat posse Aquensem Academiam tan-

ro ornamento gloriari, & ægrè ferebat excidere spe, 1603.
 quam satis firmam conceperat efficiendi demùm ex
 illo virum Catholico-Romanum. Cæterùm, cùm
 non posset ampliùs Patruì votis oblistere, quippe qui
 resignata illi dignitate Senatoria, etiam ab anni ini-
 tio regium diploma quæsierat; accessit tandem
 Aquas Sextias, vt necessarium illi habendæ docto-
 reum gradum consequeretur. Non accessit autem
 nisi priùs optimè exercitatus, ac nisi obtenta in fi-
 nem anni dilatione, tum vt Pacium per ferias Na-
 talitias deduceret, tum vt intereà se ad varias actio-
 nes obeundas meliùs compararet. Etenim quia mo-
 ris tum erat in Aquensi Academia, vt nemo priùs
 ad lauream Doctoratus admitteretur, quàm, præ-
 ter alia tentamenta, triduanas theseis defendisset; id-
 circò theseis miscellaneas exvtroque Iure desumptas,
 maturè & seligere, & mandare typis oportuit. Et
 aliunde, quoniam à Patruo accepturus vno die Do-
 ctoratus insignia, constituerat ipse in fratrem inse-
 quenti die conferre; eapropter habere sibi tempus
 voluit, ad congerendum vnde posset insigniorum
 originem, vetustatèmq; explicare. Accessit ergo
 tandem cum Pacio sub brumam Aquas-Sextias: ta-
 met si gradum adeptus non est, nisi die Ianuarij in-
 sequentis anni decima octaua. Tædium fortassis pa- 1604.
 rerem, si vel per capita attingerem ea, quæ magna
 cum eruditionis testatione edisseruìt singulis illis
 actionibus, quibus est Lauream consequutus. Satis
 esto subiicere, gessisse se illum eo cum vigore animi,
 vt non totam modò coronam in admirationem ra-

1604. puerit; sed ipsi etiam Pacio visus fuerit seipsum longè superare. Biduo post, cum ornamenta Doctorica in Fratrem conferret, dici non potest qua suauitate auditores perfuderit. Scilicet ex statua quadam Metrodori cum galero suo, seu Arcadico pileo, & infulis, cumque pallio philosophico, & annulo in sinistra manu: itemque ex statuis quibusdam Hippocratis cum simili pallio, epomidèque adiuncta: ex inscriptione quadam Eubuli Marathonij, ac infulata statua non ad ceruices, sed circum caput: ex consimilibus Platonis, Theophrasti, Phaulorini, aliorum: ex cimeliis Gotthicis, in quibus mitræ pileis non admodum absimiles; ex innumeris aliis (vt breue faciam) monumentis, ostendit quemadmodum vsus eiusmodi ornamentorum ab vsque Græcis ad Latinos, & ad nos vsque transierit; quemadmodumque ex Philosophia atque vetere Sacerdotio, gradum fecerit in doctrinam, Professionemque multiplicem recentiorum Academicarum; idque citatis passim Conciliis, Patribus, Poëtis, Historicis, Philosophis, Oratoribus, quibus plenam faceret fidem.



DE VITA
PEIRESKII
LIBER SECVNDVS.

Vix iam defierat celebritas, cùm memoratum antè diploma, ne, anno maius, antiquaretur, Senatui exhibendum fuit. Id ergo exhibitum quidem, & in acta referri iussum: verùm obtinuit Peireskius, ne propterea statim admitteretur, conscribereturque reipsa in Senatorum numerum; tum quia videri noluit ex eo numero Patrum amantissimum exegisse; tum quia timuit, ne si semel astringeretur officio, sibi & libertas studiorum, & occasio peregrinandi maturè nimis præriperetur. Heinc quoniam ad amicos scribens, & occupationes doctoreas in excusationem diuturni silentij prætexens, insinuavit simul se ad Senatoriam dignitatem adigi non sponte: responsa tulit varia, congratulantibus plerisque, quòd iam inter Senatores cooptatum arbitrarentur. Ex istis fuit Scaliger, qui & dignitatem nouam commendauit, & con-

1604.

gratulatus ob lauream, subiunxit et aliàs adfuisse
 Aquis-Sextiis, testem seueri examinis, quo Academia
 vteretur. Fuit etiam, Velferus, qui non modò est ob
 dignitatem congratulatus, sed admonitionem etiam,
 adhortationemque paternam adhibuit, ac inter cæ-
 tera, *Non esse animo ipsi despondendum: munus Senato-*
rium tametsi spinosum, id tamen prima fronte duntaxat;
principium solùm molestum esse, lenire tempus cætera: ni-
hil supra vireis exactum iri; fore Numen propitium; de-
beri patriæ operam, & quædam alia in eundem sen-
sum. Sic adhortatus etiam est Pacius, statim ac re-
 diit Monspelium, epistolâ nuncupatoriâ, qua Im-
 perialium Institutionum Analysin ipsi dicauit; quan-
 quam, quòd nosset illum nondum inter Senatores
 relatum, dicauit, ac inscripsit solùm, tanquam in
supremo Prouinciæ Senatu Consiliario Regio designato.
 Non pigebit porrò hûc transcribere ipsissima, nun-
 cupationis, & adhortationis verba. Sic ergo illum
 affatus est. *Ad te verò, mi Fabrici, meas lucubrationes*
mitto. Cùm enim tu antiquis moribus præditus, à nostro
conuictu, vnà cum suauissimo fratre tuo in patriam re-
diens, vetusto more, præclara xenia, vel potius munera
obtuleris, quibus vestram, vestrorumque Patruum, & Pa-
tris virorum amplissimorum, & regionum in supremis Se-
natibus Consiliariorum erga me, meosque beneuolentiam
testatam reliquistis: me quoque oportuit, ne ab antiqua,
& laudatissima consuetudine discederem, aliquid inuicem
rependere, quod grati animi testimonium esset. Quid au-
tem à me proficisci potuit, quod tibi gratius esset, quàm
aliquid ex his studiis depromptum, quibus nobilissima tua
 familia

familia maxime floret? Nam pecuniâ neque tu egēs, neque ego abundo: hæc verò studia amas, & colis; ac te ex nostris prælectionibus, atque exercitiis profecisse lubens fateri soles. Eximia verò laudis, quam tuo merito in doctoreo gradu assumendo es consequutus, participem me quoque esse vis, quasi nostris monitis, & præceptis adiutus, ad illud eruditionis culmen, quod multi frustra aspirant, ascenderis. De quo tuo, optimique fratris tui nouo honore vobis ex animo gratulor; & ut iam Senatorios animos accipiat, iam in Rempubicam, qua vestram operam requirit, omneis vestras cogitationes conuertatis, publicumque bonum perpetuum vestrorum consiliorum obiectum statuatis, etiam atque etiam hortor. Hac enim re nulla vobis dignior, nulla parentibus vestris (Patrum alterum vestrum parentem agnoscitis) gratior, aut iucundior esse; nulla vos illustriores reddere potest. Hactenus Pacius; Peireskii verò animum quidem allegendi se aliquando Senatoribus non abiicit: non intermisit etiam ptorsus susceptum Iuris studium: verum dilatione obtenta, & liberioribus iam studiis, ad colendum suauiores Musas, ad promouendum bonas artis, ad adiutandum, quantum potuit, viros bene de literis merentis animum applicuit. Ac primum quidem variè sollicitatus de coniugio, cœlibem vitam prætulit; ratus non posse se vxoris, succrescentisque familiæ sollicitudinem gerere, & expeditum se erga studia, virósque studiosos tueri. Heinc cum Pater, ipso inconsulto, conuenisset propè de nuptiis cum viri illustris Ioannis Ceppedæi primi Rationum Præsidis vnica filia contrahendis, veniam

1604. ardentè petiit non discedendi ab instituto. Quippe se Palladi, ac Musis nomen, fidemque ita dedisse, ut sacrilegium duceret de aliis nuptiis cogitare. Et Pinelli quidem exemplum, alta licet mente repositum, noluit Patri proponere; sed proposuit tamen exemplum Varij, quod præsens ac illustre erat; adiecitque sibi præ aliis domesticum esse coram oculis, quod se non posse, nisi cum laude imitari arbitraretur. Itaque imitatus Patruum ducere uxorem germano concessit; illéque propterea sequente ætate memoratam suprà Marchisam à Tullia duxit coniugem, ex eaque tertio anno post Filium suscepit, quem Claudius Patruus, superstes adhuc, cognominem fecit. Deinde, non admodum longè à doctoreo gradu suscepto, perlustrare placuit maritimam oram, tum ut omnia antiquitatis monumenta peruestigaret, tum ut rariores quasdam plantas per eam regionem deligeret in Belgenferianum hortum transferendas. Quòd duxerit autem initium à Foroiulienfibus antiquitatis reliquiis, circa quas sibi prima vice (discedendo nempe in Italiam) abundè factum non putabat, fuit occasio deducendi Draguinianum usque nobileis consanguineos, qui ad Doctoratus accesserant pompam. Visere autem imprimis voluit opus Romano nomine dignum, intercisam scilicet Rupem, seu excavatum amplum canalem in declivi quadam montis facie, quà Cyanci fluij scaturigo altera forum Iulium, à quinto usque Prouinciali lapide, per anfractus vallium, siluarumque fuit perducenda. Quàm multa verò toto progressu obseruârè,

collegeritque, enumerare prolixum foret: adnoto 1604.
 solum ipsum exinde cepisse ansam conscribendi,
 mittendique varia ad amicos varios. Cætera inter
 plurimi fecit Consulare quoddam numisma, quod
 dicebat insolitum, & neque Goltzio, neque Vrlino,
 neque aliis memoratum, quodque destinavit ad Pi-
 gnorium, vt cum Friderico Contareno communi-
 caret. Plurimi etiam inscriptiones quasdam Flami-
 nij, & Dudistij, de quibus supplendis (nam exesæ
 erant) cum Velfero præsertim egit. Plurimi quædam
 alia selecta, quæ misit ad Scaligerum, & ex rebus aliis
 conchas nescio quas, quarum occasione scripsit ad
 Penam Medicum de Concha anatifera mituli instar
 conformata. Sed vt de Plantis speciatim dicam, co-
 mitem adhibuit Botanicum quendam plantarum
 quouis tempore internoscendarum peritum, capro-
 pterque non solum plantas in suum hortum destina-
 uit, sed plerarumque etiam radices transmisit ad
 Clusium, ac inter cæteras Tragacanthæ, Aristolo-
 chiæ, Asphodeli, Arbuti vtriusque. Significauit au-
 tem simul desiderium, quo vellet Clusium aliquan-
 tisper Belgenferij detinere, ostensurus illi Styracem,
 seu arbutum foliis cotoneæ malo, floribus arantiæ
 non absimilem, & liquoris fragrantia nequaquam
 Syrio posthabendum. Is enim ad vnum milliare iux-
 ta oppidum itanascitur, vt aliàs frustra requiratur.
 Ostensurus etiam Lentiscum, quæ non minus Ma-
 stichen fudet, quàm quæ in Chio insula nasci specia-
 lis dicitur. Ostensurus & alia quædam vix aliàs vs-
 quam obseruabilia. Cùm rediisset, agere cœpit de

1604. instituendo Eremitarum Camaldulensium cœnobio in egregia illa solitudine, subrupeâque Ecclesia, quæ Diuæ Mariæ de Angelis sacra, æquâ propè distantia est Massiliam inter, & Aquas-Sextias. Occasioni fuit, quòd Patauij degens eorum institutum valdè probauisset, eruditusque inter ipsos Religiosus nomine Elias, Nouitij cuiusdam causâ, Aquis-Sextiis tum versaretur. Peireskii itaque illius conuersatione delectatus, ipsum per multos menses detinuit, in solitudine sustentauit, ac sæpiùs per complureis dies commoraturus inuisit. Procurauit intereà vt ciuium tam Aquensium, quàm Massiliensium decreto id cœnobium postularetur. Licentiam quoque instituendi à Mintensi domino, in cuius ditione est locus, obtinuit, ac circumuicinum dominium, seu fundum pretio acquisiuit. Satagit quàm enixè potuit per Patauinum Episcopum, & Cardinalem Palauicinum, vt Congregationis eius Superiores non Eliam modò illeic loci relinquerent, sed religiosos etiam alios in amplissimam messem destinarent. Rogauit, vt aliquos saltem loco visendo committerent, pecuniâque intereà sumptibus faciendis necessariam misit. Et facta quidem plurima spes: sed postremò tamen irriti conatus. Sic votis etiam non respondit redintegratus pro Pacio labor. Siquidem cum incunte vere euicisset, vt Aquenses destinarent Pacio primariam Iuris cathedram, præstituto stipendio librarum Turonicarum bis mille, & quadringentarum, proficisci ipse Monspelium cum Assessore urbis voluit, vt si quidpiam difficultatis obstete-

ret, amoliretur. Et rediit tamen re infecta; præ- 1604.
xente quidem Pacio, quòd tria librarum millia, præ-
ter occurrentia emolumenta, expeteret; sed causâ
reuerâ ab vxore datâ, quæ Catholicam urbem exo-
sa, Heidelbergensem præoptaret. Incidit verò sta-
tim in morbum, è quo vix initio æstatis conualuit.
Importuna præsertim fuit mira cutis teneritudo;
nam quacumque corporis parte tantilla fieret ve-
stium compressio, rubescens tumor cum vehementi
prurigine cooriebatur. Casus hic ansam illi præbuit
philosophandi de Maculis, quas ab vtero plerique
fortiuntur. Quippe cogitatio illum subiit fieri simi-
liter posse, vt qua parte corporis grauidæ mulieres
sefe attræctauerint, dum expetitæ cuiuspiam rei ima-
ginatione tentantur, in eadem Embryonis parte
eiusmodi rei character suboritur, exprimatûrque.
Ita non semel tetulit, ac non multis speciatim an-
nis ante obitum, cum vnâ philosopharemur de qua-
dam canis imagine intra vrinam hominis à rabido
cane demorsû conspecta. Ac difficultas quidem erat,
cur ille character non corpori matris, sed Embryo-
nis inureretur: sed assensit tamen Embryonem vte-
ro gestatum vnum corpus cum matre esse; eadẽ-
que specie alimenti, iisdẽque spiritibus secundum
omneis sui partẽs sic enutrirî, vegetariq̃ue, vt se-
mine ex omnibus partibus deciduo fuit primũ for-
matus. Quare & tenue corpusculum iisdẽ affici
casibus, quibus ipsum corpus maternum; ac posse
ipsi tantò facilius notam aliquam imprimi; dum,
spiritibus speciem conceptam deuchentibus, eo ma-

tris contactu veluti defigitur, quantò ipsum est mollius, ac tenerius. Memini verò id confirmatum memorabili quodam facto, quod ipsi fando accepimus; Muliere nempe grauida in oppido huius Prouinciæ Cipperiis dicto, ante annos circiter sexaginta, pugione confossa, eductum fuisse ex ea Embryonem cum totidem notis liuescentibus, & ad easdem partibus conspicuis, in quibus mater fuerat percussa. Quòd autem, dum illæ fructuum species, cerasa, fraga, aliæque rubescunt, impressi quoque characteres viuidiore rubore sint, causam dici posse affectionem aëris secundum eandem tempestatem similibus spiritibus concitandis idoneam, vt dum vitibus florescentibus vinum in doliis commouetur; sed non est quorsum ea de re vberius quidpiam heic proferatur. Repeto potius Peireskium balneorum vsu conualuisse (sanguine putà temperato, perspirabileque facto corpore) ac magno fuisse leuamento, quòd iucundissimam intereà familiaritatem duplicem parauit. Altera fuit cum nobili Francisco Villanouano Flayosci Barone, & Marchionis Transij germano, qui linguæ Græcæ, omnigenæque historię callentissimus, quicquid penèrat in tota Prouincia monumentorum vetustatis perspectum ad vnguem habebat. Altera cum celebri viro Francisco Malherbio, qui deinceps habitus fuit Gallicæ linguæ arbiter, & Poëseos facillè princeps. Inuisebat enim vterque; & cum priorem quidem ipsi patria communis, ac studium earundem rerum conciliasset, posteriorem illi quæsiuit commendatio Va-

rij, clarumque in Prouincia nomen, ex quo tempore fuerat memorato magno Franciæ Priori à Secretis. Heinc proinde cœpit Peireskius Malherbij poemata cognoscere, suspicere, apud exteros commendare. Siquidem cum mense Septembri illa memorabilis Ostendæ obsidio exitum habuisset, pulchraque illa carmina, *Area Parua ducum*, &c. fuissent Gallieis versibus non modò à Vario, sed à Malherbio etiam expressa, misit illicò cum ad alios, tum ad ipsum Scaligerum, quem Latinorum carminum arbitrabatur esse auctorem. Taceo autem ut Scaliger ad ipsum rescripserit auctorem esse Hugonem Grotium, adolescentem lectissimum; puellas verò ex Helicone se, ut senescentem, pridem auersatas; ex quo etiam se excusauit, quòd versus ab eo pro Pinello expetitos non mitteret. Diuersatus per Autunnum Belgenferij, spectauit Rarum illum concursum trium superiorum Planetarum, qui nonnisi anno quoque octingentesimo contingit, & Magna, seu Maxima potius, Coniunctio meritò vocatur. Et mirabile quidem fuit nasci in eo conuentu Stellam magnitudine Iouem æmulatam, quæ supra annum in eodem Serpentarij pede sic perseuerauerit, ut perseuerauerat alia in sidere Cassiopeiæ ante annos triginta duos, & alia rursus ante triennium in constellatione Cyeni. Verum quia tum Peireskio cœlestis globus non aderat, quò fieret certior de siderum non errantium nomenclatura; ideo facilè credidit Nouam illam stellam ex antiquis esse, ac potissimum videns ipsam non, ut Planetas circumstan-

1604. teis, obtusi esse luminis, sed fixarum instar mirè
 scintillare. Acceptis post aliquot menseis à Pigno-
 rio literis, didicit Stellam esse recentem, ac obserua-
 ri à Galileo; idque cùm iam ex vespertino in matuti-
 num situm transiisset: at quia in morbum incidit,
 1605. quò initio veris multùm laboravit, cùm simul quo-
 que agrotarent Pater, Frater, Patruus, Nouerca, &
 domesticorum nonnulli, idcirco sibi à studio eam
 obseruandi temperauit. Ne memorem, cùm voluit
 postea ad illas parteis respicere, stellam sic fuisse iam
 imminutam, vt fixis circumstantibus, perpetuisque
 nihilo maior, ac vna earum credita, euaniisse iudi-
 caretur. Posterioribus tamen annis dolere satis non
 poterat, quòd ad tam rarum spectaculum suis ob-
 uium temporibus studiosè magis non attendisset.
 Per ea tempora cùm Massilià Belgenferium conten-
 deret, transire Castelleto voluit, vt Parochum loci
 nomine Iulianum, ob ingenuam curiositatem sibi
 iam carum, saluaret. Cùm ab ipso aliquantisper ex-
 tra vicum deduceretur, occurrit illis Mulio floridum
 ramum ex Myrto gestans, latifolium, & flore pleno,
 qualem Peireskii neque viderat, neque inaudierat
 exstare. Itaque ratam miratus Plantam, perducere vo-
 luit in mediam siluam, vbi enata fuerat, ac trans-
 ferri ipsam curauit, vt excoleretur, propagaretur-
 que. Transferri autem noluit in Belgenferianum
 hortum, quoniam non aderat qui illam satis dili-
 genter curaret; sed in hortum potius ipsius Iuliani,
 cuius futurum circa ipsam exquisitum studium con-
 fidit. Et excoluit ille sanè, vt par fuit, quosque ex
 planta

planta manente incolumi, propagatio fieri Belgen- 1605.
 scrij potuit. Id attingere visum est, quia nusquam
 in tota Europa Myrtus pleno flore fuerat agnita; ac
 debetur Peireskio, quòd iam in hortis Regiis, quòd
 Romæ, quòd in Belgio, quòd alibi gentium visa-
 tur. Prætereo ipsi quoque deberi Fungum Coral-
 loidem dictum, de quo cùm Clusius rescriberet,
mentionem, inquit, faciam in auctario ad Exotico-
rum Historiam, quam spero breui publici iuris facere,
Fungi cognitionem tibi acceptam relaturus. Hec non-
 dum dixi Varium tantoperè fuisse illius consuetu-
 dine delectatum, vt donec fuit Aquis-Sextiis, con-
 tinenter penè habere commensalem voluerit. Quin
 habere etiam voluit peregrinationes, rusticationes-
 que cum illo communis; & cùm sub Iulij initium
 profectus est Massiliam, vt Carolum Neouillam
 Alincurium Ex-legatum Regium Roma redeun-
 tem inuiseret, illum comitem in via facundum con-
 salutaturn deduxit. Cùm destinaret autem pergere
 Parisios, insinuauit ipsi an-non vellet Urbem, au-
 lāmque cognoscere. Ipse nihil quidem sibi esse ma-
 gis in votis professus est, & maximè in tanti viri
 augustissimo comitatu: at obstare dixit volunta-
 tem Patruī, qui paratum aliās negotiorum causā
 cò discedere, id abnuisset, prætulissetque Fratrem
 proximè discessurum. Scilicet in Regis consilio
 tum agitabatur negotium circa solutionem Tallia-
 rum, vt vocant, ad quam Riantienfes contende-
 bant ratione fundorum quorundam Reginaldum
 Patrem teneri. Enimuero Varius sese curaturum

1605

recepit, vt ipse potiùs destinaretur, réque ipsa Patruo persuasit tenerum nimis esse affectum, iniuriámque esse, non beneuolentiam, arcere tantam indolem à consummatione virtutis. Itaque Patruo, propter viri auctoritatem, consentiente (nam Pater alioquin votis filij numquam apertè repugnauit) dedit sese Peireskii in comitatum Varij, Augusti mensis initio, annóque huius sæculi quinto. Incredibile autem dictu quàm citò Parisiis inclaruerit, partim virtutis propriæ, partim Varij commendatione. Primus, quem gestiit salutare, Augustus ille Thuanus fuit, tum vt ob summam humanitatem, ageret coràm gratias; tum vt ab illo acciperet, si à Scaligero quid haberet. Quantâ verò lætitiâ exceptus ab eo fuerit, exprimi non posse ipsemet narrauit. Aperta nimirum statim Bibliotheca tum priuata, tum Regia; apertum quicquid monumentorum ad contexendum historiam asseruabat in scriniis; apertum cor, & viscera sinceritatis miræ profusa. Ipse, tum plura edocuit, quæ ille de viris in Italia eruditis expetiit; tum, quia nonnihil desiderabatur ad conscribendum eorum elogia, recepit se per literas ex amicis consequuturum. Cùm iteratò illum inuisit, accessit illicò fuit Isaacus Casaubonus, cui sub Thuano commissæ erat Bibliothecæ Regiæ custodia. Is à primo statim congressu, nescias an magis suspexerit, an amauerit illum magis. Nimirum tam multa accepit, edoctusque ab eo fuit, vt nec publicè, nec priuatim per familiareis lite-

ras tacere id potuerit. Nam primùm quidem edens 1603.
 Notas ad Epistolam Gregorij Nysseni, quæ est ad
 Eustathiam, Ambrosiam, & Basilissam, meminit
 nummi ærei Rogerij Regis Siciliae, quem, inquit,
inter multos Arabicè inscriptos, cum variis figuris di-
uersorum Principum nobis ostendit Fabricius de Petris-
co Senator Aquì-Sextiensis, vir eruditissimus. Deinde,
 cùm Peireskius illi detexisset errores apud Vrsi-
 num, & Goltzium, qui Iacobo Stradæ, potius
 quàm numismatibus fidentes, corruperant varia
 ex gentilitiis nominibus aliquorum Imperatorum,
 inter triginta Tyrannos sub Gallieno recensito-
 rum, ac nominatim MARCI PIAVONII VI-
 CTORINI, ET LVCII ÆLIANI, (ex
 quibus illi MARCVM AVRELIVM, VICTO-
 RINVM, & SPVRIVM SERVILIVM LOL-
 LIANVM, contra fidem numismatum, quæ ipse
 ostendit, commenti immeritò fuerant) Casaubo-
 nus gratias amplissimas egit, ac pergens, Oro te,
 inquit, per amicitiam nostram nuperam, sed antiquis-
 simam, si per te licet; oro te, inquam, quæ habes eius
 generis mihi communices. Omnino quam ingrederis viam
 illustrandi eas tenebras, certissima est, & unica. Ex-
 pectabo magna aviditate quæ supra huiusmodi *ἑξαπο-*
στολικῆς magnus Scaliger observauerit: sed auguror etiam
 post illius messem tuo spicilegio fore locum. Est enim
 cuiusdam felicitatis incidisse in eos nummos, qui in
 illa caligine lucem tibi affulserunt. Sed ne sum proli-
 xus, excerpo duntaxat quæ in hæc verba ad illum
 scripsit, vno, alterove post anno. Deum precor, ut


1605. tanto Musarum Patrono omnia lata, ac fausta largiri velit. A te autem peto, ut qui semel tua benevolentia me dignum iudicasti, etiam porro eandem mihi impertiaris, hoc est, rogatus facias, quod ultro cepisti. Ego me tibi & debere iam multa sentio, & debiturum etiam plura non despero, si tibi dabitur aliqua occasio de studiis nostris bene merendi. Nescio an rescueris missum ad me fuisse à Serenissimo Duce Urbinati Codicem Polybij, cuius tu mihi index fuisti: itaque tibi cum primis id beneficium debeo, &c. Notum, ac inter eruditos celebrem virum heic refero, ut ex eo iudicium de cæteris facias. Nam quid memorem Frontonem Ducæum, Papyrium Massonum, & nonnullos alios, quibus salutem per ipsum dici à M. Velfero fuerat expetiturum? Quid Nicolaum Fabrum, Iacobum Bongarsium, Scævolam, & Ludouicum San-Marthanos fratres, Franciscum Pithæum Petri germanum, & alios penè innumeros, quibuscum ex eo tempore familiaritatem contraxit? Dicere præstat nullam fuisse Bibliothecam celebrem, quam euolutam non fecerit, ac præter memoratas quidem, San-Victorianam potissimum, in qua referebat se, cum multa alia, tum speciatim vidisse omnia Puellæ Aurelianensis acta, vindictiasque, & effigiem, contexto ex iis magno Codice, iussu Abbatis contemporanei. Sic & complura meminerat, quæ obseruârat in priuatis, ac nominatim Ioannis Iacobi Memmij Roissij, viri indole generosa, & tam virtute propria, quàm genere, & prole illustris, qui etiamnum viuit foelici

senecta princeps Comitum consistorianorum. Itém-
 que Renati Poterij Episcopi Bellouacensis, quem
 predicare solitus erat rarâ doctrinâ spectabilem.
 Ac rursus Pauli Petauij Senatoris summè laudati,
 cuius commendabat quidem supra mille MSS.
 codices: sed faciebat tamen Cimeliarchium pluris.
 Cùm ipsum autem videretur esse cumulatissimum;
 voluit tamen sponte augere variis Regum numis-
 matis tam primæ, quàm secundæ Stirpis. Dedit
 nempe quædam, in quibus nomina Regum lege-
 rentur, v. g. Clotarij coronâ gemmeâ redimiti,
 (Constantini scilicet more, qui pro laurea gem-
 meam vsurpauerat) quædam in quibus Comitum, sub
 quibus numi fuere cusi, vt *FILAPARII* Rhemen-
 sis, cum inscriptione *REMVVS FIT*. Pari ratione
 commendabat Francisci Oliuarij Fontanæi cimelia,
 ac libros. Ex Cimeliarchio autem Regio, cui Ba-
 garrius iam præerat, æquum sanè fuit nihil ipsum
 latere. Probauit porrò consilium, quo Francisci Pe-
 rerij nobilis Aquensis promptuarium præclaris ci-
 meliis instructissimum transferendum in illud erat:
 quippe multa adhuc deesse agnouit, vt dignum
 Regio nomine meritò existimaretur. Quia verò in-
 ter cætera Bagarrius illi ostendit Amethystum per-
 elegantem, in qua cælatus Solonis vultus celebris
 illius Dioscoridis Augusti cælatoris manu; ideò ce-
 pit ansam edocendi ipsum quidnam sibi vellent fo-
 ramina in Inscriptione, quam ostendit, obser-
 uata hac serie,


1605.



Edisseruit enim esse forulos, in quos fuissent inserti clauī continentes Græcas ex metallo literas, quæ cælatoris illius, seu ΔΙΟΚΚΟΥΡΙΑΟΥ exprimerent nomen: sed ordine retrogrado, ut proprium est cælaturarum. Id autem manifestum fecit, ubi depictis in alba charta, uti mox est factum, foraminulis, lineas interduxit, quæ eas literas in hunc modum exprimerent,



Sic se interpretatum dixit foramina quædam, quæ visebantur Assisij in antiquo nescio quo Templo. Cum enim nemo dicere posset ecquid illa significarent, diuinavit ipse inscriptionem esse, seu dedicationem factam ΙΟΒΙ ΟΡΤ. ΜΑΧ. idque demonstravit per lineas foramina sic connectenteis.



Sic speravit se interpretaturum seriem quandam foraminum Nemausensis Basilicæ, quam Quadratam Domum appellant, ubi cætypum obtinisset. Sed

Parisijs vt regrediamur , vix publicum vllum monumentum fuit, quod in examen non reuocârit, de quo iudicium non tulerit. Quippe altero statim mense, ex quo in eam urbem accessit , literas dedit ad Flayosceum , quibus scripsit se nondum quidem monumenta priscorum Regum San-Dionysiana inuississe: sed iam tamen falsi conuicisse Tumulos constructos tum Clodouæo ad Sanctam Genouesam, tum Chilperico , & quibusdam aliis ad Sanctum Germanum. Et paucis post diebus, cum eos expendisset , qui ad Sanctum Dionysium , Nihil potui comperire, inquit , quod ante Diui Ludouici tempora satisfecerit; existimóque omneis illos antiquissimos tumulos tempore eodem, nec multò ante D. Ludouicum constructos. Qui autem placuit maxime , is est nostratis Margaretæ , sororis nimirum Beatricis primogenitæ, S. Ludouici vxoris. Denique commendans vetera sigilla , quæ coràm inspexit, cætypisque expressa tulit , ex Archiuis Abbatiarum S. Dionysij, S. Germani, S. Mauri, & cæterarum, vt in quibus continerentur germanæ effigies Karoli Magni, Hludouici Pij, Hlotarij Imperatoris, Pipini Regis Aquitaniæ, Karoli Calui, Karoli Simplicis, aliorumque Regum ex secunda stirpe, Hæc sanè , inquit, satis refellunt tumulósque, & statuas hisce Principibus confectas ante quadringentos, aut quingentos annos. Nihil non adiiciendum esset circa aliarum rerum studia: quoniam nihil exstare accepit ex mirabilibus seu artis, seu naturæ operibus, quod non studiosè spectauerit, veluti ædificia , opificia , machi-

1605. nas, plantas, animalia, fossilia, omnia denique ob-
 seruatu digna. Hæc inter, varia officia quæ propè,
 quæ procul literatis exhibuit; & cum anxie requisi-
 uisset ex Paulo Seruita, ex Scaligero, ex Casaubono,
 ex eruditis aliis ecquid nouissent de Iuueno Calio
 Callano Dalmata, cuius Codicem MS. de Attilæ vi-
 ta Venetiis absportauerat; is, ut ederetur, animum
 1606. applicuit. Anni sequentis ineunte vere, ac breui in
 Prouinciam redituro Vario, non multo labore ob-
 tinuit, ut liceret sibi inuifere Angliam, comitaturò
 præsertim virum illustrem Antonium Boderium Re-
 gium Oratorem illò destinatum. Neque id modò
 Varius est passus, sed laudato proposito (in quod
 etiam conspirârunt Thuanus, Memmius, Mericus
 Vicus, amici alij) recepit sese curaturum, ut Pater,
 Patruusque factum comprobarent. Discedentem
 voluit Peireskii Aureliam vsque deducere; vnde
 priusquàm regrederetur, spectauit attentius tum
 prisca Ecclesiæ S. Crucis vestigia, quæ vetustatis esse
 duxit mille, ut minimùm, annorum: tum præter alias
 statuas, imaginésque tam Karoli Septimi, quàm
 Ioannæ puellæ, videre eas voluit, quæ in Mu-
 nicipali Curia asseruari perhibebantur; sensitque
 speciatim effigiem, qua Rex est depictus cum barba,
 & San-Michaëliano torque, non esse vndequaue fi-
 dam. Inibat porrò iam mensis Maius, cum disceden-
 te Boderio, ipse paucis diebus retardatus fuit, coactus
 veredis postea subsequi, ut Caletæ assequeretur. Cum
 soluissent, perpauci fuere ex vniuerso comitatu, qui-
 bus ex naus agitatione, halitûque maris stomachus
 non

non fuerit submotus. Peireskius, cùm id præcaueret, cæteris relictis, ad malum confedit, ubi & melius habuit. Causâ requisitâ, respondit agitationem minimam illa in parte fieri; quamobrem se eò declinasse, ne nauicaret, ut cæteri, qui longè magis, tam ad proram, quàm ad puppim agitarentur. Appulsus in Angliam, ac postquàm præeunte Oratore Iacobum Regem salutauit, carus ipsi habitus est, accessitque ab eo non semel. Admissus est etiam in conclaue, seditque inter primores Comites in solemnino quodam Conuentu per ea tempora celebrato. Ad viros doctos quod attinet, quos seu Londini, seu Oxonij, seu aliis in locis conuenit, primus fuit ille de sua Britannia benè meritus Guillelmus Camdenus, apud quem cùm aliquando sermo incidisset de antiquitate Britannicæ linguæ, ad quam Aremorica spectat, & præsentem Doctorem Tato, post rogatas circa complureis variarum Galliarum regionum voces, requisisset etiam quid Arelate, quid Tolonum significarent, responsum tulit, Arelatem eâ linguâ dici ciuitatem in vliginoso loco constitutam; & Tolonum citharam, fortè ob vicinum promontorium, cui Citharistes nomen fuit. Accepit & id genus alia, ex quibus penè deductus fuit in Strabonis, Taciti, aliorumque sententiam, qui scripserunt Gallos, & Britannos eadem primitus lingua vsos. Alter fuit Robertus Cottonus; inter curiosos, optimèque animatos conspicuus. Deinde tam Iacobus Collius, quàm illius socer Matthias Lobellius, regius Botanographus, quem vtrumque deuinctum voluit. Post-

1606. cā Albericus Gentilis, Henricus Sauilius, Ioannes Nordenus, & plerique alij. Non tacendus verò eruditus tum iuuenis Ioannes Barclaius, quem quanta beneuolentia prosequutus fuerit, intelligetur inferiùs. Dolere autem solebat non agnitos sibi nec Gulielmum Gilbertum auctorem libri de Magnete, nec Thomam Lydiatum celebrem Mathematicum. Non heic memorabo Bibliothecas varias, in quibus rariores libros obseruauit; non Musæa, in quibus uidit, & ex quibus comparauit quicquid pretiosum licuit. Magni verò ducebat præ cæteris gemmam, centum & quinquaginta libris Turonicis emptam, propter cælatum Aëtionem cum Tiara Phrygia, quem Patrem Andromaches Hæctoris vxoris argumentabatur. Referam solùm, quia maturiùs, quam concepta spes, discedere voluit, idcò maximum fuisse factum ipsius desiderium, & in familia Oratoris, & apud eruditos viros, qui cùm postea variè ipsius meminert, sufficiet heic excerpere quod memoratus Camdenus habet in descriptione Britanniae, cùm de numismatibus ad rem suam pertinentibus verba facit. *Cuiusmodi, inquit, non alibi effossa hætenus audiui, priusquam nuperrimè nobilissimus, & in re nummorum antiquaria longè doctissimus, & perspicacissimus Nicolaus Faber Petriscius eiusmodi in Gallia reperta mihi ostendit. Et commoratus quidem fuisset nonnihil ampliùs in Anglia: sed quia treis duntaxat mensibus se abfuturum promiserat, idcò post mensem discessit in Hollandiam, quam ab vsque initio (sed planè tamen tacitus) constituerat perlustrare. Quo*

discessurus tempore fuit, adiungere se illi voluit nobilis turba iuuenum, qui ipsi quoque fuerant ex Gallia Boderium sequuti. Verùm illi quidem ad arma, aliáque studia diuerterunt; ipse perrexit requirere eruditos præsertim viros. Ac salutauit quidem primùm quos Middelburgi, Dordraci, Roterodami, Delphis, Hagæ celebrari acceperat: sed id tamen tum in transcurso solùm, quoniam præcipua illi cura inuisendi Scaligerum Lugduni Batauorum degentem. Constituerat cum ipso primùm quasi ignotus colloqui: quamobrem nomine mutato epistolam commendatitiam, quasi à Peireskio conscriptam, missamque illi obtulit. Scaliger autem eâ perlectâ, ipsum est humanissimè in Peireskij gratiam complexus. Post multos consertos sermones, & productos obiter libros, voluit Peireskius ex nescio quo paucas lineas exscribere: vbi verò ille chartam, calamumque exhibuit, ac inter dictandum primas lineas characterem vidit, & *ιστορικῆς* agnouit, tum in amplexus proruens, gratiosissimè conquestus est fraudem. Cùm deinceps variis de rebus colloquerentur suauissimè, Scaliger inter cætera declarauit velle se quidem iteratò procurare editionem Eusebij (nempe non planè arridebat quæ iam tum primùm absoluebatur) itémque paterni in Aristotelem de Animalibus commentarij: sed esse tamen animum redeundi postea in Galliam, & apponendi ossa sua Iulij parentis ossibus. Cùm excepisset autem Peireskius non esse illum igitur *ἐντελέθει* moriturum, illacrymatus Scaliger verbum ea de re non

1606. adiecit. Interpretatus illi Peireskii numismata varia, ac præsertim Siclos, donatus est, inuitus licet, singulari Semisclo, cuius ille præ cæteris interpretationem fuerat demiratus. Donauit ipse multa vicissim, & quod fuit illi iucundissimum, exhibuit, quam detulerat, expectatam ichnographiam, cum inscriptis carminibus sepulcrorum Scaligeranorum. Scilicet eam demùm superiore Martio Veronâ obtinuerat, nec pluribus literis datis habere prius potuerat, ob varios morbos Nîchezolæ, & quod Syluius Donius, qui illam aggressus primus fuerat, inter perficiendum obiisset. Vnum, de quo Peireskii auebat interrogare Scaligerum, & non est tamen vnquam ausus, ne rem molestam faceret, fuit opus illud Cyclometricum, seu de Circuli quadratura ante duodecim annos in lucem emissum, ac statim à Francisco Vieta, Adriano Romano (postea quoque à Christophoro Clauio, hominum Societatis IESV γεωμετρικὰ στοιχεῖα) aliisque in eo puluere exercitatissimis erroris conuictum. Nimirum præmonitus fuit non posse illi eam camarinam sine quadam bile moueri. Quod attinet verò ad Genealogiam, non professus est quidem se subdubitare an reuerâ attineret ad Veronenses Principes, quorum stirpem ille in se desitutam asseuerabat: sed paullò tamen liberiùs, & quasi vellet quid cæteris responderetur, accipere; proposuit ipsi quæ à Scioppio, Guilandino, aliisque fuere obiecta. Post Scaligerum cura fuit inuifendi Karolum Clusium, quem octogenario maiorem podagra tum primùm tentabat, vt & primùm Scaligerum exer-

cuerat , ante paucos menseis. Deprehendit autem 1606.
imprimi curantem in Appendice altera exoticarum
plantarum figuram Fungi Coralloidis , quem ad il-
lum ex Prouincia , cum aliis penè innumeris planta-
rum , radicum , seminúmque generibus transmiserat.
Commodùm etiam illum admonuît circa Indicas
quasdam plantas , in quibus describendis errasset , &
quasdam , de quibus nihil audiisset , idque prolatis
commentariis iuxta ostensos sibi Parisiis à Vespasiano
Robino fructus. Inuisit quoq; post Clusium , præcipua
Academiæ lumina , ac speciatim iniiit amicitiam cum
Bonauentura Vulcanio , qui circa Procopij versio-
nem tum occupabatur ; cum Dominico Baudio , qui
ad peritiam historiæ adiciebat poëseos elegantiam ,
& cum nonnullis aliis. Dolere verò solitus fuit ,
quòd per ea tempora abfuiſſet Lugduno Daniel
Heinsius , quem non semel audierat à Scaligero com-
mendari. Fuit deinceps Amsterodami ; vbi fatiari
vix potuit interrogando , & cognoscendo tam mul-
ta prælara , & rara , quæ ex vtraque India in id
emporium conuehuntur. Fuit Enculæ , vt spectaret
illeic celebre illud Bernardi Paludani Cimeliarchium ,
in quo non ægrè tulisset , tanquam ad Cyaneos sco-
pulos consenescere. Redeundo , nonnihil Hagæ
commoratus , discedere noluit , quin priùs agnouis-
set Hugonem Grotium , quem , tametsi adolescen-
tem , eruditio planè matura , ac omnigena com-
mendabat. Diuertit verò Scheuelingam , vt explo-
raret vegetationem , & velocitatem Currus eâ solertiâ
à paucis annis excogitati , vt passis velis in littore.

1606. nauigij instar euolaret. Inaudierat nempe Comitē Mauritium post Neoportuensē victoriā experiundi grātiā illum conscendisse, vnā cum capto in praelio Francisco Mendoza, ac intra duas horas attingisse oppidum Puttenum, quod inter, atque Schevelingam horaria milliaria quatuordecim intercipiuntur. Quare ipse quoque experiri voluit, commemorareque solebat stuporem, quo correptus fuerat, cum vento translatus citatissimo, non persentisceret tamen (nempe tam citus erat, quā ventus) cūque animaduerneret scrobeis occurrenteis præteruolari; restagnantes passim aquas superficie tenus duntaxat attingi; qui antecedeabant cursores visos quasi retrorsum niti; quæ distantissima apparebant, momento penè præteruehi; & quædam id genus similia. Delphis iucundè exceptus fuit ab Abrahamo Goriæo, quem fortè offendit cæleri curantem Græca quædam numismata, quorum aliquot miserat Parisiis, oblati prius ad vsque mille, quæ ex Italia adduxerat. Satagebat nempe Goriæus complere illa Paralipomena antiquorum numismatum, quæ promiserat in Dactyliotheca; quare & commisit Peireskio descriptionem breui prælo subiiciendam, vt pro suo candore eam expenderet, &, quā opus foret, duceret lituras: ipse autem morem bona fide gessit, correxitque potissimum nescio quid scriptum circa Traianum. Quo loco narrare solebat rem memoratū non indignam, nempe Goriæum, cū aliās Latinæ linguæ non studuisset, intellexisse tamē libros omneis circa rem nummariam Latine conscriptos;

eodem modo, quo Forcatulus omncis circa rem Mathematicam : tantum valet improbus labor ex desiderio quidpiam noscendi vehementissimo profectus. Vidit etiam Delphis superstitem adhuc Religiosam quandam ex eo tempore, quo Hollandi à Catholico-Romana religione defeecerant ; viso prius Vltraiecti Canonico in primæua sua professione viuere permissio. Cùmque suspexisset non modò quicquid antiquissimorum ad conclusa illa Rheni ostia monumentorum superest ; sed etiam quicquid dominatio Burgundionum Ducum expressum reliquit ; tum miratus maximè est , maximoperèque laudauit temperasse sibi Hollandos ab euerfione Templorum, & asseruasse intactos Choros, cum affixis insignibus Equitum aurei velleris à Philippo vsque Bono instituti. Cæterum redire voluit per Brabantiam , Flandriam , reliquasque Belgij Prouincias , impetratis prius ab Hollandis , & ab Archiduce liberi comitatus libellis. Accessit autem primùm Antuerpiam circiter finem Iulij , inistque ibi amicitiam cum Andrea Schotto , & Carolo Scribanio ex Societate IESV viris eruditis : itémque cum Auberto Miræo, Ecclesiæ Decano, rerum Belgicarum, ac totius Historiæ Ecclesiasticæ eximiè perito ; & cum Nicolao Roccioxio rei antiquariæ impensè studioso ; & cum Henrico Sedulio auctore vitæ B. Elziarij. Cùm deinceps Machliniâ peruenisset Louanium, nihil æquè doluit, ac non fuisse ampliùs in viuus Iustum Lipsium , præclarum illud bonarum literarum lumen ante paucos menses extinctum. Sperârat enim sese

1606.

illum non minùs, quàm Scaligerum omnibus officiis breui deuincturum. Doluit pariter non adesse per eos dies Adrianum Romanum Mathematicum illum celebrem, quem gestierat summoperè cum Scaligero conciliare. Postquàm inuisit Academiam, doctòsque, qui in illa viros, visere voluit apud vi-
duam Medici cuiusdam cornutos duos lepores, qui ex Noruegia dicebantur allati. Et quia reperit mortuum alterum, obtinere quouis pretio & illius cornua, & geminorum iconismum voluit. Bruxellæ amicitiam iniit cum Karolo Bromantio, Comite Brouæ, & quibusdam aliis; at suspexit potissimum celebrem Pictorem Venceslaum Cobergeum, qui tum habebat præ manibus insigne opus quadripartitum de Architectura, de Pictura, scripturæque antiqua, de Deorum imaginibus, de Numismatis, seu mauis Medaliis, aut metallicis æneis à Iulio Cæsare ad Gallienum vsque. Memorabat porrò varios circa parteis singulas confertos cum illo sermones, maxime autem circa postremam, propter Cobergei opinionem, quòd Medalia huiusmodi monetales esse non possent; argumento præcipuo, quòd typus seu forma, qua ferirentur, signarenturque, elaborari non posset ante duos menses ab artifice; adeò vt, cum plures ducentis percuti eodem typo non possent, pretium operæ fuisset longè superaturum monetæ valorem. De colloquio, memini solùm obiecisse Peireskium, vsurpatam fuisse Seruorum industriam, quæ pretio non redimeretur; & excepisse Cobergeum, rem peractam fuisse cum Serui edicto

edicto prohiberentur non modò quidpiam pingere, 1606.
 sed pingendi etiam addiscere artem. Bruxella discess-
 furus, scripsit ad Cottonum epistolam pereruditam,
 misitque simul cętypos variorum nummorum, ac
 nominatim Commodi, ob inusitatam scripturam
 vocis BRITANIA, per duplex TT, & simplex
 N. Salutare voluit exinde Gandavi Laurentium
 Deebrotium, quem in Italia nouerat. Insulis Flo-
 rentium Nallæum, eruditum Canonicum, antiqui-
 tatum Liturgicarum auctorem. Tornaci Dionysium
 Willerium Canonicum, & Cancellarium, ac Hiero-
 nymum Winghemium similiter Canonicum; il-
 lum rerum antiquarum instructissimum, istum stu-
 diosissimum rariorem Plantarum. Duaci Guillel-
 mum Richardotum Ioannis Præsidis filium, quicum
 ex vsque Italia colebat amicitiam; & Andream Ho-
 ium Professore Græcum, abs quo memorante ac-
 cepi quàm iucundè suauissimis Peireskij, ac Richar-
 doti confabulationibus tertius interfuisset. Enim ve-
 rò præ cæteris referendus hoc loco est eximius Prin-
 cepts Karolus dux Croius, & Arschotanus, qui ipsum
 totis decem diebus in celebri domo Bellimontana de-
 tinuit, continuò spectantem vt innumera, ita rarif-
 sima cimelia, ditissimásque metallothecas, quibus
 curiosissimus, eruditissimúsque ille exornauerat no-
 bilissimum Musæum. Quin discedentem etiam coë-
 git absportare omnia, quæ habebat antiquorum
 Galliæ Regum tam aurea, quàm argentea numisma-
 ta; itémque ex Græcis ad vsque sexaginta; præter
 aliquot vascula, ponderaque, & mensuras antiquas;

1606. cùm tamen nihil aliud à Peiresckio accipere voluerit, quàm æreum nummum Ioannis illius, qui Theodosij, ac Placidij Valentiniani temporibus arripuit Imperium. Quo loco venit in mentem, aduexisse illum ex Flandria numismata Gallorum Regum, ex prima quidem Stirpe quadraginta aurea, præter varia argentea; & ex secunda quinquaginta argentea, præter vnum aureum Ludouici Pij, quod æstimabat maximi, quoniam non modò rarissimum, sed etiam parùm aberat, quin singulare arbitraretur. Instabat tum tempus, quo perhibebatur celeberris fore cæremonias ad Fontem-bellaqueum, in Delphini Principis, hoc est Regis Franciæ Primogeniti, baptismo. Videlicet illius sponsor dicebatur Pontifex Summus, ac nomine Pontificis Masseus Barberinus Nuncius. Quamobrem sub Augusti finem discessit ex Belgio, ac satis tempori adueniens solemni pompæ interfuit, quæ peracta est die mensis sequentis vigesima quarta. Renuntiatum interea est obiisse domi Nouercam, expectarique eius reditum variis rebus componendis. Quocirca amicis quàm coram, quàm per literas salutatis, regressus in Prouinciam est sub initium alterius mensis. Domi exceptus non abnuitt consilium, quod Pater, Fraterque potissimum sumpserant (nam Patruus nonnihil repugnarat) coëmendi ipsam Riantij Baroniam, cuius quia Valauesum erat subclientelare prædium, idcirco fuerat litigiorum benè multorum seminarium. Hinc ipsemet curam assumpsit paciscendi, contrahendique cum Ludouico Grollæo Medullioneo Marchione Brissiaci, eamque ob caus-

1607.
sam in Delphinatum versus illum profectus est, rediitque confecta re, sub initium sequentis anni, qui fuit salutis millesimus sexcentessimus septimus. Cum rediit, multis quidem rebus præclaris incubuit, sed nulli iucundiùs, quàm procurandæ multiplici vestigiorum vrbis, portùsque Carthaginienſis descriptioni. Nimirùm non alia ratione summos Auctores intelligi, conciliarique posse putauit; cogitauitque ea re gratificari Casaubono, quicum de Portus præferti situm, formaque differuerat, neque illius tamen dubiis nouerat esse factum satis. Scripsit præterea copiosè ad Alardum Compendiensem Canonicum circa rem monetariam, ac inter cætera, de usu Aurei Solidi in Gallia ad tertiæ usque Stirpis initium, ostendendo viginti duos huiusmodi solidos pependisse integram libram (tametsi quam vocant monetalem libram ex viginti solùm constaret) ac demonstrando Solidum non semper pro duodecim tantum denariis argenteis oblocatum fuisse, sed nonnunquam pro pluribus, etiam ad usque quadraginta. Inuasit illum interea morbus oculorum molestissimus, à quo medio vere vix fuit liberatus. Cœpit tunc illum Patruus vehementer exstimulare, ut sese ad adipiscendum destinatam pridem Senatoriam dignitatem compararet. Ingrauescebat enim valetudo, infestabantque maximè articulorum dolores, quibus leniendis statuerat ad balnea nostra Dinienſia ante æstatem accedere: sed timens ne quid fortè sibi humanitùs contingeret, constituerat simul ex vrbe non antè decedere, quàm Nepotem coopta-

1607. tum inter Senatores vidisset. Et necessebat is quidem semper quàm gratosè poterat, moras; sed ipsum die quadam, tacito consilio, deduxit ad Varium, ut iuberetur illius ore sese necessario examini subiacere, Senatuque aggregare. Tum ratus Peireskii nihil ampliùs cunctandum, postulauit solùm octiduum, ut rem maturiùs aggredieretur. Medius erat Iunius, imminébátque anniuersarium, trimestréque Curia Parlamenti iustitium: quocirca festinandum fuit, cum examinari, approbarique, nisi pro Comitibus curiatis, non posset. Itaque paratus accessit, seseque probauit conuocatis Classibus ad vi. Kalendas Quintileis. Proposita ipsi Lex fuerat ex sexto libro Codicis, qua Gordianus sanxit ab eo, qui neque legatum, neque fidei-commissum, neque hæreditatem, vel mortis causâ donationem accepit, nihil posse per fideicommissum relinqui. Eam porro cum exponeret, oblitus non fuit, quod à Valerio, & Sallustio de Scipionis Æmiliani facinore proditum est, qui à Masinissa Numidiæ Rege sibi coniunctissimo totius Regni hæres testamento nuncupatus, enixéque rogatus, ut ipsum inter quinquaginta quatuor superstites filios æqualiter hercisceretur, egregiè adeo id præstitit, ut ne minimam quidem rem sibi retinendam putârit. Non item oblitus quod Aristoteles in Politicis detestatus est tam Carthaginensium, quàm Locrensiùm instituta, quorum alij patrimonia æqualia habebant, alij quæ habebant, vendere non poterant, ut antiquæ hæreditates penes familias diutiùs starent; quoniam,

præter incommoda cætera, heinc efficeretur, vt ciues inertes tam in expectandis, quàm in possidendis patrimoniis forent. Cætera mitto, vt attingam qua præsertim re admirationem sui creârit. Nempe tametsi quod ad theoriam, quæstionésque Iuris spectaret, existimatus fuerat paratissimus adfuturus; quod attinebat tamen ad vsum, iudiciorúmque formulas, creditus non fuerat perinde instructus. Sed nimirum neque Parisiis, neque Aquis-Sextiis, occasionem vllam prætermiserat sciscitandi pragmaticos, cognitoresque, & structores litium, ac reducendi in commentarios quicquid aut ex ipsorum ore, aut ex inspectis instrumentis, saccularibusque copiis didicisset. Profecerat etiam consilio, exemplóque optimi, consultissimisque Senatoris Antonij Thoronij, dictionem nullam in toto formulario iure intactam relinquens, cuius notationem, causámque non nosset, vt vsum meliùs eliceret, animóque infigeret. Vt paucis expediam, mirus fuit applausus; mirúmque elogium, quo fuit denique Patribus conscriptus. Inardescibat deinde Patruus desiderio veniendi Diniam, sed obstitit increascens morbus, inualescénsque Solis feruor: proxima quippe erat tempestas dierum Canicularium, per quos ab vsurpandis balneis, thermis que mos est abstinere. Auebat etiam Peireskii vnà cum Patruo accedere; tum vt obsequio continentem gratitudinem testaretur, tum vt hanc partem Prouinciæ nondum sibi visam lustraret; tum vt Baronem Flayosceum interuiferet, qui ducta in vxorem filia vnica Guillelmi Falconij Di-

nienſis Proſenſcalli, apud ſocerum morabatur. Ab-
 nuit tamen id Patruus, ſeu ne abſiſteret à iure di-
 cundo in Claſſe per ferias ſtatuas delecta; ſeu ne diſ-
 cederet à Vario, qui illum abs ſe abeſſe ægrè patie-
 batur: ſeu ne curam dimitteret, qua rogatus fuerat
 præſſe Cayero pictori in obducendis laqueatæ Au-
 ditorij Palatini contabulationi Gallorum Regum
 Iconibus. Ipſe nimirum ſolus par fuit ſuppeditare
 maximam quandam germanarum iconum ſeriem,
 quam ex numiſmatis, ſigillis, ſepulcris, vitris, aliſſ-
 que, huiusmodi monumentis deduxerat: meminiſ-
 ſe, cum veram faciem Hugonis Capeti diù deſide-
 raſſet, dixiſſe non ſemel habere ſe gratiam optimo
 viro Auguſto Galandio, quòd illam ab eo obtinuif-
 ſet, ectypo ſigilli expreſſam. Diſceſſit ergo Patruus
 ſine eo, poſt Caniculareis exactos. Enimvero Varius
 rem gratam vtrique factururus, conſtituit per Septem-
 brim menſem vnà aduenire, adducereque Peireſ-
 kium, vt vnà Patrum inuiſerent, vnàque regionem
 ſpectarent. Et nonnulla quidem obſeruanda illis oc-
 currerunt antiquitatis veſtigia: ſed nihil mirabilius
 viſum noſtratibus Thermis, in crypta ſubrupea, quam
 aquæ calentis prætercurrentis alucolus ſic feruefacit,
 vt leniſſimè ſudorem educens, mire conferat pitui-
 toſis, frigidifſque humoribus; idque præſertim vbi
 illi diſpoſiti priùs ad exſolutionem fuerint Balneo
 quodam, Virtutum dicto, ob ſingularem energiam,
 mirabileſſque, & deſperatas aliis remediis curatio-
 nes. Optabant porro illi quidem præterea ſpectare
 Serpentes, ex obuerſa Aulſtro, ac præceſſa rupe, ad

cuius radicem sunt Thermae, Balneaque deciduos, 1607.
& maxime quidem quia innoxij, expertesque veneni sunt: verum illi non decidunt, nisi Maio, ac Iunio, & ferè quidem copulati, dum prurientes variè discurrent, eque rimis in rimas subeuntes ad precipitium non attendunt. Faciam heic fortè rem non ingratis hominibus nostris, si duo quædam commemorâro, quæ edifferentem Peireskium audierunt. Vnum apud Petrum Trichaudum, San-Martinum Inquisitoriae classis Præsidentem, qui solitus Dinia per ætatem degere, illum cum Vario domo excepit. Cum enim caussa exquireretur caloris aquarum Thermalium, & Guillelmus Alamandus doctus Medicus esse diceret non actu, sed potentiâ ignem; excepit ipse debere potiùs esse ignem actu ardentem in cauernis illis subterraneis, quæ exinde incalcescentes aquam præterfluentem feruifacerent; neque enim seu bitumen, seu sulphur, seu aliam materiam potentiâ solùm calidam excalefacere aquam seu traiectam, seu infusam, etiam vitriolo, halinitro, aliisque huiusmodi mineralibus turgescentem. Adiecit fumos, seu vapores ex aquis thermalium in fissuras rupium subeuntes ita Serpenteis afficere, vt veneni generationem seu impendant, seu corrigant; eadem ratione, qua in Ponto idem facit vsus absinthij, ex Plinio. Qui Plinius quidem, cum aliunde non improbet venenum serpentum in felle esse, & serpentes congressuri dicantur fel euomere; mirum non videri, si quo tempore Serpentes isti coeunt, deciduntque, veneno carcant. Alterum,

1607.

apud Antonium de Bononia Episcopum, qui sequenti die vtrumque, ac etiam Trichaudum conuiuio excepit. Cum enim ex ostensis sibi à Flayosceo in duobus Sacellis maioris Ecclesiæ tam Porcelletanis, quàm Villanouanis insignibus, edisseruisset tempora, quibus Prælatos optimos ex iis familiis habuimus; incidit sermo de tempore, deque titulis, quibus Auenio, Comitatusque Venascinus ad Pontificem Maximum peruénit. Cumque alij nihil scirent aliud, quàm factam à Ioanna Regina Clementi sexto venditionem, anno supra millesimum trecentesimo quadagesimo octauo, ac die nona Iunij, pretio Florenorum octogies mille; retexit ipse totam historiam ab anno vsque ducentesimo nono, quo Raymondus tertius Tolosatum Comes hærescos Albigensum fautor, & Legati interfecti auctor creditus, fuit ab Innocentio tertio iterum excommunicatus. Inde enim cœpit ditioe spoliari, ac post annos nouem-decim transactio Parisiis sic fuit inita, vt Alfonso illius filio sola vrbs Tolosa, cum paucis adiacentibus cesserit; cætera vltra Rhodanum loca ad Regem attinuerint; quæ citrà verò possidebantur, ad Pontificem spectârint. Cum homines autem eiusce regionis non satis lubentes id ferrent, quòd Romam passim prouocarentur, ac ideò Alfonsi partibus fauerent, Bonifacius quidem octauus prouocationes illas remisit, Clemens verò quintus, vt ampliùs demereretur animos, etiam sedere illeic voluit; & cum, post Ioannem vigesimum secundum, Clemens Sextus Pontifex foret, facta

facta est venditio eorum iurium, quæ Comitibus Prouinciæ erant, à partitione vsque facta inter Raymondum Berengarium Comitem Prouinciæ, & Alphonsum Comitem Tolosæ, anno supra millesimum centesimo vigesimo quinto. Et hæc ille quidem, plurâque disseruit, ac denuò comitatus est Varium triduo post redeuntem. Patruus postea, vt restitutam valetudinem tueretur, & vt tranquillius degeret quicquid æui supererat, non Aquas-Sextias, sed Belgenferium, dum regrederetur, contendit. Occurrerat illi Peireskius, ac non modò deduxerat, sed lateri etiam eius adhærere, neque à præstandis obsequiis recedere statuerat: verum non tulit Patruus, voluitque vt potius rediret Aquas-Sextias propter Remigalia, quibus fit Curia instauratio. Rediit ergo Peireskius, ac tantò minùs pœnituit, quantò audire licuit Varium sua illa oris suauitate de Lite, & concordia, deque amore Iustitiæ, Magistratuumque perorantem. Deinceps verò ita cœpit suo defungi officio, vt desiderari nihil posset. Tametsi enim Varius, cum pensa curialia distribueret, nollet initio inspectorem multarum litium designare; quarum tamen paucarum curam illi commissam voluit, eas ipse ita solitus fuit otiosè, acutèque, & per omnes numeros, ac momenta iuris perpendere, vt confectis instrumentorum enucleatissimis breuiariis, explanatissimè deinde, & summa cum fide ad Curiam referret. Cum verò alio expositore ferenda erat sententia, mirè lætabatur, si tempus ad deliberandum daretur, aut controuersia commentarios præhabe-

1607.

ret à partibus ; pudebat enim , nisi foret communiendo suffragio instructissimus , calculum conferre. Rursus autem , quoniam persæpe ob litium anfractus animo pendebat , conuenire solitus erat memoratum Thoronium , qui scrupulos eximeret , nec dubitabat etiam Vario grauiores causas proponere , qui ob eximiam grauissimi , sanissimique iudicij perspicuitatem eas illustraret. Agebat verò id præsertim in vespertino colloquio : iam tum enim Varius singulis noctibus aduocabat illum in frugalem cœnam , ut sermones conferere , sepositis arbitris , posset. Ceterum , quia nescius erat tempus frustra conterere , idcirco satis supererat , ut bonas artis excoleret , & cum doctis viris tueretur commercium. Inter cetera , procurauit exquisitam fieri anatomiam magnæ cuiusdam Testudinis (longitudine nempe cubitali) quam è Martigio mari educatam pisciculis nutrierat , à mensibus circiter tribus. Cum singularia verò multa in ea dissectione obseruata fuerint , tum illa non postrema , Quòd omoplatæ anteriorem , non posteriorem habuerint situm. Quòd arteria aspera fuerit longitudinis semicubitalis , diuisâque in treis ramos , tribus à pulmone procùl digitis , ac ramos quosdam ad renes , & vesicam usque producens. Quòd eadem annulos habuerit omninò , siue vnde- quaque (etiam versus œsophagum) perfectos , & cartilagineos , larinxque epiglottide destituta constiterit. Quòd non ex sola vena porta venarum distributio in interanea fuerit , sed plurimæ etiam ex reliqua caua hepatis parte prodierint ; ex eademque parte

cholidochus porus processerit geminus in dodecadaetylon intestinum. Quòd nulla distinctio gracillium, crassorumque intestinorum, nulla cæci dicti appendicula, nullus item lien, nullus adeps circumuectiens cor (tamen si id aquæ pericardio conclusæ innatauerit) & id genus nonnulla alia. Detexit aliunde non longè ab vrbe insignem quandam copiam non humanorum modo ossium naturæ factorum lapideæ, sed variorum etiam animalculorum, itémque stirpium, foliorum, florum, similiúmque huiusmodi: quam confestim distribuit per vniuersam penè Europam. Adiecit autem tessellas quasdam, seu lapides Rhomboidaleis, tum rubeos, tum crySTALLINOS (videlicet ipsius talchi, seu specularis lapidis speciei) ex Riaticensi agro effossos, eaque in re mirabileis, quòd dum exsoluuntur in minutiores particulas, particulae quæque tuentur rhomboidalem illam figuram. Quin- etiam mittens Parisios, adiectam voluit congeriem diuersissimam conchyliorum, & piscium, qui monstrosâ formâ in mari Mediterraneo visuntur: itémque pellem felis marini, & innumera alia, quæ destinauit præsertim ad pictorem celebrem Danielelem Monstereum, à quo expectabat icones Varij, Thuani, Casauboni, atque Malherbij. In Italiam cum mitteret, nominatim verò ad Gualdum, accepit magno suo dolore obiisse Baronium, deque lamentabili casu ad Flayosceum, & alios scripsit. Cum verò in Belgium, condoluit Villerio ob iacturam ab ipso factam Hadrianei numismatis, in cuius auersa parte ex Villerij quidem

1607.

sententia fuerat Phœnix exhibitus, ex ipsius verò Peireskij interpretatione, Ciconia. Argumentatus autem id fuit, ex proceritate crurumque, & colli, cùm Phœnix soleat potius Aquilæ instar repræsentari: prætereaque ex serpente ipsi ad pedes apposito, & ex inscriptione PATRI, qua designata fuerat Hadriani erga Traianum pietas: denique ex quibusdam aliis satis luculentis indiciis, quibus consolari adnixus est virum, monstrando rem deperditam non fuisse adeò, atque ille existimauerat, raram. Sic consolatus etiam est circa iacturam Iaspidis Argæum montem referentis; idque egens ipse tum quoque consolatione aliqua, quòd famulus quidam suffuratus fuisset numismata aurea primorum Imperatorum, & onychas, gemmâsque alias elaboratissimæ cælaturæ. Incidit intereà Claudius Patruus in morbum lethalem non longè à Regalibus sequentis anni millesimi sexcentissimi octauo. Inuiderat illum Peireskios per festa Natalitia; & quia valentem reliquerat, ideo mira consternatione renuntiatum excepit casum, qui septimo die à decubitu carissimum abstulit caput. Constituerat optimus Senex cor, & intestina Belgenserij condi, reliquum verò corpus Aquas-Sextias in maiorum suorum sepulcrum transferri. Id itaque parentatione, magnâque pompa præstitum est, inuitatâ Curiâ actione (vt tum moris erat) panegyrica per Ioannem Petrum Oliuarium Senatorem optimum, & assensu factò per Varium oratione alia eximia, quæ inter funebreis habetur, inque editione posthuma est numero decima sexta. Ad

1608.

cuius calcem videre licet quanti Peireskium fecerit, 1608.
cùm tantoperè commendauit studium, quo Patruus
talem delegerat, parauerátque successorem. Nescio
an dici debeat, quod demirata tota vrbs est, fidissi-
mum defuncti canem affectatione perpetua circum-
stitisse feretrum, non potuisse per plureis dies amo-
ueri à tumulo, & postquàm domum reductus fuit,
coram icone diù constitisse. Peireskius, sedato non-
nihil dolore, sese, vt priùs, ad functionem Senato-
riam composuit; paríque modo non destitit bonas
horas succidere in gratiam liberalium & studiorum,
& studiosorum. Nam primùm quidem varias ad va-
rios amicos literas perscripsit; sed proluxiores tamen
nullas, quàm ad Lælium Paschalinum, circa Vrsini
lapsus, circa Francorum Regum icones, sigilla, nu-
mismata, titulos (conuictis specialiter iis, qui Karo-
lum Pipini filium vsurpasse Magni cognomentum
arbitrarentur) circa statuas thymelicas, circa suum
Aëtionem, quem cùm Velserus opinaretur pictorem
esse, cuius Lucianus in Herodoto meminit, persi-
stit ipse in sententia, propter tiam Phrygiam, seu in-
signe regium, quod ad Patrem Andromaches duce-
ret potius referendum; circa columnas Herculeas,
portum Ostiensem, & cætera curiositatis inèxhaustæ.
Ita egit cum Fontanæo de re nummaria; & cum
Strada specialiter de numismatibus antiquis: cum
Claudio Frereo libellorum supplicum Magistro, &
Gratianopolitani Senatus postea Principe, de histo-
ria Francica: cum San-Marthanis Fratribus de Ge-
nealogistica; cum Pignorio de Purpura; cum Nico-

1608. Iacobi Fabro, cumque aliis de rebus sexcentis. Deinde innumera fuere, quae obseruauit circa genera piscium reiectanea, quibus Martigij, alibi que condendis curam demandarat; quae circa conchyliis, circa plantas, circa lapides, circa caetera (quae rursus variè distribuit) maximèque cum per Aprilem diuersatus est Belgenferij, vna cum Vario; ubi de prolatis compluribus rebus, quas ille nondum viderat, est suauissimè collocutus. Etenim sermo habitus est de Lapide caeruleo, in agro Olbienfi reperto, è quo eiusdem cognominis color extrahitur, vti etiam ex marmore lapidem lazulum imitante; de lapide item Coralloide stellato, de Coralloide punctato; de Lepadite, seu Lepadi conchae vniuersalium non absimili; qui omnes fuerant eruti ex agro Castelletano. Rursus de Conchite striato, quem ex agro Antipolitano, ac Fossensi habuerat; de Gagate, & Succino flauo, eruto ad turrim Beuontiam. Huius occasione edisseruit Succinum rem fossilem esse. Quippe in Sicilia quoque effodi, & torrentium impetu detegi, deferri que ad mare vsque, & repellente maris aqua, in littoribus saepe inueniri. Probabile proinde esse, vt quod expiscantur ad Balthicum mare, vi aquarum erutum, translatumque eò fuerit (maximè verò cum eodem modo plerumque contineat conclusas muscas, caeteraque id genus animalcula.) Quare & fabulosum esse, quod aliqui narrant, arbores praegrandeis esse in Noruegia, ex quibus id Succinum, quasi gummi quoddam decidat, concreseat, atque induretur. Enimvero toto hoc anno nihil magis placuit, quam quod ob-

seruauit, ac philosophatus est circa pluuiam Sanguinea^{1608.}
neam; quam decidisse rumor perccebit sub Iulij
mensis initium; conspicuis nempe maximis guttis,
tam in ipsa vrbe, ad parietes cœmiterij maioris Ec-
clesiæ, quod est prope muros; quam ad muros ipsos;
ac rursus, ad parietes villarum, pagorum, oppido-
rumque, ad aliquot milliaria circumuicinarum. Nam
primum quidem accessit ipse ad inspectandum gut-
tas illas, quibus lapides rubescebant; nihilque non
egit, vt alloqui posset quos agricolas memorabant
vltra Lambiscum sic fuisse percussos ex decedente
pluuia, vt derelictis operis in vicinas ædeis citi aufu-
gissent. Deinde, cum fabulam esse, quod de viris
huiusmodi proditum fuerat, comperisset, non pla-
cuit illi quod Physici referrent huiusmodi pluuiam
ad vapores è rubra terra sublimè euectos, & post con-
cretionem deciduos; quippe vi caloris eductum va-
porem absque colore sursum ferri; vt vel constare
potest ex eo, qui eductus ex rosas rubeis in limpi-
dam aquam concreuit. Minus etiam placuit, quod
vulgus, ac nonnulli Theologi opinarentur facinus
esse Dæmonum, Strigumve, à quibus fuissent inter-
fecti innocentes infantuli; scilicet hoc esse meram
coniecturam, fortassisque etiam Dei bonitati, pro-
videntiæque iniuriam. Succurrit porro interea casus,
ex quo sibimet visus est germanam causam dete-
xisse. Quippe ante aliquot menses concluderat pyxi-
de inuentam quandam Chrysalin, magnitudine, for-
mæque insignem. Eius cum amplius non meminisset,
excitari bombum inaudiit intra pyxidem, eaque ad-

1608. aperta, deprehendit chrysalin, deposito spolio, factam ex eruca papilionem pulcherrimum, qui statim auolauerit, reliqueritque in fundo guttam rubeam, amplitudine Solidi vulgaris. Quoniam verò id contigit circiter idem mensis initium, ac per idem tempus obseruata est Papilionum confertim per aërem transuolantium incredibilis multitudo: idcirco opinatus est papiliones huiusmodi interquiescentis parietibus diffudisse illeic, quasi excrementum, guttas simileis, magnitudine videlicet pareis. Quare iteratò accessit, comprobauitque guttas illas non supra ædificia, non in deuexis lapidum superficiebus existare, vti debuerat contingere, si è cœlo sanguine pluisset; sed in subcauis potius, ac in foraminibus, vbi animalcula potuerant quasi nidulari. Accessit, quòd parietes iis tingeantur, non qui in mediis oppidis, sed qui agrorum vicini erant, neque secundum parietis elatiores, sed ad mediocrem solum altitudinem, quantam volitare papiliones solent. Hac ratione proinde est interpretatus, quod Gregorius Turo-nensis refert de pluua sanguinea Childeberti tempore conspecta Parisiis, in diuersis partibus; & in domo quadam territorij Syluaneënsis. Itémque quod memoratur temporibus Regis Roberti sanguine pluuisse, circiter finem Iunij; adeò vt sanguis qui cecidisset super carnem, vestem, lapidémque non posset aquâ elui, posset verò qui super lignum. Quippe idem fuit papilionum tempus, & recentes quoque has guttas elui non posse vllâ aquâ è lapidibus comprobatum est. Hac, & similia cum apud Varium magnâ

magnâ coronâ edisseruisset , placuit simul rem explorare, contigitque vt cùm variè per agros incederent, guttas quoque multas deprehenderint in lapidibus, rupibûsque: sed ad cauas tamen, subuexâlve, non verò cælo obuertas parteis. Accepit deinde ex Italia, & transmisit statim ad Thuanum elogia doctorum quorundam virorum , vt Hieronymi Columnæ, Gabrielis Faerni, Cruceij, & similium, quorum ille voluerat in sua Historia meminisse. Rogârat aliunde ipsum Scaliger , vt instauraret commercium, quod per P. Ostagerium hospitem olim Masiliæ suum instituerat in Oriente , coëmendis Samaritanis, Ægyptiacis, Arabicis libris; dolens quòd à quindecim annis, quibus degeret in Hollandia , nihil prorsus inaudiisset de Pentateucho Samaritano, cuius sibi procurandi Ostagerius fuerat pollicitus studium. Peireskius ergo, cùm priùs quidem aliquid ea in re tentasset, tum tamen incumbendo acriùs, eiusmodi librum inter plureis alios in Ægypto coëmi, afferrique ad se mandauit. Verùm nauis, qua vehebatur, à piratis direpta est, recuperarique is liber non potuit. Ita priuatus Scaliger fuit exoptatissimo Codice, vt etiam nunquam est assequutus expectatissimum responsum, quod Peireskio ab eius morte venit fœliciter in manus. Scripserat nempe Scaliger ad Samaritanos Ægypti, itémque ad magnum eorum Sacerdotem Eleazarum in ciuitate Sichemo morantem, quæsierátque ex ipsis varia circa obseruationem Sabbathi, aliorumque festorum; circa Messiam, eiusque apud ipsos nomen; & ad extre-

1608.

mum, exemplum Legis, Pentateuchive poposcera-
 Ac ipsi quidem geminis Epistolis responderant; sed
 quòd illæ in Genebrardi, aliorumque manus inci-
 dissent, detentæ sunt, donec, Scaligero mortuo, Pei-
 reskii & obtinuit, & per virum impensè doctum
 Ioannem Morinum è Congregatione Oratorij, la-
 tinas fieri nuper curauit. Curam quoque eo tempo-
 re euocandi Pacium resumpsit, & quod est ampliùs,
 efficiendi ne diutiùs in Religione heterodoxa perse-
 ueraret: at nimis multa interuenerunt, quæ sollici-
 tudinem variam, variòsque conatus fecere rursùm
 irritos. Aberat per ea tempora Valauesius frater Pa-
 risiis, ob Riantiensia negotia: & quia ipsi aliquot
 mensium intercedebant induciæ; ideò rogauit illum
 Peireskii, vt, vel sui causâ, inuiferet Angliam, Bel-
 giùmque, & amicos illeic suos saluaret, quæ dona-
 ria misit, offerret, rara quædam nancisceretur. Ora-
 uit etiam quam-maximè Aquis-granum contende-
 ret, vt quicquid illeic monumentorum Caroli Ma-
 gni superesset, attentissimè inspectaret, inscriptio-
 nes exscriberet, icones quasque in Ecclesiasticis seu
 libris, seu vitris, seu vestibus, seu lapidibus, seu qui-
 busuis aliis rebus impressas exprimi curaret; locorum,
 ornamentorumque ichnographiam non negligeret;
 diplomatum apographa, sigillorum ectypa, prece,
 pretiòve obtineret. Adiecit se sic pœnitere, quòd in
 Hollandia cum versaretur, Aquis-granum non di-
 uertisset, vt nisi Fratri confideret, paratus esset defi-
 nitè, neque alio nomine eò suscipere profectionem.
 Fecit porrò Frater abundè, & satis, mira sollicitudi-

ne, sedulitate, fide; cùm ipse interea post initum annum est digressus Monspelium, ob illa eadem negotia: scilicet Marchio Oresonius Bressiaco litem intenderat, ob diuenditum Riantij ius plenum. Redierat medio circiter vere, dolorem dentium infandum perpeffus, cùm non longè post incidente patre in periculosissimum morbum, contraxit ipse quoque febrim, quæ diuturna admodum fuit, cessansque sic languidum fecit, vt vix denique per autumnum penitus conualuerit. Quo loco referendum est, quod retulit ipse non semel. Cùm ciborum non appetens, fastidiosusque, tabesceret, rogasse Iacobum Fontanum clarum medicum, eiusque affinem, annon aliquid demùm esset, cuius esum appeteret. Annuente ipso aliquid esse, sed quod se non impetraturum, haberet compertissimum; instituisse illum, id modò, quodcumque foret, significaret. Cùm dixisset autem, Pepones: tum excepisse medicum, maeste, bonoque animo esto; neque enim permitto modò, sed adhortor etiam, ac præcipio, addoque, vt nonnihil meri præassumas, postassumasque, & absque pane, aliavere ad initium pastus, in stomachum mittas. Obsequutum igitur fuisse, adeoque benè inde habuisse, vt deinceps, ac donèc vixit innoxie semper eadem ratione pepones esitauerit. Conualescens variis officiis studiosos varios adiutavit, veluti Ioannem Taxilem Arelatensem Medicum, nescio quid de ea nova stella, quæ per memoratam magnam coniunctionem apparuerat, meditantem; Gasparem Bricium in eadem ciuitate parochum; virum bonum,

1609. industrium, & cælestium obseruatorem. Ioannem Baptistam Hansenium, quem nouerat Romæ in erudita familia Cardinalis Baronij, cuique procurârat, vt toto triennio foret Gymnasiarcha Aquensis. Atque istos quidem, aliósque demeritus est, valetudine adhuc dubia, remissioréque solùm morbo; cui contrahendo, producendóque non contulit parùm iactura trium amicorum insignium, qui in Hollandia elati sunt. Eorum primus fuit Scaliger, qui manum iam admouerat commentationi de Hebræis numismatibus, cùm laborare hydrope cœpit, ex intemperie iocinoris, quæ quarto demùm, aut quinto mense, ipsum, die Ianuarij vigesima prima, oppressit. Alter fuit Clusius, qui non tam podagra recenti, quàm debilitate naturæ, die quarta Aprilis interiit. Post-huma huius opera, siue Posteriores curas edidit curator testamento datus Franciscus Raphelengius, mentione sæpè facta Peireskij, cuiusmodi illud, *Alata est ex Guinea in Galliam Spica non dissimilis precedenti, nucula Indicæ fructibus constans, cuius iconem nobilissimus, & amplissimus vir Nicolaus Fabricius dominus de Peiresc, Aquis-Sextiis in Gallie Prouincia Senator ad Clusium miserat. Et postea, Sequens Tragacantha icon, quæ nobis transmissa est ex Gallie Prouincia, nempe Aquis-Sextiis, ab amplissimo, & nobilissimo viro Nicolao Fabricio, Domino de Peiresc, Consiliario Regio in supremo Senatu Aquensi, cum literis ad clarissimum Clusium. Tertius fuit Abrahamus Gorlaeus, à quo non potuit cœptum opus Paralipomenon absolui. Parùm porro abfuit quin hisce amicis Varius quartus*

accesserit. Is per iustitium Septembri mense concesserat Antipolim, vt possessionem eius loci regio acquisiti patrimonio, Regis nomine adipisceretur. Cùm inuississet verò Fratrem, Petrum nempe Varium Vintientem Episcopum, incidit in febrim periculossissimam, ac mense penè diuturniorem. Hanc Peireskius cùm accepisset, teneri vix potuit, quin, laborans licèt, laboranti accurreret. Cùm non posset tamen, mira sollicitudine, vel potiùs anxietate fuit, vt quocumque modo operam præstaret. Cætera inter, scripsit Massiliam, ac exstimulauit Carolum Cassaneum clarum Medicum, appararique illi curauit & rhedam, & lembum, vt seu terra mallet, seu mari, cò expedite aduolarèt. Missitauit penè in singulos dies, qui exquisita quædam seu remedia, seu edulia ferrent, & quis foret status morbi renunciarent. Cùmque primùm facta est spes melioris valetudinis, sellam misit gestatoriam, quam domi habebat commodissimam; tametsi ille non potuit, nisi vectorio lecto reduci. Dum vterque deinceps residua autumnu conualescerent, dielque totos in colloquiis familiaribus ducerent, putàs-ne illorum sermones nihil habuisse eruditionis? Vnum præterire non possum, qui fuit postmodum aliquoties à Peireskio commemoratus, cuiusque occasione, etiam post eius obitum, superfuit quidpiam peragendum. Ansam fecère Conuentus varij, qui toto Regno Principis iussu habitare recens fuerant, vt de condendis perpetuis circa Monetarum valorem, vsumque Statutis deliberaretur. Cùm enim ante septem annos statuisset publico edi-

1609. Cto, vt aureus Solatus antea oblocatus sexaginta solidis, valeret exinde sexaginta quinque; euenerat iam, vt pro septuaginta, & pluribus commutaretur. Itaque Vario sententiam poscente, respondit Peireskii vix esse sperandum, vt proserpens malum fisti vnquam posset. Causam enim esse commercium cum vicinis nationibus, apud quas aurum cariùs, quàm apud nos redimeretur. Nam tum quidem aurum nobis esse in proportionem ad argentum non omninò duodecupla; apud Hispanos verò, exempli causâ, in plusquam tredecupla esse, idque edicto recentissimo, quo Rex Hispaniæ auri valorem decima parte adauxerat, intacto valore argenti. Qua in re sanè non fuerat Principem nostrum imitatus, qui maiore solidorum numero aurum æstimans, maiore quoque æstimauit argentum, ne proportio illa euariata censeretur. Subiunxit, tametsi non modò Rex noster, sed etiam Rex Angliæ, cæterisque Principes nouis edictis eam proportionem euariarent, promouerentque; euenturum tamen, vt singulis æmulatione quadam vel aurum pluri facientibus, vel ipsius pondus, aut certè internum argenti valorem, imminuentibus, res definiri nunquam posset. Scilicet nunquam defuturas, vel bellorum occasiones, quibus, exhaustis ærariis, ad id remedium prouocaretur; vel nationes satis consultas, quæ puriores auri, argentique species penes se seruare, aliundèue allicere hoc artificio procurarent. Et exemplo quidem esse posse Romanos, apud quos As æreus, Denarius argenteus, & Solidus aureus ita paullatim

fuere imminuti, vt postremò facti extra vsum fuerint; & Solidus ipse nominatim, qui cùm potuisset initio duobus Solatis exæquari; commutari demùm debuerit in speciem argenteam, quæ ipsa quoque sic degenerauerit, vt existimari possit in Solidum nostrum vsualem abiisse. Verùm ne tam procùl quæreret exemplum, sufficere, si spectaretur vel vnus Solati valor, qui intra centum postremos annos ita increuisset, vt decrefcente simul interna bonitate solidi, duplo solidorum numero iam æstimaretur. Non esse verò probabile, vt deinceps confisteret, sed futurum haud dubiè, vt intra paucos annos triplo, quadruplòque incrementum acciperet, Solidusque interea non imminueretur modò pondere, sed euaderet etiam planè æreus, tunc pondere quoque suo decessurus. Nec verò vana fuit coniectura: quando iam Solatus à nuperis annis taxatus est solidis centum quatuor; idque Edicto publico, cuius occasione ipse, cùm foret adhuc superstes, adnotauit auri ad argentum proportionem proximè quindecuplam esse. Sed ad colloquium vt redeam, cùm retulisset obiter Assem initio pependisse libram integram, seu duodecim vncias; ac diminutum deinceps fuisse ad vsque duas, ad vnā, ad minus: Denarium, cùm tempore Regum pependisset trientem vnciæ; sub antiqua tamen Republica pependisse solum sextantem, sub recentiore partem septimam, sub primis Cæsaribus octauam; seu drachmam (Atticæ nempe drachmæ æqualem:) Solidum denique principio fuisse partem libræ trigessimam octauam,

1609. postea quadragesimam, quadragesimam quintam, quinquagesimam, & ita deinceps: tum requisivit Varius, quæ illæ Libræ, seu Vnciæ à nostratibus diffiderent? Excepit Peireskii, sibi ea in renondum penitus factum satis. Nam habere se quidem pondera antiqua librarum triginta, decem, trium, singulorum, quæ cum libra Parisiensi senum denum vnciarum zygotatica comparasset; sed comperisse tamen solum vncias Romanas duodecim, decem circiter vnciis Parisiensibus exæquari. Circiter, inquam; nam nunc excessum, nunc defectum excurrere ad treis, quatuor, & quinque drachmas. Tametsi verò doctus Budæus proportionem præscripsisset proximè sesqui-alteram, quod putaret libram Romanam semuncia superadditâ libræ Marcæ, seu octo vnciis Parisiensibus æquam esse; attamen se varios Denarios antiquiores, integriorésque, quàm Budæo fuissent ad manum, ad eandem libram exegisse, deprehendisseque libram Romanam cum semuncia decem Parisiensibus vnciis, ut minimùm, æquipollere. Non audere tamen adhuc rem decernere; quod illi quoque denarij passi fuissent intertrimentum, expectareque donec Româ impetrauisset modulum Congij, qui à Vespasiani vsque tempore in Capitolio consecratus, existeret, adseruareturque in Farnesiano Palatio, ac decem librarum vini, aut aquæ pondus continens, prodere posset quotnam libris, vnciisque Parisiensibus tale pondus exæquaretur. Probauit ille, rogauitque ecquam putaret Congij ad nostrates liquorum mensuras esse analogiam? Peireskii

verò

verò dixit id quoque determinandum ex modulo; 1609.
interea verò putare se continere Congium tres circiter Potus (sic enim in Prouincia vocantur, quæ Parisiis Pintæ, cum hæ illis minores sint) licereque etiam id explorare, si constiterit quæ proportio inter Romanum Pedem antiquum, & nostrum quem dicimus Pannum, seu mauis Palmum, intercedat. Romani nempe, vt Amphoram Congij octuplam definirunt magnitudine pedis cubici; ita Congij capacitatem dimidio pedis cubico definitam esse voluerunt. Heinc non vnum quidem duntaxat, sed duos quoque modulos Congij temporis progressu obtinuit: verum nunquam satis vacauit rem pro voto expendere, & postquam posteriorem obtinuit, citò nimis interiit, rem certo certius exploraturus. Cæterum quia nos, quantum licuit, illius curam supplementum, nescio an, si dixerimus, nimia sit futura digressio. Tenemur certè gratificari hominibus nostris, qui non modò pondera, mensuræque illas inter se, sed cum nostratibus etiam à Peireskio comparatum iri sperârunt. Vt paucis ergo res dicatur, cautiones adhibuimus easdem, quas Lucas Pætus, & Villalpandus; dum vas ipsum ad summum collum puteali aqua oppleuimus, expendimus, vasis pondus subduximus. Deprehendimus autem aquam, quæ Romano pondere esse debuit decem librarum, seu vnciarum centum viginti, esse pondere Parisiensi (quale nempe Parisiis exploratum, missumque est) librarum septem, minus vnciæ quadrante; seu vnciarum centum yndecim, & quadrantum vnciæ trium. Deinde

1609. ex hac proportionē collegimus vnciam Romanam continere grana quingenta, & triginta sex, qualium quingenta septuaginta sex in Parisiensi continentur; unde & illis in drachmas collectis, obuenire cuilibet drachmæ grana sexaginta septem: idque proinde censuimus pondus Denarij Cæsarei, quem dictum est fuisse drachmalem. Adhæc difficile non fuit valorem huiusce Denarij, & cæterorum consequenter, ac monetæ cuiuslibet, monetâ nostrâ exprimere, & à recentiore præsertim Edicto, anni nempe M. DC. XXXVI. Cum ex præscripto enim argenti valore, atque pondere colligamus argenti vnciam æstimari solidis Turonicis sexaginta quatuor: idcirco Denarius Romanus valebit septem solidis, ac denariis turonicis quinque, cum triente eiusdem turonici denarij (sicque parum prorsus excedet valorem Regalis Hispanici) & tale fuisse intelligetur non modo apud Romanos, sed etiam apud Græcos, ob parem Denarij, Drachmæque valorem, militum stipendium in singulos dies. Quinarius proinde, siue Victoriatus valebit tribus solidis, cum denariis turonicis octo, ac denarij besse; Sester-tius vno solido, cum denariis decem, ac triente denarij. Et quia, verbi causâ, Siclus Hebræorum fuit, ex Iosepho, Tetradrachmalis, seu denariorum Romanorum quatuor; idcirco valuit solidis similibus viginti nouem, cum denariis turonicis nouem; ac triente. Unde & quia triginta vocati Denarij, quibus Christus Seruator à proditore Iuda diuenditus legitur, triginta Sicli fuisse videntur; ideò Pre-

tium colligitur librarum turoicarum quadragin- 1609.
ta quatuor, ac solidorum tredecim, cum denariis
quatuor. Quod spectat ad comparationem cum
Prouinciali pondere, obseruauimus illam eandem
aquam, siue Romanas libras decem pendere libras
Prouincialeis nouem, cum vnciæ triente; seu vncias
centum quadraginta quatuor, & trientem vnciæ.
Obseruauimus aliunde libram Parisiensem cum pro-
typica Nostrate collatam continere ipsam semel,
cum quatuor vnciis, & vnciæ besse. Sed notandum
Zygostatam Stateras ita temperare, vt versus nume-
rum centenarium, singularum librarum pondus sin-
gulis vnciis adaugeat, propter detrimentum earum
mercium, quæ cumulatim emptæ, minutatim ven-
duntur: adeo vt quæ centum libræ Parisienses æqui-
ponderarent nostratibus centum viginti nouem, cum
triente, exæquentur solum centum viginti duabus,
quatuordecimque vnciis, cum besse. Cum liceat ve-
ro mensuram Romanam tam cum Parisiensi, quàm
cum Prouinciali ex ponderibus comparare; addo
duntaxat nos comperisse quatuordecim Pintas Pa-
risienseis adæquari Potibus nostratibus vndecim; &
liquidorum Modium, qui Parisiis continet Pintas
ducentas octoginta, continere nostros Mellereol-
as quatuor, cum potibus viginti octo: continente
Mellereola Potus duodequingaginta, quorum qui-
libet pendit Prouincialeis libras treis, cum quadran-
te. Ex quibus elicies Congium continere Potus no-
strates duos, cum sextis ferè quinque; seu Parisien-
seis Pintas treis, cum semisse proximè: intelligesque,

1609. exempli gratiâ, quantum biberit, qui treis vini Congios vno haustu sicasse coram Tiberio legitur; unde & Tricongij cognomentum tulit. Habebis rursum quantum mensurarum nostrarum contineat Vrina Congij quadrupla, Amphora octupla: quantum Sextarius sexta pars Congij, & Semi-sextarius pars duodecima, aliàs Hemina, seu Cotyle dicta. Vbi notabis, si lubeat, videri Parisienseis appellare quartam Pintæ partem Semi-sextarium, quod illa ad Semi-sextarium Romanum proximè accedat. Dixi porro obiter liquidorum Modium: nam alioquin Modius aridorum constans ex centum quadraginta quatuor Buxeis, ex quibus quatuordecim deprehensi sunt id statuere Onus, quod nos ex quinque Heminis, Pannalibúsve decem constituimus; talis inquam Modius æquiualeat nostris Oneribus decem, pannalibúsque proximè tribus. Atque hæc sunt quidem, quæ homines nostros scire præsertim attineat; nisi adhuc adiiciam diuissse nos Pedem Parisiensem ex prototypo desumptum in mille particulas, obseruasséque Palmum nostratem, qui octaua Cannæ pars est, continere solum ex iis partibus septingentas sexaginta treis: Pedem verò Romanum antiquum nongentas & sex; ne memorem Anglicanum continere nongentas triginta treis; Hollandum nongentas sexaginta sex; Lugdunensem, & Gratianopolitanum mille, & quinquaginta duas; Bracchium Florentinum mille octingentas, & duas; verum de his nimis iam multa. Ad Peireskium redeo, qui statim insequente anno millesimo sexcentesimo deci-

mo est rursus profectus Monspelium. Cùm rebus autem prosperè gestis, incunte iam Maio rediret, in somnium illi contigit, quod aliquoties mihi enarrans solitus fuit præmittere se, si ab alio fuisset enarratum, non crediturum. Erat in eius comitatu Iacobus Raynerius Aquisensis ciuis, qui in eodem cubiculo indormire solitus, indormiit speciatim intra id hospitium, quod vocitant Album, Monspelium, ac Nemausum inter. Somniauit autem Peireskios, ac nescio quid insolitum obmurmurare visus est: quare excitatus Raynerius, ipsum, ecquidnam noui esset rogitando, expergefecit. Tum ille, prohi, inquit, quàm gratum, bellumque excussisti somnium! Quærente Raynerio, quid-nam rei foret, somniabam, inquit, me esse Nemausi, oblatumque mihi fuisse ab Aurifice numisma aureum Iulij Cæsaris, pretio scutatorum quatuor; iamque eram illi, ad ipsum habendum, numeraturus pecuniam, cùm excitante te importunè, & ex oculis Aurifex, & ex manibus Numisma euauit. Exinde, somnium nihil moratus, discessit Nemausum, & cùm prandium appareretur, per ciuitatem digressus est. Casu autem planè stupendo in Aurificem ecce incidit, ex quo dum requireret, si quidpiam fortè rarum haberet, habere se ille respondit Iulium Cæsarem aureum. Rogauit quanti cum venderet; responsum, pretio scutatorum quatuor. Itaque id pretium statim numerauit, acceptoque Iulio, suum somnium foelicitate mira compleuit. Mira, inquam; nam facilè quidem cogitare Nemausum potuit, quò sequente luce erat.

accessurus : potuit illud Iulij numisma , quod vigilans sæpiùs exoptauerat : potuit id repertum in ea ciuitate , in qua tot Romanæ antiquitatis vestigia : potuit apud Aurificem , ad quod genus hominum vulgò referunt qui talia effodiunt : potuit valorem medioerem , quo aurifices potiùs , quàm Antiquarij ista pendunt ; potuit scutatorum quatuor , quo moderato pretio aurifex posset esse contentus : denique potuit Aurifex , & Nemausi quidem , ac eo pretio habere nummum : verùm hæc omnia concurrisse , & euentum somnio ita respondisse admirabile prorsus est. Non is autem erat Peireskii , qui propterea somnij causam præternaturalem putaret , vt fortè fecisset , si sæpiùs contigissent similia : sed cum nosset fortunæ lusus , habebat duntaxat hunc casum inter eos , qui sua raritate stuporem apud vulgus creant , cuiusmodi etiam memorantur de Eudemo Aristorelis familiari ad Pheras ; de duobus Arcadibus ad Megaram , & de nonnullis similibus ; quam historiarum huiusmodi omnium penes auctores fides esto. Commoratus est deinde Peireskii aliquot diebus Arelate , vt præter aliàs obseruitata , exploraret curiosiùs monumenta quædam insignia ad monasterium Montis-maioris. Cum inde autem discessisset , & iam Salonem accederet , attingit eum Cursor ab Archiepiscopo , qui renunciaret mox inauditam Henrici Regis luctuosam mortem. Consternatus mirè , festinauit tamen , vt consolaretur Varium : dolorem quippè præsentens , quo nouerat percussus iri. Et sanè illius accessus leuamen ad-

hibuit non mediocre magno Viro, qui iam factum. 1610.
rescuerat, hominibúsq; & literis missis dare ope-
ram cœperat, vt vniuersa Prouincia in officio conti-
neretur. Memorabile porrò est ab anni vsque ini-
tio, & priusquàm Peireskius Monspelium discede-
ret, allatum ipsi fuisse ex Hispania Prognosticon
annuum, siue Almanach ab Hieronymo Ollerio
Beneficiato Barcinonensi compositum, & Nouem-
bri superiore Valentiae impressum, in quo non ob-
scure prædictus lamentabilis casus foret. Sic ille
nempe designârat & natiuitatis circumstantias, &
euenta quædam præcipua; vt denotari alius Rex,
quàm Magnus Henricus non posset. Illud Vario
cùm ostendisset, communicassétque præterea cum
Iosepho Galterio Priore, & Domino Valletæ, viro
totius quidem Matheseos, sed Astronomica præfer-
tim peritissimo, digna omnino visa est res, quæ, li-
cèt Astrologicis prædictionibus non esset fidendum,
non negligeretur tamen, tanquam sacrum attinens
Caput, pro cuius incolumitate nulla cautio posset
censeri superflua. Itaque Varius ex eo tempore ipsum-
met exemplum transmisit ad Regem. Ac prætereo
quidem vt magnus, veréque generosus Princeps
laudato Varij affectu contemplerit prognosticon:
sed quia euentus comprobauit, ipseque Ollerius
aliud postea edens in sequentem annum, est pro-
pterea mirè gloriatus; idcirco taceri non potest,
quod saltem dubium faciat ex ipsis Astris, an
potius aliunde rem euenturam coniecerit. Nam de
Astrologica quidem vanitate non est quòd hic loci.

1610. quidquam memorem, & maximè cum euulgata ante treis annos Themata, nisi post annos præterea quatuor, nihil ominarentur infaustum. Non is etiam sum, qui subdubitem habuisse Vatem cum prauo Genio, qui id præfagierit, reuelaueritque commercium: dico solum potuisse ipsum aliqua ratione esse conscium machinationis illius, qua infandum adeò parricidium commissum est. Ea certè neque in Hispania, neque in Italia celari planè potuerat; nam etiam Regij Oratores, ac nominatim Venetiis agens ille virorum optimus Ioannes Bochartus Campinius, Regem iam illius præmonuerant. Comprobatur aliunde est Massiliensis nautas, quotquot ex Hispania ante duos menses aduentarant, retulisse rumorem fuisse in Hispania disseminatum, quòd Rex Francorum nunc occisus, nunc occidendus gladio foret. Narravit etiam Peireskius, scripsitque ad Malherbium, quod in hunc locum inferi possit. Memorabat nempe die Sabbathi, ac triduo post mortem Regis renunciatam, transiisse Aquis-Sextiis illusterrimum Venetum ex Priulorum familia, qui fuerat Orator Parisiis, ac tum pergebat Orator Madritum. Cum inuississet autem Varium, sibi aliunde cognitum, enarrasse ipsi inter cætera, se Mediolano iter facientem salutasse illic Comitem Fontanum; & cum Regiarum copiarum vim inter colloquendum exaggerauisset, tum excepisse Comitem, nihil sibi ex iis metuendum, quòd vnus hominis mors esset breui eas euersura. Sed temperandum ab istis est. Accepit subinde Peireskius scriptas à Pignorio tertiacius

cuius mensis die literas , quibus admonitus est dete- 1610.
xisse Galileum inuento recens Telescopio magnâ
quædam , admirandâque circa stellas spectacula , ac
potissimum quatuor nouos Ioui circumductos Pla-
netas , quos Mediceos nuncupauisset. Scilicet ab
ineunte vsque superiore anno sexcentesimo nono Ia-
cobus Metius Alcmariensis , dum varia vitra compo-
neret , vt effecta experiretur , inciderat casu in eam
conuexi , concauique comparisonem , ex qua , in-
teriecto potissimum tubo , viderentur intuenti res
paruæ grandescere , & sepositæ admoueri , (vnde &
illi prima defertur Telescopij inuentio ; tametsi Ioan-
nes Baptista à Porta tale quidpiam iam euulgârat)
Galileus verò ex solo rumore inuentionis ad se per-
ducto , cœperat ipse excogitare tum causam effe-
ctuum Telescopij , tum conficiendi artificium ; adeo
vt post molimina , ac tentamenta varia , peruenisset
tandem ad vnius exactissimi constructionem. Ipsum
fuit , quo per primos duos anni decimi memorati
menseis obseruationes illas peregit , quas titulo Si-
derei Nuntij mense Martio typis vulgauit. Peires-
kius ergo re cognita , magno cum ardore satagit , vt
& librum , & Telescopium quam-primùm posset ,
nancisceretur. Enimuerò cùm librum habuisset , ex-
quisitum tamen Telescopium sortitus illicò non est ,
quantumuis nonnulla impetrauerit tam ex Italia ,
quàm ex Hollandia , ac etiam Parisiis , ex quo pri-
mùm tempore elaborari illeic cœperunt. Hinc est ,
cur Iouis Satellites ante Nouembrim detegere , ob-
seruarique nequiuert ; certè vt integram Choream

1610. censeretur deprehendisse. Ex quo verò deprehendit, mirum quantâ lætitiâ id spectaculum fuerit contemplatus. Nam statim quidem rem demonstravit Vario, aliisque amicis; sed & ne tempus frustra abiret, apparauit obseruatorium, inuitauitque, ac sæpius per compluribus dies detinuit memoratum Galterium, cumque eo in obseruando biennium penè totum consumpsit. Erat adhuc frater Parisiis: quare illum sollicitare, varièque vrgeri nunquam destitit, donec vitra Telescopica confici curauit, misitque ad usque quadraginta. Videlicet spes erat fore, vt consequeretur tandem optima, & cuiusmodi fuerant à Galileo usurpata. Interea tamen aliquot reuolutiones speculatus, cepit cum Galterio consilium de Motuum hypothesis, tabulisque concinnandis. Quamobrem Galterius eam Spartam aggressus, sic breui perfecit, vt exquisitè, quantum licuit, determinârit tempora, quibus singuli Medicei circumuolutiones proximè absoluunt, Extimus nempe diebus sexdecim, cum sexdecim horis: Sequens septem diebus, cum horis tribus, & semisse horæ: Tertius diebus tribus, cum tredecim horis, ac semisse itidem: Intimus die vnica, cum horis octodecim, ac simul semisse. Minutias non recensco; quandoquidem licet ad usque secundas, vt Astronomi loquuntur, superputatæ fuerint; nihilominus dies docuit addendum quidpiam, demendumque: vt etiamnum quoque restat aliquid, quod obseruatio, ac diligentia temporum sequentium valeat emendare. Hæc solum attingo, vt innuam, quàm vehementer Peireskii in id

incubuerit, vt res adhuc nascens in suo exortu perficeretur. Quippe delegit præterea virum industrium Ioannem Lombardum, qui obseruando operam conferret; ac eruditos adolescentes Petrum Robertum Medicinæ, & Ioannem Baptistam Morinum Philosophiæ candidatos, qui se Galterio addicerent, vt quia nimis molestum erat numeros omneis retinere, calculis præscriptis, ipsum subleuarent. Obtinuit etiam obseruationes, quas præter Galileum, Ioannes Kepplerus clarissimus ille Cæsaris Mathematicus, aliique iam peregerant; vt ex illarum collatione perfici hypotheses possent. Curauit quoque elaborari Theoricen mechanicam, Peurbachianæ vulgaris instar; vt suppositis radicibus motuum, Mediceorum loca possent colligi in annos, menseis, dies, & horas. Nomina præterea imposuit, quibus discerni singuli possent. Nam cum Galileus vniuersè Mediceos indigitasset, noluit ipse nuncupationem vlla ratione immutare; sed principes tamen delegit ex Medicea familia, quorum nomina inderentur. Quia debebat verò præsertim seruato familiæ honore Reginas duas inclytas, quas illa nostræ Galliæ dedisset, sideribus adscribere; ideò extimo planetarum Catharinæ nomen fecit proprium; alteri, qui præcæteris eximiè resplendet, Mariæ; tum sequenti Cosmi maioris, & intimo Cosmi minoris. Cogitauit deinde tam Obseruationes euulgare, quàm Tabulas; sed quia accepit Galileum curis continentibus in id negotium incumbere; ideò ne videretur palmam illi debitam prærepturus, sese ab incepto con-

tinuit. Denique venit illi in mentem adiutare Geographos in tradenda methodo Longitudinis inueniendæ. Quippe quia horum Planetarum sunt motus citatissimi, configurationesque per singulas nocteis variæ; ideò cogitauit, si illæ, quibus contingunt momentis, in diuersis locis ad ortum, occasumque obseruarentur, posse, pro temporum variationibus, exquisitè designari intercapedines locorum: posseque adeò Tabulas, chartasque Geographicas sic emendari, ac perfici, vt exinde vsus rei Nauticæ consummationem nancisceretur. Heinc ea de re Amsterodamum ad Iodocum Hondium dedit literas, quibus etiam rogauit illum, vt indicaret nomen, & patriam Inuentoris primi Telescopij; scilicet ignorabat adhuc cum fuisse, quem iam diximus. Scripsit & Parisios copiosè ad Fratrem, postulans ab eo varia Telescopia, quæ obseruationibus faciendis in variis locis destinasset, ac potissimum in oriente, & in nouo Orbe, quò nonnulli amicorum erant breui discessuri. Et postmodum quidem obtinuit obseruationes aliquas, ac potissimum à mox antè nominato Ioanne Lombardo, qui profectus Alepum vsque, versus orientem, fuerat; sed neque illæ fecerunt satis; neque peruidit, omnibus etiam horum Planetarum configurationibus in Ephemeridas relatis, fore proptereà inuentionem adeò generalem, ac animo conceperat. Agnouit enim non posse Nautas ad illos attendere, neque interdiu, neque cælo nubiloso, neque Ioue Soli coniuncto, aut noctu sub terras delato; neque toto sexennio ad alterum

polum, cùm Iupiter esset versus alterum; & id genus similia. Quamobrem eam curam deposuit; rãtus aliunde Galileum, Kepplerúmve in eam curam incubituros, & pro sua solertia rem perfectiùs exsequuturos. Certè non parùm gauisus est, cùm non ita pridem accepit venisse Galileo in mentem, vt methodum perficeret, & cum Hollandis communicaret, à quibus arcanum Longitudinum est tantoperè expetitur. Porro cùm Peireskius foret circa ista summopere sollicitus; non destitit tamen interea pluribus curis distineri. Annus sæculi vndecimus erat, quo nescio an dicere debeam apparuisse primum in Prouincia, ac in eo hortulo, quem Peireskius intra ædis Aquis-Sextiensis habuit, flores calyceos Tulipas dictos. In eo scilicet ab autumno superiore defoderat missas Tornaco à Winghamio bulbosas illorum radices. Referebat autem, cum eo tempore nonnihil terræ in hortulo excolendo aggestum fuisset, Caniculam quandam nomine Marphisam conquisiisse catulos, quos abiici præceperat, sepeliissèque sub aggere, & aliquot diebus ita incubuisse, vt neminem accedere, etiam prætextu edulij subministrandi, pateretur. Non memini porro an hæc, an dicta ipsi Sultana fuerit, cuius obitum cùm ægrè tulisset, lætatus tamen fuit ob factum circa illam experimentum. Ea educabat treis catellos, qui vnà cum matre eodem morbo laborauerunt. Vno demortuo, proiectoque, ipsa quoque mater interiit. Neminè causam agnoscente, Anatomicum euocauit, incidique iussit, vt interanea dispiceret. Ec-

ce autem secundum totam intestinorum prolixita-
 tem series aliquot cohærentium candidarum mole-
 cularum, cuiusmodi cucurbitæ, aut cucumeris gra-
 na sunt; vnde videtur fuisse vnus ex iis latis lum-
 bricis, quos Cucurbitaleis nonnulli appellant. Erant
 verò infernè quidem maiusculæ, duriusculæque; su-
 pernè verò ita paullatim in minutulas, molliuscu-
 lāsque desinebant, vt in summo tandem nihil, nisi
 confusus albor appareret. Peireskius ergo, cùm non
 placeret quicquid curando illi morbo proferebatur
 tam à Chirurgis, quàm à quibusdam Medicis; iussit,
 nescio quo ductus genio, afferri sibi theriacam, è
 qua cùm materiæ illi adhibuisset, obseruauit magno
 suo, circumstantiūque stupore ipsam statim lique-
 scere, effluereque in decliue. Quapropter iussit ca-
 tellis duobus qui supererant, exhiberi theriacam, ale-
 xipharmacum esse ratus. Ac alter quidem animam
 iam agens inter exhibendum extinctus est; alter ve-
 rò adhuc robustior remedio assumpto omninò con-
 ualuit. Contigit illo eodem anno decantatissima hi-
 storia de Ludouico Gaufrido cacomagiæ infamato,
 deque Magdalena Paludana illius præstigiis corre-
 pta à Dæmone. Ea res verò vt totam Curiam, sic
 præsertim ipsum Peireskium admodum sollicitum
 habuit, qui vniuersam penè historiam literis proli-
 xis descripsit. Ac pro tempore quidem ipso in eadem
 cum vulgo opinione fuit, mouebantque præser-
 tim ipsum Stigmata illa insensilia corpori vtriusque
 inusta, & Cacomagiæ credita indicia: at dubitare
 postmodum cœpit, num in toto negotio impostura

quædam, aut stupor animi latuisset. Placitum tamen 1611.
semper defendit, quo Curia Magum cremari iussit:
quippe qui aliàs sacro-sancta Religionis mysteria
libidinosus pessumdedisset. Aiebat quoque tametsi
Magi non tantum habeant cum Dæmone, quan-
tum putatur, commercium; nihilominus pœna affi-
ciendos ob prauum affectum, quo desciscunt à Nu-
mine, & Cacodæmonem implorant. Sic, licet factis
vnctionibus non transferantur reuerâ in eas Syna-
gogas, in quibus nihil non patrent nefandum; pu-
niendam tamen voluntatem, qua id appetunt, sese-
que operi accingunt. Quod permouit autem ipsum,
impostura fuit, qua non multò post Massiliensis qui-
dam Sacerdos accusatus Magiæ fuit, prodente quo-
dam Dæmone, quem Gaufridus dicebatur in mulier-
culam intrusisse. Is quippe iudicio absolutus est, sed
corpore tamen toto interpunctus, vt designata à
Dæmone conquirerentur stigmata, quæ deprehendi
nulla potuerunt. Tantò verò magis Peireskii rem
vocauit in dubium, quantò post treis proximè an-
nos accepit à Winghamio similem historiam conti-
gisse in Flandria, hoc est interpunctum toto cor-
pore Canonicum quendam, qui fuit denique habi-
tus innoxius. Documentum sanè insigne, ne facile
adeò fides adhibeatur siue Dæmoni, quem Sacra
Scriptura appellat Patrem mendacij; siue muliercu-
læ, quæ partim natiua imbecillitate, partim vehe-
mentia vaporum cerebrum exturbantium, partim
malitia, aut odio, partim concepta, innutrita, defixa
altum opinione, imponere facile potest. Quod ad

- 16II. Stigmata illa spectat, hæsit Peireskii num reuerâ non essent notæ Cacomagiæ; idque præsertim ex quo agnouit rem vocatam in controuersiam à Martino Delrio, aliisque viris impensè doctis. Fortè enim esse posse à natura, pertinereque ad singularem Elephantiascos speciem; aut saltem posse ipsos Magos eas sibi, quasi cauteria inurere, ac perturbatæ menti defigere, inuersionem illam perinde referendam ad Dæmonem, ac referre solent vnguenta, quæ ipsimet parant, & inter se communicant, confisi se ipsorum vi ad maligna illa concilia transferri. Habuit Peireskii toto eo anno valetudinem vacillantem. Fuit autem dubia potissimum circiter ætatis initium; tametsi propterea nihil fuit graue passus, neque interquieuit à solitis studiis. Quinetiam visus sibi est pro votis satis confirmatus, vt adesset Varii grauissima febre totos quadraginta dies in villa Massiliensis agri, Florida ab ipso indigitata, laboranti. Non refero quanta se illi assiduitate deuouerit: hoc vnum non est prætereundum. Conualescibat ægrè Varius, quod teneretur anorexiâ, miroque ciborum fastidio. Cùm venaretur autem Peireskii occasionem addiscendi ecquid posset gustum mouere, & datâ plerumque operâ sermones interfereret de rebus gustatu iucundis; contigit aliquando Varium obiter innuere Truttas lacus Geneuensis non iniucundi esse saporis. Ille ergo id subnotans, tantâ obtinuit diligentiam insignem ex eo Lacu Truttam, opere pistorio conditam; vt, nomine licet alieno oblatam, Varius tamen diuinaverit Peireskij facinus esse.

esse. Sic excitare gustatum voluit, cū factum illi obtulit ex linguis Phœnicopterorum; tametsi id per hiemem, quoniam ea sola tempestate aues illæ maritimæ ad Arelatenseis paludes capiuntur. Parū aberat, quin ex linguæ exæquarentur hædinis: & quia tamen esca videbatur suauior, nihil pronunciauit Varius, neque diuinauit, quousque Peireskius illud Martialis extulit,

Dat mihi penna rubens nomen, sed lingua gulosis
Nostra sapit.

Rogatus subinde fuit de sapore carnis Phœnicopteri: excepit autem mirari se, cur illam Apicius apud Plinium, & Imperatores Caligula, ac Vitellius apud Suetonium, Heliogabalus apud Lampridium, & nonnulli alij tantis in deliciis habuissent. Esse enim eam iniucundam, aut saporis certè non exquisiti, aquaticarum aliarum instar, cū etiam piscem oleat; vnde à Prouincialibus vt plurimū abiicitur, exuiæque solū sunt vsui, in fastuosis conuiujs, carnibus aliarum auium obtegendis.



DE VITA
PEIRESKII
LIBER TERTIVS.

IN SEQUENTE anno Parisios iteratò profectus est. Aduocârat enim illum Valauesius, quo tempore existimabat illa de Riantio negotia extremo iudicio definitum iri. Et contingit quidem, vt cùm moras aliquo-usque traheret, iudicium interuenerit, literisque in itinere acceptis id rescierit; verùm quia non tam negotiorum causâ, quàm amicorum conuiscendorum desiderio discesserat; idcirco noluit regredi; sed ardentius viæ insistens accessit Parisios, quo tempore frater erat excessurus. Is verò bono suo fato in vrbe adhuc constitit: incidit enim statim in morbum, quo fuit per integrum mensem eâ exagitatus vehementiâ, vt nisi caput carissimum aduenisset, adstitissetque, vix ab illo emergere, conualesceréque potuisset. Cùm à mense autem Iunio restitutus fuisset valetudini pristinæ, discedere tamen absque Fratre noluit, qui in

mensẽm vsque Nouembrim dilatũm voluit reditũm. 1612.
Prætextus fuit illud nuperum iudiciũ , quod litigiorum Riantensium non fuit penitus decretorium: nam ad cognoscendum quo iure vteretur Prouincia , audiendis Ordinũm comitiis locum interpositum fecit. Vnde quia comitia non poterant cogi absque Prorege Guisio , ipsẽque Prorex ante id tempus non erat aulã excessurus , ideò Peireskius hanc sibi metam , redeundĩque anslam præfixit. Heic nihil necesse memorare quanta cum lætitiã , virtutis-que æstimatione exceperint illum Thuanus, Campinius, Roissius, Faber, aliĩque amici, & insignes viri, quorum iam antè meminimus , quĩque illum facie, vel famã iam nõrant. Nihil recensere officia, quibus literatos plerosque deuinxit , non modò qui erant in vrbe , cuiusmodi fuẽre, præter superiũs memoratos, Ioannes Sauaro, Carolus Labbeus, & alij; sed etiam qui alibi gentium , vt in cæteris Galliã ciuitatibus, in Italia, Angliã, ac Belgio. Attexere præstat, cũ nullum intermiserit studium promouendi arteis ingenuas , spectabilem præsertim fuisse quam curam continentem gessit obseruandi cœlestia , deque iis corã edisserendi cum viris Mathematicis, bonarũque rerum studiosis. Factum est quippe, vt nemo meliũs Phænomena noua calleret, quòd nemo ardentius , & constantius in iis cognoscendis operam posuisset. Heinc habitum propè miraculo fuit, quòd distractus tot aliis curis , consequi potuisset notitiã adeò exquisitã huiusmodi rerum. Quippe non de ipsis Phænomenis solũ , sed de

1612. confectiōe etiam, vsūque Telescopij multa declarauit; eāque occasione plerumque ducere secum solitus est, qui tam fabricæ Organi, quàm rationis vtendi inspectores forent. Heic referendum, cū operam circa Mediceos Planetas nauaret, adnotasse eum aliquid, quod, quibus ista curæ sunt, non fuerit fortassis ingratum. Attendit videlicet Iouem transiisse Cordi leonis ad Boream, non multū ante vesperam diei Iunij trigesimæ, & Venerem corniculatam transiisse adhūc magis ad Boream, inter eam vesperam, & consequentem primæ Iulij; qua etiam nonnihil coniunctionem cum Ioue prætergressa fuit: cū & Luna tunc, omnibus borealior, ipsi eidem Cordi leonis instaret proximè coniuncta. Sic Eclipses duas obseruauit, alteram Lunæ, alteram Solis. Et de Lunari quidem, quæ contigit die Maij decimaquarta, retulit in schedas obstitisse nubeis, ne adnotaret aliud, quàm Eclipsin cœptam, & ad quadrantem propè diametri promotam, cū vrba horologia variè pulsarent horam nonam, ipsæque in autmato haberet nonam, ac semissem; promotam verò vltra trientem, & ad semidiametrum penè, dum ex vrbanis haberetur nona, cum semisse, ex proprio verò decima. At paullò exquisitiùs circa Solarem, quæ eiusdem mensis die trigesima accidit, scripsit se obseruasse Solem fuisse iam factum, qualis est Luna ad dichotomiam proximè accedens, cū iuxta vrba horologia foret hora nona (matutina nempe) ac triens. Deinceps quoque horâ decimâ cum triente, semisse, ac besse, vltimam increuisse Eclipsin; at

horâ vndecimâ iam imminui cœptam, & ad centum Solis reductam. Horâ vndecimâ cum beſſe, vix ſuperfuiſſe digitum: denique horâ duodecimâ, minùs ſexta parte, Eclipſin deſuiſſe. Quæ commemoro, vt intelligas diligentiam ſaltem in eo non potuiſſe deſiderari. Et expetiſſet quidem poſteà obſeruata fuiſſe omnia ſcrupuloſiùs: ſed ſatis tamen peractum duxit, vt ſumma cum lætitia obſeruationem compararet cum Romana quadam Lunaris Eclipſeos, quam Ioannes Remus Quietanus clarus Medicus, & Mathematicus retulit; & cum Hafnienſi duplici, ſeu vtriuſque Eclipſeos, quam celebris vir Chriſtianus Seuerinus Longomontanus, Tychoſis Brahei quondam adiutor, deſcripſit. Prodiit per hæc tempora liber Italicè ſcriptus, titulo Squitini, quo libertas Veneta ab iſſis Reipublicæ fundamentis fuit diſcuſſa. Is, quia viſus eſt continere eximiam quandam Imperij, Gotthorûmque Regum Hiſtoriæ notitiam, idcirco ſtatim creditus fuit (quæ etiamnum eſt multorum perſuaſio) Peireſkium habere auctorem. Enimvero teſtari licet nihil tale ipſi veniſſe in mentem. Quin potiùs ſic ſemper reueritus fuit Reipublicæ maieltatem, quòſque in illa amicos habuit, vt ad præſtandum oblequium potiùs, quàm ad contumeliàm fuerit comparatus. Ac non diſquiro quidem an auctor huiuſce libri fuerit Antonius Albizius, nobilis ille Florentinus, qui Chriſtianorum Principum Stemmata ediderat ante duos annos, vt nonnullis perſuaſum eſt; an, vt videtur verofiſimiliu, inſignis ille Marcus Veſſerus, cuius ſæ-

1612.

piùs meminimus, ob consummatam eruditionem, propensionemque singularem erga domum Austriacam. Addo duntaxat, immerito videri quosdam suspicatos tam Gualdum, quàm Pignorium, aut contulisse operas in eo opere conscribendo, aut communicasse cum Peireskio quos digereret commentarios. Il fuere enim magis ingenui, patriæque suæ magis amantes, quàm vt ea impietatis labe commaculari voluerint. Vt cumque sit, Peireskios certè nihil simile vnquam cogitauit. Parisiis porro discessurus, ac vale iam amicis dicens, recepit, inter cætera, se ad Mericum Vicum, hieme ingruente, transmissurum par Phœnicopterorum. Subierat quippe earum auium enutriendarum desiderium, non ob pulchritudinem modò alarum rubore flammantium, (vnde nostrates *Flammantem* vocant) obque proceritatem crurum, & colli, cuius causâ à Iuvenale Phœnicopterus Ingens dicitur; sed præsertim ob speciem victus, quo Peireskios quasdam apud Varium educatas commemorabat. Referebat enim illas noctu potiùs, quàm interdiù capere cibum (qui ferè illis parabatur ex pane aqua madefacto:) præsentire frigus aduentans, ac tum ad ignem accedere, pedibusque etiam interdum cremari; dolente pedum altero, illius vice vti rostro, ipsoque, & altero pede alternando incedere: dormire erectas in alterum pedem, reliquo in ventrem, plumasque subducto; parci esse somni, aliâque similia. In ipso discessu summopere doluit eripi sibi extremo morbo amantissimum sui Nicolaum Fabrum, qui non mul-

tōs ante dies commendârat apud Regem egregium 1612.
virum Thomam Billonum operosissima illa sua, ac
fœlicitatis miræ Anagrammata oblatum. In itine-
re diuexatus est magna vrinæ difficultate. Postquàm
rediit, nulla res æquè eum affecit, ac iniuria Variorum a Se-
natorum vno illata, tum ante Natalitia, tum initio al- 1613.
terius anni; cuius proinde toto decursu vix à latere
ipsius discessit, nisi quo octiduo graui morbo labo-
rauit sub finem Aprilis. Rediit interea Frater Pari-
sius, ipsèque per illum varia munera ad amicos de-
dit. Misit quoque multa in Italiam ad Paschalinum,
Benedictum, alios, quibuscum varia edisseruit, & ex
quibus aliqua pro amicis aliis vicissim expetiit. Hos
inter fuit Casaubonus, itémque Henricus Polanius
Monetalis Ex-præfectus, qui postulârat tum varios
libros operâ ipsius in Italia inuestigandos, tum pon-
dera antiqua varia, aut institutam certè ipsorum
cum Parisiensi comparisonem. Scribens aliunde
Parisiis, nihil æquè fategit, ac Hannibalem Fabro-
tum Iuris professione clarum, & meliōrum litera-
rum studio cum primis insignem, facere tam apud
Thuanum, quàm apud ceteros amicos, quibus il-
lius eruditio iam innotuerat, commendatum. Ad
eruditos alios quod spectat, Edens non multò pōst
Sirmondus in Sidonium Apollinarem Notas, consti-
tutionem retulit, quam Cusanus esse Constantini
Magni, Scaliger Constantini Tyranni opinati fue-
rant; Peireskius verò docuit, ex Codice Arelatensi,
fuisse potiùs Honorij, & Theodosij Augustorum,
scriptam scilicet ad Agricolam Præfectum Galliarum.

1613. de agendo singulis annis Arelate septem Prouinci-
 rum conuentu. Deinde Iacobus Fontanus nuncu-
 pans illi Commentarios in Aphorismos Hippocra-
 tis, hisce verbis inscriptos voluit, *Hunc vero, quem
 in hoc opusculo condendo insumpsi laborem, tuo fauore
 cectum in lucem prodire exopro, qui virtutum, & scien-
 tiarum omnium cumulo coruscans, fugabis omnia omnium
 oblectatorum conuitia, efficiēsque et hoc opus medi. inae
 studiosis utile, sit omnibus futurum iucundum; cum ita
 his non tantum placeas, sed etiam reliquis omnibus, qui
 literarum studiis incumbunt, ut nullam sibi ipsis propriam
 virtutem esse putent, nisi tibi testatam, & acceptam in-
 telligant.* Dicatum quoque, editumque eodem tem-
 pore fuit opus à memorato supra Taxillo, continens
 Iudicium de ea noua Stella, quæ colluxerat ante no-
 uem annos. Verum Peireskii neque consilium, ne-
 que iudicium probare potuit; quod ille aduersus
 meliores auctores, etiam à se communicatos, argu-
 mentaretur Stellam sublunarem, ac suprema aëris
 regione non superiorem. Nimirum ferre non po-
 terat, ut obseruationibus, demonstrationibusque
 refragantibus, quærerentur argutiæ, quibus opinio-
 nes in scholis inueteratæ stabilirentur; tanquam do-
 cere nihil dies posset, neque experimenta forent ra-
 tiociniis umbratilibus præferenda. Quocirca eodem
 tempore collaudauit Jacij candorem, qui rogatus
 sententiam ferre de Solaribus Maculis Telescopio
 iam obseruatis, ad deliberandum tempus petiit, con-
 turbatum se asserens, & ex obseruationibus nouis
 hypothesibus nouas constituendas sentiens. Sub idem
 tempus

tempus rumor percrebuit de Giganteis ossibus, quæ in Delphinatu reperta Rex imperavit ad se transmitti. Ferebant enim detectum fuisse in fabuloso quodam loco, non longè ab ipso confluente Rhodanum inter, & Isaram, sepulcrum lateritium, triginta longum pedibus, latum duodecim, altum octo, cum superposito lapide, in quo hæc inscriptio, THEV-TOBOCHVS REX. Addebant, sepulchro aperto, apparuisse intus Skeleton humanum, longum pedes viginti quinque, cum semisse; latum ad humeros, seu scapulas decem; profundum ad thoracem quinque. Cranium observatum fuisse quinque pedum secundum longitudinem; secundum verò ambitum, decem. Spectato prodigio per integrum diem, cætera quidem ossa abiisse in cineres; at superfuisse, quæ translata nemo non vidisset Parisiis, partem maxillæ inferioris, vertebrae duas, portiones costæ, humeri, femoris, alterum femur, tibiam, astragalum, calcaneum; præter non transmissa aliquot fragmenta, ac nominatim femoris, itémque duos dentes. Memorabant etiam reperta argentea numismata, numero circiter quinquaginta, cum effigie Marij, & in aversa parte literis MA, nominis ipsius initialibus; unde & confirmatum volebant sepultum illic Theutobochum Theutonum Regem à Mario devictum, virum tantæ proceritatis, ut Auctores meminerint fuisse trophæis eminentiorem, & quaternos, senosque equos transilire solitum, aliâque id genus. Porro ut Peireskiius rem vertit in dubium; ita expendit quidnam potuisset fabulæ locum facere, idque præ-

1613. fertim, ex quo libellum à Nicolao Habigoto Parisiensi Chirurgo ea de re conscriptum pellegit. Ac non hæsit quidem, quin ossa in ea regione detecta fuissent: concessit posse alicuius vetustioris Gigantis esse; at cuius esse perhibebantur, in animum nunquam induxit. Nam primùm quidem, neque Theutobochus, neque illius subditi latinam linguam vsurpârunt, vt excitato tumulto inscriberetur Latina vox; neque Romani, si pro sua illa hostili pietate monumentum condidissent, illud extruxissent ex lateribus (signinum certè opus non fuisset, quale ad sepulchra tunc vsui non erat) sed potiùs, nisi ex marmore, saltem ex alio lapide, in quo & suæ victoriæ, & pietatis aduersum hosteis insculptæ notæ relinquerentur: cùm aliunde locum delecturi fuissent, nisi sublimem, aut faxeum; saltem non ita arenosum, atque lubricum, cuiusmodi is fuerat; ne facilè obrui, aut subuerti posset. Mirabatur etiam neque asseruatum, ostensùmque fuisse inscriptum illum Lapidem, qui Parisios sanè fuerat transferendus; neque sepulcrum relictum fuisse vel intemeratum, vel cum insignibus vestigiis; vt Dominus illius loci propagandæ ossium Giganteorum famæ curiosus, videbatur cordi habere debuisse. Suspicionem adaugebat, quòd acceptæ Cranij dimensiones perhiberentur, cùm id nimirum solidum, nec cinereum existeret; & tam citò tamen, aliis ossibus superstitis, exsolutum fuisset. Videbantur enim fabulæ auctores subueriti fuisse, ne ex accurata eius inspectione comparationeque cum humano cranio posset veritas scèlicius

exquiri. Ad Numismata quod spectaret, dicebat illas literas designasse non MARIUM, cuius prænomen C. non fuisset omisſum, neque integrum nomen MARIIVS Romanorum more exprimi neglectum; ſed potiùs MAſiliam, tum Rempublicam, cuius, vt ciuitatis Græcæ, ea numiſmatum argenteorum forma erat propriâ, non ipſorum Romanorum. Quoniam verò à paucis annis, neque longè ab eo loco reperta complura huiuſmodi numiſmata fuerant, ipſæque nonnulla ab illuſtri Frerco, cuius eſt ſuperiùs facta mentio, habuerat; eam ob cauſſam ſubdubitaui, num callidè, vt tempora, ita loca forent confuſa. Quòd Theutobochus verò legatur fuiſſe Trophæis procerior, arguere id quidem, fuiſſe illum altitudinis decem, duodecimve pedum noſtrorum vulgariũ, cuiuſmodi erant trophæa, quæ in ouationibus, ac triumphis geſtabantur (idque computata geſtantium, brachiorũque elatorum altitudine) cuiuſque modi etiam Heroum exhibebatur ſtatura (ad humanam nempe communem ſeſqui altera) non verò pedum viginti quinque. Sed neque id, quod legitur de Equis quaternis, ſenſque, ita eſſe intelligendum, quaſi diſtentiſſis cruribus ipſos vnà complecteretur: ſed potiùs, quòd moris haberet ex vno tranſire in alium; hoc eſt, mutare ſæpius equum, tamquam breui ſpatio pondere laſſatum. Argumento eſſe, quòd Florus (à quo id ſcriptum) prodidit illum quaternos, ſenſque equos tranſilire ſolitum, vix vnum, cùm fugeret, aſcendiſſe; quaſi indicetur non vnà deductam equorum multitudinem, vt deduci

1613. moris erat. Denique plura edifferebat & de loco victoriæ, & de triumpho, cuius pars, seu spectaculum Theutobochus fuit, & de nonnullis aliis rebus, quibus euulgato rumori habita fides eleuaretur. Obtinuit etiam postremis annis aliquot fragmenta huiusmodi ossium: sed ex illorum inspectione confirmatus magis in sententia fuit, ratus tum demum grandia ossa, quæ effossis sæpe sepulcris miramur, esse Elephantina; quasi belluarum Domini illa cara habuerint, aut fortè etiam posteritati illudere voluerint ex ea sepeliendorum cura. Opinatus est etiam, commonstrari interdum ossa, quæ effossa fuerint ex arenis, aliisve locis, vbi casu quodam fuerint obruta; cum reperire vix liceat virum aliquem fide dignum, qui sepulcra fabrefacta oculis suis conspexerit, fidesque penes illos sit, qui diuendunt, monstrant, aut se inuenisse, eruisseque profitentur. Heinc optauit sapiùs virum aliquem tam falli, quàm fallere nescium, in Siciliam nauigare, explorareque quæ effossa non procùl Panormo Gigantum ossa perhibentur, ac specialiter Crania. Sperauit enim fieri posse, vt is vteretur ingenua illa voce Suetonij, esse Capreis immanium belluarum, ferarumque membra prægrandia, quæ dicuntur Gigantum ossa. Sed hæc iam nimis. Sequutus annus feralis fuit amicorum illustrium morte. Accepit enim ex literis Aprili mense à Gualdo scriptis, obiisse & Contarenum Procuratorem Venetiis, & Lælium Paschalinum Romæ, & Veronæ Nichezolan. Accepit etiam postmodum obiisse Augustæ optimum Velferum, die Iunij vige-
- 1614.

finis quarta ; quo etiam proximè tempore Casaubonus mortuus in Anglia. Quin ipse quoque literis ad Natalitium Benedictum mense Maio scriptis meminit Ducis Arschotani, tanquam antè demortui. Meminit aliàs, vt vita functi Heidelbergæ, Marquardi Freheri Iuriconsulti, & Historici, cuius amicitiam Velferus parârat. Nescio an alij fuerint ; sed numerare solebat annum ab alio ferali quintum, ereptorum nempe sibi capitum carissimorum iacturâ, numeroque infaustissimum. Addebat sibi solatio fuisse, quòd inire intereà amicitiam licuerit cum aliis viris oppidò magnis. Vnus fuit Ioannes Franciscus Vidius à Balneo, Patracensis Archiepiscopus, & per ea tempora Auenionensis Vicelegatus. Singularis enim deinceps necessitudo intercessit, seu donec ille Auenione degit ; seu cùm est versatus perillustis Nuncius tam apud Principes Belgarum, quàm apud Regem Christianissimum ; seu postquàm factus est Cardinalis raræ, & spectatæ virtutis. Alius fuit Franciscus Sauarius Breuius, qui diu fuerat Orator Regius ad portam Ottomanicam, quique tum Roma rediens, vere nouo fuit Aquis-Sextiis ; ac secum habuit Gabrielem Sionitam ex Maronitis Libani montis, linguarum Orientalium interpretatione iam clarum, quicum etiam Peireskius amicitiam contrahere, porroque excolere suauissimum habuit. Alius rursùm fuit Guillelmus Catellus, eximium Senatus Tolosani lumen, quicum multa communicauit, seu ad specialem Comitum Tolosanorum historiam, seu vniuersè ad Occitanicæ commentarios spectantia ; quod